

بقولك كله 2 نكاح الجنه



إسعاد يونس

دار نهضة مصر

بقولك ما كده 2

إسعاد يونس

فكرة: إياد صالح
تأليف: مؤمن المحمدي - إسلام صالحين
إشراف عام: داليا محمد إبراهيم

يونس، إسعاد
زي ما بقولك كده ج 2 / إسعاد يونس
الجيزة: دار نهضة مصر للنشر ، 2018
512 ص ، 14 سم
تدمك: 9789771456230
1 - برامج الإذاعة
2 - الإذاعة
أ - العنوان

جميع الحقوق محفوظة © لدار نهضة مصر للنشر
يحظر طبع أو نشر أو تصوير أو تخزين
أي جزء من هذا الكتاب بأية وسيلة إلكترونية أو ميكانيكية
أو بالتصوير أو خلاف ذلك إلا بإذن كتابي صريح من الناشر.



الترقيم الدولي: 9789771456230

رقم الإيداع: 1700/ 2018

الطبعة الثانية: إبريل 2018



أسسها أحمد محمد إبراهيم سنة 1939

21 شارع أحمد عرابي - المهندسين - الجيزة

تليفون: 33466434 - 02 33472864

فاكس: 02 33462576

خدمة العملاء: 16766

Website: www.nahdetmisr.com

E-mail: publishing@nahdetmisr.com

زكي
بقولك ما
كده 2

بدأ كبرنامج إذاعي تقدمه «إسعاد يونس» من إنتاج شركة «ليوميديا»، ويذاع على راديو 9090 يوميًا من بداية 2016.. تم اختيار أفضل الحلقات التي أُذيعت لتُنشرها دار نهضة مصر للنشر بنفس الاسم. صدر الجزء الأول منه ديسمبر ٢٠١٦، وهذا هو الجزء الثاني.

زكي
بقولك ما
كده 2

مقدمة

إذا كنت من الناس اللي شايفين الدنيا سواد، وحاشر نفسك في نفق اخترت إنه يكون مضلم، وواحد قرار إنه يفضل مضلم لدرجة إنك مستعد تنفخ فتطفي أي شمعة تنور أو ترمي بصيص ضوء، وارتحت نفسياً لإنك تتحول لكائن شكاء بكاء نواح لطام من باب إن كده أريح يا عم، ده حتى الأمل معناه إني لازم أقوم من عالكنبة أو كرسي السايبر أو القهوة واشتغل والواحد ما فيهوش حيل، إذا كنت واحد من دول فبلاش تقرا الكتاب ده!

«إياد صالح» شاب لابس نظارة، وراها عينين هي اللي بتصحح النظر، ويتوجه عدسات النظارة عشان تشوف الحقيقة، لا بتقولها سوديا ولا جملها، بتقولها شوفي منابع الخير فين، نقبي عن المناجم ومصادر الطاقة البشرية اللي بيها لوحدها نقدر نعدي وننصف نفسنا، لا نجلدها ولا نلبسها السلطانية، حط خطة وترتيب ورسوم خطاوي وبدأ البحث عن الشباب اللي حايبقوا نواة لكتيبة التنوير، وبعد البحث رسي على الشابين دول «مؤمن المحمدي» و«إسلام صالحين».

ومع بعض هما الثلاثة، قرروا إنهم يملوا محل المحرات اللي بيحترت الأرض ويقلبها عشان ترجع تطرح زرعة، أو قوس المنجد اللي بينفض القطن المكلع المعطن ويرجعه بيرق ويصحصححه من جديد. قرروا ينكثوا الواقع ويطلعوا حقايقه وينفضوا عنه التراب وينقوا الدودة ويوروننا احنا فين فعلاً، حاكم احنا ساعات بنبص لبلدنا من أضييق فتحة مناخير وأغشلق نظارة.

مؤمن المحمدي وإسلام صالحين، مع إياد صالح، ثلاثة من «عيالي» اللي بعتر بيهم وبشوف فيهم أمل لبره، واطمئن أكثر على بلدي لو بقى فيه منهم مليون، شبان أباهي بيهم في أي مكان. وللصدفة الجميلة بقى إن الشابين اللي استقر عليهم إياد من النوبة الجميلة أرض الخير في مصر.

يا رب كتر أعيادنا

بيجي عيد الأم

فتلاقي السوشيال ميديا عليه دعوات:

ما تحتفلوش بعيد الأم

ليه يا جماعة، كفى الله الشر؟

يقول لك: مراعاة للناس اللي فقدت الأم

بيجي يوم اليتيم

تلاقي دعوات:

ما تحتفلوش بيوم اليتيم

ليه يا بشر؟

أصل إنت كده بتفكره بإنه يتيم

(على أساس يعني هو ناسي)

بيجي عيد المش عارفة إيه

يقول لك ده مش بتاعنا

عيد الأبصر إيه

ده عيد عنصري

يوم المرأة العالمي

يقول لك: وليه مفيش يوم الرجل العالمي

آه والله زي ما بقولك كده.

كل عيد، احتفال، ذكرى، أي حاجة، لازم نطلع فيها الققط الفاطسة، وننكد على اللي مهتمين باليوم ده.

مع إن الحكاية أبسط من البساطة

اللي مش بيحتفل بيوم معين

اللي مش مهتم بيه

ما يحتفلش

يتجاهله

يتعامل معاه كأنه مش موجود

ويسيب الناس المهمة تهتم

أكيد لا أنا ولا حضرتك ولا حضرتك، بنصحى كل يوم الصبح، نفتح الكاليندر، ونقول: النهارده اليوم العالمي لإيه؟ ولا عيد إيه؟ علشان أحتفل.

كل واحد مننا عنده اهتمامات معينة، لأنها بتمس حاجة جواه، فيهتم باليوم ده، الموضوع بسيط مفيهوش حاجة يعني.

مهم جداً تخصيص أيام لمعاني معينة، جد كانت ولا هزل، حضرتك شايفها مهمة ولا تافهة، خيرية ولا كرنفالية، والعالم لما فكر في كده، فكر لإننا بنعيش في عصر الانشغال، الدنيا من حوالينا كل حاجة فيها بتلهي، مش بس الشغل.

فكر كده في يومك، تلاقيه ما بيلحقتش يبدأ، فينتهي، وتلاقي نفسك كل يوم مأجل حاجتين ثلاثة لبكرة، وييجي بكرة، يبدأ ويخلص، فتلاقي نفسك برضه مأجل حاجتين ثلاثة لبكرة.

في وسط المحيط اللي إحنا عايشين فيه ده، محتاجين نفكر بعض بمعاني تهمننا، مش شرط تهمننا كلنا، كفاية إنها تهتم طايقة أو شريحة من البشر.

العالم بيتطور، والناس بتكتر، وعلامات التطور مش بس التكنولوجيا والصناعة والصواريخ والفضاء والتلسكوب اللي بيكتشف كواكب جديدة والاختراعات والأسلحة النووية والكاميرات اللي بتصور تحت المية وفوق السحاب.

التطور الأساسي بيبقى في الدماغ، والاهتمام بالإنسان، الإنسان الفرد، إنت وإنتي وأنا وهو وهي وإحنا وهم وكلنا، والإحساس بإن فيه حاجات كثير ممكن نتشارك فيها، أو يتشارك فيها بعض الناس.

فيه أعياد لإن المعنى مهم: زي الأم والطفل واليتيم والعمال ومرضى التوحد وغيرها من الحاجات اللي بتبقى فرصة لجمع تبرعات، عمل أفلام دعائية للتوعية بالموضوع ده، عمل أبحاث لتطوير الشغل في المجال ده، تنظيم مؤتمرات لطرح أفكار جديدة وحلول للمشكلات اللي بتقابل الأفراد اللي ممكن يبقوا تحت العنوان العريض اللي بنحتفل بيه.

فيه أعياد بتبقى فرصة لالتقاط الأنفاس أو التعبير لبعض عن مشاعرنا زي الفلانتين ويوم الصداقة وكل معاني العلاقات الجميلة اللي بتجمعنا.

فيه أيام بيبقى غرضها الترفيه زي الهالويين، وعلى فكرة في معظم البلاد بتبقى فيه أيام زي الهالويين كده، أو كرنفالات، الناس بيخرجوا فيها للشارع ويروِّحوا عن أنفسهم من تعب الشغل، وإحنا في مصر هنا كان عندنا زمان وفاء النيل في النص الثاني من أغسطس.

محدث قال كل السنة تبقى أعياد لكل الناس، ولا إننا نبطل شغل، المطلوب بس نفتكر.

والي مش عايز يفتكر، هو حر، لكن لازمته إيه ينكد على اللي فاكرين؟

يارب

يارب كتر أعيادنا

ووقفنا للي فيه الخير

قولوا آمين

وشك حلو يا لطيف

«وشك حلو يا لطيف»

مين فاكر الهتاف ده؟

كان جمهور الكورة بيهتف الهتاف ده دايمًا، خصوصًا خصوصًا في ماتشات المنتخب، ولما بقى كسبانين. ومن كتر ما سمعناه، فكان حتى اللي مالوش فالكورة زي حالاتي حافظينه، ونقوله مع الجمهور، أصل الواحد مننا حتى لو مالوش فيها، يشجع بلده واللي بيمثل بلده في أي مجال.

اللي لفت نظري في الكابتن لطيف، إن كل الجمهور كان بيحبه، إن كانوا زملاوية أو حتى أهلاوية، مع إنه الله يرحمه كان زملاوي من ساسه لراسه، ومكنش أبدًا بيخبي ده، آه والله زي ما بقولك كده، فالحكاية دي كانت بالنسبة لي ظاهرة.

معروف إن الكورة شوية فيها تعصب، وجمهور الأهلي يحب نجوم الأهلي، وجمهور الزمالك يشجع نجوم الزمالك، قليلين أوي من نجوم الناديين الكبار اللي ما اختلفش على حبههم حد، وكانوا مشهود لهم من الجميع، زي الكابتن الخطيب كده في الأهلي، والكابتن محمد لطيف في الزمالك.

الحكاية دي خلتنني أفتش شوية وراه، أحاول أفهم هو وصل للمعادلة دي إزاي، أصل الاحترام مش بالساهل، والأصعب من إن الناس تحترمك إنها تحبك وتعشقتك وتعتبرك وش السعد عليها.

الراجل ده يا جماعة كان أسطورة بكل معاني الكلمة، يعني حضرتك متخيل إن فيه لاعب مصري احترف في بريطانيا العظمى، أصل الكورة وجذرها، في الثلاثينات، وكان واحد من لاعبي المنتخب المصري اللي لعبوا في كاس العالم 1934، وكان له سنة ورنه في العالم كله وقتها.

بعد ما رجع كابتن لطيف، نقل لنا خبرات الإنجليز، وساعد في إنه يشرح لنا إزاي نعمل بطولة دوري عام، ومع بداية الدوري سنة 48 لعب دور من أهم أدواره.

الإذاعة المصرية وقتها كانت بدأت تذيع الماتشات، بالصوت طبعًا، مكنش فيه تلفزيون، وكان الكابتن لطيف ليه أصدقاء مكفوفين يبروحوا معاه الاستاد، وهو يوصف لهم الماتشات، فالإذاعة اختارته علشان ينقل لمستمعي الراديو الوصف التفصيلي للمباريات.

من خلال صوت كابتن لطيف، عرف المصريين الكورة، وتابعوها، وقدر ينقل لهم نبض الملعب وكإنهم يشوفوه بالضبط، وكل ده بالحب والاحترام للكل، والإنصاف والعدالة بين الكل، وعمر تشجيعه للزمالك ما خلاه بيخس حق الأندية الثانية، خصوصًا الأهلي، فحبوه الكل.

من كتر حب الجماهير للكابتن لطيف، وثقتهم في عدالته ونزاهته كان بيحكم المباريات، ويحكم مباريات
كمان للنادي الأهلي، وعمرنا ما سمعنا عن حد اشتكى إنه جامل الفريق ده، ولا الفريق ده.

كان طبيعي جداً، وقت افتتاح التلفزيون، إنهم يثقوا في الكابتن لطيف، إنه يكون أول مذيع لمباريات
الكورة على الشاشة الصغيرة، وبدأت أفلام السينما تستضيفه في دور المعلق، أظن كلنا فاكرينه في فيلم «غريب
في بيتي» مثلاً.

الكابتن لطيف في تعليقه، مكنش مجرد معلق بيوصف المباراة، كان زي أخ وصديق للأسرة المصرية، وكان
مشجع للفرق المصرية زيه زي أي مشجع. ومرة حصلت حادثة مشهورة، لما كان بيعلق على ماتش مع فرقة
أجنبية فجبنا جون، وصوته راح من كتر التشجيع، صوته راح فعلاً، واستمرت المباراة كام دقيقة من غير
تعليق لحد ما رجع له صوته.

سنة 90، رحنا كاس العالم مرة تانية، بس القدر ما أمهلش كابتن لطيف يشوفنا راجعين من إيطاليا،
واتوفي قبلها بكام أسبوع.

الله يرحمك يا كابتن لطيف

كان فعلاً وشك حلو

والله زمان يا سلاحي

بعد السلام الوطني بتاع فيردي

ثم نشيد اسلمي يا مصر

قامت يوليو

فاتغير النشيد الوطني

خلينا نقول الأول إنه قبل 23 يوليو بيوم واحد

يعني يوم الثلاث 22 يوليو 1952،

نشرت الأخبار مقالة لكامل الشناوي. لما نتكلم عن مقالة في جرنان الأخبار بتاع علي ومصطفى أمين، فدي حاجة مش سهلة وقتها. الصحافة كانت سلطة رابعة بجدة، وأحياناً تالته أو تانية أو أولى.

وإذا كان مقال في الأخبار حاجة مهمة، فكون المقال ده لكامل الشناوي، فده موضوع تاني خالص. لأن الشناوي مكش مجرد صحفي ولا كاتب عمود ولا شاعر ولا عضو برلمان عادي، ده كان واحد حاطط صوابه كلها في كواليس البلد، ويعرف إيه اللي هيحصل، مش إيه اللي بيحصل.

المقال اللي كتبه كامل الشناوي في الأخبار، كان بيقول: خلاص، الموضوع كده خالص، والقماشه دابت، والموضوع محتاج يخلص الليلة، ويمسك هو الحكم والبلد، ويدخل بينا مرحلة جديدة.

تاني يوم مقال الشناوي، اتحرك الطباط، كان طبعي، والحال كده، إن كامل الشناوي يكتب نشيد، ويلحنه محمد عبد الوهاب، ويسموه «نشيد الحرية»: كنت في صمتك مرغم، واللي تحس كده بسم الله ما شاء الله إنه اتولد علشان يكون سلام وطني، بالفعل بقى النشيد الوطني لمصر، لحد ما جات فترة جديدة بتوجهات جديدة، بس نشيد الحرية فضل مألوف في ودان المصريين، كمقدمة لنشرات الأخبار، كلنا عشناها في وقت من الأوقات.

النشيد الرابع لمصر تبدأ حكايته لما حصل «العدوان الثلاثي الغاشم» على مصر، سنة 1956، كان فيه كهربا في كل حاجة. عبدالناصر أمم القناة، استنفر عام، ناصر بيخطب من الأزهر، مانشيتات الجرايد: سنقاتل. . سنقاتل. . سنقاتل. كمال الطويل راح عامل لحن ناري.

بعد ما عمله، اتصل بصاحبه صلاح جاهين، اللي هو أصلاً كتلة لهب، بتكلم عن اتنين شباب، 26 و27 سنة، ومنطلقين، ومكسرين الدنيا، وحاسين إن مصر أم الدنيا وهتبقى قد الدنيا.

اكتب يا صلاح، كتب:

والله زمان يا سلاحي

اشتقت لك في كفاحي

انطق وقول أنا صاحبي.

اتصلوا بالست، تغني دي يا ست؟ ما ترددتش، وراحت تغنيها في الإذاعة، وطبعاً الموضوع بقى أسطورة، الست تغني رغم خطر قصف الإذاعة، المهم، اتغنى النشيد، وكان عنوان المرحلة، والفترة عدت، ويدوب سنة وشوية دخلت مصر في تجربة وحدة مع سوريا، وفقدت اسمها لفترة طويلة نسبياً، بقى اسمها «الجمهورية العربية المتحدة». وطبعاً طبعاً، التوب الجديد لازم له تجديدات كثير، أهمها تغيير السلام الوطني، وعمل سلام جديد للدولة الجديدة.

لما حبوا يختاروا النشيد، حصلت حاجات كثير، لكن المهم إن الرئيس عبدالناصر، هو اللي حسم الموضوع، وقال لهم: إيه ده؟ معقولة؟ أم كلثوم تغني نشيد وما يقاش هو السلام الوطني، خدوا «والله زمان يا سلاحي»!

الي عمل التوزيع الموسيقي للنشيد هو الفنان الكبير أندريا رايدر، الي محتاج يتقال عنه كثير، وفضل النشيد ده سلامنا الوطني حوالي 19 سنة. حصل بس فيه تعديل بعد أكتوبر سنة 1974، وبعدين رجعوا للصيغة الأصلية سنة 1975.

وبعدين حصلت أكتوبر

وبقى لازم يبقى عندنا نشيد جديد

الي هو نشيدنا لحد دلوقتي

بلادي بلادي بلادي

هزيمة بألف انتصار

مع إني مش بتابع الكورة، ولا الرياضة بصفة عامة، إنما فيه لحظات رياضية عمري ما اقدر أنساها، لحظات الواحد مننا جسمه بيقشعر فيها من الفرحة والفخر، وعينه بتدمع من الفرحة، لحظات تتمنى تتكرر، حتى لو مش بحذافيرها، لكن بروحها ودفاها.

لا، مش هاتكلم عن أي انتصارات مصرية في الرياضة، هاكلمك عن هزيمة أشرف من 100 انتصار، هزيمة خلت صاحبها، وبلد صاحبها يتكرم في كل مكان في العالم، والدنيا كلها تشهد له بالاحترام.

مش هطول عليك، أنا باتكلم عن البطل المصري العظيم محمد علي رشوان، نجم الجودو، وصاحب الميدالية الفضية في أولمبياد لوس أنجلوس 1984.

مش فاهمة أوي مشوار رشوان في اللعبة، أنا أصلاً أخري رياضة القعدا على الكنبه، إنما اللي أعرفه إنه كان بطل واخذ ميداليات كثيرة في بطولات عالم كثيرة، ولما دخلنا أولمبياد لوس أنجلوس، كانت مصر بقالها سنين طويلة جدًا ما كسبتش أي ميداليات في البطولة الرياضية الأهم والأعرق.

رشوان وصل للنهائي، ويلاعب قصاد بطل ياباني اسمه ياماشيتا (الحمد لله اسمه سهل)، لو كسب بطلنا ياخذ الذهب، ولو خسر ياخذ الفضة، ولحد هنا عادي، لكن اللي مش عادي هو أخلاق رشوان، وروحه الرياضية السمحة اللي ما سمعناش عنها كثير، لا في مصر، ولا في أي حنة تانية.

البطل الياباني كان عنده إصابة، ورشوان عرف، فكانت فرصة عمرها ما هتتكرر، بينك وبين الذهب الأولمبي المفتخر، ودخول التاريخ من الباب الملوكي، إنك تلعب على إصابة المنافس بتاعك، هي ضربة واحدة، حركة بسيطة هتعملها برجلك، وتبقى سيد أسياد اللعبة في العالم، هي دي الاختبارات ولا بلاش.

رشوان ما فكرش تانية واحدة، وحسم أمره، هو مش هيلعب على رجل البطل الياباني المصابة، هيلعب على الرجل السليمة، لو كسبه يبقى كسبه بقدراته ومجوده وشرفه، لو خسره هيبقى ده اللي يستحقه، مش أكثر منه، آه والله، زي ما بقولك كده، آآآآه، فين ممكن نلاقي روح زي دي في أي مجال؟

بطلنا خسر المباراة، وخسر الذهب، بس كسب الأهم من الانتصار في الرياضة، كسب نفسه أولاً، كسب احترام العالم كله ثانيًا، ولفترة طويلة بعدها كنا بنقرا في كل صحف العالم عن البطل الحقيقي، ورفت عليه التكريات الرمزية من كل مكان.

مش هكلمك عن تكريم اليونيسكو له في احتفال مهيب، ولا جائزة الروح الرياضية من اللجنة الأولمبية للعدل، ولا ولا ولا، ولا حتى عن تكريم الدولة المصرية له، وتقليده أرفع الأوسمة، كل ده حقه

وأقل من حقه، هكلمك عن احتفال واحتفاء اليابانيين أنفسهم برشوان.

أهل اليابان اعتبروا رشوان واحد منهم، وعلى كل المستويات الرسمية والشعبية أكدوا إنهم كانوا يتمنوا لو إن بطل زي ده اتولد على أرضهم، ومن كتر ترحيبهم بابتنا الجميل، هو نفسه اتجوز بنت يابانية، وعاشوا مع بعض هنا في مصر حياة جميلة، وخلفوا ثلاث ولاد جمال.

تخيل إنه فيه واحد عايش وسطنا، على نفس الأرض، وتحت نفس السماء، شخص بالرضا ده، والقناعة دي، والأكادة يا أخي ويا أختي إنك مش بتلاقيه يطلع في أي حته يتكلم عن الإنجاز، الإنجاز اللي بجد، لا، إنجازين: الميدالية الفضية اللي هي أصلاً حاجة مش قليلة، والإنجاز الأهم: الاحترام.

ربنا يصبحك بالخير يا رشوان، ويهني أيامك.

نبوية موسى

وقع في إيدي عدد قديم من مجلة «المصور»، لقيت فيه تحقيق كبير عنوانه: «الفتاة التي تفوقت على العقاد والنقراشي في اللغة العربية».

طيب.

العقاد عارفينه، عباس محمود العقاد الكاتب الكبير.

النقراشي باشا كمان المفروض ده كان سياسي كبير، ورئيس حكومة مصر في يوم من الأيام.

مين بقى الفتاة اللي تفوقت على الجهابذة دول؟

التحقيق بيكلمنا عن «نبوية موسى».

اللي كل مرحلة من مراحل حياتها ليها حدوتة عايزة تتحكي في حلقات، وكلها مهمة، وكلها من الحاجات اللي تخلي الجسم يقشعر،

آه والله

زي ما بقولك كده.

إلا هو إيه الناس دول؟

معقول مصر كانت مليانة بني آدمين زي كدا!

نبوية ماهيش بنت وزير ولا مسئول، ولا حتى من القاهرة المحروسة، حيث البندر والمدينة، دي بنت اتولدت في قرية الحكماء محافظة الشرقية، يتيمة الأب، إحنا بتتكلم هنا في 1886.

أبوها كان ظابط صغير في الجيش المصري.

راح السودان قبل هي ما تتولد بشهرين، وما رجعت أخباره والأغلب إنه اتوفى، والقوات المسلحة صرفت له معاش، كان لازم يكفي الأسرة المكونة من ثلاث أبناء.

نبوية غوت التعليم من وهي صغيرة، وموضوع إن حد يتعلم ده، ناهيك عن كونها بنت، كان حاجة صعبة ومكلفة، فعلمت نفسها بنفسها، وأجادت اللغة العربية والإنجليزية والحساب.

طبعا الكلام ده بيعدي علينا سطر في سيرة حياة إنسان، ممكن نقوله بصوت روتيني، كإننا بنقرا خبر هامشي في جرنان، إنما الواحد لما يقرا حاجة زي دي بيسرح في الملكوت، ويقعد يتخيل البنت دي في الزمن

هي دي مصر الي لازم ترجع

وهترجع

صدقوني هترجع

آه والله

زي ما بقولكوا كده.

نجيب باشا محفوظ

تعرف إن «نجيب محفوظ» الأديب العالمي، اللي خد نوبل في الأدب، اسمه لوحده «نجيب محفوظ»، اسم مركب يعني.

آه والله

زي ما بقولك كده.

زمان كان منتشر إن حد يسمي ابنه اسم كامل على بعضه، لأسباب مختلفة، اللي يهمني منها دلوقتي: ليه أبو «نجيب محفوظ» سماه كده؟

الحكاية تبدأ سنة 1882، لما ميخائيل أفندي محفوظ، الموظف، خلّف ولد، فسماه «نجيب»، والولد ده كبر، وقبل ما يوصل سن العشرين، كان بقى مشهور جدًّا، وكانت شهرته باسم «نجيب محفوظ».

ليه كان مشهور؟

لإنه وهو عنده عشرين سنة، كان ميعاد تخرجه من كلية الطب، كان بيدرس الطب في القصر العيني، زي أي طالب، على إيد مدرسين أجانب، وجه الوقت يتخرج.

في وقت تخرجه، ضرب مصر وباء الكوليرا، اللي كان طه حسين اتكلم عنه في «الأيام»، نجيب محفوظ كطبيب شاب لسه ما انخرجش، ما كانش المفروض يكون في أماكن قريبة من مصدر الوباء، اللي كان لسه مش متحدد بالضبط، كان مفروض يقعد في محطة السكة الحديد يعدد الحالات اللي جايه ويسجلها ويسجل حالتها، وكده يعني.

الوضع كان حاجة زي الحرب، مين ممكن يكون في الصفوف الأمامية، ومين يقعد في الصفوف الخلفية، وهو مكانه كان ورا، ورا خالص.

اتقدم الطبيب الشاب بطلب، إنه يبقى في أول صف، ويتنقل على مسئوليته الشخصية للصعيد، وفضل يتنقل من صف لصف قدام العدو المجهول، اللي بيفتك بالمصريين، لحد ما عرف أصل وفصل الوباء، ومصدره، اللي كان عبارة عن بير ميه ملوث في قرية بعيدة.

بمجرد اكتشاف أصل الوباء، حصلت سيطرة عليه، ومعاه اترفع اسم نجيب محفوظ، وبقى واحد من أشهر الدكاترة في مصر، وهو لسه يادوب خريج.

عينوه كطبيب تخدير، وكان تكليفه في مستشفى من مستشفيات السويس، لكنه كان مشغولاً بأمراض النساء والولادة، لأنه لاحظ زيادة حالات الوفيات في عمليات الولادة، خصوصاً طبعاً الولادة المتعسرة، فعمل عيادة خاصة بيه، وقدر إنه يبقى متخصص في الولادة المتعسرة.

سنة 1911، كان فيه ست من الستات في حالة ولادة، وواضح إن الوضع كان صعب جداً، فجوز الست، عبد العزيز أفندي، وداها عند الدكتور نجيب، اللي قدر يحافظ على الأم والجنين الاتين، وده ما كانش حد مصدقه، فأهل المولود قرروا يسموا الولد على اسم الدكتور، فسموه «نجيب محفوظ».

اتطور الموضوع مع الدكتور نجيب، وقرر إنه مش كفاية يكون هو ممتاز، هو مهها كان محدود، فعمل مركز متكامل لصحة الحامل والأم عموماً.

حاجة تانية عظيمة في وقتها عملها د. نجيب.

هو كان فاهم إنه مش كثير من الناس وقتها بيروحوا للدكتور في الولادة، أو المستشفيات عموماً، الناس عادة كانت بتفضل «الداية»، اللي بتروح البيت تولد الست في بيتها، فراح عمل مركز لتدريب الدايات، إزاي تتبع الخطوات العلمية السليمة، ما دام مفيش مفر منها في الوقت ده، ونجح إنه يدرب مئات الدايات على عمليات الولادة.

الفكرة هنا مش دكتور ناجح، ودمتم، مش حد بيتفوق في مجاله وخلاص، لأ، بتكلم عن حد بيطور الحتة اللي شغال فيها، وباصص للصورة العامة، وبيحاول يسد النقص، ويحسن الصورة، ويساعدنا كلنا نمشي لقدام ولفوق

هو ده

هو ده

آه والله زي ما بقولك كده.

هو ده

حكاية زلعة العسل

دي حكاية عن بلد كان بيعيش فيها ناس كتير أوي. البلد دي أكلتهم الأساسية كانت العسل، والعسل كان موجود في زلعة كبيرة كبيرة كبيرة، يمكن قد برج القاهرة كده.

الناس في البلد دي، كانوا بيروحوا للزلعة، ياخدوا حاجتهم من العسل، كل واحد حسب شغله، وكانوا مطمئنين خالص إن العسل هيكفيهم، لحد ما جه اليوم، وجرس الإنذار ضرب، العسل قرب يخلص، ومحتاجين نملا زلعتنا الكبيرة دي من تاني.

طيب نعمل إيه؟

الناس العاقلين قالوا لازم كلنا نتحرك، وكلنا يعني كلنا، كل واحد مننا لازم يشيل اللي يقدر يشيله، ويروح يملا عسل من البلاد الثانية، بعيدة كانت ولا قريبة، أي واحد يعرف مكان ممكن يجيب منه العسل، يروح وما يتأخرش، ولازم نتحرك في أسرع وقت، قبل ما يبجي اليوم اللي نروح فيه زلعتنا نلاقيها فاضية مفيهاش ولا نقطة.

كل الناس بدأت ترتب وتتحرك، وكل واحد بقى عارف إنه شايل هم، وبدأت الترتيبات في كل بيت، هنطلع إيه؟ ونشيل إيه؟ ونتحرك فين؟ ونسأل مين؟ وبقى الهدف واضح للكل، لحد ما جه واحد فكيك، فكر فكرة جهنمية، وافتكر إنها مش هتيجي على بال حد غيره.

الفكرة مكتتش في صالح إننا نجيب عسل منين، هو كان بي فكر في نفسه، إزاي ما يعملش أي مجهود، بس في الآخر بيان إنه زي الناس، بيعمل دوره، وينقل العسل؟ وفكرته الجهنمية اللوذعية كانت إنه يملا من النهر، يملا ميه، ويشيلها، ويروح يدلق المية في زلعة العسل.

هو قال لك إيه؟

يعني هي جت عليّ؟!

ملايين الناس هيتبعوا ويشغلوا ويروحوا وييجوا ويودوا ويحبوا، أنا بقى ناصح، مش هعمل حاجة، ومحدش هياخد باله، ما أنا شكلي أنا كمان باتعب وأشتغل وأرجي وأودي وأجيب، كل الناس هتشوفني، وأنا بادلق في الزلعة، يفرق إيه العسل من الميه؟ وفي الآخر شوية المية اللي بادلقهم دول مش هياثروا في زلعة العسل الكبيرة.

تلاقيه كمان قال بينه وبين نفسه:

يا سلام عليّ وعلى أفكارى النيرة!

بس يا سيدي، بس يا ستي

أخو الراجل الفكيك ده خد باله، فقال لك: أما صحيح فكرة، فعلاً! هي يعني جت عليّ، أما اعمل زيه وأريح نفسي، زميل أخو الراجل الفكيك بدأ يعمل نفس الحاجة، أخو زميل أخو الراجل الفكيك شرحه، وبقت فرة في البلد كلها.

كل واحد مكنش شايف غير نفسه، ومستقلّ اللي بيعمله، وفاكر إنه مش هيجرى حاجة يعني، وأكثر كلمة بقت منتشرة في البلد كله: يعني هي جت عليّ؟!

اللي حصل في آخر القصة الحزينة دي؟

بالضبط زي ما حضرتك متوقع

البلد صحيت في يوم لقت زلعتها مليانة ميه، آه والله زي ما بقولك كده، ميه، والميه ما تشبعش، اللي زاد وغطى إن النهر نقص، والزلعة ما بقتش بس محتاجة تتملي عسل، بقت محتاجة تفضى الأول من الميه اللي فيها، اللي ما بقتش ميه نقيه بعد ما اتلحوست.

الحمد لله إن القصة دي خيالية.

نفوق منها بقى، ونشوف مصالحنا، نشوفها بجد، وكل واحد مننا يكون متأكد إن اللي بيعمله، مهما كان قليل، مهما كان محدش شايفه، ولا بيحاسبه، هيفرق كثير في الوضع النهائي لينا كلنا.

ربنا يسترها علينا جميعاً

قولوا آمين

حرب أكتوبر

هي 6 أكتوبر 1973 كانت حرب؟

والنبي ما كانت حرب

كانت حاجة أكبر من كده بكثير

كانت ملحمة

كانت حلم

كانت يوم، كل واحد عاشه، كل واحد يتتمي للبلد الي عاشته، لازم يفخر، ويقول أنا من البلد الي عاشت اليوم ده

آه والله

زي ما بقولك كده.

في اليوم ده

مصر كانت كلها قلب واحد، حاجة واحدة، حته واحدة، محدش فكر إننا في حالة حرب، بمعنى إنه خايف على نفسه أو بيته أو أولاده أو ماله أو أي حاجة تخصه، كان فيه إحساس واحد بس، مسيطر على كل مصري ومصرية، من بحريها لقبليها، ومن شرقها لغربها.

إحساس أنا جندي

لازم اعمل حاجة تفيد في معركة التحرير.

البطولات العسكرية اتحكى عنها كثير، ومع ذلك يفضل الي اتحكى نقطة في بحر البطولة والصمود والشغل بأقل تكلفة وأعلى مجهود وأكثر تركيز ممكن.

بس البطولات العسكرية بيكتمل بهاءها مع حركة الشعب كله، الي كان متناغم مع بعضه، بيعزف سيمفونية العبور المقدس.

الي يقولك إن ده كلام أغاني وشعارات، جايز يكون معذور لو ماشفش اليوم ده، لكن مالوش أي عذر، لو كان وسطينا، وسط كل مصري، جواها أو براها.

كفاية أقول لك إنه حتى أقسام الشرطة ما شافتش أي حالة إجرام من أي نوع، محدش فكر، مجرد بس يفكر إنه يرتكب أي حماقة في يوم زي ده، ولا حتى خناقة بين اتنين لأي سبب.

الستات كانت بتعمل كل حاجة ممكن تتعمل، 13 ألف ست و بنت تطوعوا وبقوا تحت أمر القوات المسلحة، وفيه غيرهم 11 ألف كانوا في طابور الانتظار، الستات الكبار كانوا بيعملوا أي حاجة، الست تحية كريكوا تزعمت حملة، كانت هي أول واحدة فيها، وهي التبرع بالمصاغ والذهب لصالح المجهود الحربي.

أغنية «بسم الله» اللي عبر المصريين معاها، غناها ناس مش مطربين، مش محترفين، لا عمرهم غنوا قبلها، ولا غنوا بعدها، دول موظفين وعمال أمن في مبنى ماسبيرو، بليغ حمدي مالقاش مطربين يغنوا الغنوة في حالة الحرب اللي حاصلة، فغناها بأي حد قابله.

أي حد وقتها كان ممكن يعمل أي حاجة، ويعملها صح، ويجيدها، وكأنه مولود بيعملها. دا بيتبرع بالدم، وده ينظم المرور، وده يجري يشارك في المقاومة الشعبية، وده يوصل أكل، وده يوصل ميه، والكل عايز يشارك.

في يوم زي ده، المعنى أكبر بكثير من حرب عسكرية، ليها نتائج سياسية، دي لحظة بتثبت إننا نقدر، إن الروح موجودة، مستتية بس اللحظة اللي تطلع فيها.

واحنا بنفتكر اليوم ده، عايزين نقول إنه مش ضروري اللحظة دي تبقى حرب والعياذ بالله، الشر به وبعيد، وربنا يحفظ مصر من كل اللي بيحصل في المنطقة، إنما ممكن اللحظة دي تبقى أي مرحلة شدة، محتاجة تكاتف علشان كلنا نعددها.

محتاجة إننا نقف زي ما وقفوا الفلاحين في فيلم الأرض، لما لا مؤاخذه الجاموسة وقعت في الساقية، نسيوا كل خلافاتهم، وعملوا جبل واحد، كلهم ماسكينه علشان يقدرُوا يخرجوا من الموقف اللي همّا فيه.

أكتوبر مش حرب

أكتوبر روح

ضروري كلنا نجتهد في إننا نحضرها

آه والله

زي ما بقولك كده.

١٦ مارس

في يوم ستاشر مارس من كل سنة بيحتفل العالم بيوم المرأة المصرية!! أيوه العالم، مش مصر بس. ده يوم عالمي للمرأة المصرية مسجل في أجندة المناسبات الدولية.

اشمعى يوم 16 مارس؟ قالك يا سيدي ده اليوم اللي خرجت فيه أكبر مظاهرة نسائية في تاريخ مصر بقيادة الزعيمة هدى هانم شعراوي، ورائدات الحركة النسائية في مصر في وقت ثورة 1919.

المظاهرة الضخمة خرجت بسبب سقوط أول شهيدة في تاريخ مصر الحديث برصاص القوات البريطانية، وهي المرحومة (حمدي خليل) وحمدي كانت سيدة عادية من حي الجمالية خرجت بعد نفي سعد باشا في المظاهرات اللي ملت مصر وقتها ضد الاحتلال البريطاني.

وفجأة يفتح العساكر الإنجليز الرصاص الحي على المتظاهرين وتسقط (حمدي خليل) ومن بعدها سقطت أكثر من مظاهرة سيده منهم (سعدية حسين وشفيقة عشاوي وعائشة عمر وفاطمة رياض ونجية إسماعيل)، سقوط المتظاهرين وبالأخص السيدات ولع الدنيا وقلبها دندرة على دماغ الإنجليز. طبعًا مكانتش حادثة مسبقة، التطاول لدرجة قتل النساء كمان.

خرجت أكبر مظاهرة للتنديد بمقتل حمدي ورفيقاتها اللي بالمناسبة كانوا ستات شعبيات من أحياء بولاق والظاهر وسور مجرى العيون، مكانوش سياسيات مثلاً ولا زعيمات.

استمرت المظاهرات وبالأخص النسائية ليوم 20 وفي النهاية رضخ الإنجليز ورجع سعد باشا وتولى الوزارة وأول خطاب يوم رجوعه قال فيه: صيحووا جميعًا لتحيا المرأة المصرية.

طبعا ماحدث يعرف عن 16 مارس في مصر غير إن قبل منه 15 مارس وبعد منه 17 مارس، واهي كلها أيام ربنا.

ولا حد هيفتكر يقول كلمتين عن حميدة ولا هدى هانم ولا ثورة 19، بس إحنا اهو بنقول.

يحييا كفاح الست المصرية في كل الأوقات من أول أم الملك مينا، اللي كانت أكثر من شجع ابنها على توحيد شمال مصر وجنوبها تحت راية واحدة قوية وخرجت معاه في حروبه ضد مملكة الشمال، لحد أجدع ست موجودة في شوارع مصر المحروسة بإيد بتأكل وتراعي وتكبر وتداداي، وبالإيد الثانية بتمرض مريض، أو بتكتب على سبورة، أو بترسم تصميم، أو بتشاور على متهم في محكمة، أو بتتاجر وتبيع وتشتري، أو بتكتب مقال، أو ماسكة ميكرفون وبتهتف أو تغني.

تحية لكل أم وكل ربة بيت وكل ست في بر مصر صابرة عالغلا والكوا، صابرة على مر العيشة وحلوها.
تحية لكل ست حوشت وعملت جمعية وسترت بيتها وجوزت بناتها وجهزت ولادها ووقفت جنب الزوج
في محنته قبل فرحته. تحية للواقفات قصاد نار البوتاجاز في صهد الصيف وساحبات البطاطين عالنايمين في
عز برد الشتا.

تحية للي باعت ذهبها وجبرت بيه المصايب، واللي اكتفت بالموجود ولا طلبتش جديد علشان الجديد يروح
للي نفسهم فيه.

تحية للي لبست جلابية وعمة ولاسة ونزلت وسط الشنبات تحيب لقمة عيشها وعيش العيال، تحية للي
جرّت عربية خضار وشالت طلبات وحملت على كتفها كراتين، تحية للي مسكت السمك في البحر بإيدها
عريانة، واللي بتصحى من الفجر تمسح سالام وتغسل عربيات السكان.

تحية للي اشتغلت في ناسا واللي خطبت في البيت الابيض واللي بقت وزيرة وسفيرة ووكيلة براندات عالمية
وعالمة فزياء وقائدة جيش في بلاد ما وراء أعالي البحار.

تحية، ومية، وعشر تلاف، ومليون، ومليار تحية، يا جدعة يا بنت البلد يا أم ضحكة يتهزها أجدع شنب.

١٢٠ سنة سينما

100 سنة سينما . سينما يا سينما

كلمات الأغنية ولحنها المميز - عمرخيرت ما بيهزرش يا إخوانا- المهم اللحن الجميل والكلمات القليلة المركزة والصوت الرائع لأنغام وطلعت زكريا، مع تتابع أفيشات وأسامي أجمل 100 فيلم في تاريخ السينما المصرية، بيخلقوا من العمل ده حالة كده متفرده من نوعها. حاجة كده من الحاجات اللي ممكن تلزق في خلفية دماغك لزقة بغرا، وتفضل تتردد آلاف المرات في فراغ نافوخك، لحد ما تخليك تبقى عاوز تنزل تجري في الشارع وأنت ناكش شعرك.

الحالة دي رغم انها مؤلمة ومؤرقة جدًا إلا إنها ما بتحصلش إلا في الحاجات المميزة . . المميزه بزيادة. العمل تم إنتاجه سنة 1996 للاحتفال بمئوية السينما المصرية!!

96؟ آه سنة 96 احتفلنا بمرور 100 سنة على ظهور السينما المصرية في تاريخ الفنون. يعني عدى على الحدث ده 20 سنة وزيادة دلوقتي.

الغريب أن قائمة أفضل 100 فيلم اللي بيتناولها العمل ده ما تجددتش من يومها. يعني فيه ما يقرب من ربع قرن من الإبداع السينمائي، مافهمش ولا عمل واحد في قائمة أفضل 100 فيلم في تاريخ السينما المصرية!! آه بجد زي ما بقولكوا كده.

تخيلوا أفلام زي المصير وبحب السياما وعمارة يعقوبيان وسهر الليالي، مش موجودة في القائمة؟!

من عجائب القائمة كمان إن ما فيهاش ولا فيلم لإسماعيل ياسين!!! ولا فيلم لفؤاد المهندس!!

بيننا بنلاقي صاحب نصيب الأسد في القائمة العظيم شكري سرحان، برصيد 15 فيلم ما بين مشاركة وبطولة، بعده بتيجي سيدة الشاشة فاتن حمامة وأخيرًا الراحل الكبير (أحمد زكي) في المركز الثالث لأكبر رصيد أفلام في القائمة.

المخرجين بيجي على رأسهم بطبيعة الحال العالمي يوسف شاهين بأكثر من 12 فيلم.

الكوميديا مالهش نصيب كبير، وحتى الكام فيلم اللي في القائمة نقدر نعتبرهم light comedy كمان زي الزوجة رقم 13 ومراتي مدير عام.

سنة 2013 اجتمع مجموعة من النقاد العرب واختاروا قائمة بأهم 100 فيلم عربي. اللي كان بديهيًا حوالي 50٪ منها أفلام مصرية. وجه على رأس القائمة كأهم فيلم عربي في التاريخ (المومياء) لشادي عبد السلام.

ويليه رائعة يوسف شاهين (باب الحديد) وفي المركز الرابع يبجي (الأرض)، القائمة ولأنها اتعملت مؤخرًا فففيها أفلام أحدث زي (رسائل البحر) و(أرض الخوف) و(حين ميسرة) وغيرهم.

تاريخ السينما المصرية وجمالها وكم الإبداع وعصارة المجهود اللي فيها ماتكفيهاش قائمة واحدة ولا اتنين ولا عشرة. يعني عاوزين قوائم للأفلام القصيرة وقوائم للأفلام التلفزيونية وقوائم للأفلام الاستعراضية وغيرها للكوميدي والميلودراما. أفلام الدجيتال والموبايل عاوزة قوائم لوحدها، الوثائقيات رخرة محتاجة شغل بعد الضهر!!

الحلم اللي بدأ من 120 سنة وزيادة ومستمر وهيفضل مستمر بإذن الله، طول ما الأرض دي لسه بيمشي عليها مبدعين وفنانين حقيقيين، لسه قادرين يخلصوا ويقدموا للدنيا صور بتتحرك، صور تاخذ قلبك قبل عينك، صور تنقلك العوالم اللي نفسك تعيشها واللي نفسك ماتخطيهاش.

قوائمنا محتاجة تتجدد وتتجدد دايمًا وأول بأول، سنويًا على الأقل ولا حتى كل خمس سنين، بحيث نقول إحنا واقفين فين، رجعنا ورا ولا طالعين لقدام.

السينما ذاكرة الأمة يا بشر، عيب أوي لما تبقى ذاكرة الأمة بعافية وإحنا واقفين مابن عملهاش حاجة!!

أبو قرش وأبو قرشين

في الشغل، أي شغل، فيه ظاهرة مصرية صميمة
تيجي تقيّم أداء حد في المهمة اللي عليه: موظف أو عامل أو مدير أو حتى رئيس مجلس الإدارة
فييجي واحد يقولك:

آه هو شغله وحش، بس هو طيب

آه والله

زي ما بقولك كده.

يقول لك: هو طيب وابن حلال.

ماشي، طيب دي تخليك تصاحبه، تحترمه، تناسبه، إنما في إطار الشغل، هو عنده مهمة، هتساهم في إن
الشغل على بعض، في الناتج النهائي، يطلع مطبوط أو ما يطلعش، فكلنا، كلنا، نكسب أو نخسر، ده مالوش
أي دخل بطيبته من عدمها.

دي مش دعوة للقسوة، دي بس محاولة إننا ما نحطش أبو قرش على أبو قرشين

لأنه على الناحية الثانية، ممكن ترشح حد لمهمة أو شغلانة، فييجي صاحب القرار يقولك: هو شاطر، بس
دمه ثقيل.

ماشي، دمه ثقيل يبقى ما تقعدش معاه عالقهوة، ما تخرجش معاه في رحلة، اعمل له أن فولو ولا حتى
بلوك عالفيسبوك، إنما إيه علاقة تقل دمه بإنجازته للشغل من عدمه؟

تعالى نوسع المشهد شوية

حتى في الحاجات العامة، لما يبقى مطروح على الرأي العام موضوع أو قضية، كتير بنلاقي المناقشات
والدفاع والهجوم في حاجات بره الموضوع خالص، زي إنك بتهاجم أفكار حد، فتتريق على شعره، أو لبسه
أو ملامحه، أو طريقة كلامه، أو تنتقده لتصرفات شخصية مالهش أي دعوة بالموضوع اللي إنت بتناقشه.

أو العكس، تيجي تدافع عن حد في قضية تخص حاجة رسمية أو مجال شغله، فتقول: كفاية ابتسامته، أو
شوف هو مؤدب إزاي وهو بيتكلم، أو تحكي قصة عن إنك قابلته فقلت له: سلام عليكم، قال لك عليكم
السلام، وإنك حسيت قد إيه في السلام ده إنه مهذب وجميل وكيوت خالص.

عن نفسي:

طول عمري باحاول إني أفصل الحاجات عن بعضها، وأمنع نفسي من مجرد التفكير في اللي ماليش فيه، زميل أو زميلة في الشغل، بره الشغل ولا حتى أسمع هو عمل إيه، اتجوز، طلق، خلف، راح جه، مش قصتي.

في الناحية الثانية، لو فيه زميلة، بره الشغل هي صاحبتني الروح بالروح، وبتزورني وأوزورها، ونروح ونيجي سواء، جوه الشغل كل واحد فينا بيبقى على حسب وظيفته إيه؟

عارفة إن فصل الحاجات عن بعضها مش سهل، ومش بادعي إني كمواطنة يعني، كنت مثالية أوي زي ما أنا عايزه، بس المحاولة مهمة، والنجاح فيها بنسبة تسعين في المية، أحسن بكتير من إن الحاجات تبقى سايحة على بعضها.

مشكلة خلط الأوراق، مش بس أزمتهنا إننا بنظلم ناس تستحق، لصالح ناس تانية ما تستحقش، المشكلة الأكبر في إننا بنميع وبنضيع القضية الأصلية اللي إحنا بتتكلم فيها.

لما نسيب مضمون قضية عامة، ونمسك في تسريحة شعر صاحبة القضية، وهل ده لون شعرها الأصلي، ولا صابغاه، ولا عاملة إكستيشن مثلاً، تفتكر كده القضية الأصلية، اللي إحنا عشانها فتحنا الموضوع، راحت فين؟

راحت فالوبا زي هنادي بالضبط.

طيب، يبقى إيه؟

يبقى نركز، وتتكلم فصلب الموضوع اللي فاتحينه، كده أكيد أفيد بكتير.

علشان ما نلاقيش نفسنا كل مرة بنقول زي عوكل

إيه اللي جاب القلعة جنب البحر؟

آه والله

زي ما بقولكوا كده

آمال فهمي

صعب أوي أقعد ورا ميكرفون، واتكلم في الإذاعة، ولا اتكلمش عن الأستاذة. .

آمال فهمي أو زي ما بيطلق عليها (ملكة الكلام)، صاحبة البرنامج الإذاعي الأشهر في تاريخ الإذاعة المصرية، (على الناصية) من المفارقات على فكرة إن (على الناصية) ما بدأش بصوت آمال فهمي. بدأ بصوت الإذاعي الكبير (إسماعيل عبد المجيد) اللي كان بيذيع 9 أغنيات في البرنامج مع بعض المعلومات والحوارات.

تبدأ آمال فهمي مع (على الناصية) من سنة 58، وتشتهر بجملته (تحب تسمع إيه)؟ اللي كانت بتنتهي بيها كل حواراتها على الناصية مع الضيوف.

ولدت آمال فهمي عام 26 في حي عابدين، وحصلت على ليسانس الآداب قسم لغة عربية من جامعة القاهرة، اشتغلت 6 شهور في الصحافة، قبل ما تتعين في الإذاعة سنة 51.

(على الناصية) مكانش أول برامجها في الإذاعة. سبقه برنامج (حول العالم) اللي كانت بتقدم فيه معلومات عامة عن دول العالم مع تسجيلات نادرة لهتلر في حلقتها عن ألمانيا، ولنهر في حلقة عن الهند وغيرهم من الزعماء والمشاهير.

وبعده قدمت برنامج (في خدمتك) اللي كان يعتبر أول برنامج إذاعي يتلقى شكاوى المواطنين، ويتواصل مع المسؤولين لمحاولة حلها. البرنامج اللي نجح جدًّا في وقتها، لأنه كان فريد وجديد من نوعه وقرب من مشاكل الناس بشكل مباشر، لدرجة إن يومياً كان بيجيلها أكثر من 500 جواب حكايات ومشاكل من الناس!!

آمال فهمي كان لها نصيب من الأوائل.

فكانت أول امرأة تتولى رئاسة إذاعة عربية وهي إذاعة الشرق الاوسط.

وكانت كانت أول من أدخل فكرة (فوازير رمضان) للإذاعة المصرية، الفكرة اللي نجحت لدرجة إن في سنة من السنين يوصلها (مليون) جواب، حل لفوازير رمضان. آه والله زي ما بقولكوا كده! مليون جواب في الستينات، تخيلوا؟! الموضوع اللي خلى رئيس هيئة البريد يشتكي لرئيس الوزرا منها، لأنها تسببت في ضغط رهيب على المصلحة!

بالإضافة كمان إنها كانت أول امرأة تجري ما يعرف بـ (التحقيقات الإذاعية). . الناس كلها عرفت شكل آمال فهمي من خلال فيلم (حكاية حب) اللي طلعت فيه بشخصيتها الحقيقية، واستضافت عبدالحليم اللي

غنى في ميكرفون الإذاعة أغنيته الجميلة (بحلم بيك). وبتقول الأستاذة آمال إن أجرها عن الفيلم كان إزازه بارفان فرنسية أهدها ليها عبدالحليم بنفسه، وإنها كانت سعيدة جداً بالتجربة، لأنها بتحب عبدالحليم جداً. آمال فهمي حصلت على العديد من الجوايز من أغلب الدول العربية تقريباً. بس أهمهم وأقربهم لقلبها: جائزة علي ومصطفى أمين، بالإضافة للقب (ملكة الكلام) اللقب اللي حصلت عليه في لبنان، بعد استطلاع رأي موسع، أجرته الصحف والإذاعة اللبنانية في كل الدول العربية.

قيمة وقامة إذاعية وإنسانة بحجم آمال فهمي صعب نوفيها حقها في حلقة واحدة من البرنامج، بس من هنا حابة أبعت تحيات وسلامات كتير جداً، باسم كل اللي حبوا آمال فهمي، باسم كل اللي اتعلقوا بصوتها، باسم كل اللي اتعلموا منها، باسم كل الأجيال اللي اتربت على إيدها واللي ارتبط يومهم بصوتها. باقة ورد وتمنيات بالشفاء ودوام الصحة وطولة العمر.

أمينة السعيد

لما فكرنا نعمل البرنامج ده

كان أول سؤال

إيه الموضوعات اللي ممكن نقدمها لحضراتكم؟

وتبقى حاجة نجتهد في إنها تكون ممتعة ومفيدة

حاجات نتونس بيها مع بعض

وتدينا كلنا طاقة وأمل

من الموضوعات اللي فكرنا إنها ممكن تكون مهمة

إننا ندردش شوية عن الستات المصريات الرائدات

بس كان فيه سؤال:

هنلاقي قد إيه ستات نتكلم عنهم؟

وهل ده هيكفيننا كام حلقة لقدام؟

لكن السؤال ده ما كانش عندي خالص

لأنه كل ما هنتفتح كتاب التاريخ هنلاقي صفحات وصفحات وفصول ومجلدات مليانة بأسماء لسيدات مصريات، كافحوا، وحفروا في الصخر، وشقوا طريق المستقبل، ومن بدري، من بدري أوي، ولو قعدنا نقدم البرنامج ده بس عن الست المصرية العظيمة، محتاجين سنين طويلة.

آه والله.

زي ما بقولك كده.

إزاي مثلاً نتكلم عن سيدات مصريات رائدات، من غير ما نتكلم عن أمينة السعيد.

أمينة بنت الصعيد، اللي اتعلمت في العشرينات، وخذت الابتدائية والبكالوريا، ولما جات تدخل الجامعة، حبت تدرس التجارة، كان عندها اهتمام بالاقتصاد والحساب، فلقت إنها مش مقبولة لأنها بنت، وكليات كثيرة، مش بس التجارة، كانت رافضة التحاق البنات.

أمينة اضطرت تدرس الآداب، لكنها قررت إنها تكرس حياتها كلها لقضية المرأة، وإلغاء عبارة «ممنوع للفتيات» أو البنات أو السيدات من أي مجال في مصر، وأي حاجة يقدر الراجل يعملها، ممكن جداً الست تعملها، ويمكن أحسن.

علشان كده أمينة اختارت الصحافة.

اللي مكنتش سهلة برضه.

مكنتش فيه صحفيات مصريات، باستثناءات بسيطة.

يمكن كان فيه كاتبات، يكتبوا مقالات، أدب، شعر، لكن صحافة، وأخبار، وإدارة تحرير، كان صعب أوي، روز اليوسف كانت استثناء، وروزا عموماً كانت حالة خاصة في الصحافة وفي الفن.

أمينة دخلت الصحافة من دار الهلال، واشتغلت في المصور، وانضمت لحركات التحرر النسائي، وكانت قريبة أوي من هدى شعراوي، اللي تبتتها، ودعمتها في مشوارها الصحفي.

لمع اسم أمينة السعيد، وقدرت توصل لجمهور عريض من القراء، وده شجع آل زيدان، ملاك دار الهلال، إنهم ينتجوا مخصوص مجلة للمرأة، فعملوا مجلة «حواء» اللي مكنتش فيه بيت متعلم في مصر مش بيشتريها، يعني في الوقت اللي مصر فيه كانت ما تزيدش عن عشرين مليون نسمة، كانت مجلة «حواء» بتبيع حوالي 200 ألف نسخة.

الرقم ده ما اسموش نجاح، ده اسمه اكتساح.

اكتساح ناتج من ثقة.

ومع طوفان الرسائل اللي كانت بتيجي يومياً لأمينة السعيدة، عملت باب من أشهر الأبواب الصحفية، اسمه «اسألوني»، كانت بتستعرض فيه المشاكل الاجتماعية للأسرة المصرية، ودخلت من خلاله معارك، لما تراجعها دلوقتي تتخض.

تتخض من إننا في النص الأول من القرن العشرين، كنا بناقش قضايا ما نجرؤش النهارده في الألفية الثالثة إننا نناقشها.

كان طبعي إن أمينة السعيد، تبقى رئيس تحرير المصور، وأول رئيس مجلس إدارة سيدة لمؤسسة صحفية، هي طبعاً دار الهلال، وعضو في مجلس الشورى، وحاجات كثير عملتها أمينة السعيد، وقدرت تتفوق فيها وتخرج من كل معركة منتصرة.

مش محتاجة أقول لحضرتك إنه مش بس كلية التجارة اللي بقت تقبل البنات، كل مكان في مصر ما بقاش عنده مشكلة، وده بفضل كفاح الستات اللي زي أمينة وغيرها.

آه والله

زي ما بقولك كده.

ترجمة أفلام السينما

في بدايات صناعة السينما ما كانتش الأفلام بتترجم نهائي، فيلم بالإنجليزي يتداع بالإنجليزي، فرنساوي فرنساوي، وانت تعرف اللغة تشوف الفيلم، ما تعرفش تتفرج على الضرب أو المناظر وانت ساكت، آه والله زي ما بقولك كده.

مع إن الكتابة على الشاشة مكنتش صعبة
بس طبعاً في النهاية بقى فيه احتياج للترجمة.

الاحتياج للترجمة ما بدأش مع الأفلام السينمائية الروائية، إنما مع الأفلام المتصورة لأغراض علمية، فكان من الضروري وضع المصطلحات على الشاشة، والحكاية دي كانت عملية معقدة جداً، بنتكلم في أواخر الثلاثينات، أوائل الأربعينات.

وقتها مكنتش الموضوع ببساطة أسير الظلام وفارس السايبر، اللي بينزل الترجمة من على أي موقع، ويلزقها على الفيلم وهو قاعد في بيتهم بهدوم النوم، ويوزع على البشر قيمه وآراؤه، كانت عملية صعبة جداً ومكلفة، وكانت التقنية بطبيعة الحال مش موجودة في مصر.

كان فيه طالب مصري في كلية الهندسة، اتخرج وراح باريس يحضر الماجستير، فوهو ماشي في كليته، لقي إعلان عن دورة لتعليم كيفية دمج الترجمة على شريط الفيلم، ولأنه هو نفسه كان هاوي للسينما عموماً، والسينما الأجنبية خصوصاً، فكر في إنه يروح يتعلم الحكاية، وقد كان.

أيوه، تمام، هو دلوقتي اتعلم الحكاية دي، هيعمل بقى بيها إيه لما يوصل مصر، هل فيه حركة لترجمة الأفلام العلمية؟ مش قد كده، ثم إنه هو بيحب الأفلام الأجنبية، وكان غرض تعلمه الأساسي هو إنه يوسع قاعدة الفيلم الناطق بالإنجليزية في مصر، فبدأ يعرض فكرته على موزعي السينما عندنا، فرفضوا.

رفضوا لأنها مش متجربة، عادة أصحاب الأموال ما يجوش يغامروا، هو عايز ريفرنس، يشوفه بعينه، ويتأكد إنه شغال، بعدها ربك يسهل، وممكن تلاقي حد، فإذا لاقيت حد اقتنع، مش هتلاحق بعدين، بس لازم الطلعة الأولى تبقى عليك.

وقتها مكنتش حد في العالم كله بيعمل كده، مش بس في مصر، فكان على الطالب ده إنه يخوض المغامرة بنفسه، وهو خاض مغامرات كثير، كان بيحجب أفلام قصيرة، علشان التكلفة تبقى أقل، ويعمل لها ترجمة، تفتكر إن ده معناه إنهم ياخدوا الترجمة دي كده مجاناً؟

أبدًا، الفكرة إن دي حاجة مش متجربة، فحتى لو ببلاش، مش هنعملها، أصلًا زبون الفيلم الأجنبي عارف إنجليزي، والفيلم الأجنبي مالوش زبون بره الطبقة دي، فممكن الترجمة تضايق اللي قاعد يتفرج، فكان لازم صاحبنا يقدم النموذج اللي يخلي موزعي الأفلام يلجئوا له.

قعد الطالب، اللي ما عادش طالب، ينظم عروض للأفلام القصيرة اللي بيترجمها، وخلي الدعوة للعروض دي مجانًا على أساس الموزعين يشوفوا نتيجة التجربة بعينهم، وقد كان.

بعد سلسلة من العروض أخيرًا أخيرًا ظهر حد اقتنع بالفكرة، وسنة 1944 كان أول عرض لفيلم روائي مترجم في العالم، ده كان في مصر، فيلم أجنبي اسمه «روميو وجولييت»، والفيلم نجح وكسر الدنيا، فكانت المكافأة إن المهندس المصري ده بقى صاحب أول معمل للترجمة، وفضل يشتغل منفردًا حوالي خمسين سنة.

بعدها توسع، وراح عمل معمل للترجمة في لبنان بالمشاركة مع شخص لبناني، واشتهر عبر التاريخ بتهذيب اللغة الأصلية، لأنه كان مدرك فرق الثقافات والقيم، فهو اللي اخترع تَبًّا وعليك اللعنة، وتجاهل الكلام اللي فيه تجديف ديني ومشيت.

إيه ده؟

هو أنا لحد دلوقتي ما قلتلكش اسم المهندس المصري العظيم ده؟

إنت أكيد عرفته

طبعًا أنيس عبيد

مين فينا ما يعرفوش؟

أهلي وزمالك

في الكورة، فيه أهلي وزمالك

وده له جماهير وده له جماهير

والجماهير هنا وهنا بتشجع ناديها بحماس، ونفسها يكسب كل البطولات، ويضم أحسن اللّعبة، ويبقى هو الأول دائماً.

أنا بقول أهلي وزمالك على سبيل المثال يعني، مع كل الحب والاحترام لكل أندية مصر وجماهيرها الكُمل. بس التشجيع الجنوني ده وارد في نشاط زي الكورة، وده مش بيحصل عندنا بس، كل العالم عنده مشجعين، بيدافعوا عن فريقهم لآخر حد ممكن، مش عايزة أقولها، بس مجانين كورة. ده في الكورة، ومقبول.

بره الكورة بقى، هل يجوز تتحول كل حاجة في حياتنا لأهلي وزمالك.

كل الموضوعات تقريباً

في كل المجالات تقريباً

أول ما يتفتح

تلاقي الناس اتقسمت أهلي وزمالك، مع وضد، وكل واحد يشجع فريق، بيدافع عنه بالحق والباطل، ويتريق على أصحاب الرأي الثاني، ويمكن يشتمهم، وتوصل لأكثر من كده بكثير. آه والله، زي ما بقولك كده.

طب وحياتك عندي، وإحنا بقينا عشرة وصحاب، أنا بتخض لما الاقي خناقة مثلاً بين الناس اللي بيحبوا الصيف، والناس اللي بيحبوا الشتا.

معسكرين عمالين يطحنوا في بعض، وكل واحد بيحاول يثبت بكل الطرق إن الفصل بتاعه أحسن، الفصل بتاعه هو، اللي بيعب الجو فيه، اللي بيرتاح فيه، اللي صحته بتيجي عليه.

ببقى عايزة أقول يا جماعة استهدوا بالله، لا انت اللي عملت الصيف ولا انتي اللي بتجيب الشتا، والحمد لله، فيه شتا، وفيه صيف، وكل اللي بيرتاح لفصل يتبسط فيه.

قيس على كده بقى.

في أي موضوع: دين سياسة فن مجتمع طبيخ أزياء فكر ثقافة أدب حتى في العلوم تلاقي واحد بيتكلم عن نظرية علمية، ويهاجم أصحاب النظريات الثانية وشايفهم مش يفهموا ومش يحسوا.

الموضوع ده مش سهل ولا هين.

فكرة إننا نمسك في خناق بعض عالفارغة والمليانة عملية بتشحن النبي آدم ضد زميله وصاحبه، وحتى ضد اخوه ابن امه وابوه.

الوضع ده بيخلينا شويه شويه عدائين، وبيضيق الصدر والأفق والخلق.

ممكن يتسبب والعياذ بالله في أمراض.

لما تبقى طول الوقت مغلول، ده خطر على صحتك.

لما العالم أقر التسامح كمبدأ أساسي، ليه أولوية على كل حاجة، وبيصرف مليارات كل سنة على نشر ثقافة التسامح، فده مش من فراغ، ولا رفاهية، ولا قلة مشاكل، إنما إحساس كبير بإن العالم في خطر إذا المواطنين عاشوا في حالة شحن مستمرة.

زمان كانوا بيعلمونا مقولة: رأيي صواب يحتمل الخطأ، ورأيك خطأ يحتمل الصواب، كانوا بيكتبوها على ظهر الكراسات، وكان مدرس الخط الأستاذ فلان الفلاني، عليه رحمة الله، يخلينا نكتبها خمس مرات بالنسخ، وخمس مرات بالرقعة، كانت درس مهم أوي، علشان وإحنا بنكتبها نفتكر إن الواحد مش لازم يتعصب لكل الحاجات بنفس الدرجة، وفيه موضوعات كتير ما يصحش نتعصب فيها من أساسه.

مهما حاولنا، ومهما عملنا، عمرنا ما هنقدر نوصل لمرحلة إن كلنا عندنا نفس الرأي بالمللي في كل حاجة، علشان كده، لازم نتعايش، لازم نقبل المختلف، لازم نتعود على إن فيه حاجات موجودة مش على كيفنا.

أول عالمة ذرة مصرية

«سنبو»

ده اسم قرية مصرية في محافظة الغربية، القرية دي كان فيها واحد من أعيانها اسمه موسى، عنده بيت لما الناس بيتقابلوا فيه يتكلموا في أحوال البلاد والعباد، ويستفيدوا من عقلية الراجل اللي كان مشهود لها بالكفاءة والاتزان.

يوم 3 مارس 1917، يعني من 100 سنة، ربنا رزق موسى بنت، فسماها سميرة، سميرة موسى، ومن لحظة ما جات الدنيا وقالت واء واء واء، بدأ الترتيبات إنها تتعلم. آه والله زي ما بقولك كده.

من ميت سنة، في دلتا مصر، كان فيه ناس فاهمة قيمة التعليم عمومًا، وتعليم البنات خصوصًا، والتعليم مش يعني تاخد ورقة مكتوب فيها إنها شهادة جامعية، التعليم يعني العلم، العلم يا اخوانا. العلم. ترتيبات تعليم البنت مكنتش سهلة في الزمن ده، مكنتش فيه مدارس لا في قرية سنبو، ولا في محافظة الغربية، ويمكن كان في الدلتا كلها، المدارس كانت هناك، في مصر المحروسة، قاهرة المعز، وكان مستحيل البنت تروح المدرسة من غير ما تروح تعيش حياتها كلها هناك.

فكر الأب، اللي كان مصمم على تحقيق حلمه، اللي كان بيعتبره حلم للبلد كلها، فقرّر يغير حياته وحياته أسرته كلها، نزل مصر، واختار الإقامة في حي الحسين العريق، ورتب أحواله بحيث يبقاله مصدر دخل كريم يصرف منه على عيلته، وودى البنت مدرسة «قصر الشوق»، ولما نجحت بتفوق، دخلها المدرسة الثانوية.

دخول بنت مدرسة ثانوية في الوقت ده كان حدث، ولو كانت اكتفت بالتعليم كانت هي وأبوها هيبقوا من الأبطال، بس هي قررت تكمل لحد النهاية، والنهاية في العلم عمرها ما تيجي في حياة الإنسان.

دخلت مدرسة بنات الأشراف الثانوية، ومن أول لحظة ظهر نبوغها في العلوم والرياضيات، لدرجة إنها أعادت صياغة كتاب المدرسة في الجبر، وطبعته على حساب والدها الشخصي، ووزعته على زميلاتها في المدرسة.

نبوية موسى، الرائدة النسائية المعروفة، كانت هي ناظرة المدرسة، وهي اللي أسستها، لما شافت عبقرية البنت، قررت تشتري لها معمل مخصوص على نفقة المدرسة، تعمل فيه تجاربها، وده بقى لما المنظومة كلها تهتم بالمتفوقين، وتدفعهم لقدام ولفوق.

طبعا سميرة موسى كانت أول دفعتها في التوجيهية، ومع إنها كانت تقدر تدرس الهندسة مستريح، أو كبت يعني، تدرس الآداب وتخلص، قررت تدخل كلية العلوم، وفي الكلية اتعلمت على إيد العالم المصري الكبير علي مصطفى مشرفة، وتأثرت بيه، وقررت إنها تكمل مسيرته في علوم الذرة.

طلعت سميرة الأولى على دفعتها، واتعينت مدرسة في الجامعة، وحضرت الماجستير، وسافرت بريطانيا تحضر الدكتوراه، وأنجزتها في أقل من سنة ونص، وبقت واحدة من علماء الذرة المعدودين في العالم كله.

بعدها سافرت أمريكا، وهناك قابلت وجه رب كريم، وهي لسه في عز شبابها، 35 سنة كان عمرها. الحادثة اللي اتوفت فيها سميرة اتكتب عنها كثير، واتقال إنها مقصودة ومدبرة، وفيه غموض كثير في الموضوع.

مش عايزة أكون سبب في النعم، ولا أقلب المواجع.

خلينا في قصة البنت المصرية العادية، اللي لما كلنا بنقف وراها، بنقدر نطلع منها إمكانياتها، الإمكانيات دي جبارة، مالهش حدود، إحنا عقلياً وعلمياً مش أقل من أي حد، ونقدر نكون في أعلى مكانة، محتاجين بس نصدق إننا نقدر، وإحنا نقدر، وهنكون.

آه والله

زي ما بقولكوا كده.

أول نشيد وطني

للأسف الشديد

ما بقاش فيه كثير عارفين حكاية النشيد الوطني لمصر، وكان إيه وبقى إيه، ولا حتى النشيد الحالي تاريخه إيه؟

وإمتى مصر كان عندها نشيد وطني

علشان كده

عايز أحكي لكم حكايات السلام الوطني لمصر

من أول نشيد لحد بلادي بلادي

والنهار ده أحكي لكم حكاية أول مرة اتعزف فيها السلام الوطني لدولة اسمها مصر

ياللا بينا

النهارده، وإحنا في سنة 2017، لما نقول إن الدولة عملت حفلة كلفتها مليون جنيه ونص، مش بالذمة يبقى بذخ؟

طب لما نقول إن الحفلة دي كانت مثلاً سنة 1970، يبقى نوصفها بإيه؟

طيب إيه رأيك نقول إنها كانت 1910؟

ولا أقول لك: مليون جنيه ونص دي كانت تكلفة حفل افتتاح قناة السويس اللي كانت 16 نوفمبر 1869، في عهد، وتحت إشراف، الخديوي إسماعيل!

آه والله زي ما بقولك كده.

أصلاً الإمبراطورة الفرنسية أوجيني حصل لها هسس، وبعثت لنابليون الثالث في فرنسا، وقالت له إنها عاشت أحلى حفلة في حياتها!

الحفلة الفظيعة دي، اللي اتعملت في بورسعيد طبعاً، كانت أسطورية، و«على هامشها» اتعملت حاجات مهمة منها كوبري قصر النيل مثلاً، اللي صممه الراجل إيفل ده بتاع فرنسا، ومنها قصر القبة، ومنها قصر الجزيرة، اللي كان المقر الرسمي للضيوف، واللي اتباع بعدها كذا مرة، واستقر سنة 1919 في إيد راجل لبناني اسمه حبيب لطف الله، عمله سكن خاص، لحد ما جات يوليو أمته، ورجعته فندق تاني، وسمته عمر الخيام، وفي السبعينات اتباع تاني، واتسمى باسمه الحالي: فندق الماريوت.

الحفلة دي يهمننا منها حدث واحد، إنها كانت أول مرة يتعزف فيها سلام وطني لمصر، ومن هنا هنبداً نحكي قصة السلام الوطني وازاي اتغير لحد ما نوصل لنشيد بلادي بلادي.

المهم، قبل حفل افتتاح قناة السويس، الخديوي إسماعيل جاب مؤلف موسيقي إيطالي، اسمه جوزيبي فيردي، واداله 150 ألف فرانك ذهب، وطلب منه يعمل أوبرا «عايدة» علشان تتعزف في الحفلة المهمة اللي هتعمل.

هو اختيار «عايدة»، ما كانش بس علشان الافتتاح، بس هي كانت هتخدم على هدف سياسي هو حملة عسكرية على الحبشة، بس ده مش موضوعنا دلوقتي.

قصة «عايدة» كتبها عالم آثار فرنسي، اسمه ميريت باشا، والحته اللي بين ميدان التحرير وميدان طلعت حرب دي اسمها: شارع ميريت باشا، على اسم المواطن ده، اللي اكتشف آثار ومعابد أكثر ما أي حد يتخيل. لكن فيردي استعان بشاعر إيطالي، كتب نص الأوبرا اللي اتألفت وجهزت، بس ما اتعزفتش في حفلة الافتتاح، علشان الملابس والإكسسوارات والديكورات ما لحقتش تيجي من أوروبا، علشان كان فيه حرب عطلتها. واتلعبت أوبرا تانيه.

إنما عايدة كانت حاضرة، لأن جزء منها (جزء النصر) تم اختياره علشان يبقى أول سلام وطني في تاريخك يا مصر، وفعلاً اتعزف السلام في الحفلة، وبرضه فكرة السلام الوطني دي كان ليها هدف سياسي، هو تأكيد الاستقلال عن الخلافة في تركيا، وفضلت موسيقى فيردي رسمياً هي السلام الوطني، لحد ما حصل الاستقلال بعد ثورة 1919، وفي سنة 1923، مصر بقالها نشيد وطني، مش مجرد سلام، لأن النشيد الجديد بقى فيه كلمات وأشعار وحاجات من هذا النوع.

المهم ان مصر بقت دولة حرة مستقلة

يا سلااام يا مصر

إحسان شريف

تصدق بالله!

هتصدق إن شاء الله

فيلم إشاعة حب كان مكتوب أصلاً لـ «إسماعيل ياسين» كان هيعمل دور حسين، اللي عمله عمر الشريف.

قول والمصحف!

والمصحف.

والله

زي ما بقولك كده.

كان المفروض يبقى فيلم بأبطال تانيين خالص، حاجة كده ابن حميدو ستايل، بس إسماعيل ياسين كان في عزه، ومشغول في 500 فيلم، و700 حاجة، ففطين عبد الوهاب قرر حاجة تانية خالص.

فطين كان في ذهنه من قبلها إنه عايز يعمل فيلم كوميدي بممثلين اشتهروا بأدوار تراجيدية، وتراجيدية من النوع الغميق، اللي همّأ أبعد ما يكونوا عن الكوميديا، فلما إسماعيل انشغل، قال لك نشتغل المشروع ده.

عمر الشريف ويوسف وهبي أبرز الفنانين دول، لكن كمان اختار في دور بنت سلطح باشا إحسان شريف.

أهي إحسان شريف دي

هي اللي حابة أحكي لك النهارده حكايتها...

إحسان كانت مرات زكي طليعات، آرثر الطيب في فيلم الناصر صلاح الدين، وانفصلوا وكل شغلها لحد الفيلم ده كان تراجيديا.

إحسان مواليد حلوان، أهلها ربوها وعلموها، ووصلت لحد البكالوريا، اللي خدتها من مدرسة حلوان الثانوية، وكانت غاوية التمثيل، بس مكنتش زي كتير من الفنانين اللي بيلفوا عالفرق، هي كانت من أسرة عادية مستقرة، فكان أغلب شغلها في البدايات مع فرق الهواة.

اللي اكتشفها هو طليعات، وبعدين تجوزها، قبل ما انفصلوا اعتمدت على المسرح فترة، لحد ما انتظمت في شغل السينا.

حكاية إنها بنت ناس دي، خلتهم يستعينوا بيها في دور البنت الأرستقراطية المنفوخة نفخة كدابة، والكاركتري دي لزيق فيها، فحصرها في المساحة دي تقريبًا، مع إننا مثلاً شفناها بعدين في أدوار مختلفة.

إحسان هي أم أحمد زكي في «النمر الأسود» ست فقيرة غلبانة، وقدمته حلو، هي كمان الداية في فيلم البوسطجي، اللي بتتنقل أخبار البلد، وبرضه قدمته حلو، وغيره وغيره، بس مش كتير لما بنلتفت لإمكانيات الممثل، إحنا بنشوفه عمل إيه وأجاد فيه، فنحلبه.

بدأت إحسان مشوار السيميا بدري، بفيلم «هدية» مع محمود ذو الفقار، بس بعده محدش بقى بيديها أدوار أكثر من خمس سنين، لحد ما طلبوها في فيلم مع كمال الشناوي، وشادية اسمه «بين قلبين».

فضلت تعمل الحت الصغيرة، لحد ما عملت دور بارز في فيلم «أين عمري؟».

«أين عمري» ده كان رواية لإحسان عبد القدوس، والفيلم كان بطولة ماجدة الصباحي، وإنتاجها، ومشهور باسم «عمو عزيز» الجملة اللي كانت بتقولها ماجدة لزكي رستم، قبل ما يتجوزها، وتعيش معاه حياة القسوة واللي بالك فيه.

كان مطلوب ممثلة تلعب دور أخت عمو عزيز العانس، وده دور صعب من ناحية التمثيل، والفنانات يهربوا منه، فلما اختاروا إحسان ما اترددتش، وعملت الدور كويس، وده اللي خلاها حاضرة في الذهن، فلما فكر فطين في بنت سلطح باشا، نطت إحسان، وكلنا شفناها في الدور، وفاكرين جملتها: «بلدي أوي دي يا حسين».

من ساعتها، وإحسان اشتغلت بصفة منتظمة في الأدوار اللي زي دي، لحد ما اتوفت بعد ما عملت دورها في «شهد الملكة»، آخر أفلامها.

ربنا يرحمها..

ويرحم الجميع.

أبلة نظيرة

كأبي ست مصرية أصيلة، كنت قاعدة قصاد قناة من قنوات الأكل من كام يوم، أجندي في ايديا، وقلمي ورا ودي، ومستنية المقادير. بس الحقيقة ما اخبيش عليكم، ماقتنعش أوي بتورته السلمون بالزبادي والتين الشوكي. فقولت استنى البرنامج الي بعده.

وانا سرحانة في كم العك الي بيحصل قدام عيني، ماتعرف ده ميل لتعذيب الذات ولا أهو أي حاجة تعمل دوشة وخلص.

سرحت كده وقلت في عقل بالي. إلا هو كان إيه الحال قبل قنوات الطبخ؟

إلا وافتكرك شيرين في «المتزوجون» لما سأها مسعودي وإنتي هتعرفي عملي ملوخية؟

قوم ردت بألاطة كده او مال مش معايا كتاب أبلة نظيرة!!!!

ياااااه أبلة نظيرة

الكتاب الي ماكانش فيه بيت فيكي يا مصر يخلي منه. لدرجة إن كتاب أبلة نظيرة كان جزء من جهاز أي بنت بتستعد للجواز.

ده كمان الي كتير مايعرفهوش بأه إن كتاب أبلة نظيرة كان بيتم تدريسه.

آه والله زي ما بقولكوا كده!

كان بيتم تدريسه للبنات في مادة التدبير المنزلي لحد السبعينات تقريباً.

وبالمناسبة كل الي اتعاملوا مع الطبخ بشكل احترافي بياكدوا دايمًا إن أظبط مقادير ممكن أي حد يشتغل عليها وهو مغمض هي مقادير أبلة نظيرة.

إلا مين هي أبلة نظيرة؟

أبلة نظيرة هي السيدة (نظيرة نيقولا) مواليد 1902 وكانت بتدرس في مدرسة (الدراسات النسوية) وهي الصورة الأولى لكلية الاقتصاد المنزلي.

وسنة 26 تقرر الدولة إرسال بعثات لاستكمال دراستهم في الخارج، ومن ضمن التخصصات دي كان التدبير المنزلي.

فيتم إرسال نظيرة نيقولا و 14 زميلة ليها لجامعة جلوستر في إنجلترا.

الأهل يعارضوا طبعاً بس تفوق نظيرة في التعليم وأخلاقها يشفعونها عندهم، وتسافر فعلاً وتكمل دراستها لمدة 3 سنين في التدبير المنزلي وشغل الإبرة.

وترجع مصر وتبقى كبيرة معلمات الثقافة النسوية في مدرسة السنية، وكانت من أكثر الحاجات الي تحاول تزرعها في الطالبات، إن العين بتاكل قبل المعدة، وتجميل الأكل وإعداد مكان الأكل بأناقة ما يقلش أهمية أبداً عن إتقان الأكل نفسه.

شوف الجمال!!

في الأربعينات تعلن وزارة التربية والتعليم عن مسابقة لأفضل كتاب لفنون الطهي علشان يصبح مقرر على الطالبات.

وتتقدم نظيرة للمسابقة بالاشتراك مع زميلتها بهية عثمان ويألفوا أهم كتاب في تاريخ الطبخ في الشرق الأوسط كله الي بالمناسبة ما اسموش (أبله نظيرة)

اسمه (فن الطهي)

المميز في الكتاب ده إنه كان معد لبنات لسه يا دوب بيتعلموا الطبخ. قوم أبله نظيرة وبهية عثمان كانوا بيعلموهم حرفياً كل حاجة. من أبسط الحاجات زي مسكة المعلقة، وطريقة تعيير وتكيبيل المقادير لغاية عمال تورتة الجواز.

الكتاب اتطبع أكثر من 40 طبعة وحرفياً اتربت عليه مصر كلها وعلى وصفاته. الي المحترفين زي ما قلتكم بيشهدوا إنها لحد النهارده أظبط وصفات.

أبله نظيرة كمان كان ليها برنامج إذاعي يومي بتستناه ربات البيوت، وكان أول برنامج طبخ عرفته مصر. الكتاب تمت عليه تعديلات بسيطة بعد تغير الموازين من الوقية للكيلو جرام، وهنلاقي لحد النهارده طبعات قديمة في بيوتنا فيها المكاييل كلها بالأوقية.

وبعد 90 سنة عطاء تفارقنا أبله نظيرة سنة 92، بعد ما علمت 3 أجيال كاملة أصول الطبخ وخلقت فن بمعنى كلمة الفن وسمته (فن الطهي)

تحية للروح الي شبعتنا وأمتعتنا. تحية لروح أبله نظيرة.

أخو الرئيس

عادة لما تيجي تعرف حقيقة تاريخية اسمعها من عدوك قبل ما تسمعها من حبيبك.
القاعدة دي ذهبية وأثبتت دايمًا نجاحها. عدوك صحيح ممكن يزيّف الحقايق بشكل أو بآخر وبالأخص لو كان مهزوم، لكن هيديك في حكايته أكثر من ضوء وينورلك أكثر من منطقة ضلمة في الحدوتة اللي انت حافظها.

افتكرت الكلام ده وأنا بقرأ شهادة واحد من الطباط السابقين في الجيش الإسرائيلي خلال حرب 73 المجيدة.

الطباط اسمه (إيرون بن شتاين) وحاليًا بيشتغل طبيب في مستشفى جورج تاون في أمريكا.
بيقولك يا سيدي إنه كان نباتشي في المطار الحربي يوم عيد الغفران سنة 73، وأغلب الطيارين كانوا في أجازة، والساعة 2 وربع لاقوا طيارتين من طراز سخوي وميج بيهاجموا المطار.
الطيارة الأولى هاجمت الممر وحظائر الطيارات ودمرتهم تمامًا، الطيارة الثانية كانت بتهاجم الصواريخ المسئولة عن حماية المطار نفسه وكانت من طراز سكاي هوك.
الطيار الأول انسحب بعد أول دورة بعد ما أدى مهمته.

الطيار الثاني اتفاجئ بإن الصواريخ اللي بتأمن المطار عددها أكبر من توقعاته فقام بدورة ثانية لتدمير الباقي منها، وهنا بيقول صاحب الشهادة، إن الدورة الثانية دي ادتلهم فرصة يهاجموا الطيار الثاني، فقام بضرب مدافع الطيارة المصرية هو وزميله، بس الطيار المصري كان بارع جدًّا في تفادي طلقاتهم، وما اكتفاهم بكده ده قام بدورة تالته كمان للقضاء على منظومة دفاع المطار الإسرائيلي تمامًا.

وهنا زميل لهم أصاب الطيارة المصرية ودمرها بصاروخ محمول على الكتف، بس بعد ما الطيار الشهيد البطل قام بدوره بالكامل خير أداء علشان يلحق مكانه في جنة ربه بإذن الله.

البطل اللي بتتكلم عنه هو الشهيد طيار مقاتل محمد عاطف السادات، شقيق الرئيس الراحل محمد أنور السادات.

حكاية البطل عاطف السادات اللي قبل الحرب وخلال مرحلة الاسترخاء. . اللي كانت جزء من خطة الخداع الاستراتيجي، اللي كان بيصدرها الجيش المصري وقتها للأعداء، طلب من اخوه يقوم هو وزميله بمهمة انتحارية في قلب سيناء بالطيران ويدمروا اللي يقدروا عليه ويموتوا.

الشهيد اللي كانت آخر كلماته حسب الشهود قوله تعالى: ﴿بِ يَ يَ يَ يَ يَ يَ يَ﴾ (الأَنْفَال: 17).
حكاية من ضمن مئات وآلاف حكايات الفخر بأبطال جيشنا في حروب مصر على طول الزمن.
حكاية خلتنني أقف شوية قصاد فكرة كل الناس اللي موجودين في أماكن عمل قريين من قرايبهم أو
أهلهم المسئولين في نفس المكان.

الناس اللي النظرة العامة ليهم دايمًا أبدًا نظرة بنص عين وبتحمل كثير من النأوزة والتنبيط.
امم ماهو ابن أخت صاحب الشركة. . . آأآأه ماهي الكتكوتة أخت رئيس مجلس الإدارة. . . آه ماهو ابن
جوز بنت خالة جيران عم احمد قريب بنت عمتهم من بعيد.
ماينقولش الواسطة والمحسوية حاجة حلوة.
لأ مش حلوة وهاجمناها أكثر من مرة ورا نفس الميكرفون ده.

ولا هي ازدواجية معايير أبدًا. بس كمان ماينفعلش نظلم ناس اجتهدت في مواقعها وبذلوا جهود مضاعفة،
علشان يثبتوا إنهم مستحقين لمكانهم ومواقعهم واللي وصلوله مش لأنهم ذوي حظوة يعني زي ما بقولكوا
كده.

أكم ناس ضحوا بحياتهم نفسها علشان واجبهم يادوه على أكمل وجه في نفس الوقت اللي كان لهم بدل
الضهر ألف يركنوا عليه وغيرهم يقوم بمهامهم.
احكموا على الناس بأداؤهم وشغلهم مش بفكرتكم السابقة عنهم. مافيش حاجة مطلقة وعهد الله وما
فيس قواعد مالهاش استثناءات.

اسلمي يا مصر

أول سلام وطني لمصر

كانت مزيكا فيردي

بس بعد ثورة 1919، بدأ الكلام عن إن السلام بتاع فيردي، ما ينفعش يفضل السلام الوطني لمصر، وزى ما كان فيه حراك سياسي، وشد وجذب، وسعد زغلول ونفي واستقلال ودستور جديد، وما إلى ذلك، كان فيه عركة على النشيد الوطني الجديد لمصر.

آه والله زي ما بقولك كده.

عركة

دي مصر يا جدعان مش أي حاجة

تبدأ الحكاية مع تأسيس لجنة اسمها «لجنة ترقية الأغاني القومية»، سنة 1920، وترقية هنا مش معناها الصعود الوظيفي، لأ، دي جاية من الرقي، يعني حاجة كده زي لجنة النهوض بالأغاني القومية، اللجنة دي كانت برئاسة جعفر باشا والي، وزير الأوقاف (وأحد مؤسسي النادي الأهلي).

بعدين أسس «طلعت باشا حرب» شركة «ترقية التمثيل العربي» وقرر إن يوم افتتاحها يكون 1921، وفي الافتتاح هيتلعب نشيد وطني، النشيد ده هتختار كلماته لجنة ترقية الأغنية الوطنية، من خلال مسابقة، وتدي لمؤلفه 100 جنيه، وبعدين تديه لعدد من الملحنين، وتختار أحسن لحن.

إتقدم 56 شاعر بـ 56 نشيد، وطبعًا اللي كسب كان أحمد بيه شوقي، وكان بيقول:

لَنَا وَطَنٌ بَأَنْفُسِنَا نَقِيهِ

وَبِالدُّنْيَا الْعَرِيضَةِ نَفْتَدِيهِ

اللجنة أدت النص لحوالي سبع ملحنين، وفي الآخر اختارت لحن سيد درويش، واتلعب في الافتتاح المذكور.

على الناحية الثانية، كان مصطفى صادق الرافعي ضد كل الكلام ده، وعمل حملة صحفية ضد لجنة ترقية الأغاني، وضد شوقي، وضد جعفر والي، وضد الكل كليلة.

كان فريق الرافعي فيه كمان صفر بيه علي، واحد من مؤسسي معهد الموسيقى العربية، وعضو مجلس إدارته، ثم وكيله. وصفر علي كمان كان من الناس اللي بيعتبروهم حراس للموسيقى العربية.

بعد 1921، حصلت معارك صحفية كبيرة بين الفريقين، لأن كل فريق عايز يحط هو النشيد الوطني، اللي كان بالضرورة هيظهر بمجرد الحصول على الاستقلال، وإصدار الدستور المصري (كانت مسألة وقت).
الرافعي عمل لجنة ضد اللجنة اللي اختارت شوقي، سهاها «لجنة مارش سعد»، وعمل نشيد مناهض
بيقول:

إلى العلا إلى العلا
إلى العلا بنى الوطن
إلى العلا كل فتاة وفتى
إلى العلا في كل جيل وزمن
فلن يموت مجدنا، كلا، ولن
بس بعد كده راح عامل نشيد تاني بيقول:
اسلمي يا مصر إنني الفدا
ذي يدي إن مدت الدنيا يدا

واستقروا على النشيد التاني، لمواجهة نشيد أحمد شوقي، ولحنه «صفر علي»، وبعد الشد والجذب والذي منه، ومعارك انحاز فيها بديع خيرى لـ «اسلمي يا مصر» قدر فريق «صفر والرافعي» إنه يفوز بالنشيد الوطني، خصوصاً إن علاقة «صفر» بالملك فؤاد نفسه كانت قوية.

فضل النشيد ده هو النشيد الوطني لمصر لحد ما قامت يوليو 1952، فغيروه، وفضل كنشيد رسمي للشرطة المصرية، لكنه على المستوى الجماهيري اندثر تماماً، زي ما اندثرت كل حاجة قبل 52، لحد الثمانينات. لما حفيد صفر علي، واسمه أيمن صفر لعب النشيد في التلفزيون، وبدأنا نسمعه، ولما ظهر اليوتيوب شفناه وشيرناه، ولسه بنشيره
واسلمي يا مصر

إعلانات بير السلم

الإعلان حرفة وفن

فن مرئي ومسموع ومكتوب ومتعلق ومتوزع وملزوق، فن يتواصل بكافة أشكال التواصل الي في الدنيا.

من الآخر الإعلان دنيا متكاملة، وكل ما زادت الرغبة في الربح كل ما اتجهنا لحرفة وحرفية الإعلان أكثر وأكثر.

إنتاج الإعلانات في العالم يقوم عليه مؤسسات ضخمة، ميزانية بعضها أكبر من ميزانية دول شمال إفريقيا مجتمعة! أه وربنا زي ما بقولكوا كده.

والحقيقة وبما إننا من أوائل الدول الي دخلها الإعلام بكافة أشكاله مكتوب ومرئي ومسموع، كنا بطبيعة الحال من أوائل الدول الي صناعة الإعلان فيها بدأت بدري جداً.

وظهرت على الساحة كيانات ومؤسسات إعلانية كبيرة وضخمة، قدمت فن حقيقي يتحسب ضمن الفنون الراقية فعلاً، بعض إنتاج المؤسسات دي وصل إبداعه لدرجة تشكيل جزء كبير من وعي أجيال كاملة، ارتبط ألحان وتصوير وكلمات الإعلانات في ذهنها بذكريات طفولتهم وشبابهم، وبقت بالنسبأهم نوستالجيا بديعة في حياتهم.

تعرفش بأه الي حصل لما دخل عصر الفضائيات علينا بقرونه، وظهرت فوضى قنوات بير السلم والبدرون وتحت الأرض، ظهر معها نوعية إعلانات تواكب نفس النوعية دي من القنوات.

قوم ظهرت إعلانات شبه القنوات دي بالظبط!!

أجنة مشوهة كده مالهأش معالم، كل حاجة فيها رديئة ورخيصة وبأسة لأبعد الحدود، بجد زي ما بقولكوا كده

تبقى بتفر في القنوات في أمان الله، تبص تلقى، أفندي طول بعرض ببدلة مغرق دماغه فازلين وماسك علبه بلاستك في إيدته، وهات يا تفنيد في فوائد الدواء المعجزة، الي بيخسس الجناب ويطول الشعر ويعالج آلام الركب والمفاصل، ويشد الجلد، ويعالج الاكتئاب، ويرد الغايب ويوشوش الدكتورا الكف، ويبين زين كمان لو عاوز!!

ملو الدنيا كناعة بالقشطة كده. . آمال العالم ناحرين قلبهم اختراعات واكتشافات ليه؟؟؟

ما شربة عم محمود بتنزل الدود.. أهى وكلة زي الفل!!

تقلب عالقناة اللي بعديها تلاقي شابة موديل من اللي دراعك أتخن منها 7 مرات بتؤكد إنها خست 400 كيلو جرام و176 إنشاً من محيط أوراكها لأنها استخدمت الجهاز الفلاني أسبوعين فقط!!

تاخذ حباية الضغط وتقلب القناة تلاقي دول عظمى أنشأت شركات بتبخ الدبان والصراصير!!

تقلب تلقى شوار العروسة المكونة من 12 ألف قطعة بـ 150 جنيه و30٪ خصم لمدة أسبوع!!!!

ياختبيبيبيبي هو فيه إيه يا جدعان؟؟؟ مش كده!!

ما هو إن كان المتكلم مجنون ما هو المستمع المفروض عاقل.

يعني مش بس شيء متردي على المستوى السمعي والبصري والإنتاجي وعلى مستوى كل معطيات العمل الإعلامي.

لأ ده كمان اشتغالات علني!! اشتغالات بتوصل لصحة النبي آدمين، اشتغالات بتبيع للناس الوهم عيني عينك.

طب ده المصيبة الكبيرة بأه، إنك تلاقي قنوات موجهة المفروض للعيال الصغيرة، كارتون وأغاني أطفال وبعدين تلاقيهم جايين إعلانات منتجات، عدم المؤاخذه للكبار فقط!! والأنييل والأضل إعلانات الدجل والشعوذة العلني!؟

مين فين بجد؟؟؟ لأ يعني مين مسئول عن إيه؟؟؟ نقول يا مين إلحق يا مين حوش؟؟؟

والمهم إن يوماتي على الله تسمع أسامي الشركات دي مقبوض على أصحابها بتهمة النصب أو بيع منتجات غير صالحة للاستهلاك الآدمي.

وبردو الإعلانات شغالة، وبردو الناس بتتصل وتشتري!؟

طب مؤقتاً لحد ما يشوفولنا حل، نحاول إحنا نوعي نفسنا ونوعي الناس، يمكن.

الأخلاق

في مدارسنا، كنت أول ما تدخل من الباب، وتدخل الحوش، تلاقي لافتات مكتوبة بعناية، كان يكتبها خطاطين محترفين، ويدعوا في أنواع الخطوط، إيشي ثلث، كوفي، نسخ، حاجة آخر أهبة.

من جمال اللافتات دي، كنا نحب نبص لها، كانت زي لوحات فنية حروفها بتنطق.

جمال اللافتات دي، كان بيعمل حاجة تانية غير تربية الذوق الفني، وهي إن المعاني المكتوبة في اللوحات دي بتلرزق في دماغنا، وبتنغشش في وجداننا، وبترسخ جوانا باعتبارها حقيقة، مش لافتات مكتوبة سد خانة علشان لازم يبقى فيه لافتات.

من الجمل اللي كانت مكتوبة في مدرستي، مدرسة كذا، البيت العظيم لأمير الشعرا أحمد بيه شوقي:

وإنما الأمم الأخلاق ما بقيت

فإن همو ذهب أخلاقهم ذهبوا

آه والله

زي ما بقولك كده.

مش عارفة إمتى وازاي وازاي سمحنا إن البيت ده يتحول لمادة سخرية، ويبقى فيه ناس كثير بتتعامل معاه على إنه حاجة تضحك، مع إن الحكاية ما تضحكش خالص، والبيت ده بالذات لازم نتعامل معاه بمنتهى الجدية اللي في الدنيا.

الأخلاق

الأخلاق يا جماعة

الأخلاق أكبر بكثير مما نتصوره

الأخلاق هي المسطرة اللي بيحطها أي مجتمع علشان يحدد إيه اللي يصح وإيه اللي ما يصحش، إيه اللي ينفع نعمله وإيه اللي ما ينفعش.

أي مجتمع مفيش أخلاق بيلتزم بيها الأفراد، هي مجتمعات في طريقها للانهار، وهو ده معنى بيت شوقي بيه، وهو اللي عرفناه من تجارب البشرية في كل تاريخ البشرية.

صحيح الأخلاق بتختلف من مجتمع لمجتمع، وجايز جداً نكون محتاجين نعمل أبديت لحاجات كثير، ونعيد فيها النظر، لكننا طول الوقت محتاجين ندور على أخلاق نلتزم بيها كلنا، وفيه أساسيات بتبقى عاملة

زي جرس الإنذار، لما بتجاوزها، بنبقى دخلنا دايرة الخطر.

من الأساسيات دي، واللي بقينا نتجاوزها بمنتهى السهولة، هي شتيمة الناس بالاسم، خصوصًا على السوشيال ميديا.

وعايزة ارجع معاكم بالذاكرة، لما بدأت السوشيال ميديا في مصر، كانت فكرة إن الواحد يتشتم، مجرد الفكرة، حاجة مرعبة جدًا، وكان اللي بيقرأ شتيمة حد كاتبها علني كده، كان بيتهز من جوه، باعتبارها حاجة غير عادية.

بمرور الوقت، السوشيال ميديا عملت زي تمارين، فبقى شوية شوية عادي، بقيت تقرا شتيمتك بأشع الشتائم، واتهامك بأفزع الاتهامات شيء عادي، ما يستحقش لإنك تهتم بيه. لحد ما وصلنا لإن فيه ناس بتفخر إنها بتتشتم على السوشيال ميديا، وبقت الشتيمة عامل من عوامل النجاح.

الخطوة اللي بعدها، هي إنك تشتبك مع اللي بيشتبك، تشتبك معاه مباشرة، فترد عليه، وتشتمه إنت كمان، أو إنك تشتمه على مساحتك.

النتيجة إيه؟

مجتمع أفراد مش بيحترموا بعض، والشتيمة تبقى مش بتحوق، فتتطور أساليب العداوة والهجوم، ومن الشتيمة للكوميكس، لضرب الأخبار، لترويج الإشاعات، وبعدين ده يبقى له أنصار، وده يبقى له أنصار، وأنصار ده بيدعوا يشتموا في أنصار ده.

متهيألي إن هو ده بالضبط اللي صوراه الكاتب الساخر العظيم أحمد رجب في قصة «فوزية البرجوازية».

الخلاصة

عايز تهدم مجتمع، إلعب في ظبطة أخلاقياته، وخلي أفراده يتعاملوا مع بعض من غير أبسط الأخلاق، واقعد بقى اتفرج على النتيجة.

آه والله

زي ما بقولكوا كده.

صباح الأمل

الأمل مش كلمة

الأمل فعل

الأمل مش إني ألبس نضارة وردية، وأقول الدنيا تمام

ده ما اسموش أمل، ممكن يبقى اسمه أي حاجة تانية،

الأمل إني أقدر أكمل، وأستمر، وأمشي كل لحظة خطوة لقدام ولفوق

أيوه، أنا أقدر، أيوه إحنا نقدر

بس لازم نبقي عارفين كويس، ومكتشفين نفسنا، نقدر نعمل إيه

فنعمله

آه والله زي ما بقولك كده.

وبمناسبة الأمل، تعالى أحكي لك لحظة ما تتنسيش

لحظة عاشتها البشرية بأكملها

لحظة بمليون لحظة وأكثر

اللحظة دي كانت في أولمبياد لوس أنجلوس 1984، أولمبياد يعني رياضة، وفيه ناس ليها في الرياضة، وناس زي حالتي، مش متابعة والله.

كان فيه مسابقة الماراثون

الاستاد مليون

الناس قدام الشاشة بتتابع

مسابقة عادية

وفجأة دخلت في الكادر عداءة، بنت من المتسابقات

كان شكلها ما يتوصفش

تعبانة ومنهكة وبتمشي بصعوبة شديدة

مش قادرة تنقل رجلها من التعب

لكنها مستمرة

العداءة دي كانت من سويسرا، اسمها جابرييلا أندرسون، عمري ما نسييت الاسم، وعمري ما هانساه، الاسم ده له معنى كبير أوي أوي أوي جوهر كل اللي عاشوا اللحظة دي.

الناس في الاستاد ما بقيتش متابعه مين هيكسب، أو مين فعلاً كسب كلهم بقوا مهتمين بالعداءة اللي بتجر رجلها، ومصممة تكمل السباق.

اتعرف إنها خدت ضربة شمس، وبكده مستحيل تكسب

بس هي شافت إنها بتمثل بلدها وشعبها، ولازم تكمل للآخر

الاستمرار في حد ذاته شرف

مكنش حد هيلومها لو انسحبت، ولا حد هياخد باله

بس هي مش بتفكر غير في مهمتها.

الناس اللي قدام التلفزيون بدؤوا يقولوا للناس اللي متابعه

صاحبتني كلمتني

افتحي التلفزيون بسرعة وهاتي الأولمبياد

أولمبياد إيه يا ست إنتي؟ أنا ماليش فيه

إنتي شكلك رايقة، وأنا ورايا شغل

كنت بأكتب ساعتها

صاحبتني أصرت: افتحي بس

وفتحت التلفزيون

شفت منظر البنت، كان حاجة تشيب

متهيألي إن كل إنسان في الدنيا دي حس لحظتها إن البنت دي بتمثله هو شخصياً.

تقريباً خلص السبق، والعداءات كلهم وصلوا خط النهاية، بس بالنسبة لنا، السبق ما بقاش مين يوصل

الأول، السبق كان إن جابرييلا توصل خط النهاية

السبق كان بين الإنسان والظروف

بين الإنسان وطبيعته

بين الإنسان ونفسه
بين الإنسان ومهمته اللي هو جي علشانها
ولازم نكسب السبق ده
مع كل خطوة كانت بتخطيها، كانت دقات القلوب بتزيد
خط النهاية بيقترب خطوة
بس التعب بيزيد درجة
لحد فين هتقدر تصمد وتتحمل
كل ما خط النهاية يقرب
كل ما الحسرة هتبقى أكبر لو وقعت خالص وما كملتش
كانت لحظات مهيبة
دقات القلوب ما بقتش مستحيلة
فوقفنا على ضوافر رجلينا
وسنان بتقرقض في أقرب حاجة ليها
مخدة بقي
مشبك خشب
أي حاجة
أعصابنا مش مستحيلة
وأخيرًا
أخيرًا
أخيرًا
وصلت البطلة لخط النهاية
وأول ما وصلت رجليها ماشالتهاش، ووقعت
لو سألت أي حد من اللي عاشوا اللحظة دي: مين اللي خدت الميدالية الذهبية
هيقول لك والله ما أعرف
إحنا بطلتنا البنت دي

البنء اللل اءء العالء كلء ءرس كبئر فل الإصرار

وهو الأمل إله ءبر الإصرار؟

ءبر إنك ءكمل وءسءمر وءقول لنفسك كل لءظة

أبوه، أنا أقءر

آه والله زل ما بقولكوا كءه

صباح الأمل

الأباطية

لما نيجي نتكلم عن العائلات المصرية الي كان لها دور رئيسي في تاريخ مصر، ونبتي نعدد ونفند كده في أسامي العائلات، صعب أوي مايتبادرش لذهننا أول اسم بشكل تلقائي ويكون الأباطية!!

الأباطية اسم عريق بكل ما تحمله الكلمة من معنى الحقيقة، أي وربنا زي ما بقولكوا كده. وإحنا بنفتش كده في التاريخ الأباطي، لاقينا إنها أكثر عائلة ارتبط اسمها بلقب باشا!!

آه أكبر عدد من الباشوات في تاريخ مصر كان من بين أفراد العائلة الأباطية.

اختلف المؤرخون حول الأصول الأباطية هل هي شركسية ولا أناضولية، لكن في النهاية دخلوا البوتقة المصرية إياها، وفورًا بقوا جزء من نسيج المحروسة.

محمد علي باشا لما قرر ينشئ مجلس استشاري يساعده في نهضته الحديثة اختار اتنين من كبار العائلة الأباطية وقتها.

ومن وقتها لم تخل وزارة مصرية لحد النهاردة من اسم أباطي واحد على الأقل إلا في حالات نادرة نعددها على صوابع الإيد الواحدة!!

العيلة الأباطية منبتهم في الشرقية وبيتشروا في أرض مصر كلها وفي كتير كمان من الأقطار العربية، واشتهروا باستصلاح الأراضي البور وتعمير الأراضي الصحراوية وضمها لمساحات مصر الزراعية في كفر الشيخ والشرقية والزقازيق.

وكم كفور وعزب اتسمت بأسامي الأباطية في مصر كلها.

زي قرية أباطة، وعزبة عبد الحليم أباطة، وعزبة عبد العظيم بك أباطة بمركز فاقوس، وعزبة محمد بك أباطة، وعزبة دسوقي أباطة مركز الزقازيق، وعزبة بغدادي أباطة مركز منيا القمح بالشرقية، والربعماية أساس العائلة.

مشاهير الأباطية محتاجين بأه مجلدات نتكلم فيها عنهم، الخمس دقايق بتوع البرنامج مايكفوش اسم واحد بس منهم صدقوني زي ما بقولكوا كده، بس مايضرش نقول كام علم منهم.

خد عندك الأديب ثروت أباطة، ووزير الكهرباء السابق ماهر أباطة، العسكري والقيادي وجيه أباطة، أمين أباطة وزير الزراعة الأسبق، محمود أباطة رئيس حزب الوفد السابق، فرج أباطة رجل الأعمال، وطبعًا دنجوان مصر الأول والأخير رشدي أباطة.

وكم أسامي مايسعهاش مجلدات وعيب ننسى أو نغفل اسم واحد منهم بس نجيب وقت مينين؟
بصوا حاجة حلوة إن البني آدم يكون ناجح، وحاجة ترفع الراس إنه يكون منتمي لكيان أو عيلة تفتح
النفس كده وتدي لاسمك رنة عراقية وأصل.

بس الأحلى بجد إنك تكون ابن نفسك!! آه ابن نفسك. . . بني آدم ناجح لأنك تستحق النجاح، متفوق
لأنك مبدع، بتوصل لبي انت عاوزه لأنك الأحق والأجدر.

وعلى فكرة عمر ما حد نجح نجاح حقيقي لأن اسمه آخره لقب رنان. لأ لو فاشل بيبقى متعلم عليه
وبزيادة كمان، لأن الكرسي بيكون واسع ومبهوق والرايح والجاي بيشفه بيلؤ في مكانه ويضحك ويفطس
على روحه من الضحك من منظره.

ولو سألت أي شاب من شباب الأباضية على سبيل المثال بما أننا جايين في سيرتهم هتلاقيهم في كل
المجالات اللي في الدنيا. . . أطباء، مهندسين، محامين، تجار، إعلاميين مهاجرين، مدرسين، عسكريين، فنانين
وكلهم عندهم إجابة واحدة. لأ مااعتمدتش على العيلة في حاجة، كل واحد في اتجاهه بيعمل كل اللي يقدر
عليه!

حاجة تشرف وتفرح بجد وتستحق تفكر فيها وتقرا عنها، وتفتخر إن مصر فيها عيلة عريقة وأصيلة زي
العائلة الأباضية.

تحية لكل أفراد العائلة الأباضية وتحية لإسهامات أفرادها الدائمة في بناء بلدهم.

الأحلام المؤجلة

الزميلة العزيزة والأخت الفاضلة queen latifa - كلنا اخوات في الله بتزغرولي كده ليه؟؟؟! - ليها فيلم من أحلى أفلامها إن لم يكن أحلامهم.

فيلم last holiday أو الأجازة الأخيرة.

بيحكى الفيلم عن ست في أواخر الثلاثينات مش متجوزة وبشتغل بياعة في محل، وبتحب زميلها في صمت، ومش بتصرحله، عايشة في بيت عادي، أقصى حاجة بتعملها إنها مشتركة في كورال الكنيسة، بتتخبط في نافوخها مرة قوم تعمل فحوصات، تكتشف إنها مصابة بمرض نادر وهتموت خلال شهر بالكثير.

هوب تتقلب حياتها فوقاني تحتاني. تغضب وتسب وتلعن وتكتئب، تدور على علاج. . . مافيش علاج لحالتها. تدور حتى على حد تشكيله وجيعتها. . . ماتلاقيش، تمد إيدها وتطلع كراسه كانت كاتبة فيها كل اللي نفسها فيه.

بس. . . . تطق في دماغها وتروح تسيل كل الفلوس اللي حيلتها وتأمينها ومعاشها وتبيع كل حاجة وتقرر تروح أجازتها الأخيرة.

أغلى فندق في أوربا وفي جناح ملكي، وتعمل كل اللي نفسها فيه. قابلت أحسن شيف في العالم لأ واتفصحت عليه وطبخت معاه كمان. نطت بحبل (bungee jump) اتزحقت على الثلج. اتعرفت على رجال أعمال ومسؤولين في الحكومة، الكل كان بيحاول يفهمها ويتعرف عليها، معجبين بانطلاقها وعفويتها وشخصيتها المجهولة.

في الآخر اكتشف طبيبها إنها لا عيانه ولا حاجة. وحببها سافر لها واعترف لها بحبه واتجوزوا وفتحت مطعمها الخاص والحياة رجعت نورت من جديد.

الحدوتة الحلوة البسيطة لو وراها حاجة فهي فكرة الأحلام المؤجلة.

بنعيش حياتنا بطولها وإحنا بنكركب في أحلام فوق بعضها. نخزن في أمنيات، ونستف في لقاءات وعلاقات ناويين نعملها، ونفضل نعبي ونقول هنعمل وهانسوي

هلعب رياضة

هعمل فورمة الساحل

هسافر شرم

هاتفرج عالصحرا

هاطلع الجبل

هاتعلم اضرب كما نجة

هرقص تانجو

هصحي الصبح أجري عالكورنيش

هحضر حفلة فيروز

هسهر اتفرج عالشروق

هاكل أكل صحي

هربي كلب

ها..ها..ها..ها..ها..ها..

لحد ما تبقى الأمنيات

هاروح المستشفى، هعمل عملية، هطقطق صوابعي، هادفن في البلد جنب أهلي!!!!

كمية ها مابتخلصش

ولا فيش حاجة منها بتتعمل!!!

كمية أمنيات مؤجلة مالهش أول ولا آخر والدنيا مابتوقفش، وعجلة الزمن ماشية تفرم وتفرتك في أمنياتنا وتعملها delete أول بأول، وإحنا مطاوعين العجلة وبتتفرج على أمنياتنا وهي بتدهس قصاد عينا ونضيف أمنيات جديدة، وسقف طموحنا يوطى ويوطى لحد ما يتطربق على دماغنا.

لأ ما يصحش وعهد الله. آه بجد ما يصحش زي ما بقولكوا كده. ماتجيش

ماتركبش، ماتنفعش... وكل أساليب الرفض والنفي اللي في الدنيا.

إيه يعني كبرت ولا كبرتني؟

إيه يعني عيالك بقوا شحطة واطول منك؟

إيه يعني الشعرتين اللي شابوا؟ وايه يعني الشغل ما بيرحمش.

إحنا بشر بالمناسبة... آه بجد زي ما بقولكوا كده

إحنا بشر والدنيا والوقت ماشيين ما يوقفوش لحد. وحياتنا أكشن تصوير مافهاش بروفات.

المشهد لا هيتعاد ولا هيبقى فيه فرصة تانية تحققوا فيها الأمنيات المكركبة فوق بعض دي.

قومي وقوم منك ليها لها له، طلعا كراسه الأملات من دماغكوا والحقوا الي تلحقوه منها.
ملعونة كل القيود الي تمنعكوا تحققوا الي اتمتوه وشقيتوا وانتوا مخزنيه ومستنين فرصة لتحقيقه.
اخلقوا الفرصة. ماتستوش مفاجأة ولا حد ييجي يشدكوا يحقلكوا أحلامكم.
اسعوا يا جدعان مايش وقت.

الموضوع ده مكلف؟

آه مكلف طبعًا الحق يتقال.

بس الأكادة أن تكلفة أي تقنية جديدة بتبقى مبالغ فيها لأن بيتصرف عليها لحد ما تتوجد أصلاً. وبعد كده خلاص بتبقى المصاريف مصاريف إنتاجها ودمتم.

الصين بأه قررت تتوسع في الموضوع - هيقليوها زحاليق شكلهم - قالك قرروا يشتروا 4 طائرات خاصة للرش ويطوروا 8 عندهم، ويستحدثوا نظام صاروخي للرش، ويصرفوا 168 مليون دولار كمان في الأبحاث الخاصة بالموضوع ده.

القصد / العلم جبار يا جدعان آه وربنا جبار.

المشاكل مهما كبرت وبقت طول الجبال، وعليت لجل ما تناطح السماء، تيجي قصاد العلم وهوب تقلب أرنب.

العلم اللي قادر يحل أي أزمة.

ثورة العلم في كل المجالات اللي خلقها ربنا بتخلينا نهج وإحنا حيا لله بنتفرج ونقرى عنها، ونستعجب ونجيب الكلام ده في برامج ساركازم من باب الاندهاش، ومصمصمة الشفايف.

الحاجات دي مش خيال ولا أفكار طايرة والناس لسه بتتناقش فيها.

الحاجات دي واقع حاصل دلوقتي اهوه، في ذات نفس اللحظة اللي عربية حضرتك بتكركر فيها عالمحور، ممكن تكون طيارة طلعت في الصين تنزل شوية مطرة تروي كام ألف فدان ثوم صيني من اللي بيتقشر لواحد ده، علشان تصدروا هولنا نعمله مع الملوخية.

آه والنبي زي ما بقولكوا كده

فين إحنا من اللي بيتقال ده يا بشر؟

آه يعني بنعمل إيه غير الفرجة والمشاورة واننا نعمل باي باي من وراقفا اللي طالعين في الصورة، زي العالم الرخمة اللي بيتلموا في التصوير الخارجي؟

ده حتى مراكز البحوث والكليات والجامعات، الأبحاث اللي فيها مرصصة جنب بعض جنب بعض مدفين من البرد وقاعدين بس يلماوا عفرة وتراب!!

وميزانية البحث العلمي عندنا راخرة حاجة كده عاوزه محلول معالجة الجفاف!

والدنيا في سبق والكل مشمع الفتلة وماحدش بيبيص لأخوه

طب وبعدين مكملين كده لإمتي؟

ما حد يقولنا يا جدعان!!

الأوبرج

قاعدة بتفرج على مسرحية (أنا وهو وهي) للراحل العظيم فؤاد المهندس وجميلة الجميلات شويكار، إلا وافتكر أحداث المسرحية اللي بيقع الفصل الأول منها في الأوبرج.

وافتكر فوراً الأوبرج اللي كان على كل لسان في أفلام ومسرحيات الخمسينات والستينات!!

رايحين فين رايحين الأوبرج

جايين منين كنا في فرح في الأوبرج!

الجمعة الجاية نصطاد بط في الأوبرج.

بالليل هاروح أسهر في الأوبرج!

أوبرج أوبرج لدرجة ان وقع كلمة أوبرج في حد ذاته على ودن النفر مننا بقى سينائي جداً!!

والشهادة لله الأوبرج طول عمره قيمة وسيما والغريب بأه إنه من الحاجات اللي لسه محتفظة برونقها وجمالها. . . . وهو أمر يستاهل الاحتفاء الصراحة في المحروسة اليومين دول.

آه والنبي زي ما بقولكوا كده

تعا اما نحكي عن الأوبرج شوية

قالك يا سيدي مولانا فاروق كان قاعد في ليلة برد في بدايات حكمه في الثلاثينات، وإذا به يفكر إنه يختار مشتى لطيف لليالي البرد دي، ويبقى في نفس الوقت مش بعيد عن القاهرة، زي أسوان (مشتاه المفضل) ويقدر يمارس رياضته المفضلة اللي هي الصيد بكافة أنواعه.

يطلعوا مستشارين صاحب الجلالة بخرايط مصر ويقولوله هنا ينفع وهنا ينفع.

قوم يختار بحيرة قارون ولما يسألوه اشمعنى؟

يقول قريبة من مصر وفيها منظر جميل وأقدر أمارس أكثر من نوع من الصيد غير إن هواها دافي في الشتا وبارد في الصيف!!

اختيارات ملوك بأه؟

وفعلاً يتبني الأوبرج كاستراحة ملكية أنيقة وكعادة الملك العاشق للأناقة والرقي الملكي والكاره جداً للبهرجة، يتبني الأوبرج على الطراز الروستيك. ويقع صاحب الجلالة في غرام المكان. ويتحول لمكانه

المفضل للقاءات الزعماء والقادة وحتى للقاءاته الخاصة بأصدقائه وحاشيته.

تشهد قاعات الأوبرج لحظات تاريخية كثير جداً.

أشهرها اللقاء التاريخي بين تشرشل رئيس الوزراء البريطاني وجمالة الملك عبد العزيز آل سعود، واتسمت القاعة الي شهدت اللقاء ده بقاعة تشرشل.

الأوبرج بيحتفظ بأجمل إطلالة على بحيرة قارون الرائعة، الي تعتبر بالمناسبة واحة من أجمل البحيرات الطبيعية في العالم كله.

(منظر الغروب من شرفات الأوبرج قد يدفعك للبكاء تأثراً)

الجملة الي قالها تشرشل لما زار الأوبرج

طبعاً ولأن الأوبرج أقيم أصلاً كلودج للصيد ففيه رصيف خاص للملك على البحيرة مباشرة يقدر يصطاد منه أو ياخذ قارب لقلب البحيرة ويشوف البط ويصطاده.

ده غير إطلالة الاستراحة على وادي الحيطان الي بيضم صورة للحياة الأولية في عصور ما قبل التاريخ.

حاجة في منتهى الروعة لا يمكن تتوفر في مكان تاني في العالم كله.

الاستراحة بعد عام 52 استلمتها وزارة السياحة واتحولت لفندق خمس نجوم. . . اتحرك من مستغل للتاني لحد ما وصل لحالة سيئة جداً سنة 2005

بعد كده استلمته شركة فنادق عالمية رجعت له لسيرته الأولى الحقيقية مع الحفاظ على حالته وطابعه الملكي سواء في الديكورات أو الطابع العام للمبنى.

مصر فيها أماكن أحلى من خيالنا حتى، أمان بنسبيها ونسافر ندفع الآلافات علشان نشوف حاجات في ربع جمالها ونتوهم بيها؟

غلطتنا؟ يمكن

بس الأكادة إنها غلطة أي حد مسئول عن الجمال ده وسايينا مانعرفش عنه حاجة. أو حتى ساكت وسايب الزمن يلعب لعبته وينسينا ولا بيفرجناش على الروعة دي أول بأول.

آه والله

زي ما بقولكوا كده

البداية الجديدة

موسم جديد. . .

بنتدي معاكم موسم جديد، وسنة جديدة من عمر البرنامج.

البرنامج الي دردشنا فيه عن كل حاجة تقريباً، الي فكينا مع بعض فيه عن مكنونات صدورنا، وبعبعنا فيه في التاريخ والجغرافيا والسيما والتلفزيون وحياتنا الاجتماعية وكم حواديت وحكايات.

55 ألف كلمة قولناهم في الموسم الي فات.

والنهارده بنتدي مشوار جديد

مشوار جديد من الكلام والحكي ومحاولة دق الأجراس وتفتيح الجروح والطبظة عالوجع والفرحة، آه الفرحة بالحاجات الحلوة والضحك والتريقة عالموم علشان ماتضحكش هيا علينا.

وفكرة انك تبنتدي موسم جديد، طريق جديد، علاقات جديدة، مواليد جداد، بيت جديد. . . فكرة حلوة، كل حاجة جديدة حلوة، الهدمة الجديدة فرحة، الحب الجديد شوقه، الوظيفة الجديدة نصره، العيل الجديد رزق.

كل جديد بيحمل معاه شكل من أشكال البهجة والانتصار. وشيء كمان من الترقب والتوجس والخوف أحياناً.

من منطلق إننا بشر وطبيعتنا البشرية ميالة أكثر للهدوء والرتابة والاعتیاد والتغير مش أحسن حاجة بتحصل للنفس البشرية.

بس عادي الحجر ده الي بيترمي في المياه الساكنة، قوم يخلق دواير كده واضطرابات تحركها وتفرفشها وتنكش محتواها مطلوب دايا.

مطلوب ما نستسلمش في حياتنا للتيار، حلو نمشي في سكتنا والأحلى لما تكون سكتنا دي بتحققنا الي إحنا عاوزينه. بس برضو مطلوب من وقت للتاني نرمي حجر كده في البركة.

نكسر روتين، نثور على وضع رتيب وممل، ندخل جديد، بنتدي بداية جديدة، نتهور كده تهور محسوب، ننط كده قفزة ثقة ونشوف موديانا على فين.

مانتقلقوش من البدايات الجديدة. سواء البدايات دي بعد نجاح سابق أو فشل سابق. ابتدوا كأنها نقطة ومن أول السطر.

ماتركنش على نجاحك اللي فات وتحط شادرالبطيخ اياه في بطنك وتقول في عقل بالك: خلاص بأه قفشنا كبد الحقيقة وجبنا زتونة الواقع. لأن كبد الحقيقة محد بيقفشه وزتونة الواقع نيه ومرة علقم وماحدش بيقدر يوصلها ولا يدوق طعمها. اللي بيركن على نجاحاته السابقة بيلبس أسود من الغالي. اسمعوا بس زي ما بقولكوا كده. هتلاقي عيل ابن 7 الصبح جاي من تحت باطك وطالع يرمح قدامك ويبطلعلك لسانه ويقولك راحت عليك يا حدق، على رأي عم فؤاد المهندس الله يرحمه.

ابتدي بعد النجاح كأنه أول يوم في تجربتك بنفس العزم والقوة بتاعة البداية الأولى علشان تقدر تتخطى نجاحك، وتعيده للنجاح اللي بعد منه.

وكان اوعى تبتدي بداية جديدة وانت محبط وكتافك مدلدلة بسبب فشلك السابق. لأ يفتح الله، مكانش يتعز يا ضنايا. هيفضل شبح الفشل ده راكب على كتفك ومدلدل رجليه لامؤاخذة على قفاك وسايقتك للفشل والإحباط اللي بعديه.

انفض بواقي الفشل وشبحه من على ودنك وخف رجلك من حمل الإحباط واليأس وشمع الفتلة واجري. اجري وكأنك بتهرب من الفشل. ابتدي على نضافة وكأنك اتولدت ساعة ما ابتديت. الفشل كان محطة في سكة النجاح. خلي أملك قصاد عينك مش ورا ضهرك. إنما النصر صبر ساعة وعهد الله.

يالا بينا كلنا من أول يوم في الموسم الجديد نعلن بدايات جديدة في بيوتنا وأشغالنا مع أهالينا وصحابنا وحبابنا وولادنا. بدايات جديدة مش مركونة لا على نجاحات سابقة ولا على إحباطات سابقة.

حاجة fresh كده بتقفييل مصنعها

يالا يا جدعان

اتكلنا على الله

البطل أحمد عبد العزيز

البطل أحمد عبد العزيز، مش مجرد اسم شارع، ده اسم واحد من أهم المقاتلين المصريين في حرب 1948، الشهيرة في تاريخنا باسم النكبة.

آه والله

زي ما بقولك كده.

في كتاب العروش والجوش، محمد حسنين هيكل يقول إنه كان صحفي في أخبار اليوم وقتها، هيكل يحكي إنه خد مصور، ونجح في إنه يخترق المعارك، ويوصل لمكان قوات البطل أحمد عبد العزيز ويأخذ أخبار وصور، بس لما رجع من الجبهة، ما رضوش ينشروا أي حاجة باستثناء شوية صور منها الصورة الوحيدة للبطل، ودي كانت المرة الأولى اللي المصريين يسمعوها فيها اسمه.

أحمد عبد العزيز ممكن، بل إنه لازم، يتعمل عنه حلقات وحلقات، وأعمال درامية وكتب، وهو يستحق، بس إحنا هنقف عند كام حاجة نشاور عليهم، منها إن أبوه محمد عبد العزيز كان ظابط في الجيش المصري، بالتحديد أميرالاي وقائد الكتيبة الثامنة للجيش المصري في السودان، علشان كده البطل أحمد عبد العزيز اتولد في السودان.

المهم، إن الأميرالاي محمد عبد العزيز انفصل من الجيش سنة 1919 لأنه لما قامت الثورة طلعت الجنود بتاعته من الكتيبة يشاركوا الناس في المظاهرات فتعرض لمحاكمة عسكرية، انتهت بفصله من الجيش.

قصة الأب هيكررها الابن بس بصورة أخف شويتين، ومختلفة ثلاث شويات، لأنه لما ولعت حرب 1948، كان رأي البطل أحمد عبد العزيز إن تدخل الجيوش العربية النظامية وقتها، وفي الحرب دي تحديداً هيكون غلطة كبيرة، هيدي فرصة لإسرائيل تظهر بمظهر الدولة اللي بتواجه دول، ويدي جيشها صفة الجيش النظامي (وده اللي حصل فعلاً).

عبد العزيز كان شايف إن دي عصابات الصهيونية، لازم يترد عليها بشغل عصابات مضاد، علشان كده لازم القتال يعتمد على الأهالي والمتطوعين. ووجهة نظره دي مكنتش وجهة نظر، لأنه نقلها للمساحة العملية بإنه بدأ في تدريب أهالي ومتطوعين على إطلاق النار والحياة العسكرية في معسكر الهايكستب الشهير.

الجيش خيره بين التوقف عن اللي بيعمله أو الإحالة للاستيداع، فراح مقدم طلب بنفسه إنه يتحال للاستيداع، واستمر في شغله، ورغم انسحابه من الجيش، ورغم إنه مكنتش شايفها حرب جيوش، إلا إنه

حط نفسه هو وقواته تحت تصرف القوات المسلحة المصرية.

القوات المسلحة اقتنعت، وفعلا تولت هي الإشراف على عمليات التدريب، وده اللي خلاله يكمل، ويعمل بطولات العالم كله حكى عنها، وبتدرس في الكليات العسكرية. بغض النظر عن نتيجة الحرب ككل.

في يوم، كانت المفاوضات دايرة في مقر قيادة الجيش العربي اللي في القدس، بحضور الكولونيل عبد الله التل، ولما انتهت المفاوضات في ليلة 22 أغسطس، حب أحمد عبد العزيز إنه ينقل نتائج المفاوضات للقيادة المصرية العامة في المجدل، فراح على غزة، مكان مقر قيادة الجيش المصري، وأصر على إنه يروح مع إن المعارك كانت وقتها دايرة بشدة في الطريق اللي يودي للمجدل.

كانت منطقة عراق المنشية اللي هيمر عليها مستهدفة من اليهود، وده خلى القيادة العامة تمنع السير على الطريق ده بالليل. لكنه كان يوصل الأخبار بأي طريقة وبأي تمن، ومهما كانت المخاطر، فعدى وسط إطلاق النار، واللي حصل حصل...
وبقى عندنا شهيد عظيم.

البطل عبد الرؤوف جمعة

أوقات كثير وبالأخص في الأزمنة إياها اللي بيكثر فيها الإحباطات واليؤوسات -ألا هو جمع يأس إيه؟- المهم في الأيام الغبرة يعني من الآخر. بتبقى كلمات اتربينا وعيشنا عليها وكانت طول عمرها صاحبة معنى رنان كده ومنورة ومزهرة. قوم في الأيام دي تظفي ورنتها تحسج وتشخلل كده، ويتصلها بنص عين وتتقال حتى بشكل مش ولا بد.

قوم نيحي، نطلعها من نيش الزمن، وننفص من عليها تراب وعكارة الأيام، وحنة كربوناتوا مع فوطة خشنة تنجلي وتنور وتزهزه من جديد.

كلمات بأه من نوعية

البطولة

الفدائية

الشهامة

النبيل

يعني حبة الكلام اللي بيحمل في طياته معاني أكبر حتى من إن الكلمات توصفها.

خلوني أحكيلكم حكاية.

البطل / عبد الرؤوف جمعة

واحد من أبطال الصاعقة في حرب 73 المجيدة. طب عمل إيه عم عبد الرؤوف؟

خلونا نسمع الحكاية من خلال المجموعة 73 مؤرخين وهما الحقيقة مجموعة من ولاد القوات المسلحة المهتمين بالتوثيق والتاريخ للأحداث العسكرية والبطولات الفردية لأبناء جيش مصر وبيقوموا بجهد عظيم لازم نحبيهم عليه.

المهم الجندي المقاتل عبد الرؤوف جمعة في يوم 6 اكتوبر 73 نزل خلف خطوط العدو على مسافة 200 - 300 كيلو من أقرب مكان لقواتنا. وخلال تأديته لمهمته وبعد يومين ثلاثة أصيب البطل ده، إصابة عادية؟ لأ ياريت . . . أصيب بمجموعة طلقات أعلى فخده، تدخل الطلقات من ناحية وتخرج من الناحية الثانية، حاجة وأنت بتسمعها تقشعر . . . ما بالك باللي حصلته بأه؟

بمتهى البسالة يطلب المقاتل من القائد بتاعه يقتله علشان لا يعوق حركتهم ولا يقع أسير، الموت عنده كان أهون من الأسر.

القائد البطل عبد الحميد خليفة يرفض ويشيل عبد الرؤوف على كتفه ويطلع به الجبل ومعاهم اتنين عساكر والضابط مجدي شحاتة.

وعلى مدى 200 يوم يفضل الخمسة في قلب صحراء سيناء.

وفي زمن حرب دايرة لا فيه طبيب ولا تمريض، والمصاب بيداوي نفسه بالنباتات الصحراوية اللي اتعلم في الصاعقة إزاي يستخدمها لسد جروحه.

وبمساعدة بدو سينا الجدعان اللي وقفوا مع أبطال الجيش ومدوهم بالأكل والمياه والوصفات البدوية.

وفي إبريل 74 يرجع الأبطال الخمسة للصاعقة بسلاحهم يتوجهوا فوراً لمقابلة وزير الحربية اللي لما عرف حكاية الجندي عبد الرؤوف أمر فوراً بعرضه على القمسيون الطبي، والمفاجأة أن القمسيون قال إن عبد الرؤوف زي الفل وجروحه التامت تماماً!!

وبعد أجازة صغيرة مع أهله في سوهاج يرجع البطل لصفوف الصاعقة يكمل مهمته معايم.

عم عبد الرؤوف حالياً ساعي في مدرسة في سوهاج.

المدرسين والطلبة والناظر عارفينه ويحبوه بس يمكن أغلبهم مايعرفوش بطولة الجدع العظيم ده. لما المجموعة 73 نشرت حكايته في 2012 جاله سيل مكالمات من الدنيا كلها عرضوا عليه هدايا وأموال كثير الراجل الجدع رفضها بكل عزة نفس رغم بساطة ظروفه.

آه والله زي ما بقولكوا كده.

اكم ناس حوالينا بساطة مظهرهم وبساطة حالهم مايبوحيش بأكثر من طحنة الحياة ووجعها.

الناس دي أغلبهم شايلين المعاني الجميلة البراقة اللي قلنا عليها في الأول.

شيلنها بكل جماها وروعتها ولمعناها ورنه معناها الجميل.

علشان كده لما بنفقد الثقة في القيم والمثل العليا لازم نستدعي الحكايات والشخوص العظيمة دي.

نحييهم ونقدرهم ونفتح تاريخهم علشان يتشد زهرنا تاني كده ونرجع نثق في كل الكلام اللي الوقت بيهزه في عيننا أحياناً.

التربية

التربية مش لحظة

التربية مش نظريات

التربية ماهاش وقت معين، التربية طول الوقت

آه والله

زي ما بقولك كده.

اللي بالأحظه حوالي، وجايز أكون غلط، إن معظمنا معظمنا، بيهتم أوي بتربية الأطفال في أوقات معينة، مناسبات معينة، لما يكون مثلاً عندنا ضيوف، أو لما نكون ضيوف عند حد.

بنهتم بتربية الأطفال في كلامنا، لما بننظر، ونقول الأحسن نعمل كذا وما نعملش كذا، نقول كذا وما نقولش كذا، لكن مش دي الأوقات اللي بتحصل فيها التربية، التربية عملية مستمرة 24 ساعة / 7 أيام في الأسبوع، 30 يوم في الشهر، 365 يوم في السنة.

اللي بيحصل، إنه طالما مفيش علينا ضغط، بنسيب نفسنا براحتها، ونتصرف ككبار، ونتكلم زي ما بنكلم صحابنا، وناسين إنه فيه حوالينا أطفالنا، وإنهم مش بيتعلموا منا في الأوقات الاستثنائية، لأ دول بيلقوا منا طول الوقت.

لما نكون بنتكلم في التلفون مثلاً، ناخذ بالنا، يا ريت أساساً ما نتكلمش قدام الأولاد، لإنك لو كذبت قدامه، ولو في حاجات بسيطة، زي إنك تقول: أنا ما خرجت من إمبراح، مع إنك نزلت ولو شوية ورجعت، الطفل ساعتها ثقته بتتهز، مش بس فيك أو فيكي، لكن كمان في قيمة الصدق نفسها.

مش بس نقل القيم، والتعويد على الأخلاق، لكن كمان تكوين الشخصية، شخصية الطفل بتكون من التفاصيل الصغيرة، زي إنك تخليه خايف، طول الوقت خايف، مانعه من إنه يعمل أي حاجة، بحجة إنك تأمنه، إنما الحقيقة إننا بنشتري دماغنا، ويكبر الطفل / أو الطفلة، وسنه يزيد، ويبقى عنده تمن وتسع سنين، لكنه بيتصرف زي طفل ثلاث سنين.

العلاقة بينا وبين أطفالنا مش بتكون بس في الحاجات الكبيرة والمهمة، لكن في الحاجات البسيطة جداً، لو سألك سؤال، اهتم بيه، وركز وانت بتقول له الإجابة، ولو بيسأل في وقت مش مناسب، عرفه ليه الوقت مش مناسب، وما تنسأهوش، لأنه هو مش هينسى.

لما ييجي الوقت المناسب، جاوبه، وكلمه، وكن حريص على إنك تخصص له ولو نص ساعة في اليوم، ابنك أهم من أي حاجة، أهم من الشغل نفسه، حتى لو كان الشغل علشانه.

معلش استحملوني النهاردا...

إنما فعلاً قلبي واكلمي على ولادنا، ولادنا بيكبروا، بس مش بيكبروا بينا ووسطينا، تدخلنا في حياتهم بقاله أبسط تأثير، وده لإننا شايفين إننا بنعمل اللي علينا لما بنوفر لهم سبل الحياة.

أنا عارفة إننا جميعاً، كل واحد في مستواه، بنتعب كثير عشان توفير احتياجات ولادنا، إنما مالوش أي أهمية، لو سبناهم للحياة تربيههم بعيد عننا، ولما بنظهر في حياتهم، بنظهر في كثير من الأوقات بشكل سلبي، فنسيبهم للإنترنت والأصدقاء والشارع، بعد كده نتفاجئ.

نتفاجئ بأراؤهم وتصرفاتهم واختياراتهم وطريقة كلامهم وطباعهم مع إننا إحنا اللي زرعنا الحاجات دي جواهرهم، بإننا ما ركزناش.

عارفة إنها حاجة مش ساهلة

بس أظن إن ولادنا يستاهلوا

إن ما كانواش هم يستاهلوا

مين يستاهل؟

في العالم واللي اتكلف بناؤها 160 ألف جنيه تقريباً - حاجة كده بتاعة ثلاثة أربعة مليار دلوقتي -
المسرحين سواء الكوميديا أو الأوبرا كانوا بينافسوا على إرضاء الجمهور، اللي اتفتن بالبدع الجديدة دي،
وده اللي شجع مستثمرين أوروبيين ومصريين وعرب (مغاربة وشوام وغيرهم) على الاستثمار في بيزنس
الترفيه الجديد على المجتمع.

ظهرت المسارح في صورتها الأولى واللي كان أغلبها في حي الأزبكية وظهرت كازينوهات الليل، ونشطت
حركة الفنون المسموعة والمرئية بكل أشكالها. غناء وتأليف وتلحين وتشخيص ورقص. وبقت مصر قبلة
لكل الفنانين في العالم. سوق جديدة ومتعشش لكافة أشكال الفنون اللي المجتمع المقبول مكانش يعرف عنها
حاجة.

وظهر لأول مرة مصطلح (الصحافة الفنية) لأن الجورنالجية لقوا في الحركة الجديدة مادة دسمة، يقدرُوا
يخرجوا منها بمواضيع فلانة اللي غنت الطقطوقة الفلانية وعلان اللي سرق اللحن الفلاني. وهكذا، وأديهم
بحطة إيدك لحد النهارده بيعملوا نفس ذات شغلانه.

الاهتمام المفرط بالفنون ده، انعكس على شكل البلد كلها إجمالاً، كل حاجة بقى بيتم العناية الفنية بيها.
المباني بقوا بيبالغوا في بناها وزخرفتها، شوارع القاهرة والمدن الكبرى بقوا بيبالغوا في تزيينها ونصافتها.

كل مكان جديد يفتح بيراعي إنه يكون أجمل وأشيك من كل اللي قبله.
البلد كلها تحولت للوحة فنية.

بالكم الاهتمام بالترفيه ممكن يغير أوي كده؟؟. آه ممكن وممكن أوي كمان.

التسويق

ده إحنا اللي عبيننا الهوا في قزايز. . . كذب!!
آه وربنا كذب وفنجرة حنك وفض مجالس وأي هري بيتقال. لا عمرنا عبيننا الهوا في قزايز ولا شوفنا القزايز دي.
لينا السبق أي نعم في الكلام. آه الكلام، ماهو إحنا أشطر ناس في الكلام، على رأي شادية (ماخدش منك غير كلام وبس يا حسب الله)
إحنا اللي قلنا المثل كدلالة مطلقة كده على الحداقة والفهلوة ووراه سلبية أمثال من نوعية «الديب اللي جنبناه من ديله»، و«العنب اللي عصرنا بذره»، و«الهوا اللي دهناه دوكو»، و«التعريفة اللي خرمنها». ناس فعلياً دهنوا الهوا دوكوا، وعملوا دهانات صلبة تترش تثبت لوحدها حتى لو مكانش في سطح تثبت عليه!! وده عملته ألمانيا. يمسيهم بالخير الألمان، دهنوا الهوا دوكو!!
تعبية الهوا في قزايز بأه صناعة ضخمة وقائمة بذاتها في السويد!!
آه وربنا زي ما بقولكوا كده.
في السويد بيعبوا الهوا في صفايح مش أزايز!! يمكن علشان حقوق الملكية الفكرية ولا حاجة.
المهم الناس فعلاً بيعبوا هوا السويد في علب (كانز) حلوة كده وشيك ومكتوب عليها (السويد في علبة) تفتح ماتلاقيش حاجة (حبة هوا يا ولداه) تلحق تشمهم وخلصت على كده.
اللطيف إن مبيعات الموضوع ده حاجة كده اللهم صلي عالنبى. . . تفرح القلب الحزين.
الأمر اللي خلى السويد تتوسع في إنتاج علب الهوا دي وتبيعتها في كل مكاتب السياحة والمعارض والبازارات وحتى السوبر ماركت.
وبكام؟ والنبى رخيصة حاجة بتاعة 69 كرونة، قيمة 65 جنيه قبل ما يعوم ... الله أعلم يعملوا كام دلوقتي.
الحقيقة ماندهشتش من الفكرة أوي. اندهشت لحاجة تانية. قدرة الناس دي على التسويق والترويج والبيع والمكسب مخيفة الحقيقة.
ياما عندنا منتجات عظيمة بمعنى كلمة عظيمة، ونسبنا إحنا أصلاً أهل البلد إننا بنتتجها بسبب الشح التسويقي اللي إحنا عايشين فيه!!

والنبي (آفة صناعتنا التسويق) أخت (آفة حارتنا النسيان).
عندنا منسوجات العالم بيتشتحتف على ريحيتها. . . . ما بنسوقهاش
عندنا منتجات غذائية مالهاش أخت في الدنيا كلها. . . . ماتعرفش عنها حاجة.
عندنا صناعات زيوت وصابون فوق الهايلة بحبتين تلاتة. . . . بنستورد الأسوأ ونستخدمه لأن منتجنا
مش متوفر في السوق رغم إنه موجود في المصنع.
عندنا منتجات على كل شكل ولون لا يعيبيها جودة ولا متانة.
عيبيها الوحيد هو إحنا والطريقة اللي بنقدمها بيها ونتعامل معاها.
إزازة ماتغيرش شكلها من قبل الميلاد.
طباعة كئيبة على العبوة.
رسوم ساذجة من أيام أفيشات السينما الصامتة.
انعدام تواصل بين المنتج والمستهلك.
حبة حاجات تتحلل في قعدة وعهد الله.
وبالمناسبة الناس بتاعة أصل التسويق صعب وغالي ومكلف.
اهمدوا بأه. كان فيه وخلص من اللي بتقولوه ده.
النهارده العالم كله بيعتمد على التسويق أون لاين. وده لا مكلف ولا بتاع من بداية دولار واحد بتعمل
دعاية توصل للقراد لو عاوز.
محتاجين بس نغير كهنة أمون، اللي لسه مقتنعين إن أصعب حاجة في الدنيا التسويق وإن التسويق
ماييجيش غير عن طريق معارض الأسر المنتجة، وعبر مقراتنا في القرى والنجوع ومعارض الشركة
وسيارات البيع المتنقلة.
كان زمان وجبر وعهد الله التسويق دلوقتي أون لاين والتوصيل من الباب للباب والناس بتعمل ملايين
على حس صورة حلوة ومنتج متقدم في شكل محترم وشيك.
آه وربنا زي ما بقولكوا كده.

التكاي

ماهي مش تكية السيد الوالد!! كثير ما بنسمع كلمة (تكية) في وسط كلامنا مقرونة دايماً بنوع من التنبيط، ودلالة على المال السايب، والتنبلة، والصرف من غير عمل ولا إنتاج.

لحد ما الكلمة بقالها مردود سلبي في ذهننا كده. بس الحقيقة إن التكاي -جمع تكية- مكانتش أبداً عمل سلبي، ولا الهدف منها حاجة بطالة أبداً. ده بالعكس ده التكاي دي في مصر الأيوبية والمملوكية والعثمانية كانت تاج العمل الخيري والأهلي!! آه والنبي زي ما بقولكوا كده.

يعني لما حد يبقى مطرطش أوي في عمال الخير وغني غنى فاحش كمان، قوم يقرر ينشئ تكية. لأن التكاي كانت حاجة كبيرة جداً، من كل ناحية.

يعني إن كان من ناحية المساحة، فبعض التكاي كان بيوصل مساحتها لـ 2000 ذراع!! ومن ناحية البنيان. فأضحخ مباني في العصور العثمانية والمملوكية كانت الخانقاه والتكاي بعد المساجد الكبيرة.

ده غير إن البنيان كان بيبقى بنيان فخم، مش حيالله مبنى وخلاص. لأ ده صحن ضخم بيضم مجموعة إيوانات على الجوانب، وغرف للإقامة، ومطبخ للأكل، وقاعات للذكر، وقاعات للدراسة. والمبنى مقبب، له مجموعة قباب يعني. قبة كبيرة للصحن الرئيسي وقباب أصغر لسكن الدراويش، وقباب أصغر للقاعات. التكاي كانت شكل من أشكال التكافل الاجتماعي، الهدف منها مش الأكل والمرعى وقلة الصنعة. حاجة كده أقرب شكل لموائد الرحمن الحالية. مكان للفقراء والمحتاجين والمسافرين ياكلوا ويشربوا، ومأوى للمشردين من البرد وبهدلة الشوارع.

مصر في زمن التكاي كانت دولة غنية، وهدف لفقراء الدول القريبة والبعيدة، يجوا يعيشوا ويشغلوا فيها، كثير من المهاجرين دول ببيجوا على الحميد المجيد، بؤجة هدومهم وبس، وأحياناً كمان من غير بؤجة، بالهدمة اللي عليهم.

التكاي كانت بتكون ملجأ المسافرين والمهاجرين دول، أكل وشرب ومأوى لحد ما يلاقوا شغل ومسكن ومصدر دخل.

التكاي كمان كانت بيتم الصرف عليها من الأوقاف وليها حصة أو نصيب من ميزانية الدولة، والميسورين كانوا بيوقفوا أطيان وجناين ونخل وإيرادات زرايب وبيوت على التكاي وعمارتها والصرف عليها.

أشهر التكايا في مصر كانت تكية وقبة الكلشني وتكية السلمانية وتكية السلطان محمود ثم تكية الرفاعية. ومن أشهر التكايا العثمانية في مدينة القاهرة التكية السليمانية التي أنشأها الأمير العثماني سليمان باشا بالسروجية، والتكية الرفاعية ببولاق، وهي تخص طائفة الرفاعية الصوفية، ومن أشهر التكايا العثمانية والتي لسه مستخدمة لحد دلوقتي، ويشغلها مسرح الدراويش هي تكية الدراويش «المولوية» نسبة لطائفة الدراويش المولوية إحدى الطوائف الصوفية العثمانية، ومسرح الدراويش تابع لقطاع المسرح بوزارة الثقافة المصرية.

والي ما شافش عرض المولوية بالمناسبة فايته كثير. حاجة كده إبداع مفرط. آه وربنا زي ما بقولكوا كده. نشاط التكايا المصرية امتد كمان لخارج الحدود. فبنلاقي محمد علي باشا أمر بإنشاء التكية الحجازية في مكة والمدينة وجدة، وكانت بتعنى بأهل الحجاز والحجاج والمعتمرين وكان بيوصل عدد المستفيدين منها يومياً 400 فرد ويوصلوا في موسم الحج لأكثر من 4000 شخص يومياً. التكايا كمان كانت بتقدم خدمات صحية وعلاج لأهل الأحياء المجاورة ليها، وكان الأطباء والصيادلة ليهم مكان معلوم في التكية.

طب والنبي ياريتها تبقى تكية!! هي التكية حاجة بطالة بدمتكم؟

التنوع

صورة انتشرت من فترة كده في السوشيال ميديا، الصورة مشهد أبيض وأسود ولقطته عادية جداً. واقف فيها مجموعة ستات في حفلة ضمن أحداث الفيلم.

الي مش عادي هو تفاصيلها والي ورا تفاصيلها.

الصورة بتجمع الفنانة الجميلة «ماجدة الصباحي» والمبدعة الراحلة «سناء جميل»، والراحل «فاروق عجرمة»، والفنانة «صالحه قاصين»، والفنانة «فيكتوريا كوهين».

تعالوا نشوف التفاصيل الي ورا المشهد والصورة.

الفنانة ماجدة مسلمة سنية

الفنانة سناء جميل مسيحية

فيكتوريا كوهين وصالحه قاصين يهوديتان

الفنان فاروق عجرمة درزي

كل دول جمعهم لقطة واحدة وفيلم واحد ومهنة واحدة وبلد واحدة!! كل دول ظهوروا ببساطة في مشهد واحد. كل دول ساهموا في تاريخنا وإبداعنا بدون ما تكون حدود الدين والاختلاف عائق في اتحادهم وقيامهم بإنتاج مشترك وتعايش مشترك!

طب ما العملية مكانتش صعبة أهى!

ده وإحنا بنبص من شباك السيما بس شوفنا مشهد ضم كل الناس المختلفين دول. أمال مصر كلها على بعضها كانت عاملة ازاي؟!

مصر كانت بستان أعراق وأديان وجنسيات مافيش فيه وردة ولا شجرة أخت الثانية!!

آه والله زي ما بقولكوا كده.

وصل عدد الجنسيات الي موجودة في مصر سنة 1944 لـ 33 جنسية مختلفة وأكثر من 19 ملة وديانة.

تصدقوا ده؟ كل التنوع والاختلاف ده كان قائم على أرض المحروسة ومع ذلك مكانش فيه طائفية!!

التنوع ده خلى كل حاجة مصرية لها شكل وطعم تاني. المنتج المصري كان عجة في العالم كله، منتج دايمًا مطلوب سواء صناعي أو زراعي، منتج متميز في جودته وإتقانه وسعره منافس جداً.

الفن المصري راخر كان متميز جداً، السينما المصرية على سبيل المثال كانت السينما رقم 3 في العالم كله!! آه والنبى زي ما بقولكوا كده. الفيلم المصري كان له وزنه وقيمتة وكان أهم فيلم في الشرق كله.

تنوع الثقافات والجنسيات والأديان والإثنيات ده اللي بيخلق حالة التفرد.

عصير التفاح حلو بس لما تدخله نكهة فانيليا على روح القرفة مع نقطة مية ورد بسيطة كده بيطلعك حاجة تانية لا تقارن بالتفاح لواحد أو الفانيليا لواحد أو القرفة أو الورد لواحد.

الخلط والدمج وإن كل واحد يدي أحسن ما عنده بيطلع في النهاية منتج فريد جداً وفي نفس الوقت حقيقي مش مزيف ولا مدعي.

طب الخلطة دي بتيجي إزاي؟ بتيجي من قيمة غابت عننا وبقت نادرة أكثر من التماثيل اللي شكلها حلو في شوارع وميادين مصر.

إيه القيمة دي يا عيال؟ حاجة كده اسمها اسم الله على مقامكم: التقبل.

آه هو ده. التقبل. اقبل الناس واقبل تواجدهم في محيطك وحياتك وحاسبهم على تصرفاتهم وإنتاجهم مش على دينهم وجنسياتهم وقناعاتهم.

اللي بيفيدك وبينتج وبيعاملك بالحسنى وعمره ما بيأذيك ومابتسمعش منه غير الطيبة ولا بتاخذش منه غير الكويسة، مالکش فيه غير إلا المعاملة الحسنة والتقبل.

إيه الصعب أوي في القيمة دي؟ إيه الغريب؟ إيه اللي مش مفهوم؟

ليه ما بنامش الليل إلا لما نحاسب كل واحد عالي في ضميره؟

وعلى علاقته بربه؟ وعلى لونه؟ وعلى عاشر جد من سلسفين جدوده؟

طب استفدنا إيه من القعاد لبعض على كل ده؟؟

وصلنا لفين يعني ووضعنا بقى إيه لما عملنا كده؟

لأ، حد يجاوبني بجد استفدنا إيه زمان من التقبل، واستفدنا إيه النهارده من الرفض.

وادي قعدة. . . وأنا مستنية حد يرد بأه...

عائشة التيمورية

وانت جي من أغا خان كده عالكورنيش، والنيل على يمينك، هتلاقي أكثر من كوبري
ما تطلعهمش

خليك لما تعدي من تحت كوبري قصر النيل
إنت كده في رحاب جاردن سيتي.

سيب أول وتاني مدخل للحج العريق، وخش تالت مدخل
أقف هناك، واقرا اليافطة:
شارع «عائشة التيمورية»

ممکن يكون كثير منّا عدى هناك، ويمكن لينا شغل أو مصلحة، من غير ما نسأل نفسنا عن الست اللي
واخده اسم شارع، من شوارع جاردن سيتي، اللي هو من أعرق شوارع القاهرة المحروسة.
آه والله، زي ما بقولك كده.

عائشة التيمورية تقدر تقول إنها عميدة العائلة التيمورية المشهورة بالكتابة والأدب والإبداع وحفظ
التراث، واللي كانت مؤسسة لكثير من الأعمال الإبداعية والفكرية، وكانت هنا تمشي على عائشة، وتمشي على
العائلة كلها، اللي منها أحمد تيمور ومحمد تيمور ومحمود تيمور.

هي عصمت بنت إسماعيل باشا، اسم عائشة جه من إن والدها إسماعيل باشا تيمور سماها وأختها كل
واحدة اسمين: اسم تركي واسم إسلامي، وهي كان نصيبها عصمت، وعائشة.

لما كبرت شوية، والدتها بدأت تعلمها شغل الستات وقتها، إحنا بتتكلم عن الخمسينات، مش خمسينات
القرن العشرين، لأ، اللي قبله، يعني في الزمن السحيق، ألف وتمنية حاجة وخمسين.

البت رفضت تتحبس في الحرملك، وكانت بتحلم إنها تطلع أديبة وشاعرة، كانت بتلاقي نفسها في الورقة
والقلم، بس كان وقتها ريشة مش قلم. فكانت والدتها تعاقبها وتقول لها الحاجات دي للرجالة بس.

والدها إسماعيل باشا قال لمراته (أم عائشة) واضح إن البنت موهوبة فعلاً، خلينا نعلمها تعليم كويس،
ونديها الفرصة، ونحافظ عليها في نفس الوقت، سيب لي المهمة دي، خدي إنتي عفت وسيبي لي عصمت.

وقتها مكنش فيه مدارس لتعليم البنات، فراح إسماعيل باشا جاب مدرسين ومدرسات للبت في البيت،
اتعلمت اللغة العربية وأصولها، واتعلمت جنبها أكثر من لغة ثانية، واتعلمت فنون الكتابة والشعر

والأوزان.

كان طبعي تطلع عائشة أدبية، وأدبية كبيرة، كتبت الشعر والرواية والمقالات والكتب الفكرية، وليها أكثر من كتاب مطبوع.

الأهم إن عائشة هي اللي اتولت تعليم أخوها الصغير أحمد، اللي بقى بعدها الأديب الكبير أحمد تيمور، والد الكاتبين محمد تيمور ومحمود تيمور.

أحمد تيمور الكبير، الأب يعني، كان له دور في حفظ الأمثال والتعبيرات الشعبية، لما سجلها كلها في موسوعة وكتبها في مخطوطات، ما انطبعتش في حياته، لكن الدولة طبعتها بعد وفاته بكثير.

محمد تيمور كان مؤسس فن القصة القصيرة، وأول واحد كتبها، غير مساهمته في تأسيس المسرح المصري، وهو كاتب الأوبريت العظيم «العشرة الطيبة»، اللي لحنه سيد درويش، واللي اتعاد واتعاد أجزاء منه كثير بأصوات مختلفة من كل الأجيال.

محمود تيمور كمان كان له دور في القصة والمسرح، والعيلة كلها كان ليها فضل كبير على الثقافة المصرية، العيلة دي بدأت من عند الست عائشة التيمورية.

للأسف، عائشة خلفت بنت واحدة بس، وفقدتها وهي صغيرة، فده تسبب لها في صدمة كبيرة، وبسبب الصدمة دي حرقت كثير من اللي كتبتة، خصوصًا الأشعار، لإنها كتبت كثير في مصيبتها دي، فخرنا كتابات كثير ما وصلتناش.

لكن اللي وصلنا غير مؤلفات العيلة مكتبة كبيرة من كتب التراث، اللي كانت محفوظة في مخطوطات، قبل فترة الطباعة، المكتبة دي اشتغل عليها أجيال وأجيال من الدارسين والباحثين ومحبي الأدب والفكر.

أمانة يا شيخ، لما تدخل حي جاردن سيتي، وتقف قدام اليافاطة اللي شايلة اسمها، اترحم عليها، واقرا لها الفاتحة.

أمين

ثقب أسود لكل مواطن

يقولك يا سيدي من الحقائق العلمية المذهلة، إن النجوم ليها دورة حياة. تبقى نجمة حلوة كده بيبي تكبر تبقى مقصوفة رقبة في إعدادية، تفور وتدور وتبقى شابة اسم النبي حارسها، تعجز وتأتب وسانها تقع ويالا السلامة تاخذ استمارة 6 وتبقى ثقب اسود!!

آه زي ما بقولكوا كده. نهاية دورة حياة النجوم إنها تتحول لثقب إسود في الفضاء. وتفضل تبلع أي حاجة معدية جنبها، كوكب حلو وصغرن كده تايه من مجموعته الشمسية تقوم زالطاه، شمس منورة فرحانة بشبابها، هوب تقوم شافطها ماتباناش، قمر مكتتب كده ولا لهوش نفس يطلع للحبيبة ولا للمذئوبين تروح ممززة فيه.

يعني تعيش دور المكنسة الكهرا بتاعة الفضاء.

فكرة الثقب الأسود دي فكرتني بفكرة خزعبلية كده، يكونش يا عيال فيه ثقب أسود في بيت كل واحد فينا؟!!

آه والنبي زي ما بقولكوا كده!!

ما هو أصل مش منطقي أبدًا يبقى فيه أزمة معالق شاي في 97٪ من البيوت المصرية!!

ده إحنا بنشتري معالق شاي أكثر مابنشتري شاي شخصيا!! ومهما جبت دست معالق ولا أطقم ولا فرداني ولا حتى معالق بلاستيك، بردو يجي عليك وقت ماتلاقيش صداهم في البيت!!!

ما هو يا ثقب أسود يا إما فيه مدمن معالق صغيرة، في كل بيت مصري بيطحنهم ويشدهم كنوع من أنواع المخدرات المنزلية!!

بردو كل بيوت العالم مش البيت المصري بس، بتعاني من متلازمة (فردة الشراب اليتيمة). كان زمان في العصر الروماني يدخلوا 2 مصارعين حلبة المصارعة، والقانون الوحيد للعبة هو (يدخل 2 ويخرج واحد). يفضلوا يمر مطوا في بعض لحد ما واحد يقضي عالتاني ويخرج لواحد.

في العصر الحديث اتحولت الحلبة دي لغسالة والمصارعين لجوز شرابات، والقانون هو هو... يدخل 2 ويخرج واحد.

وانشالله تقف على دماغك بردو هيخرج واحد. اربطهم في بعض... بردو هيخرج واحد

حطهم في كيس غسالة... كان غيرك اشطر بردو هو واحد اللي ليك في ذمة الغسالة

اربطهم مع بعض بأفيز بلاستك. . . . برد هيخرجلك واحد والأفيز هتلاقي فيه message من الغسالة كاتبالك فيه (كان غيرك أشطر يا حدق)

بصوا هو التفسير الوحيد اللي لاقيته إنه راخر ثقب إسود في الغسالة، يا إما الغسالة بتاخذ أجرتها فرد شرابات!!

والحل المنطقي الوحيد إنهم يعملوا الشرابات 3 فرد، ماتوجعوش قلبنا.

- بالنسبة لريموت الرسيفر والتلفزيون. دول الثقب الأسود بتاعهم عادة بيكون في التلاجة أو عدم المؤاخذة علبة الزبالة!! آه والنبي زي ما بقولك كده، ماتعرفش إيه السر إن الريموت دايمًا لاجئ سياسي في التلاجة، أو منتحر في علبة الزبالة. هل ده راجع لأصولهم إنهم جاينين من دول باردة مثلاً فمش مستحتملين جونا!!! ولا إننا بنعاملهم معاملة تخليهم يلجئوا للصفحة الزبالة هربا من عشرتنا!؟

- الولاعات بأه، كل بني آدم طبيعي محتاج خط إنتاج ولاعات ملازم ليه وماشي وراه!! وتقريبا اختفاء الولاعات بيكون نوع من العدالة الشعرية، مقابل كل الولاعات اللي قلبناها من صحابنا في يوم من الأيام. نسامح بعض في الرفايح يا جدعان مش كده.

- أخيراً بالنسبة للنضارة لو مش متشعبطة في صدرك ولا فوق قبة دماغك، فمتدورش عليها، دور على كشف النضارة أسهل.

آه والنبي زي ما بقولكوا كده.

الجبرتي

«مصر اللي عمر الجبرتي لم عرف لها عمر»

البيت ده كتبه صلاح جاهين في قصيدة «على اسم مصر»، واللي قاصد بيه إن عمق مصر التاريخي أبعد من «التاريخ»، ورمز لعملية «التاريخ» دي بـ «الجبرتي»، باعتباره أصل الكار، وزتونة الشغلانة، وهو كذلك فعلا.

آه والله زي ما بقولك كده.

الجبرتي ده حاجة كده زي هيرودوت

إن مكش يزيد عنه

ما يقلش

الجبرتي حكى حكايات كتير، فاحنا هنا قررنا نحكي حكايته، على قد ما نقدر يعني.

عبد الرحمن الجبرتي أصوله ترجع لبلد اسمها «جبرت» في إريتريا، أبوه كان من علماء الأزهر قبل وصول الحملة الفرنسية، وما عرفناش إذا كان أبوه هو اللي جه من إريتريا ولا اتولد في مصر وجدوده هم اللي جم، بس المعروف إن حسن الجبرتي، أبوه، كان غني وعنده كذا بيت، والبيوت دي كانت مليانة كتب ومخطوطات، وبتشغي من طلاب الأزهر.

لما وصل عبد الرحمن لسن 21، أبوه اتوفى، وساب له ثروة معقولة، وكان طبعا علمه في الأزهر مع الطلاب المجاورين، وهو كان زاهد في الدنيا شوية، مش مهتم بجمع المال، فاستغل الحاجتين اللي ورثهم عن أبوه، المال والعلم، في إنه يلف مديريات مصر المحروسة، ويطلع على أحوال البلاد والعباد، وبدأ رحلته مع التدوين.

الكتاب الهائل اللي سابه الجبرتي، والمشهور باسم تاريخ الجبرتي، هو سماه: «عجائب الآثار في التراجم والأخبار»، وده ما كتبوش مرة واحدة، كان بيحدد يسجل كل حاجة لفترات طويلة، ويدور على مصادر ومراجع، ويدون الأسماء.

بدأ بالمشايخ، ومين كان شيخ للأزهر، ومشايخ آخرين. وبعدين اللي اشتهروا بالعلوم الفقهية والعقلية والنقلية والشعر والأدب والخطابة وكده يعني. ثم أسماء الأمراء واللي مسك منهم مشيخة البلد ومساعديه. واستعان الجبرتي في شغله ده بناس كتير أهمهم صديقه المشهور إسماعيل الخشاب.

وهو عنده 44 سنة، جت الحملة الفرنسية على مصر، وهو خد موقف تقدر تقول عليه محايد، مش قلة وطنية، بس هو حس إن مهمة التأريخ ما تقلش أهمية عن أي مهمة تانية، فبدأ يسجل كل شاردة وواردة، وكان طبيعي إنه ما ييقاش محبوب، لا من الفرنسيين، ولا من اللي بيقاوموهم، ومع ذلك الجميع كان عارف أهميته وأهمية اللي بيعمله، الأهمية دي اللي هيدفع تمناها غالي بعدين.

بعد خروج الحملة الفرنسية كتب كتابه المشهور، والكتاب اتقابل بحفاوة، خصوصاً إنه مش بس سجل اللي شافه، ده سجل الـ 100 سنة اللي سبقوه، بإنه قعد يسأل ويستقصي، ويقابل الناس اللي عاصروا الأحداث على قد ما يقدر، وخرج بسفر عظيم، مليون حكايات، ومكتوب بلغة أقرب لعامية الفترة اللي عاش فيها.

لما جه محمد علي مسك مصر، مكنش فيه بينه وبين الجبرتي عمار، هو كان فاهم أهمية الراجل، والراجل كان مقرر يعمل شغله كمؤرخ، بس الكيميا بينهم ما ظبطتش...

أواخر أيام الجبرتي، الظروف بقت صعبة عليه من كل اتجاه، بطل يكتب، وبطل يقرأ، بطل حتى يخرج من بيتهم، وبصره كف، وحالته بقت بالبلا، وكانت النتيجة الطبيعية للحالة الكرب دي إنه يتوفى سنة 1822، بعد 3 سنين من وفاة ابنه وهو لسه فيه شغل كثير ما تموش.

وربنا يرحم الجميع.

حبة جنان

بما إن كل حاجة اتشقلبت
والي فوق بقى تحت
واليمين أصبح في الشمال
واللخبطة طالت كل حاجة في حياتنا
فالجنان بقى هو العقل
والعقل بقى هو الجنان
آه والله

زي ما بقولك كده، ودي مش فلسفة
ولا تأملات في الفضاء الخارجي
ده واقع عايشينه كل يوم
تخيل

لو واحد وهو ماشي
عدى على محل ورد
نقى بوكيه ورد، ولّا حتى وردة بعشرة جنيهه
وطلب يوديه عنوان ما
صاحب محل الورد
أو غيره يعني
أي حد شاف الموقف ده
هيفكر في إيه؟
بالضبط
الحب الحب

طيب، لو عرفنا إنه الراجل ده باعت الورد لمراته؟
هنفكر في إيه؟

بالضبط

أكيد الراجل ده عامل عملة بيداريها
ويضحك على عقل المدام بالبوكيه المسكين ده

طيب، لو عرفنا بقى إنه عادي

الراجل ده ما عندوش أي ظرف

لا بيعت الورد لحد بره

ولا عامل عملة

ولا حد مريض لا سمح الله

ولا عيد ميلاد

ولا عيد جواز

ولا حتى عيد الهالويين

ده واحد عايز يقول لمراته، أم عياله، بحبك

يبقى الراجل ده إيه؟

مجنون

شفت، أديك إنت اللي قلت

مع إن المفروض إن ده فعل طبيعي جداً جداً

إننا نكون ودودين مع بعض

ونعرف بعض كل شوية إننا لسه بنحب بعض

الكلام ده مش لوم

أنا عارفة إن الدنيا ساحلانا كلنا

وغرقانين في الدوامة

وبنعافر

والمشاغل ماهاش أول من آخر

والفلوس عالقد

والمطالب كثير

و و و

كل ده عارفاه

كلنا عايشين مع بعض

وعارفين اللي فيها

إنما ده ما يمنعش إننا ناخذ نفس شوية، أو نحاول

ونقول لبعض

حتى لو الحاجات العاقلة والطبيعية والعادية بقت جنان

يبقى نتجنن شوية

مفيش مانع تاخذ خمس دقائق بريك مثلاً

وتطلع التلفون

تقلب فالنمر

تقول أو تقولي: فلان أو فلانة دي صاحبتني، وأنا بحبه وهاصبح عليه أو أمسي، أسأل عليه، أطمئن، أحسسه إنني فاكراه، وإن فيه ناس بتسأل على ناس من غير مصلحة.

مفيش مانع

واحنا قاعدين عالفيس بوك

نظمن على ولاد صديق ما بقاش معانا، راح في حته أحسن، نشوفهم لو محتاجين حاجة، ده أكيد مش هياخذ زمن بنكتب فيه بوست، ممكن يكون مالوش أي ثلاثين لازمة، نشحن بس فيه بعض ضد بعض.

مفيش مانع

واحنا في العربيات أو المواصلات نفكر ثلاثين ثانية، ثلاثين ثانية بس، ونفتكر اسم حد ساعدنا، أو كان لطيف معانا، أو عمل الواجب اللي عليه مطبوط، فنقول له شكراً، ولو برسالة عالواتساب، مش لازم نفتكره بس ساعة الموقف، ممكن نحسسه إن الحاجة الكويسة اللي عملها لاقية صدى، وفيه ناس مش بتنساها.

مفيش مانع

نحاول، ولو كل أسبوع، نفكر في حد صاحبنا، عايش وحده، أو في غربة، أو في أي ظرف، فنشد على إيدته، ونقول له: إنت مش لوحك، شد حيلك.

فيه حاجات كتير

لو اديناها خمس دقائق من يومنا، هتفرق كتير جدًّا مع اللي حوالينا

وهنلاقي اللي يسأل علينا

كلنا محتاجين اللي يسأل علينا

كلنا محتاجين شوية من ده

ده جنان؟

وماله

أحسن بكتير من العقل اللي إحنا عايشين فيه

يعني،

ده اللي إحنا عايشين فيه هو العقل.

آه والله زي ما بقولكوا كده.

الدمرداش ومراته

عارف حضرتك مستشفى الدمرداش

اللي بنى مستشفى الدمرداش واحد اسمه الدمرداش،

آه والله زي ما بقولك كده.

بس مكنش أي واحد.

عبد الرحيم الدمرداش، الراجل ده من أغرب الشخصيات اللي ممكن تقرا عنها، لأنه جمع بين ثلاث حاجات صعب جدًا تجتمع في إنسان واحد، بس أهى حصلت.

أولاً، أبوه كان راجل متصوف، وشيخ طريقة، هي الطريقة الدمرداشية، ولما اتوفى أبوه كان عنده 24 سنة، فالنظام في الطرق دي كان توريثي، بمعنى إنه ابن شيخ الطريقة هو اللي لازم يتولى مكان أبوه، وقد كان.

لحد كده حاجة عادية مفياش أي حاجة، ابن شيخ الطريقة بقى شيخ طريقة عادي، هيقوم بدوره، ويقرا الورد كل يوم، ويعمل الحضرات والذكر والمولد، كل اللي بالك فيه، بس اللي مش عادي إن نفس ذات الراجل يبقى واحد من رجال الأعمال المعدودين في مصر، وإنه يفضل يعمل فلوس لحد ما ثروته توصل نص مليون جنيه على الأقل، أواخر العشرينات، يعني حضرتك بتتكلم في مليارات بحساب التضخم.

المزج بين الطريقة الصوفية والبيزنيس، خلى رجال أعمال ومسؤولين كبار يسلكوا في الطريقة الدمرداشية، ويبقى لها صيت عالي في مصر طول فترة حياته، هو تجاوز الخمسين سنة وهو شيخ الطريقة.

الحاجة الثالثة إنه مع ده وده كان مهتم بالأدب، وقارئ جيد، لدرجة إن بنته «قوت القلوب هانم الدمرداشية» كانت كاتبة معروفة، وهو كان بيشجعها على الكتابة والنشر، كمان كان مهتم بالفن وابن نكتة، ده غير معرفة موسوعية في التاريخ والجغرافيا.

سنة 1928، لما قرب على الثمانين، وحس إن أجله قرب، قرر يعمل حاجة تفيد البشر إلى أبد الأبد، فقرر يعمل مستشفى ضخمة تحمل اسمه، وكان ساعتها رئيس الوزراء هو النحاس باشا.

راح الدمرداش للنحاس، ووضع مشروع المستشفى تحت تصرف الحكومة المصرية، مع وضع شوية شروط، باعتباره هو اللي هيصرف:

أولاً: تخصيص 40 ألف جنيه لبناء المستشفى، مع الإسراع في عمل المناقصة، على أساس يلحق يشوفها قبل ما يموت، وعلشان شرط السرعة ده، زود التبرع خمس تلاف جنيه كمان.

ثانيًا: تخصيص ستين ألف جنيه كوديعة تصرف منها المستشفى على المرضى، على اعتبار إن مبنى المستشفى أقل حاجة في التكلفة، إنما بعد كده فيه تكاليف عالية من رواتب ومستلزمات وخلافه، فكان الإنفاق على ده من ريع الستين ألف (ما تنساش التضخم)

ثالثًا: وده الأهم، تقبل المستشفى جميع المرضى أيا كانت حالتهم، ويتلقوا العلاج في المستشفى مجاناً بصورة كاملة، وذلك دون أدنى تمييز بينهم على أي أساس عرقي أو ديني أو طائفي أو عنصري، المسلم زي المسيحي، الأبيض زي الأسود، الصعيدي زي البحراوي.

مرات الشيخ عبد الرحيم بقى، قالت له: وانت يعني هتطلع أجدع مني؟ وراحت باعت كل صيغتها ومجوهراتها، طلعا 16 ألف جنيه، راحت خصصتهم لإنشاء معهد للبحوث الطبية والعلمية، وما فضلهاش من مجوهراتها إلا حاجات بسيطة للاستخدام الشخصي، وفعلاً تم إنشاء المعهد.

بدعوا بُنا المستشفى، بس للأسف الشديد ما لحقش الشيخ الدمرداش يشوف حصاد زرعه، واتوفى قبل ما يكتمل بناؤه ويفتتحه للجمهور.

لما تدور على سبب لتصرف الدمرداش بالطريقة دي، يبقى لازم نقول إنه كان تلميذ مخلص ونجيب للشيخ محمد عبده، الراجل العظيم الي كان يحب الحياة ليه ولغيره، رائد التنوير الحديث.

بجد بجد

ربنا يرحمهم جميعاً.

الدنيا لسه بخير

فيديو انتشر في الأيام اللي فاتت، الفيديو فيه راجل فوق السبعين في المستشفى مع مراته ست عجوزة ومريضة. الست تعبانة يا ولداه ونايمة في السرير، ومن الألم مغمضة عنيتها ومستسلمة لوجعها.

الزوج المسن بأه بيضحك ويهزر معاها، وماسك مشط ويسرحلها شعرها، علشان شكلها يبقى حلو في الفيديو!! الست مستمتعة جدًا بالدلع الزوجي والحنية المفرطة دي رغم ألمها الواضح، وبترد على جوزها وتكلمه.

حالة كده فيها كمية إنسانية وسلاسة ووداعة وعرفان بالجميل ورقة وجمال تكفي تنهي كل الحروب اللي على وجه الأرض بجد والله زي ما بقولكوا كده.

الفيديو ده بالحالة الجميلة اللي موجودة فيه، بيكون فرصة نادرة للواحد يشوف حاجات لسه فيها روح وريحة وراحة، حاجة كده شبه صوت فيروز ولا حتة مزيكا لعمرخيرت، في زمن المرجيحة والزوحليقة ومزيكة تفحر وتمحر!!

حالة جنون العلاقات اللي بنعيش فيها بشكل يومي دي، اللي تخليك تحس إن طرفين أي علاقة داخلينها متحفزين لبعض وقاعدين لبعض، بكم النصايح والبوستات العظيمة بتاعة. . . على فكرة عزيزتي حواء من حقت تكتمي على عصفورة قلب الراجل لحد ما يبانله صاحب، قوم لما يبانله صاحب تغزيه هو وصاحبه.

وعلى الطرف الثاني تلاقي بوستات: عزيزي الذكر، شبكة مش جايين، مهر مش دافعين، فاتحة مش حافظين!!

تلاقي واحد طالع في فيديو يبرق ويزغر ويجعر:

- أختناaaaaaaaaaaaaaaaaااا شرعاً يحق للزوج كيت وكيت وكيت...

هوب تلاقي واحدة طالعة محمرة عنيتها ومطولة ضوافرها وسانة سنانها:

- لأaaaaaaaaااااا ده شرعاً بأه الراجل ملزم بكيت وكيت وكيت...

وده يخش يحامي لده ودول يخشوا يحاموا لدول، وتولع الدنيا تبقى حرب شعواء عبر الفضاء الإلكتروني.

وسط الزحمة وحالة الشحن والشحن المضاد دي، الواحد يفتقد الكلام الحلو، الرومانسية، حكايات

الحب، شوية الأمل والتفاؤل والتطمين اللي من غير تلزيق بالمناسبة. فاكرين جملة (الدنيا لسه بخير)؟

راحت فين دي؟ بص عندك يابني هناك شوفها محشورة بين مخدات الكرسي ولا مرمية فوق أنهي
دولاب!!؟ ما حد يستدعيها لنا ولا يحضرها لنا حتى زي ما بيحضروا العفاريت كده!! هو مين اللي صرفها
أصلاً، ما هي كانت موجودة ومطمنانا أحياناً ومطبطة علينا أحيان تانية؟!

ماهو مش معقولة حتى اللي عايشين معاهم تحت سقف بيت واحد نبقى طول الوقت بيوصلنا رسائل
سلبية عنهم!! ده اللي عايش مرتاح حتى مع شريكه يخش نص ساعة الفيس بوك ولا يتفرج له على كام فيديو
نصايح من اياهم ممكن يروح يغز شريكه من باب الاحتياط. . . . ويوم ما يبقى سوي نفسياً أوي وما
صاهوش أي شحنات سلبية أهو يروح يصروخه وهو نايم!!

يحضرنى جملة الجميلة والعظيمة وردة وهي بتقول (كترتوا من الحب تلاقوا في الضلمة ألف قمر).
يالهوي عالجمال!! كترتوا من الحب يا بشر. . . كترتوا من الحب يا أفندية. . . كترتوا من الحب يا مدامات. . .
كترتوا من الحب يا عيال ياللي لابسين بامبرز حتى.

كترتوا من الحب وحطوه قبل نية السوء، وافترض نية السوء. كترتوا من الحب علشان نلاقي مرادفات
التسامح والمغفرة وتسقيط الفارغة وتكبير الدماغ والتغاضي، رجعت لقواميس حياتنا.

قوم يرجع التقبل، وحبيبك على عيبه، وحبيبك اللي ييلعلك الزلط. ونلاقي (الدنيا لسه بخير) اللي تاهت
وخرجت ولم تعد دي.

الزبال

- لم تمح الرئاسة رائحة القمامة من يدي!!!

دي الجملة اللي قالها (ميونج باك) رئيس كوريا الجنوبية الأسبق، في خطابه الشهير يوم ما تولى حكم كوريا الجنوبية.

الراجل ده أسطورة لا بجد زي ما بقولكوا كده أسطورة. الجدع ده اتولد لأسرة معدمة مش فقيرة. ماحيلتهمش اللضا بمعنى الكلمة. اشتغل في سن الـ18 جامع قمامة (زبال يعني) علشان يجمع فلوس مصاريف الجامعة. مافيش بابا اللي بيدخل جامعات خاصة، ولا ماما اللي بتبيع صيغتها على الدروس.

الواد بصراحة كان ملهم كده وحرك ودماغه مطققة، قوم يتخرج من هنا وتخطفه شركة هيونداي الشهيرة. في ظرف خمس سنين الموظف الشاب ينجح يبقى رئيس الشركة المالتي ناشيونال دي!!

أصل بعيد عن السامعين عندهم هناك حاجة كده اسمها (إعطاء الفرصة لأصحاب الكفاءة) الشر به وبعيد. المهم هيونداي على إيد الشاب الملهم الألمي ده، يتضاعف رأس مالها خمس مرات في خمس سنين!!! آه والنبي زي ما بقولكوا كده، خمس مرات يا مؤمنين!!

الواد من عبقريته في الإدارة العاملين والفنيين وكل اللي لاحظوا عبقريته يجبروه على الترشح لرئاسة الجمهورية!!

وفعلاً يصحى الصبح عامل القمامة يلقي روحه رئيس جمهورية!! ويقول كلمته الشهيرة. «لم تمح الرئاسة رائحة القمامة من يدي!!!» شوف الجمال!!

كوريا الجنوبية بالمناسبة من حياالله خمسين سنة كانت خامس أفقر دولة في العالم! بعد ميونج كوريا بقت خامس أقوى اقتصاد في العالم. اللي بيأكد ميونج إن السبب الرئيسي هو اهتمام كوريا بالمواطن الكوري والاهتمام بالتعليم في المقام الأول، وبيأكد ميونج إن كوريا ما عندهاش أي موارد غير المواطن الكوري أهم مورد في الدولة.

حكاية ميونج افكرتها وأنا بتابع أخبار أوائل الثانوية العامة السنادي، وخبر البنوتة اللي تجاوزت عقبات اجتماعية كتير كان ممكن توقف أي حد وتحليه يرفع الراية البيضاء ويستسلم، وبجد ماكانش أي حد ممكن يلومها.

لكن هي مافكرتش غير في إنها الأحق، والأجدر. واستمرت وربك ما يضيعش حق الشقيان.

بالمناسبة السنادي كان في أكثر من قصة لمتفوقى الثانوية العامة. مش بس قصة مي. لأ فيه كثير اتنشر
قصص تفوقهم رغم ظروفهم الصعبة. وكذا شاب وبنت فعلاً يفرحوا بمجموعهم وبقصص كفاحهم.
دايمًا قصص النجاح الغير مشروط إلا بالشغل والاجتهاد دي، بتفتح القلب كده وتسرخاطر. تدي النفر
مننا أمل وتقول للواحد ما انت أهو تقدر، اللي حالهم أصعب منك ألف مرة قدروا، أمال انت واقف محلك
سر ليه؟ لأ تقدر وربنا تقدر وزى ما بقولك كده تقدر وتقدر أوي كمان.

أيوه الدنيا صعبة

وأيوه العيشة مايعلم بيها إلا ربنا

وأيوه الغلا كاوي الكل

وأيوه الفرص قليلة

وأيوه أيوه وأيوه على كل لسته الإحباطات اللي ممكن نرص ونعدد ونفند فيها من هنا لبعده بكرة المغرب.
بس في نفس ذات الوقت، الناس دي ما نجحتش في حته تانية! ولا كانت ظروفهم تختلف عن ظروفك.
يعني لو ثبتنا كل العوامل والمؤثرات اللي واقعة عليك وعليهم، نلاقي ان اللي واقع عليهم ربما أضعاف اللي
عليك.

وهما قدروا وعافروا وربك قدرهم. طب ها؟

إيه؟

مش حاسس بحاجة؟

مش نتوكل بأه؟

ياللا يا جدعان انتوا لسه قاعدين؟

السخرية سلاح

أي حاجة تخص الإنسان ينفع تبقى مادة للسخرية

لونه، وزنه، طريقة كلامه، هدومه، لحظاته الحميمية، صوره، معتقداته، أفكاره، فساد، نزاهته، انضباطه، فوضاه، اختياراته، ميوله، أسلوب كتابته، اهتماماته، تعبيراته، لزماته، سر حانه، تركيزه، انتباهاته،
ميت إلخ وإلخ

والسخرية حلوة مفيش كلام، ومصر عرفت في تاريخها مجموعة من الساخرين العظماء، مكنوش يقلوا أهمية عن غيرهم من الجادين، الرائد محمد عفيفي، الرائع بهجت قمر، العظيم أحمد رجب، عمنا الكبير محمود السعدني، حسام حازم، جلال عامر، خايقة أكر القايمة آخذ وقت الحلقة كله، وبرضه هانسي ناس كانوا سبب في رسم البسمة على وشوشنا، وبرضه كانوا سبب في إننا نفكر ونواجه مشكلاتنا، وناخذ بالناس من ظواهر وتفاصيل مهمة أوي.

أحمد رجب مثلاً، كانت مصر كلها بتستنى مقاله في الأخبار، نص كلمة، هو مكنش مقال كان كام كلمة، كام كلمة قصيرين، ويمكن جملة واحدة، وأحياناً كان بيكتب كلمة مفيش غيرها، لكنها كانت بتبقى كلمة بألف كلمة.

المقال ده كنا نقراه، ونقعد نقول لبعض: قرئت أحمد رجب النهارده، شوفت أحمد رجب النهارده، وبسبب اللي بيكتبه ممكن تتفتح نقاشات في السياسة والفن والتاريخ والاقتصاد والعلاقات الدولية والرياضة وغيره. محمود السعدني حكى تاريخ مصر، وكتب مقالات وكتب في كل الموضوعات اللي تتخيلها، وكان واحد من مثقفين مصر المعدودين على الصواب، وصيته كان في كل البلاد العربية، وكل ده بالسخرية، والسخرية وحدها.

آه والله زي ما بقولك كده.

إنما دلوقتي، حال السخرية بقى إزاي؟

السخرية ما بقيتش صعبة

الألش والنكتة والإيفيه والكوميكس وخلافه مش محتاجين أكثر من شوية تكتيكات ممكن اكتسابهم إما بالملاحظة أو حتى بالتعلم، مش بس كده، ده كمان سرقته سهلة، والألشة الواحدة بيكتبها مليون واحد على إنهم اخترعوها.

السخرية السهلة دي، اللي موضوعها متوافر وجاهز عامل زي السلاح، نصل السكينة بالتحديد. نصل السكينة سهل استخدامه سواء في قطع قالب زبدة، أو في جز رقبة. الفرق مش في صعوبة الاستخدام، الفرق في الجرأة والقرار، إنت هتستخدم السكينة في إيه؟

في المعارك، السخرية بتبقى سلاح الضعفاء والعاجزين، وأوقات كثيرة، بيبقى سلاح ناجع، وياما السخرية قلبت موازين معارك، خصوصًا لو فيه مجموعات كبيرة، بتستخدمه بشكل موحد، وفي نفس الاتجاه.

إنما ده ما يمنعش إن أي حاجة، تزيد عن حدها، بتقلب ضدها، وإحنا برضه لازم نفكر في اللي حاصل واللي بيحصل، وناخد بالنال وإحنا بنستخدم السلاح الرهيب ده، وحكاية إن سلاح السخرية ده بقى في إيد أي حد يستخدمه ضد أي حد في أي اتجاه على أي موضوع.

وبقى عادي إنك تلاقي ناس بتسخر من ناس من غير هدف، ولا حتى معركة أو لمعارك تافهة.

بقينا نشوف سخرية ونقرا سخرية من غير أي ضوابط، وفي كل الموضوعات، وعلى كل الحاجات، بما في ذلك حاجات ما ينفعش نسخر منها أو عليها، ومش عايزة أسمى حاجات علشان ما أبقاش بانشر اللي خايفة إنه يتنشر.

السخرية حلوة، لما تبقى من أهلها، متوجهة في مكانها، وفي حدودها، علشان تأدي دورها، وما تتحولش من ابتسامه حلوة لحالة هستيريا. آه والله، زي ما بقولكوا كده.

السنهوري باشا

س: مين كتب القانون المدني المصري بشروحه بسلاطاته ببابا غنوجه؟

طب س تانية: مين كتب دستور دولة السودان الشقيق؟

س: تالته، مين كتب دستور دولة الكويت الشقيقة؟

ولا أقول لك، تعالى نقول الأسئلة كلها مرة واحدة:

مين كتب دستور دولة الإمارات الشقيقة والقانون المدني في العراق الشقيق وسوريا الشقيقة؟

كوووووول الأسئلة دي إجابتها واحدة:

د. عبد الرزاق السنهوري باشا

آه والله زي ما بقولك كده.

اللي يلفت انتباهك في حياة عملاق زي الدكتور السنهوري حاجتين...

الحاجتين دول كانوا منتشرين في مصر وقت من الأوقات، أنا عن نفسي حصلت بواقى منه وشفتها بعيني،
واتعاملت معاها عن قرب:

الأولى، يعني إيه مثقف؟

المثقف مش اللي قرا كتب كتير وبس، لكن المثقف اللي بجده، هو اللي له صلة بمجالات كتير نظري
وعملي، يعني، السنهوري باشا مثلاً كان رئيس مجلس الدولة، وفي نفس ذات الوقت عضو مجمع اللغة
العربية، وله أبحاث ودراسات في اللغة، ويتقال عنه إنه كان يحفظ أكثر من عشر تلاف بيت من الشعر
العربي.

لاحظ إن ده بعيد عن حكاية كتابته لكل الدساتير والقوانين اللي اتكلمنا عنها، ومفيش مانع في النص
يبقى وزير المعارف، عادي يعني، فيأسس وهو وزير جامعة إسكندرية، تخيل إن الراجل اللي أسس جامعة
إسكندرية، الإنجاز ده مجرد سطر صغير من إنجازاته.

آه، سوري، نسيت أقول لك إنه كان وكيل النائب العام فترة، ده قبل ما ياخذ الدكتوراه من فرنسا، وياخذ
جائزة أفضل شهادة دكتوراه وقتها عن عيوب في القانون الإنجليزي.

اللي هو نعم!

خير!

إمتى؟!

إزاي؟!

دا أقل حاجة عملها الراجل ده لو حد النهارده عملها ممكن يعيش عليها بقية عمره، ويبقى يستاهل وعن جدارة.

إنما النهضة اللي بجد بتحصل من خلال ناس بتشتغل، ومش بتبص وراها..

خلاص، أنا أنجزت ده..

اللي بعده..

ناس مش بتقف، مش بتهدا، مش بتفكر غير في الإنجاز والإنتاج.

الحاجة الثانية المهمة هي الكفاح.

السنهوري ما اتولدش وفي بقه معلقة ذهب، ولا فضة، بالعكس، أبوه اتوفى وهو صغير، وسابه تلميذ صغير، فكان بيشتغل ويدرس، ومع ذلك كان الثاني عالقطر المصري في التوجيهية، والأول على الدفعة في ليسانس الحقوق، ولما بدأ حياته الوظيفية كان موظف صغير أوي في وزارة المالية.

حتى مسيرته في الوظيفة، ورغم اجتهاده وموهبته وعبقريته، ما كانوش مفروشين ورد وياسمين، أكثر من مرة يتعرض للعقاب من سلطات الاحتلال، فيتنقل أسيوط مرة، ويتكدر مرة، ويتفصل أكثر من مرة في أكثر من وظيفة.

حتى لما كان رئيس مجلس الدولة، مش بس تعرض للإقالة، ده المجلس كله اتحل، بسبب مواقفه السياسية.

مش مهم إيه كانت المواقف دي

المهم، إن مفيش حاجة تغني عن حاجة

لا الموهبة تغني عن الاجتهاد

ولا التفوق النظري يغني عن العملي

ولا الفقر يمنع النجاح

ولا صعوبة الحياة تمنع إننا نمشي الطريق

السنهوري باشا والي زيه، بيقدموا لنا نماذج حية على إن كل ده مش شعارات، كل ده واقع اتعاش، يصعب عليك وعليكي وعلى أي حد عاقل إنه يتحول لمجرد أسماء، يمكن سمعنا بعضها، ويمكن ما سمعناش، يمكن حطيناه اسم شارع أو ميدان ويمكن ما عملناش.

إنما هي مش مجرد أسماء

دي أفعال

وأفعال جامدة

أتمنى نستحق تكون جزء من تاريخنا

آه والله

زي ما بقولك كده.

الشهيد الجيزي

محمود الجيزي.

محمود شاب رياضي، قرر بعد نكسة 67 يتطوع في الجيش المصري، كثير جاهم إحباط وفقدوا الأمل في كل حاجة في الدنيا خلال الفترة دي.

كثير قرروا يهاجروا وسابوا البلد، كثير الاكتئاب ضربهم وقسم وسطهم، كثير الحلم اللي انهار قصاد عينهم خلاهم يفقدوا حتى الإيمان بأبسط البدييات. بس ده مكانش حال الجيزي وغيره. وزيه كثير.

المهم الجيزي وحسب موقع المجموعة 73. اتطوع في الجيش وبسبب جسمه وشكله راح عالصاعقة طوالي.

بيّن كرامة من أول يوم، وانضم للمجموعة 39 قتال، ويتصاب أكثر من مرة، بس إيه ولا الهوا. يتصاب ويرجع جري بعد العلاج على المجموعة. ينتقل بعد مبادرة روجرز الجيزي للصاعقة البحرية.

في أواخر سنة 73 ولما حصلت ثغرة الدفرسوار كان الجيزي في دورية حراسة على شط خليج السويس.

يرجع من الدورية يلاقي الدبابات الإسرائيلية دخلت ميناء الأدبية وحاصرت السويس!!

فكر كم يعمل ايه؟

يهرب لأقرب وحدة؟

يسلم نفسه؟

مين ده!! لا طبعاً مش ابن الصاعقة المصرية أبداً.

الجيزي يطلع جبل عتاقة ويتحصن في مغارة ويبدأ يحارب لواحد!!

آه والله زي ما بقولكوا كده.

كل ليلة ينزل ويختار هدف إسرائيلي جديد

عربية جيب / مدرعة / دورية حراسة

ويهاجمها!! ويرجع من هجومه عليهم بذخيرة جديدة وأكل وشرب وسلاح.

وتاني يوم يختار هدف جديد وهكذا!!

لدرجة إن القائد الإسرائيلي اتخيل إن اللي بيهاجه سرية صاعقة سرّية..

سريه يعني 90 نفر متخيلين اللي الراجل ده كان بيعمله!!

ولما فاض بيه القائد قرر يحاصر المكان اللي الجيزي كان بيتحرك فيه!

واتحرك بسرية دبابات.. 300 مقاتل و30 دبابة رايمين يخلصوا على سرية صاعقة مش متخيلين إنهم رايمين لواحد بطوله.

ويتحصن الجيزي في مغارته وورا صخرته.

ويتكلم القائد الإسرائيلي فالميكرفون ويطلب (السرية) المصرية بالاستسلام. كل ده والجيزي كل شوية يصطاد واحد منهم بسلاحه.

يهدوا شوية يقوم هو مصطاد الثاني.

وبعدين.. ساعة الشهادة قربت، هتعمل إيه يا جيزي وكل الذخيرة اللي معاك قربت تخلص ومتحاصر من 30 دبابة؟

وتخلص فعلاً الذخيرة ويتحدد مكانه من قناص إسرائيلي. ويقع البطل بطلقة في ظهره وفي إيدته خنجره بعد طلقاته ما خلصت.

ويقتحم القائد الموقع ويتجنن لما مايلقاش إلا جثة واحدة فقط للبطل الجيزي.

ولما يتأكد إن كل اللي واجهه ده كان عسكري واحد فقط

يقف يأديله التحية العسكرية.

ويأمر جنوده بدفنه بشكل لائق.

ويذيع راديو إسرائيل الخبر وقتها بالقضاء على سرية صاعقة مصرية كاملة!!

البطل الجيزي وغيره كتار من أبطال الجيش المصري حكاياتهم المليانة فخر وحماس ونماذج للتضحية والفداء بتخلي الواحد نفسه تنور مهما كانت محبطة.

مهما كان فيه أوقات صعبة، والمرار فيها بزيادة كفاية أوي إنك تقرا أو تسمع عن بطل زي الجيزي. علشان تصدق إن حبك لبلدك ماهاوش شعارات ولا كلام وخلاص.. لأ ده بجد وبحق وحقيقي. مهما بتقسى وتوجعك وترذل عليك وتشتكي منها لطوب الأرض

مهما الأيام تغمق وتقلب كاروهات بني في أسود منقط بزيتي.

ساعة ماحد ينوي بس يدوس على خيالها تلقى جوه منك مارد طالع يحرق اللي فكر بس مجرد تفكير يأذيها ولا يجي عليها.

ومن غير ليه ومن غير اشمعنى هو كده

كده زي ما بقولكوا كده.

الشيخ مصطفى

في قرية ميت غزال، مركز سنطة غربية، سنة 1943، كان قاعد يتعشى وسط أهله، فجأة لقي خبط ورزع غالباب، ومأمور المركز وعمدة القرية بيقتحموا البيت، معاهم قوة:

* إنت مصطفى إسماعيل؟

- أيوه، يا جناب العمدة، تمام يا حضرة المأمور، خير.

* هيجي مين الخير، شوف إنت هببت إيه، إنت مطلوب تروح لمراد باشا محسن ناظر الخاصة الملكية.

مؤكد لو كان المأمور عرف الي حصل كان هيعامل الراجل الي رايح له، بشكل تاني خالص.

آه والله

زي ما بقولك كده.

نرجع فلاشباك كام يوم ورا، نلاقي الإذاعة المصرية عاملة بث مباشر من المسجد الحسيني، في مناسبة دينية، وكان المفروض يجيها الشيخ عبد الفتاح الشعشاعي، واحد من المقرئين التقال في البلد.

الشيخ الشعشاعي مشهور ومطلوب، وتلاقيه يومها كان بيحيي المناسبة في خمس ست أماكن، فاتأخر عن ميعاد الهوا، وكان لازم الإذاعة تذيع، فكان مقرئ اسمه الشيخ محمد الصيفي، كان حاضر فطلبوا منه يجيي الليلة بدل الشيخ عبد الفتاح.

زي ما محمد فوزي قدم بليغ بداله، الشيخ محمد الصيفي قال لهم إنه فيه واحد من الي قاعدين هنا صوته حلو أوي، فالناس قبلت ترشيح الشيخ الصيفي، والإذاعة نقلت لأول مرة صوت الشيخ مصطفى إسماعيل وهو بيقرأ تلاوة بدأت بسورة «التحريم»، واستمر يقرأ عبر الأثير من الساعة ثمانية للساعة ثمانية ونص، بس السميعة الي حاضرين لايف ما اكتفوش، ففضل يقرأ لحد نص الليل.

مين كان سامع البث الإذاعي؟

الملك فاروق شخصياً، فقرر إن الراجل صاحب الحنجرة الأماظ دي يبقى مقرئ القصر الملكي، وطلب من مراد باشا محسن إنه يجيب له الشيخ ده، بس كان فيه مشكلة صغيرة إن الإذاعة ما قالتش اسمه، لأنه مكنش قارئ معتمد.

ناظر الخاصة الملكية اتصل بالشيخ الصيفي، الي دله على بلد الشيخ مصطفى، وحصل المشهد الي سمعناه في الأول بتاع المأمور والعمدة.

من ساعة الدخلة الملوكي لمصطفى إسماعيل، وهو مقرئ مصر الأول، كان عنده علم بالمقامات زي ما له علم بالتجويد، وكان بيوجد من أي مقام، وأتم تجويد القرآن 30 مرة على إيد أستاذه إدريس فاخر قبل ما يتم 16 سنة.

عبدالناصر اداله وسام الاستحقاق، والسادات كان بيعتبره مقرئه المفضل، مش بس من قبل ما يبقى رئيس، ده من قبل يوليو بكتير، علشان كده اختاره يروح معاه القدس في الزيارة المعروفة 1977، وراح معاه الشيخ مصطفى، ودي مشهورة، بس اللي مش مشهور إنها ما كانتش أول مرة يزور القدس.

قبل 1967، كان المصريين بيروحوا القدس، وهو زارها سنة 1960 في ليلة الإسراء والمعراج، وقرا هناك. اللي يفرسك بقى، إن عدد الساعات اللي سجلها الشيخ مصطفى وصلت 53 ألف ساعة، عارف يعني إيه 53 ألف ساعة؟ يعني علشان تسمعهم متواصلين محتاج أكثر من 6 سنين لا تاكل ولا تشرب ولا تنام ولا تدخل الحمام، الراجل ده قضى أغلب عمره بيسجل القرآن.

إيه اللي يفرس في كده؟

اللي فضل من التسجيلات دي، قول كام ساعة؟

300 ساعة فقط لا غير، هي اللي الإذاعة بتعيد وتزيد فيهم، بس ربنا يخلي لنا السميعة والهواه واليوتيوب والساوند كلاود، هُمّ اللي بيتيحوا لنا نسمع ما تيسر من قراءات الشيخ.

بس اللي انا نفسي أعرفه وما عرفتوش:

كان إيه موقف المأمور والعمدة لما عرفوا إن الراجل اللي اقتحموا بيته ده بقى مقرئ القصر الملكي الأول؟
هه؟ كان إيه؟

كان إيه؟

الشير اللا إرادي

كل ما افتح الصفحة الأزرق فابيض على أي جهاز معايا، أسرح، واقعد أنه نفسي ميت مرة قبل ما اشتبك
إني مش باتعامل مع مجرد موقع على شبكة الإنترنت.

آه والله

زي ما بقولك كده.

الفيسبوك مش مجرد موقع إلكتروني، ده القائد العام للرأي في العالم كله، وفي بلادنا بالأخص.

زمان كانت الصحافة، بعدها الراديو، ثم التلفزيون، قبل الإنترنت ما يعلق عينينا كلنا على شاشة
الكمبيوتر، ومن بين كل مواقع الإنترنت جه الساحر العجيب، الله يجازيك يا مارك يا ذوكبرج يا
ابن...، ألا صحيح هي امه اسمها إيه؟

يالاً ما علينا.

ليه بأنب نفسي كده؟

علشان البتاع ده، فيه زرار خطير أوي، اسمه share، الزرار ده حضرتك لما بتدوس عليه، بمجرد ما
تدوس، فانت نقلت الكلام أو الصورة اللي فوقه للي موجودين عندك على الأكاونت الشخصي بتاعك،
شوف انت بقى عندك كام فريند، ولا كام فولور؟

العملية دي بالضبط، كإنك طبعت جرنان، ونزلته للناس يقروه، لأ يا ربي، ده أقوى بكتير، الجرنان مش
أكيد هيشتره ويقراه كل الموجودين عندك في الصفحة. الجرنان محتاج وقت ينطبع وينزل السوق والناس
تروح تشتريه، إنها ده بيوصل في نفس ذات نفس اللحظة.

فيه حاجات بتتنشر على فيسبوك، ومن خلال زرار الشير ده بيوصل لملايين من الناس في دقائق معدودة،
وأحياناً ثواني، وكل واحد داس عالزرار ده ساهم في نشره وتوسيع دايرته، وجايز أو غالباً بيكون عمل ده
وهو مش واخذ باله من دوره في اللي حصل.

علشان كده، أنا بأخذ وقتي وافكر قبل ما اشير، باحاول أمنع نفسي بكل الطرق من الشير اللا إرادي.

مش كل خبر، حتى لو جاي على هوايا، خبر صحيح، وحتى لو له أصل من الصحة، ممكن ما يكونش
دقيق، والحكاية ما تكونش حصلت كده بالضبط.

مش كل معلومة مكتوبة بثقة معلومة أكيدة، ومش بالضرورة اللي ناشرها يكون بيكذب، ممكن يكون ما تأكدش كويس.

مش كل رأي مكتوب بكلام مرصوص، وشكله حلو كده، هو رأي مفيد، أو سليم، أو تحليل «عميق» لللي بيحصل، ده بغض النظر يعني إننا شبعنا عمق.

مش كل فكرة أو اقتراح حد بيقدمه بطريقة مبتكرة، هو فكرة سديدة أو اقتراح نافع.

مش كل صورة صحيحة، مش كل فيديو حقيقي، مش كل نكتة لايقة، مش مش مش.

فيه حاجات كتيره من اللي بنشيرها، لو فكرنا ثواني، مجرد ثواني، هنكتشف إنها مكتتش تستاهل، بس إحنا بندوس الشير، بعدين ننسى، وما نرجعوش تاني، غير بعد كده بكتير، لما تطلع لك في الذكريات إنك شيرت الحاجة دي، فتسأل نفسك باستغراب: هو انا قد كده كنت ساذج؟

ندي نفسنا فرصة، ما يجراش حاجة، ثم إن الإنترنت مش بس فيسبوك، لو فيه معلومة أو خبر أو صورة، ممكن أتأكد من صحتها في دقيقة، أو كام دقيقة، وفيه حاجات تستاهل منا تدوير أكثر، وتدقيق أكبر، علشان مفيش أخطر ولا أهم من الرأي العام.

الرأي العام هو اللي بيزق الدنيا، وزى ما ممكن يزقها لقدام، ممكن جدًا يزقها لورا

آه والنعمة

زي ما بقولكوا كده.

الصحافة الهلال

دايما لما نتكلم عن القوة الناعمة، بنقول السينما والأغاني والفن عموماً ممكن كمان نجيب سيرة الثقافة والأدب والرواية ونوبل لكن قليل ما بنجيب سيرة الصحافة مع إن الصحافة المصرية لعبت دور كبير في إن مصر يبقى لها صوت في العالم، مش عايزة أقول العالم العربي، ولا الشرق الأوسط، لأ، في العالم كله، وسنين طويلة، يمكن عقود كانت الصحافة المصرية والصحفيين المصريين على موائد رؤساء العالم تماً.

آه والله

زي ما بقولك كده.

والصحافة المصرية قديمة، أقدم مما نتخيل جميعاً، سواء بشكلها الحديث، أو بأشكال قديمة، لكن خيلنا في الشكل المعروف للصحافة، تقدر تقول إن الجرايد والمجلات المصرية عمرها قرنين من الزمان، أيون، ما يقرب من 200 سنة.

ولو انت داخل السيدة زينب، من عند المتديان كده

هتلاقي مبنى عتيق عريق

المبنى ده على الكام سلمة اللي يطلعوك الدور الأول

مشي عظماء مصر والعالم: حكام، ساسة، فنانيين، مثقفين، مبدعين، علماء، يوووووه ما تعدش

المبنى ده اسمه دار «الهلال».

يوم واحد سبتمبر 2017، مر على تأسيس دار الهلال 125 سنة، قرن وربع، 25 سنة فوق المية، حضرتك متخيل معايا الرقم! ده مش مجرد رقم، ده تاريخ وناس راحت وناس جت وناس اتولدت وناس راحت، واحتلال جه واحتلال مشي، وحروب عالمية قامت وقعدت، وثورة ورا ثورة ورا ثورة، ومن الخديوية للسلطانية للملكية للجمهورية.

125 سنة ده مش عمر، ده أعمار كثير.

والي أسس دار الهلال جورجي زيدان

اللبناني، اللي اتولد لأب صاحب مطعم، ومن الشغل في المطعم، لصناعة الأحذية، لدراسة الطب، ثم الصيدلة، ثم اللغات، ثم سفر وسفر وسفر: إيشي سودان، إيشي لندن، إيشي إيشي.

لكن فين لقي نفسه؟

هنا

في مصر

اللي كان عندها القدرة طول الوقت تهضم كل حاجة، وتستوعب أي ثقافة

ولقى نفسه أكثر في الكتابة

اشتغل في جرنان اسمه الزمان

شوف بقى، إذا كان الهلال بقالها 125 سنة، يبقى المكان اللي اتعلم فيه مؤسس الهلال من إمتى؟

سنة ونص بيتعلم صحافة وكتابة.

بعدين شارك واحد صاحبه اسمه جورج متري في مطبعة

وانفصلوا

جورجي زيدان عمل دار الهلال

وجورج متري عمل دار المعارف

طبعًا والنعمة قلبي بيرفرف لما تيجي الأسماء دي في بالي.

1892 صدر العدد الأول من مجلة الهلال، اللي سهاها كده علشان هي زي الهلال، بتهل مرة واحدة أول

كل شهر.

في ظرف خمس سنين، بقت واحدة من أهم المجلات الثقافية في مصر وبراهها، وبيكتب فيها فطاحل الأدب والثقافة، وبمرور الوقت بقت حلم لأي كاتب إن اسمه ينزل في مجلة الهلال، يبقى نال الرضا وامه داعية له.

وكبرت المؤسسة، وطلعت إصدارات تانية، ومجلات تانية، طلع منها المصور، والكواكب، وحواء، وكتاب الهلال، وروايات الهلال، وبقت ماركة مسجلة للثقافة الأنيقة.

عارف يا أخي

عارفة يا أختي

في الخمسينات، كان الفنان اللي يتكتب عنه في الكواكب مثلاً، بيبقى ستار توماتيكي توماتيكي كده.

فين دلوقتي أرشيف الحاجات دي؟

دي كنوز يا عالم

مش بس كنوز أدبية، وقيمة معرفية، وكده

ولو ان ده مش شوية

دي كمان حاجات تجيب ثروات مالية

وتفضل تجيب طول ما إحنا عايشين

بس مين يشتغل ويدور

آه والله

زي ما بقولك كده.

الصيف وبلاويه

يارب . . . توب علينا من الصيف وبلاويه واللي بيجرى فيه.

افتكرت الجملة العظيمة دي اللي كانت في فيلم ما . . . مش فاكره منه غير ماجدة الخطيب الحقيقية.

المهم إن كل ما يهل علينا العرق والرطوبة وزحمة الصيف -قال يعني مافيش زحمة في الشتاء- كل ما يخش الصيف بقرونه علينا، ويحط رجله ويقعد ويربع ويفرش فرشته على الموجودات كلها، قَوَام يحول البشر لصبوع محشي ورق عنب عرقها مرقها بالمعنى الحر في للكلمة.

افتكر الجملة الشهيرة والعبقرية والموجزة الحقيقية.

الصيف وبلاويه واللي بيجرى فيه.

هله الصيف معناها انتظار وَقَع سبل المتناقضات البشرية على دماغك من كل ناحية.

يعني لازم تلقى الخناقة السنوية بتاعة (شواطئ ولاد الناس) وكم الوصف والإسهاب في الموبيقات اللي بتحصل، للدرجة اللي تحسسك أن الباشمهندس أبو جهل كان واخد جروب كفار قريش ورايحين يوثدوا عيال صغيرة، ويصطادوا عبيد!!

وفي الآخر تلاقي الموضوع كله عبارة عن شبان بالمايوهات!!

على الجانب الآخر تلاقي (المصايف الشعبية) والبوستات الرخمة إياها بتاعة، شوف الجلايب، بصوا الفالانات، بص العيال لابسين ازاي، شوف بياكلوا بطيخ بقشره، إلحق حلل المحشي والوابور!! ياااي . . . يااااا يا خسارة يا بلاجات سيدي بشر، فين أيام لما كانت صوفياالورين تيجي من إيطاليا مخصوص علشان تبلبط في شاطئ أبو هيف!!!

أي والنبي زي ما بقولكوا كده كمية من الهري والهري المضاد، اللي ماتخرجش منه بأي نتيجة، ولا تتحصل منه على جملة مفيدة.

الغريب إن نفس الكلام بيتكرر بنفس الكثافة ونفس المفردات، والنبي وبنفس الصور كمان، وعلى الله كل سنة!!

طب ما خلاص يا جدعان؟ كل سنة بنقول ونعيد نفس الكلام ولا فيش حاجة بتتغير، وبالمناسبة ومافيش حاجة بتختلف!! الناس عادي بيلبسوا مايوهات من قبل الحرب العالمية، وميزان الكون ما اختلش!! وبردو بياكلوا محشي وبطيخ بقشره من التمانينات ومعدلات التلوث البيئي زي ما هي!!

مش القصد إن تعميم السلوكيات السلبية هو الصح، لكن القصد إن كتر النفخ عمال على بطال في الحبة لتحويلها لقبّة بأي شكل، مايبجيش من وراه إلا قطعة النفس ووجع الزور والدماغ وحاجات تانية.

فيه سلوك سلبي حضرتك شايفه؟ هايل جدًّا! إيه بأه الحل من وجهة نظرك؟ ماتتحفنا كده وتخلينا نرقص على سعدنا برؤيتك الثاقبة؟ ويا سلام كده لو تيجي على نفسك ولا تصورش حد!! آه ياريت plz يعني زي ما بقولك كده. تعالى على نفسك وبلاش تصور علشان ده اسمه تشهير واختراق خصوصية وانعدام ضمير وحة حاجات كتير كده تطلعك شكلك مش ولا بد خالص، ولو في أي حته في الدنيا عملت العمائل دي ممكن تتحاكم وتفضيلك حبة مش بطالين كده خلف الأسوار، أو تدفعلك غرامة تخليك تشحت بربابة في الشوارع.

من الآخر القاعدة العالمية بتقول: (حريتك تنتهي عند حرية الآخرين) واخذ بالك؟ نقولها تاني (حريتك تنتهي عند حرية الآخرين).

بمجرد ما تبدأ تخترق خصوصية الناس بتنتهي كل مصطلحات الحرية والنقد و. . . و. . . وبتبدأ المصطلحات اللي بتتناول عدم المؤاخذه تربيتك وأخلاقك.

الصح صح والغلط غلط. بس النقد حاجة والغيرة على المصلحة العامة حاجة، والتصيّد والصيد في الميه العكرة حاجة تانية خالص.

آه والنبي زي ما بقولكوا كده

الطاهرة

سنة 1920 يبني المعماري الإيطالي الأشهر وقتها في العالم:

«أنطونيو لاشياك»، قصر جديد للبرنسياسة أمينة عزيزة بنت الخديوي إسماعيل، ووالدة محمد طاهر باشا. شوف بأه لما بنت الخديوي إسماعيل تبني قصر وبينى هو لها «لاشياك» شخصياً، يطلع حاجة عمله إزاي؟ والحقيقة لاشياك ما قصرش خالص، ويخرج للكون واحد من أجمل القصور اللي عرفتها مصر في تاريخها، لأ ويصنف كواحد من أجمل قصور العالم كله رغم مساحته الصغيرة اللي بتخليه يعد الفيلا الأكثر رقياً في مصر كلها.

بالمناسبة أنطونيو لاشياك من أعظم المعماريين الأجانب اللي جم مصر وهو اللي صمم مجموعة كبيرة من مباني وسط البلد زي الفرع الرئيسي لبنك مصر، عمارات الخديوية، المبنى القديم لوزارة الخارجية المصري بميدان التحرير، مدرسة الناصرية بشارع «شامبليون» مبنى محطة الرمل بالإسكندرية.

وقت بناء القصر اتسمى باسم طاهر باشا ابن الأميرة أمينة، وطاهر باشا كان الرياضي الأشهر في مصر وقتها. رئيس للجنة الأولمبية وفارس وراعي لرياضة السيارات في مصر.

خلال الحرب العالمية ولأن طاهر باشا كان موالي للألمان. اتسجن أكثر من مرة وفي أكثر من سجن فاضطر بيع قصره واشتراه الملك فاروق وكان هدية للملكة فريدة.

ومن وقتها تحول قصر (طاهر باشا) لقصر (الطاهرة)

والطاهرة الصفة اللي فضلت لصيقة بالملكة فريدة حتى بعد طلاقها من الملك فاروق وخروج المظاهرات المؤيدة ليها والي بتهتف: لتخرج الطهارة من بيت الدعارة.

نرجع للقصر.

الملك فاروق كان من هواة جمع التحف والأنتيكات. فيحول القصر تقريباً لمتحف شخصي لمقتنياته.

هتلاقي أجمل ترايبزة بلياردو في العالم بتحتل قاعة البلياردو في القصر. وأغلى دولاب هدايا، مجموعة نادرة من التماثيل الرخامية، أجمل طقم شمعدانات وأباليك في كوكو الأرض، سقف من المرمر الأبيض لما الشمس تنوره ممكن تعيط من الجمال، تابلوهات لأشهر رسامين العالم، سجاد إيراني من اللي لما نفر يدوس عليه بس يرجع شباب.

نجف من اللي يشرح القلب المتناع، أكبر مجموعة فازات وزجاجيات من كل بلاد الدنيا، وكل ده كوم والنافورة النحاس اللي في المدخل كوم لواحدة.

بصوا هو الوصف ممكن ماينتهدش لحد بعد بكرة الساعة 8. المهم التحفة دي مانفعلش تكون مقر للحكم بسبب صغر المساحة مع كم التحف والأنتيكات طبعًا.

ودارت الدائرة طبعًا على القصر سنة 53 وانضم للقصور الرئاسية. واتحول لمقر سري لقيادة الجيش خلال حرب 73، ويمكن أشهر صورة للحرب اللي فيها الرئيس السادات مجتمع مع قادة الميدان وقدامهم خريطة كبيرة للمعركة. الصورة دي اتأخذت في قصر الطاهرة والخريطة كانت مخطوطة على ترابيزة البلياردو الأعلى في العالم اللي حكينا عنها من شوية.

القصر كمان شهد إقامة السيدة: فتحية نكروما زوجة أول رئيس لغانا. وشهد إقامة رئيس الوزراء الفرنسي ليونيل جوسبان. حالة القصر اتدهورت جدًّا طبعًا بعد التأميم. واتباعت كتير جدًّا من محتوياته في مزادات ما بعد 52. يمكن ده السبب اللي خلى إقامة إمبراطورة إيران السابقة وأسرتها (فرح ديبا) ماتولش وتقرر استئجار فيلا في جنوب فرنسا وتروح تعيش فيها.

القصر استعاد جماله ورونقه في تسعينات القرن الماضي مع حركة تجديد لكل القصور الرئاسية. ويفضل الطاهرة واحد من أكثر قصور العالم أناقة وموقعه في القاهرة العامرة. اللي يمكن كتير مننا مايعرفوش حتى بوجوده ولا تاريخه.

آي والله زي ما بقولكوا كده

الطهطاوي

النهضة مش بس سياسة

النهضة فكر وعلم وثقافة

ومصر دخلت العصر الحديث على إيدين حكام شجعان قرروا ده

لكن كمان كان فيه مثقفين، عملوا كل حاجة ممكن تتعمل، علشان مصر الماضي، تبقى كمان مصر الحاضر،
ونقدر نعتبر أبو النهضة المصرية الحديثة في الثقافة وخلافه هو رفاة الطهطاوي

آه والله

زي ما بقولك كده.

رفاعة الطهطاوي، اللي بقى مجرد اسم بنرده، وكثير مننا ما يعرفش الجبل العظيم ده تعب وشقي قد إيه،
علشان كلنا كلنا نتعلم ونبعد عن الجهل، اللي هو مش بس جهل القراءة والكتابة، لكن كمان ضلام العقول.

ويقولوا إن الديك الفصيح، من البيضة يصيح

ورفاة كان باصص بعيد، بعيد، من أول شبابه.

كان طالب في الأزهر زي آلاف وآلاف غيره.

جت بعثة رايحة فرنسا، أغلبها تراكوة، وفيها كام واحد مصري، البعثة كانت عايزة إمام من الأزهر، مهمته
بس إقامة الشعائر وإمامة الصلاة لطلاب البعثة، عافر الطهطاوي، وهو عنده 25 سنة إنه يكون الشاب ده،
وفعلا الشيخ حسن العطار، شيخ الأزهر، وافق له عالطلب.

راح الطهطاوي باريز، وهناك، ما اكتفاش بدوره الديني، درس الترجمة، وخذ درجة علمية من فرنسا،
وقبل ما ياخذ الدرجة، كان مترجم له 12 كتاب، يعتبروا أوائل الحاجات اللي اترجمت من لغة أوروبية
للعربية في الوقت ده.

لما رجع الطهطاوي، محمد علي باشا أعجب بفكره وحماسه ونشاطه، فخلاه قريب منه، واداله مساحة
واسعة يتحرك فيها، فتقدر تعتبر رفاة الطهطاوي هو أبو كل حاجة في مصر.

عمل مدرسة الألسن، اللي هتبقى كلية الألسن، وتشتغل في ترجمة الكتب، مش بشكل فردي، لا، دي
بتخرج كل سنة مترجمين.

الصحافة، بص عالصحافة، ولقى إنا ما عندناش جرايد زي بلاد بره، باستثناء جريدة يتيمة بتصدر باللغة التركية، اللي هي الوقائع المصرية، ودي تقدر تعتبرها نشرة رسمية لنشر القرارات.

الطهطاوي عمل منها نسخة عربي، وخلاها جريدة بتتوزع وتتباع، والمتعلمين يقدروا يتابعوا منها أخبار العالم، وكده بدأت الصحافة المصرية.

نين ما تدور، غالبًا غالبًا، هتلاقي البداية كانت من رفاة الطهطاوي، أول تعليم نظامي، أول مدرسة محاسبة، بقت كلية التجارة، أول أي حاجة تخطر في بالك ليها علاقة بالورقة والقلم.

مش بس كده

لما جه رفاة الطهطاوي يتجوز، ضرب بنفسه المثل، وعمل وثيقة جواز تدرس، باعتبارها وثيقة زواج ملتزمة ميه في الميه بالشريعة، لكنها حديثة ومنفتحة، وبتحافظ على كافة حقوق الزوجة، والوثيقة دي موجودة لحد دلوقتي، وتقدر تقرأها على شبكة الإنترنت.

لما اتوفي محمد علي، وجه بعده ابنه سعيد، تخلص من كل رجال الباشا، مش لمشكلة فيهم، هو بس كان ضد اللي قبله، فنفى الطهطاوي بره مصر، فعادي، ولا كان حاجة حصلت، ولا قعد يبكي ولا يشكي ولا يقول مظلوميات، فضل يشتغل ويكتب ويترجم، وهو عارف إنه راجع، ورجع بعد 4 سنين.

رجع كإنه ما غابش ولا ثانية، نفس النشاط، نفس الحماس، ونفس التفكير في المشاريع الجديدة. مدرسة لمحو الأمية، أو تعليم الكبار، والتميز بينها وبين الدراسة الابتدائية للصغار. التركيز على الآثار، ومحاربة الجهل بأهميتها، وصدور قوانين تجرم التجارة فيها، أو تهريبها بره البلد، باختصار محاربة فكرة إن الآثار دي مساخيط، المفروض نبيعها ونكسب منها وخلاص.

حاجات كتبيير أوي أوي

تخليك تسأل

إزاي عمر واحد ساع إن كل ده يحصل ويتعمل على إيد نفس الشخص؟

ربنا يرحمه

ويرحم الجميع

العشم

قالك يا سيدي جحا في يوم من الأيام اتهم في عقله، وقال أنا هديح دبيحة كبيرة وأكّل منها كل الجيران والحبايب، واجري ياولية اعزمي كل أهلك وصحابك وجيرانك، واجروا يا عيال قولوا لصحابكم بابا دابح ومستنيكم بكرة عالغدا، ويطلع هو كمان في السوق يقول للتجار ولأهله ولجيرانه مستنيكم بكرة على الغدا. قول الناس ماتكدبش خبر وبيجوا لبيت جحا أفواج أفواج، ويقول لمراته رصي كراسي ودكك صفوف صفوف ورا بعض، ويقعد الناس ورا بعض يستنوا الأكل.

حبة ويشموا ريحة الشوي والدخان يعبأ الدنيا، البطون تتركب والعقول تزوغ والكل يبشكر جحا على كرمه وإحسانه، شوية ويدخل جحا عالناس ياخدوه بأهلاً وسهلاً وبالمدح ويعدي وسطهم بين الصفوف، ويقول: يا فلان شكلك تخنان لحم التور يئديك، يا علان إنت قلبك بيوجعك ماتستحملش دهن التور، يا اسمك إيه إنت عجوز وسنانك مخلعة ماتقدرش تاكل لحم التور، يا ست ابنك عامل دوشة امشوا مافيش لحم تور، واد يا صغير فين ابوك امشي روح مالکش لحم تور.

وهكذا فضل جحا يطفش في الناس واحد ورا الثاني ورا العاشر، والناس تاخذ على خاطرها وتمشي جعانة. وفي الآخر فضل جحا بطوله في البيت.

تغضب مراته وتقوله كان ليه طيب؟

يقولها: جحا أولى بلحم توره.

صحيح جحا أولى بلحم توره، بس في نفس الوقت طالما عينه في لحم توره من الأول وطفس وديني ومالوش في الكرم، ماكانش يعشم الناس ويجيبهم لحد عنده على مآلا وشهم.

من أرذل الصفات أو التصرفات اللي ابن آدم ممكن يعملها مع مخاليق ربنا هي قطع العشم.

والنبي زي ما بقولكوا كده

لما حد يبقى حاطط ثقته فيك ويلجألك ويكون عارف ومتأكد إنك تقدر تجاوبله طلبه، وتقل معاه وتقطع عشمه.

احس على دي حركة ابتليت بيها البشرية يا جدعان.

كسر الخاطر، وقطع العشم حاجتين مرتبطين أوي ببعض.

وما أدراك ما كسر الخواطر وقطع العشم.

بالك لو من الأول نفر من دول مدي انطباع (ماليش فيه) و(ماعرفش) و(مايخصنيش) بيبقى أسهل وأريح بكتير، لأن أساساً وأصلاً ماحدث بيبقى باني عليه تطلعات ولا متعشم فيه خير ولا شر... ماحدث مستني من الأبعد حاجة يعني.

لكن لما تبقى فنجري حنك وسبع رجالة في بعض والكلمة ساحبة في لسانك سلّبة وداخل في كل حاجة بقرونك، وأنا أعمل وأنا أسوي والنبي بس تؤمر، إحنا نفسنا نخدم. بجد وحياة الميتين والصاحيين، ده انت أصل جمايلك مغرقاني، طب بص رقمي اهو، أي حاجة بس اديني رنة وانا تلاقيني تحت البيت. عارف انت الناس دي اللي من كتر إلحاحها في تقديم أي حاجة ليك تبقى مكسوف إنك مبتطلبش منهم حاجة!!

وتيجي تقصدهم في شرش بصل دبلان يعملوا من بنها!! ولا تقصدهم بجد في ساعة زنقة ولا مصلحة حقيقية، يصدر ولك فريد!!

إخبييييه عالاحساس اللي العالم دي بتحسسها.

إوعوا والنبي تقطعوا بعشم حد فيكم، إوعوا تكسروا خاطر حد. لو في إيدك حاجة تعملها اعملها ولو حتى مكاملة تليفون ولا بوست عالسوشيال ميديا بس تبقى عملت كل اللي تقدر عليه! أو من الأول ماتعشمش حد فيك وانت مش قد عشمه. بجد زي ما بقولكوا كده

العلم والإيمان

مواليد ما بعد النص الثاني من التسعينات، جايز أوي ما يعرفوش بتتكلم عن إيه النهارده. بس أكيد سمعوا.

أكيد سمعوا عن سهرة الاتنين من كل أسبوع في الثمانينات والتسعينات. . . . لأ مش تاكسي السهرة يا خفيف. دوكها كان بييجي بعد منه.

لمة العيلة حوالين التلفزيون المجعلص الحلو ده بتاع زمان. والكل قاعد فاتح بؤه ومنذهل كده. قصاد الفيديوهات اللي جايالنا حاجات ولا عمرنا سمعنا عنها.

أكيد استنتجتوا إننا بتتكلم عن العلم والإيمان.

أشهر برامج التلفزيون المصري في حقبة السبعينات والثمانينات؟

National geographic و animal planet و history chanel بتاعتنا قبل كل الكلام الكبير ده ما يحصل.

قبل ما يبقى فيه جوجل ويوتيوب وقنوات متخصصة، وقنوات مش متخصصة ولا دش من أساسه، وويكيديا وثورة الـ search اللي حاصلة حالياً دي.

برنامج كان بيجيلك كل الإبهار اللي ممكن تتخيله متمثل في أفلام وثائقية مصحوبة بتعليق متخصص وهادئ بصوت رخم للمرحوم د. مصطفى محمود.

بالنسبة لينا في وقت كل حاجة فيه كانت محدودة كان العلم والإيمان ثورة معلوماتية بحق ربنا.

آه بجد زي ما بقولكوا كده.

تر العلم والإيمان وطلّة دكتور مصطفى محمود بدلته ونضارته ووراه الخلفية السادة. كانت بالنسبة لنا إيدان بدخولنا صندوق الدنيا.

يالآ نشوف الفيروسات هتعمل فينا إيه، طب الزلازل طب البراكين. لأ هنتفرج على مملكة النحل. طب الأمراض النفسية، لأ القنابل النووية.

ياااااااااااا

العلم والإيمان استهلك عمر دكتور مصطفى محمود كلياً تقريباً.

يعني نتاجه الأدبي والعلمي والفلسفي كان كوم، والعلم والإيمان كان كوم لواحد!!

تخيل إن تصوير موسم واحد من البرنامج كان يباخذ سنتين كاملين!

آه والله زي ما بقولكوا كده

سنة كاملة تجميع للأفلام من كل حته في الدنيا أوروبا وأمريكا وآسيا وأستراليا واليابان، يفضل الدكتور يلف يجمع في الداتا دي.

ويرجع يفندهم ويجهز المادة العلمية ويبدأ تصوير ومونتاج بشكل يومي لمدة 6 شهور كاملة!!.

التعليق بأه على الأفلام كان بيتطلب من دكتور مصطفى قراءة ما يقرب من 8 كتب غير الأبحاث والرسائل علشان يعلق على حلقة واحدة.

وكشف مرة إنه اضطر يقرأ أكثر من 150 مرجع علشان يعلق على حلقة واحدة!!

دكتور مصطفى تقاضى أجر جنيهه ونص عن أول حلقة للبرنامج! آه وعهد الله جنيهه ونص وفيه كلام انهم بعد الضرايب بقوا 75 قرش كمان!

طب دا أقصى أجر حصل عليه كان 300 جنيه بعد 18 سنة عرض للبرنامج!!

والنبي زي ما بقولكوا كده.

وانا تراجع ذكريات ومعلومات كثير عن العلم والإيمان. وقفت كثير أوي قصاد فكرة المجهود الرهيب اللي كان ممكن حد يبذله علشان يتحصل على معلومة.

اللف والدوران والسفر وتمقيق العين في قرابة كام ألف صفحة في كتاب قد الكومودينو لجل ما تلقى معلومة، ممكن تكون في الصفحة 1999!

وزمن عايشين فيه المعلومة بقت على بعد (كليك) واحدة من صباعك.

ومع كده 99% من الكليكات بنعملها في طق الحنك والهيافة والرغي وسيرة الناس والتريقة والمزايدة.

و1% المفيدة راخرة فيها كلام.

تحية لقيمة وقامة العلم والإيمان وصاحب العلم والإيمان العالم الكبير المرحوم د. مصطفى محمود.

وتحية لكل الناس اللي لسه بتدور وتفتش وتستقي معلومة مفيدة ليها ولغيرها ولسه مستعدين يتعبوا ويبذلوا مجهود علشان يتقنوا عملهم .

العلم نورن بالنون

كلنا عارفين حكاية الراجل العجوز، الي كان بيحط بذرة شجرة في الأرض.
عدى عليه واحد شاب، قال له: يابا الحاج، ربنا يدريك الصحة وطولة العمر، بس يعني ما تأخذنيش،
البذرة دي على بال ما تكبر، وتبقى شجرة، وتطرح ثمار، عايز لها سنين.
الشاب كان يقصد يعني إن الراجل العجوز ده، مش هيعيش لحد ما يشوف الشجرة، طبعًا الأعمار بيد الله،
بس برضه، ربنا عرفوه بالعقل، فالشاب بيسأل: إيه فائدة إنك تعمل حاجة مش هتستفيد إنت منها.
عارفين كمان إجابة الراجل، إننا لو بنفكر بالمنطق ده، مش هنعمل حاجة، طول ما انت عايش، وفيك
نفس، واجب عليك تعمل حاجات مفيدة للكل، ليك وولي جي بعدك، واللي عايش معاك، والراجل نفسه
ياما استفاد من حاجات عملوها ناس قبله، أو ناس تانيين ما يعرفهمش خالص، هي دي الدنيا.
كلنا عارفين ده، إنما اللي عايزة أقوله لك النهارده، إن الفكرة دي مش بس في زرع الشجرة، حاجات كتير
أوي في حياتنا مالهش سن معينة نيجي عنده ونقول خلاص، شطبنا، ويالَّا حسن الختام والكلام ده.
من أكثر الحاجات الي نفسي نعرف إنها مش مرتبطة بسن، هي التعليم، أو خليني أقول لك التعلُّم، العلام
بالبلدي، آه والله زي ما بقولك كده، وإذا كان أهالينا زمان قالوا: «بعد ما شاب ودوه الكُتاب»، فده مثل
قديم، يا ريت الي سمعه يشطبه من حياته، واللي ما سمعوش، يبقى ولا كإيه سمعه.
التعليم عندنا بيبقى مرتبط عادة بفكرة «الشهادة»، مع إن الهدف الأول للعلام، هو العلام نفسه، المعرفة في
حد ذاتها، مش بيقولوا «العلم نور»، أو على رأي مسرحية فؤاد المهندس: «العلم نورن» بالنون، فالبني آدم
منا طول ما هو عايش محتاج يعرف أكثر عن حاجات أكثر.
عيب أوي لو لقيت فرصة إني أتعلم لغة مثلاً، وعندني الظروف المواتية، فيبقى المانع إني كبرت وعديت
التلاتين أو الأربعين، أو... لا خلاص كده، إحنا ما بنكبرش أساسًا عن الأربعين.
مش لازم أوصل فيها لأعلى حاجة، مش لازم أتكلمها يعني كأحد أبنائها، مش لازم أشتغل مترجمة فورية
محترفة، كفاية أوي أبقى عارفة الأساسيات، ما اعطلش وانا باقرا خبر لإني ما اعرفش الإيه من البي.
ممكن آخذ كورس في التسويق، التسويق مش بس بيع السلع، ومش بس في عالم الشركات، كلنا محتاجين
نسوق نفسنا وشغلنا وأفكارنا، ومحتاجين نتعلم أساسيات التسويق الي بيبقى فيها جوانب نفسية واجتماعية
مفيدة، كمان هاخذ فكرة عن عالم الاقتصاد.

خد اللغات والتسويق، وقيس على أي حاجة تانية، مزيكا، طبيخ، تريكو، فك وتركيب حاجة، كمبيوتر، كهربا، إلخ إلخ. مفيش أي حاجة النفر منّا بيتعلمها من غير ما توسع مداركه، وتطور شخصيته، مش بس في الحاجة اللي بيتعلمها، ده في الحياة عمومًا، وهتكون مفيدة ليه وللكل.

أنا عارفة إن كتير منّا مشغول لشوشته في حاجات البيت والعيال والأسرة والطفل، لكن برضه عندنا أوقات كتير بتضيع في اللا شيء، وعندنا كمان قلة تقدير لـ «العلام».

آه والله زي ما بقولكوا كده

وربنا يعافينا ويعافيكم.

Ellen hanna

سيدة أمريكية على مشارف التمانين من العمر. بسيطة جدًا مظهرها عادي كأى واحدة في عمرها. لطيفة جدًا مع جيرانها وقاعة جدًا بنصيبتها.

أولادها اتجوزوا من زمان وبيزوروا أسبوعيًا ومعاهم أحفادها.

جدة أمريكية عادية جدًا ما حدش ممكن يلتفت ليه.

بس الإنسانية البسيطة دي وراها حدوتة كبيرة.

إلين كانت مدرسة للرياضيات والعلوم. وفي مرة قابلت جارة ليه وهي عمرها 30 سنة وبتتها كانت كفيفة. البنت كانت كل متعتها إنها تسمع حكايات من إلين. لأن صوت إلين كان لطيف وييفوت على القلب مباشرة على حد تعبير الطفلة.

من وقتها قررت إلين تخصص وقت من يومها لتسجيل الكتب للمكفوفين بصوتها.

وفعلًا تبدأ إلين وماتوقفش!!

خمسين سنة يا مؤمن بتسجيل كتب بصوتها للمكفوفين. موسوعات كاملة اتسجلت بصوت إلين. كتب ومعاجم ومراجع مالهاش عدد أضافتها للمكتبة المسموعة.

وبدون أي مقابل مادي.

عمل تطوعي كده لله في الله من غير أيتها حاجة.

إلين مكانتش بلا حياة وبتضيع وقت والسلام. لا نهائي، الست متجوزة، ومخلفة بدل العيل 5 في عين العدو. ومستوظفة قد الدنيا كمان.

إلين في نفس ذات الوقت مكانتش مستغنية!! حياتها المادية مش اسم الله مطرطشة أوي، لأ عادي وأقل من العادي، مع عدد الولاد الكثير وطلباتهم كانت بتعاني أصلًا في دفع إيجار بيتها. ومع ذلك شايفة إن العمل التطوعي ده هو رسالتها.

فضلت كده كثير؟

10، 20، 30!! لأ، خمسين سنة يا مؤمنين!!

آه والله زي ما بقولكوا كده

خمسين سنة بتقوم بالعمل التطوعي اللي مابتأخدش فيه مليم أحمر غير خدمة المكفوفين في كل العالم. ده مش كده وبس ده في فترة مع زيادة إقبال الناس على الكتب المسموعة من المكفوفين من ناحية ومن المبصرين كمان بعد ما بقت الكتب المسموعة وسيلة أسهل للاطلاع.

عرضت عليها دار نشر شيك بقيمة 20 ألف دولار لأن شغلها فعلاً مطلوب!

قوم إللين ترفض تماماً أي مقابل مادي. وتقول عملي تطوعي لآخر يوم في عمري. ولحد مايقولولي متشكرين روعي بيتكم مش عاوزين منك حاجة.

حكاية إللين وقفتني كثير أوي قصاد فكرة العمل التطوعي.

القيمة العظيمة دي إلي أوقات كثير بتسرح فيها البارومة وتصدي، قوم نسقطها من حساباتنا. ونقول ماهو أصل دوامة الحياة. ماهو حاكم مافيش وقت. ماهو الدنيا تلاهي. ياريت والنبى نفسي بس مش ملاحظ.

بينما البعيد الواتساب واخذ ربع عمره والفيس بوك واخذ نصه، والربع الباقي يادوب على قد الأكل والشرب ولو لحق يشتغل ربع ساعة ولا حاجة.

والأخت الشوبنج، وطق الحنك، وسيرة الناس، وبرضو الواتساب والسوشيال ميديا واخدة 99% من عمرها!!

العمل التطوعي قيمة عالية جداً بتخلي النبي آدم له لازمة قصاد مجتمعه وقصاد نفسه كمان.

الحاجة الي بتحسسك إنك مش ترس في آلة بتلم فلوس أو بتجري عالمعايش وبس.

النشاط الي بيدي لحياتك قيمة حقيقية لأنك بتعمله وانت مش مستني من وراه إلا إنك تنفع غيرك وبس! خلونا نفكر كمان مرة ونبص حوالينا في الاتجاهات الأربعة. مين محتاج لمجهودك ووقتك وتقدر تعمله حاجة تضيف لرصيد نفسك قبل ما تضيفه.

وخلونا نحبي كل الناس الي بتقوم بجهود تطوعية غير هادفة للربح. . . إنتوا بجد إلي بتدوا للحياة شكل محترم.

المدارس الكنائسية

في هدوء ومن أكثر من 120 سنة بتقوم على مصر حركة تعليمية وتربوية عظيمة جداً. يمكن من الحاجات النادرة في بلدنا اللي فضلت محتفظة بمكانتها وجودتها. غير القيمة الإنسانية العظيمة اللي بتقدمها.

بتتكلم النهاردة عن المدارس الكنائسية في مصر.

صعب نحدد بالزبط أول مدرسة كنائسية أنشئت في مصر، لكن أغلب الدراسات بتقول إنها مدرسة (سان جوزيف) في الخرنفش (الي اشتهر كحي للمدارس) وده كان عام 1847 تلتها مدرسة فريد باب اللوق ودي لا سال وسان جابريل في إسكندرية.

المدارس الكنائسية اهتمت بإنشائها الإرساليات الأجنبية الكاثوليكية والإنجيلية إلي جات لمصر من أوروبا وأمريكا وبعد استقلالها وتمصيرها فضلت تقدم خدماتها التعليمية والتربوية بكفاءة تتحسد عليها الحقيقة.

يمكن السر في ده راجع لقيام إدارتها على رهبان وراهبات أكفاء وهبوا حياتهم لخدمة رسالة التربية السليمة للطلبة وتجهيزهم عقلياً وأخلاقياً وفتياً وجسدياً على مستوى لائق باسم المدارس دي.

من الحاجات الغريبة المتعلقة بالمدارس الكنائسية في مصر هو شكل خريجينها.

دايمًا تلاقي الملتزم في شغله، ويبدق في اختياراته ويدرس قراراته، وتفكيره مترتب، ومظهره لائق دايمًا، وموسوس حبتين تلاثة في نقطة النضافة الشخصية يقولك أصله خريج مدارس رهبان.

آه والنبي زي ما بقولكوا كده.

وسط حالة المدارس الأميرية اللي بالكم فيها، ووسط دلح وجنون أسعار ومصاريف المدارس الدولية، ووسط مشاكل المدارس القومية اللي مابتنتهيش، بتظهر المدارس الكنائسية زي طوق نجاة.

حالة متفردة جداً من الثبات على خدمة تعليمية فوق المعقولة بكثير. وتربوية عالية جداً وبمصروفات فعلاً لا تقارن بجودة اللي بتقدمه المدارس العظيمة دي.

تاريخ المدارس الكنائسية الطويل والمليان بخريجين زي الشمع المنور كده. . . شمع إيه؟ دول زي الكشافات النايلون والنبي، حلاوة وجمال وإبداع في كل المجالات، هو اللي صنع السمعة الطيبة للمدارس دي.

من الحاجات الغربية كمان المتعلقة بالمدارس دي واللي بتبين مدى الجمال والقيم والمثل العليا اللي بتقوم عليها هو إن أغلب طلبة المدارس دي من المسلمين!!

آه وربنا زي ما بقولكوا كده

آخر إحصائية بتقول إن نسب الطلبة المسلمين بتوصل لأكثر من 70٪ من إجمالي أعداد طلبة المدارس دي! وده بيظهر وبيؤكد انعدام الفكر المذهبي في الخدمة اللي بتقدمها الكنيسة اللي مابتفرقش بين طلبتها نهائياً.

ومن ألطف الحاجات هو كم التسامح اللي بيخرج بيه كل طالب بيدخل المدارس دي ويدرس فيها. كسر الحواجز النفسية والانفتاح العقلي والفكري اللي بتقدمه المدارس دي إلى جانب الجدية والشدة أحياناً المطلوبة في مراحل التعليم بتخرج دائماً الكيان اللي بنسميه (المواطن الصالح) أو (الإنسان السوي) لا شوفنا يوم إرهابي خارج من هناك ولا مجرم طلع في صفحة الحوادث يقول إنه خريج الجزويت مثلاً.

خريجين المدارس دي بيتنوعوا بداية من الملوك زي العاهل الأردني الراحل الملك حسين والبرنس عباس حلیم، مروراً برؤساء الوزارات زي المهندس إبراهيم محلب ورجال السياسة والفكر والأدب والفن د عصمت عبد المجيد، يوسف غالي، رشدي أباطة، منير فخري عبد النور، هشام سليم، إحم إسعاد يونس...!!! مين دي؟؟ المهم وآلاف من المبدعين في كل المجالات

حوالي 200 مدرسة في طول مصر وعرضها شكلوا جزء كبير من وجدان وتاريخ البلد دي.

شكر خاص وعميق جداً لكل القائمين على المدارس الكنائسية في مصر. صفحتكم البيضاء نموذج مشرف يستحق الإشادة والفخر بجد.

الملك حنفي

عندي عادة كده، وربنا ما يقطع لكو عاداتكو

إني أفعد أدعبس في «أصل الأشياء»

يعني لما اسمع كلمة أفعد أفكر جت منين، لما اشوف تقليد أو طقس، أحاول أفهم بدأ إزاي، وكده يعني.

من الحاجات اللي تهمني أوي أسماء الشوارع

أسماء الشوارع دليل على حاجات كثير، منها إحنا بنحتفي وبنحتفل بإيه وبمين.

آه والله، زي ما بقولك كده.

مرة وأنا صغيرة كنت في محافظة ما، وسمعت الناس يقولوا:

«شارع الملك حنفي»، حد كان بيوصف لحد مكان، فقال له: ده في شارع الملك حنفي.

كالعادة، استفزني أوي الاسم، الملك. . حنفي! إمتى مصر كان فيها ملك اسمه حنفي، وده كان ملك على إيه بالظبط؟ في حدود علمي، حتى مكش فيه قائد ولا زعيم في المكان ده اسمه حنفي، يمكن يكون الناس اعتبروه ملك ولا حاجة.

مكش وقتها فيه إنترنت، دوّرت واطقتت وسألت أساتذتنا: هل كان فيه في يوم من الأيام، أي حد مصري، ينفع نسميه «الملك حنفي»؟ ما لقيتتش.

أهدى أنا؟

أبدًا

قررت في أول مرة جاية أروح المحافظة دي، أروح الشارع المذكور، واسأل أهله منين جه الاسم ده، يمكن حد يعرف.

بس، روجت، ومسكت الشارع من أوله، فلقيت المفاجأة المضحكة المبكية.

الشارع ما اسموش «الملك حنفي»، اسمه شارع «ملك حنفي»

قلت ياااه، للدرجة دي.

الحقيقة، الناس معذورين، إحنا صحيح سمينا الشارع ده باسم الست العظيمة دي، إنها محدش كثير بيكلمنا عنها، وعن اللي زيها، لا في كتب التعليم، ولا في غيره، فطبيعي الناس لما ما تعرفش مين صاحب

الاسم، تقوله بطريقتها، إلي هي طريقة أسهل، وفيها شيء من النكتة.

ملك حفني ناصف يا عزيزي، ويا عزيزتي، ده كان اسمها، وكان ليها اسم تاني مشهورة بيه برضه هو «باحثة البادية»، وفيه في مصر عشرات المدارس الإعدادية والثانوية للبنات الي اسمها مدرسة باحثة البادية.

ملك كانت أول بنت مصرية تحصل على الشهادة الابتدائية، سنة كام بقى؟

سنة 1900

ألف وتسعمية بس، من غير إضافات.

يعني مش ألف وتسعمية وحاجة، ألف وتسعمية، تسعناشر وجنبها صفرين

يعني هي لما دخلت المدرسة، كنا في القرن الـ 19.

الحقيقة أنا باردد الرقم كذا مرة، من الانهار، دي حاجات مش سهلة ولا بسيطة، ومش بنفكرها علشان نمصمص شفايفنا، ونقول يا سلام كنا وكنا

إنما علشان نعرف إننا عندنا حاجات ممكن نبني عليها، إلي حصل ده مكنش بالساهل، ومش بيروح.

باحثة البادية أو ملك حفني ناصف، ما خدش مكانتها لمجرد إنها كانت أول بنت اتعلمت، لأ، لكن لأنها كمان كانت كاتبة وأديبة وشاعرة وباحثة فعلاً مش مجرد لقب.

أغلب بحثها كان عن «بادية الفيوم» المكان الي عاشت فيه بعد جوازها، كانت بتبحث في تاريخ المنطقة، وخصوصيتها وطبيعتها، طبعاً في حدود الي كان معروف وقتها، وكمان في حدود أدوات البحث.

معظم كتاباتها بقى كانت عن تحرير المرأة، وهي في ده كانت سابقة كل الأسماء المعروفة في المجال ده، وجمعت المقالات الي كتبتها في كتابين صدروا لها، وأسست أول جمعية نسائية في مصر.

كل ده بقى، واتوفت وهي عندها كام سنة؟

32 سنة

اتوفت وهي في عز شبابها، بس بعد ما سابت الي خلاها تعيش طول العمر.

آه والله

زي ما بقولكوا كده

جعلوني مجرمًا

الملك، وحش الشاشة، ملك الترسو، فريد شوقي، عنده تاريخ في السينما أكبر بكثير من تاريخه التمثيلي، مع إنه تقريباً مفيش حد عنده ربع التاريخ ده.

فريد بيه، زى ما كانوا بينادوا له، عمل أفلام مع مخرجين كثير من كل الأجيال والمدارس، واشتغل على مدار 50 سنة من غير انقطاع، وكل مرحلة عمرية كان بيعرف ياخذ الأدوار اللى تناسبه، وقدر يغير لونه التمثيلي أكثر من مرة، باختصار كان ابن البلاتوه البار.

استنى بس استنى

إنتي قلتي إيه؟

عنده تاريخ أكبر من تاريخه التمثيلي

يعني إيه الكلام ده؟

أقولك يا سيدي

إحنا بنقول إن تاريخه السينمائي أكبر بكثير من تاريخه التمثيلي، لأنه مكنش بس ممثل، هو كمان كان مؤلف، ومنتج، وحاجات كثير أكبر من الحصر

آه والله

زي ما بقولك كده

عايزين نقف هنا شوية عند تجربة له في الكتابة

تجربة أكثر من مهمة.

فريد شوقي، كان له أخ ظابط اسمه أحمد شوقي، فالظابط حكى للفنان حكاية واحد من المتهمين، حكاية كانت أكثر من مؤثرة، فيها تعاطف كبير مع المتهم، حتى لو فيه اعتراف بأنه مذنب ويستحق العقاب، إنما كان ممكن جداً لو كنا أرحم شوية معاه، مكنش أساساً يرتكب الجريمة.

الحكاية دى شغلت فريد شوقي، وقال في عقل باله: فعلاً، إحنا محتاجين نغير شوية في القانون، بس هو كفنان، يقدر يغير ازاى؟

إنه يعمل عمل ناجح، والعمل الناجح مؤثر، وصوته عالي، يعمل قضية رأي عام يعني، وبالفعل شاف أنها لو اتعملت سيبا ممكن تبقى عمل ناجح جداً، فاشترك مع المنتج المعروف رمسيس نجيب في كتابتها،

وكانت فيلم «جعلوني مجرمًا».

فعلًا الفيلم اتعرض، ونجح وكسر الدنيا، الكلام ده كان سنة 1954، والي أخرج الفيلم عاطف سالم، وما اعتقدش إن حد فينا ما شافش الفيلم، لكن الي عايزين نقوله هنا هو إن الفيلم تسبب فعلًا في تغيير القانون، وكان أول فيلم يعمل كده.

شوف بقى الفن لما يعمل دوره، أو خرينا نقول دور من أدواره

الناس دخلت الفيلم، واتبسطت بالحكاية، وشافت شوية أكشن على قد الفترة بتاعته يعني، وده دور مهم للفن، إلي هو التسلية، لكن كان جنب التسلية فيه أهداف تانية.

خبرني أحكيك الحكاية:

الحكاية إن مصلحة الأحوال المدنية كانت بتسجل السوابق الإجرامية للمواطنين، إلي بنعرفه باسم «الفيس والتشبيه»، إلي لازم تقدمه لأي شغل انت عايز تلتحق بيه، للتأكد من إن سجلك نضيف، وما ارتكبتش جرائم قبل كده.

جزء كبير من مأساة بطل الفيلم لو فاكيرين إنه بسبب ظلم عمه ليه، وقع في شوية عيال ولاد حرام، فارتكب جريمة، ولما طلع من الإصلاحية ما لقاش حد يشغله، فانهرف، وفي الآخر قتل عمه، وبقى مجرم بجد.

بعد عرض الفيلم، وزارة الداخلية المصرية قررت شطب السابقة الأولى من سجلات مرتكبي بعض الجرائم، على أساس تدي له فرصة إنه يبدأ حياة طبيعية ونضيفة.

فشوف هنا فريد شوقي، الملك، مش بس كمثل، لكن كاتب ومنتج، بي فكر إزاي ويعمل إيه، ويحدد لنفسه وللناس كلها أكثر من هدف عظيم، ويحقق النجاح فيهم كلهم

الله يرحمك يا فريد يا شوقي

يا ابن حوا وأدم

قادر يا كريم

الملكية العامة

من فترة كده كان واحد نزل صورة لست كبيرة قاعدة في الأتوبيس في دولة من دول شرق أوروبا. قوم وهي قاعدة لقت مسند الكرسي اللي قدامها القماش بتاعه مقطوع، والسفنج طالع بره.

قوم بهدوء طلعت إكسسوارات الستات الكبار اللي دايمًا مرافقة ليهم في شنطتهم. إبرة وفتلة ولضمت وهات يا خياطة وتشتيك في مسند الكرسي، لحد ما رجعت فابريكة، وراحت لمت الخيط والإبرة وقعدت ساكتة!!

آه والله زي ما بقولكوا كده.

ممكن حد يعتبرها ست كبيرة ولقت حاجة تتسلى بيها. بس هو الأكادة مش كده. الناس دي عندهم عقيدة كده راسخة فاهمينها كويس أوي ومصدينها، اسمها (الملكية العامة) متأكدين طول الوقت إن كل حاجة بيتعاملوا معاها في بلدهم هي ملك ليهم. ماعندهم مش مصطلح (ملك الحكومة) عارف المصطلح ده؟ أول مصطلح سياسي بيعرفوه العيال في حياتهم. تلقى العيل الصدغ من دول مقصوف رقبة صغنن كده، واقف يرزل على مخاليق ربنا ويرازي في الريح والجاي واما تقوله كخ يا بابا كده عيب، يقوم مستنح كده ويقولك وانت مالك أنا واقف (في ملك الحكومة).

الغريب إن العيل بيكبر والخطأ العلمي ده بيكبر معاه. ويفضل الشارع في ذهنه ملك الحكومة وعمود النور ملك الحكومة والطريق الأسفلت ملك الحكومة والأتوبيس ملك الحكومة، المؤسسات ملك الحكومة، والأرض والزرع والسما ملك الحكومة.

قوم بتعامل مع كل الحاجات دي على إنها ملك كائن خرافي اسمه (الحكومة)!!

وبما إنه (كائن ما) مش موجود فعادي يعني أملاكه مباحة، ماتعرفش ليه ماييجيش للنفر مننا ولو للحظة إن الأتوبيس ده إنت اللي دافع تمنه!!

والنبي زي ما بقولك كده إنت اللي دافع تمن كل اللي انت شايفه ده!! دافعه ضرايب ورسوم وتحصيلات بتاخذها منك الدولة علشان ترجعها لك في صورة خدمات، اللي هي الطرق والمواصلات والمدارس وكل الحاجات اللي بتعامل معاها على إنها ملك مخلوق الحكومة الخرافي.

فكرة إننا أو كثير حتى مننا يتعامل مع الملكية العامة إنها ملك حد مبني للمجهول كده سايب حاجته في الشارع عالمشاع. وفكرة انه مُولد وصحبه غايب، بتخلي كثير يتعاملوا بتقصير شديد الصراحة في حق الملكية العامة.

في بلاد بره عندهم مصطلح بيستخدموه طول الوقت، يقولك إيه... دي أموال دافعي الضرائب!! مش من حقك تركز في الحتة دي علشان كده هتتعطل المواصلات العامة ودي أموال دافعي الضرائب، إوعى تدهن سور جنيتك بألوان مخالفة للي قايلة عليه البلدية وإلا تاخذ مخالفة لأنك بتهدر أموال دافعي الضرائب!! دافعي الضرائب، دافعي الضرائب.

فكرة إنك بتدفع الضرائب فبالتالي كل اللي عينك بتقع عليه هو ملك ليك، بيخلي عندك انتماء للحاجة وخوف عليها وحرص كمان على إنها تفضل سليمة. ماهو عدم المؤاخذة عبيط مين اللي متأكد إن الحاجة ملكه ويخربها عند في نفسه!!

الملكية العامة من اسمها، ملكك وملكى وملك ابني وابنك وملك كل واحد ماشي في الشارع.

إحنا بلد موارد محدودة، واللي بيخرب إنت اللي بترجع تدفع تمته، بس بدل ما تمته يتصرف على مدرسة في الحي بتاعك، ولأ خط مترو جديد يخدم منطقتك، ولأ محطة كهربا ولأ مياه جديدة توصلك خدمة، بيرجع يتصرف في نفس الحاجة مرة واتنين وعشرة.

إعقلها قبل ما تخربها.

الهندي

هكلمكم النهاردة عن المواطنة (إيمان عبد العاطي)

إيمان شابة مصرية عمرها 26 سنة، بس مش شبه كل البنات في السن ده.

يعني ماتخرجتش ولا مخطوبة ولا بتحب ولا متجوزة ولا عندها لوجين وحامل في يوسف.

لأ للأسف إيمان مش كده خالص. إيمان اتولدت ومن طفولتها وهي بتعاني من مجموعة أمراض: وأزمة ليمفاوية حادة، حبس للسوائل، اضطراب غددى وهرموني، داء سكري من الدرجة الثانية، ارتفاع في ضغط الدم.

و أصيبت بجلطة خلتها كمان ما تتحركش من السرير.

ويزيد بس وزنها مع الوقت

زاد كثير؟

500 كيلو جرام يا قلب امها

وتتحول البنت لأضحخ فتاة على وجه الأرض!! أهل إيمان واخواتها نشروا حكايتها على مواقع التواصل الاجتماعي، والدورة إياها حصلت، وتوصل حدوتة إيمان لفين؟؟

لحد بلاد تركب الأفيال!! آه بجد زي ما بقولكوا كده مش هزار، حدوتة إيمان وصلت الهند وبالأخص للدكتور (موفي لاكدولا) المتخصص في جراحات السمينة المفرطة. إيلي الحقيقة ماكتفاش بالتعاطف. . . ولا بعرض مساعدة إيمان. . . لأ الراجل شال بعضه وجه من الهند لحد مصر!!

آه وربنا، يروح لإيمان بيتها إيلي ماخرجتش منه من 25 سنة.

بس كده؟ لأ الراجل يقولك الحالة لازم تروح الهند!!

هند إيه يا عم. . . الشابة مابتخرجش من سريرها، هند إيه إيلي تروحها؟ إزاي طاه؟

الراجل مخلص على حيطته غبار الحقيقة، يقوم بحملة تبرعات في الهند!! آه زي ما بقولكوا كده في الهند!! والناس تتعاطف مع البنية إيلي لا من جنسهم ولا من بلدهم ولا من دينهم كمان جايز!!

وتتوفر فلوس نقل إيمان. وهنا يجي أخيراً دور الشركة المصرية الأصيلة (مصر للطيران) ورجالة الحماية المدنية.

الحقيقة الاتين قاموا بدور ضخم يضاف لتاريخهم الكبير في خدمة البلد وولاد البلد.
أكثر من 100 عامل شاركوا في عملية نقل إيمان، غير تجهيز رافعة عملاقة تساعد في نقلها وخروجها من البيت، ووصولها للمطار، وطلوعها للطيارة، وتجهيز جناح متنقل في الطيارة.
وتوصل إيمان من مطار برج العرب لبومباي في الهندي وللمستشفى المتخصص الي كان مستعد لاستقبالها في دور كامل وطاقم تمريض وجراحين في حالة تأهب استعدادًا لحالة إيمان.
حدوتة إيمان الي انتشرت في السوشيال ميديا الفترة الي فاتت، وقفت قدامها كثير. وقفت قصاد الصبر على الابتلاء. وقفت قصاد الدعم المعنوي وتقديم العون والدعم حتى ولو ببوست ولا تويته.
بس الي بجد لازم نقف قصاده، كم الإنسانية الرهيب الي في الحدوتة، الإنسانية العابرة للحدود والقارات، الإنسانية الي لا عرفت لون ولا جنس ولا دين ولا غنى ولا فقر ولا مستحيل.
تحية لكل الي ساعدوا إيمان من مصر مرة ومن الهند ألف مرة. . . تحية لكل الي بذلوا جهد وفكروا علشان حق إنسانة واحدة في الحياة.

الحكاية الي بتجسد معنى أهالينا قالوه لنا زمان وابتدينا نساها.

الناس لبعضيها.

آه وربنا الناس لبعضيها

آه وعهد الله الناس لبعضيها

وخلونا في الآخر نعمل الي نقدر عليه دلوقتي

خلونا نصلي

ونولع شمع

و نشبك إيدنا وندعي من لساننا وقلبنا لإيمان

يارب يجبر بخاطرها وياخذ بيدها ويقويها ويرحم ضعفها ويكفل تعبها وتعب كل الي حواليتها ويشفيها ويفرح كل حبايبها بيها.

يارب تشفي كل مريض وموجوع وما توجع قلب على حبيب ولا غريب يارب.

قولوا آمين

إليزابيث

God save the queen

حفظ الله الملكة

سؤال كده تبادر لذهني - كان نفسي اقول تبادر لذهني دي من زمان- هو النفر العادي الطبيعي ممكن يستحمل شغلته قد ايه؟

يعني مهها كانت شغلتك لطيفة وكيوت. إنشالله تكون خير هشتكة دباذيب في قلب ديزني لاند، ممكن تستحمل شغلتك قد ايه؟

وبرضو انشالله يكونوا بيدوك على كل ثانية في شغلك دولار - شوف الدولار عامل كام دلوقتي على ساعتك

تستحمل برضو قد ايه؟

مع العلم وخذ في بالك إن شغلتك دي هيا هيا، مافيش جديد، نفس الذات نفس كل يوم.
ها؟

تستحمل سنة؟ اتنين؟ ثلاثة؟ خمسة؟ عشرة؟ عشرين حتى؟!
صعب مش كده؟

الأسئلة دي جات في دماغي وانا بقرا خبر احتفال الملكة باليوبيل الياقوتي لجلوسها على عرش إنجلترا، وإنها بوصولها لـ 65 سنة جلوس على العرش تكون بكده الأطول في تاريخ بريطانيا العظمى كلها، ما بين كل ملوكها وملكاتنا. متفوقة على جدتها فيكتوريا الأولى بـ 5 سنوات كاملين.

فكرت كده حبة الست دي في عمر الـ 90، مطلوب منها كل يوم تقوم الصبح تلبس بلاطي وبرانيط وجوانتيات وتاخذ الشنطة وتحبي الشعب وتبتسم، وتقوم بمهام مرسومها بالملي. 65 سنة بتقوم بنفس المهام، والملك في إنجلترا موظف ويقبض مخصصات سنوية ويملك ولا يحكمش، ده غير فكرة إن أنفاسه معدودة عليه وخطواته محسوبة طول الوقت.

فكرت في لعنة إنك تكون ملك!!

هار مدوحس الي انا قولته ده بجد؟؟

الملك لعنة؟

شوف لما الواحد يفكر فيها من كل ناحية يبص يلتقيها لعنة، ويحس إن يمكن أقل موظف بيكنس شوارع لندن جايز يكون أسعد من ملكتها، أهو يوم ما يجيب آخره يرمي المقشة وابوها شغلانة.

لكن صاحبة الجلالة يا حبة عين امها ماتقدرش.
زمان كان الغجر ليهم مثل يقولوه لما الناس تضيق عليهم.
يقولك إيه؟ زهر بغلتي أوسع من بلدكوا
بمعنى إنه بمجرد ما يركب ويرحل هيلقي براح في حته تانية.
بص هو ابن آدم طبعه كده مايملاش عينه غير التراب والله زي ما بقولكوا كده.
صعب يرضى، صعب أوي، مهما حاولت ترضيه يكتفي باللي في إيدته، قالك اتقسّمت العقول وكل واحد
رضي بعقله واتقسّمت الأرزاق كل واحد طمع في رزق اللي جنبه.
المهم... ماتضيعوش عمركم في حاجة إلا لو كانت تستحق. لا علاقات فاشلة ولا وظائف سخيفة ولا
حتى مهام مملة ورتيبة.
الحياة تستاهل نجرب فيها خبرات مختلفة وحاجات جديدة مجربنهاش قبل كده. إوعى تستني لما تبقى
الحاجة قدامك ومش قادر تعملها لإنك ضيعت وقت عميلها مشغول في حاجة تانية.
لو نفسك تغوص في البحر، إجري روح اعملها ماتفكرش مرتين.
نفسك تطلع جبل؟ تنط بالبراشوت؟ تتزحلق عالثلج؟ تخش السيميا لواحدك؟ تاكل رجلين ضفاضع؟
تستحمى في الثلج؟ تشتغل نقاش؟ تركب فيل في الهند؟
اتكل على الله، طالما تقدر ماتستنش، ماتسيبش نفسك لسلاسل وتقالات تكلبش بيها روحك.
ماهو طالما أعباء الملك مش مقطعة بعضها يبقى خلاص... أبوها شغلانة وارمي المقشة.
وفي الآخر تحية لكل اللي مايقدروش يمشوا من أماكنهم مهما زادت حمولهم وزهقوا وطقوا وطلع النخل
في عينهم. لأن مهامهم أكبر من انهم يسيبوها.

اليوم العالمي للفتاة

من خمس سنين

الأمم المتحدة اختارت يوم 11 أكتوبر علشان يكون اليوم العالمي للفتاة

ودا غير اليوم العالمي للمرأة؟

آه طبعًا، ده حاجة وده حاجة تانية خالص

آه والله

زي ما بقولك كده.

خليني الأول أقول لحضرتك إن حكاية اليوم العالمي لكذا دي، ماهياش حفلة، ولا مناسبة الناس تتبادل فيها الهدايا، ولا التلفزيونات تذيع أغنيات مخصوصة للمناسبة دي، مع إنه الاحتفال في حد ذاته شيء مش بطال، كل اللي عايز يحتفل بذكرى، هو حر.

إنما اليوم العالمي، اللي بتقره الأمم المتحدة، بيبقى زي لمبة حمراء، يوم في الأجندة تحته خط، علشان كل سنة نقول: إحنا عملنا إيه في الملف ده؟ كنا فين وبقينا فين؟ اتقدمنا ولا اتدهورنا؟ حلينا ولا عقدنا؟ علشان الملفات ما تتركش بحكم العادة البشرية الأزلية الأبدية، وهي النسيان.

طب هو مش فيه اليوم العالمي للمرأة

إيه بقى لزوم اليوم العالمي للفتاة؟

قال لك: لأن قضايا الفتاة مختلفة خالص عن قضايا المرأة، وخاصة كمان جدًّا عن قضايا الطفل بصورة عامة، الفتيات أو البنات الصغيرة عندهم ملفات خطيرة، وممكن تتنسي وسط زحمة الأحداث في هذا العالم الصعب.

مثلًا مثلًا

قضية الزواج المبكر

في كثير من بلاد العالم، ومنها مصر للأسف، ما زال بيحصل، وإحنا في سنة 2017 إن الأسرة تقرر إنها تجوز البنت في سن صغيرة أوي، بتوصل أحيانًا لـ 14 و 12 سنة، ويتكون لسه طفلة، تتأخذ من وسط أصحابها، وهي بتلعب معاهم الأولة، وتكون مطالبة إنها تبقى سيدة في غمضة عين.

الأسباب ورا ده كثير، وغالبًا معروفة، مش عايزين نعيدها، إنما ضروري نقول لأي أب أو أي أم قرر يعمل كده لأي سبب هو بيعمل إيه في بنته بالضبط.

أولاً، أكيد من حيث الصحة، هو بيعرض بنته لمتاعب جسدية مالهش أول من آخر، بتوصل لخطر الموت، خصوصًا لو حصل حمل في السن دي، بيبقى خطر عليها وعلى جنينها، وعمرها عمرها ما تجيب طفل سليم في السن ده.

جايز زمان، زمان أوي، في عصور ما عشنهاش، كان ممكن ده يحصل، لكن دلوقتي، ومع نوعية الأكل والشرب والجو اللي إحنا عايشين فيه، مستحيل البنت تبقى قادرة، وحتى لو ما حصلش مكروه مباشر لا قدر الله، كده الأب أو الأم اللي يعملوا كده، بيبقوا حكموا على بنتهم بحياة مليانة متاعب صحية ما تنتهيش. من الناحية النفسية، وما أدراك ما الناحية النفسية، البنت مش بتكون جاهزة لتحمل مسئولية بيت وأسرة، وبعد شوية يكون عندها طفل هي اللي بتربيه، في حين هي نفسها لسه طفلة محتاجة اللي يربيهها.

تحول الأنسة لسيدة، ماهيش بس عملية بيولوجية، دي حاجة معقدة نفسيًا واجتماعيًا، ودخول البنت في تجربة زي دي، في السن ده، بيسبب آثار سلبية هتفضل معاها طول حياتها، ومش هتسيبها، مهما دارت وخبت، ومهما أظهرت إنها زي الفل.

أضرار كثيرة جدًا من الزواج المبكر

اللي هو مش القضية الوحيدة، اللي تخص الفتيات الصغيرات شفت الكلام بدأ باليوم العالمي وانتهى لملفات شكلها إيه؟

هو ده الغرض من الأيام دي

بتبقى فرصة نتكلم

على الأقل نتكلم ونشاور

فاتكلموا

أيونننن كان فيه لقب (صاحب المقام الرفيع) وده كان لقب رؤساء الوزراء، ومش أي رئيس وزارة، ده رئيس وزارة وحاصل على نجمة محمد علي. علشان لو فيه حد حاسس حاليًا إن الباشوية ضاقت عليه ولا حاجة.

اللطيف إن مصر على طول تاريخها، أيام اللقب ما كان له قيمة ماعرفتش إلا 368 باشا فقط لا غير!! آه والنبى زي ما بقولكوا كده!! هما 368 باشا، لا باشا ناقص ولا باشا زايد، وأساميهم معروفة وسنة حصولهم على اللقب وسبب الحصول كمان.

القائمة بتضم أغلب الوزراء في الحقبة العلوية، وتتضم رجال الأعمال والصناعة وكبار المحسنين اللي كانوا بيقدموا أيادي خضراء في الخير.

ماتعرفش إيه بأه اللي حصل من بعد إلغاء الألقاب في بداية الخمسينات. قوم بدل الموضوع ما ينتهي ويتنسي، يحصل العكس تمامًا والناس تتمسك أكثر وأكثر بالألقاب عمومًا وبالباشوية خصوصًا!!

كل العاملين في مناصب سيادية بقوا باشوات. شوية وكل اللي معاه قرشين بقوا باشوات. حبة والأطباء والمهندسين والمحامين بقوا باشوات، هوب والحرفيين بقوا باشوات!!

بس بأه والموضوع بهوأ والكل بقوا باشوات!!.

القصد اللقب ولا المسمى ولا أي حاجة بتتخط قبل اسمك بتفقد معناها وقيمتها لو كان اسمك شخصيًا مايستاهاش.

هتلاقي اسمك بيلو كده بعد اللقب اللي اتخط من غير مناسبة.

وصاحب الاسم صغر كده وتضائل وبقي حاله عيضة.

الألقاب مابتصنعش صحابها. فيه ناس كتير أساميهم المجردة كافية جدًا علشان تقوم من مكانك احترامًا لصاحبها بمجرد ما تسمعها.

وناس تانية لو حطيت قبل اسمهم عربية محملة ألقاب برضو هيتنهم صغيرين ولا يكبروش أبدًا.

ماحدث بيترس في أي حاجة بقرونه، وهو أحمر الخدين صفر اليدين، ما عندوش أي معلومات ولا خبرة عن أي حاجة زي ما إحنا بنعمل.

مش أي حاجة تعدي قصاد عيننا، قوم الحداقة والفهلوة تلعب لعبتها في دماغنا. ماهي سهلة. هوب تسخن وتقوم تعملها.

الموضوع ده بيخسرنا كثير. . . لأ كثير أوي وربنا.

الغنا مش سهل بالمناسبة.

التمثيل راخر حاجة معقدة ومتعبة ومش سهوكة وتتنيح وفحيح في وش اللي قدامك.

النحت راخر والنبى محتاج كام سنة دراسة، على كام محاولة كده، قبل ما تقرر تحط إبداعاتك في أول ميدان يقابلك.

آه والنبى والرياضة بردو محتاجة كام سنة تدريب وكام سنة ممارسة، مش كفاية تكون أهلاوي علشان تقرر تحترف في أوربا.

بقولكوا إيه المهندسين بردو بيدرسوا خمس سنين ويتسحلوا سنين شغل وتدريب، قبل ما يدبوا إيدهم في أول عمارة.

ما أكيد العمارات اللي بتتلزق بالغرا دي على وش الأرض لحد ما تريح عالي قصادها زي الدومنة، اللي بناها معداش من قدام كلية الهندسة بالغلط في حياته.

القصد الموهبة والدراسة طريق النفر الوحيد علشان يعمل أي حاجة، أيا كانت، لا النوايا الطيبة ولا التقليد الأعمى بياكل عيش ولا يسقي مية. . . . بيودي في داهية بس.

ياختييبييي هي ليه البديهيات بقت محتاجة شرح وتفنيد اليومين دول؟!!

بحر البقر

في يوم 8 إبريل 1970 اتجهزت طائرات فانطوم إسرائيلية بالقنابل والصواريخ. علشان تنفذ مهمة شجاعة جداً في العمق المصري!!

وفي قرية فقيرة في الحسينية قرب الزقازيق شرقية قام الطيران الهمام بمهمته العظيمة. على ارتفاع منخفض من الهدف، نفذت الطائرات الفانطوم مهمتها الجلييلة اللي خرجتلها، ودمرت الهدف. الهدف كان إيه يا ولاد؟

مدرسة ابتدائي!!!

آه والله زي ما بقولكوا كده!

مدرسة ابتدائي دور واحد تلامذتها عيال كبيرهم 10 سنين وعددهم مايكملش 100 عيل يا ولداه. أطفال خرجوا من الفصول بفضول العيال يتفرجوا عالطيارة اللي معدية فوق مدرستهم ويشاوروا عليها. قوم بكل خسة وندالة ترمي عليهم صاروخ!! واحد؟

لأ، ياريت، ادورت الطيارة وراحت منولاهم الثاني كمان!!

استكفوا؟؟؟

أبدأ لازم الندالة تتأخذ للآخر، أصلها!

لفوا وحذفوا المدرسة بـ 3 قنابل كمان. وتكمل الصورة.

حصّة المزيكا اتحولت لصوان عزا، وكراريس الرسم والعربي والحساب مابقاش فيها غير درس واحد.

درس الدم

درس الندالة وقلة الأصل.

درس القتل والخيانة وانعدام الضمير.

وراح عاجلنة 30 ملاك. جابوا الدرجات النهائية. وخلصوا بدري بدري الامتحان.

وارتاحوا من وجع الدنيا وشقاها قبل ما بيتدي.

الدرس انتهى لموا الكراريس

بالدم اللى على ورقهم سال
فى قصر الأمم المتحدة
مسابقة لرسوم الأطفال
إيه رأيك فى البقع الحمرا
يا ضمير العالم يا عزيزى
دى لطفلة مصرية وسمر
كانت من أشطر تلاميذى

بالكلمات اللى بتقطر دمع ودم بقلم العظيم صلاح جاهين. وبلحن من أشجن ألحان الخالد سيد مكاي،
وبأجمل صوت للجميلة شادية.
اتخلدت مذبحة البقر.

المذبحة اللى الضمير الإنسانى هيفضل يلعن منفذها لآخر يوم فى عمر الكون نفسه.

اللى عارها هيفضل ملطخ جبين العدو الجبان. اللى قدر بدم بارد يستهدف مدرسة أطفال. ويقتل عيال
صغيرين ماهمش ذنب. ولا تسألونيش ما بنسمعش الأغنية ليه دلوقتى؟! وربنا ما عرف زي ما بقولكوا كده.
النهاردة بتمر 47 سنة على ذكرى المذبحة دي. لازم دايماً نفتكر لازم ننكر الجروح دي كل شوية. لازم
دايماً مانساش عدونا. لازم الخطوط ماتدخلش فى بعضها، ولا الصور تشوش، ولا الأصوات تغشلق. ولا
تراب النسيان يخش يغطي كل حاجة، وما نقاش واخدين بالننا مين عيشة ومين ام الخير.

إعرف عدوك وعلم عليه

إعرف عدوك وعلم عليه

صحيح الأرض رجعت، العدو اتكسر، وصحيح بعدها بكام يوم رجالة جيش مصر أخذوا تار ولادهم
اللى دمهم سال فى بحر البقر.

بس هو الحق كمان بيقول إن جرايم الحرب ما بتسقطش بالتقادم.

ولا ينفعش تبقى عايش دور الضحية طول عمرك وانت البعيد بتصبح العالم وتمسيه كل يوم على جرايمك
ضد الإنسانية.

بحر البقر مكانتش أول الجرايم ضد الإنسانية ولا كانتش آخرها.

بس هو ضمير العالم بيص دايماً بعين واحدة وماشي يطبش. والمجرم لما يبقى شاطر بيعرف يطرمخ.
بيعرف يخلق ميديا تفكر العالم دايماً بقدر إيه هو كيوت ومضطهد. وفي نفس الوقت ينسى الدنيا جرايمه
وإجرامه.

افتكروا وماتنسوش.

اكتبو في أجدتكم جنب يوم 8 إبريل (ذكرى مذبحه بحر البقر)

فكروا ولادكم وعلموهم.

خلوا لسع الشوربة صاحي، لأن الحقيقة مافيش زبادي بيحي. كله شوربة شوربة مافيش زبادي. زي كله

ضرب ضرب مافيش شتيمه.

آه والله زي ما بقولكوا كده.

بدايات السينما

تخيّل يا بيه

تخيّل يا هانم

إن مصر عرفت السينما من أول ما قالوا يا سينما، وإنها تاني دولة في العالم كله تشوف عروض الفن السابع

آه والله

زي ما بقولك كده.

أول عرض سيميا تجاري في العالم، كان في فرنسا، عمله الأخوين لوميير ديسمبر 1895.

بعدها بأسبوع، أسبوع واحد، كان أول عرض في مصر، كان في اسكندرية، وفي آخر شهر يناير (28 منه) اتنظم أول عرض تجاري في القاهرة، وكان في عمارة الأمير حلیم، والتذكرة بأربعة صاغ للنفر، وقرشين للعليل الصغير.

من ساعتها مصر ما بطلتش سينما

الكلام ده كان من 121 سنة

بعد ما بدأت العروض في مصر، ما وقفتش، بس كانوا بيعرضوا أفلام أجنبية، واللي كان بيتصور في مصر كان برضه أفلام بيعملها أجنب، ومش أفلام روائية ليها قصة، كانت أقرب لحاجات تسجيلية ووثائقية، وتصوير أماكن وكدا.

فضلنا كده لحد ما جت سنة 1917، وبدأت محاولات لتصوير أفلام، وجم جماعة طلابية إتلموا على شاب اسمه محمد كريم، وعملوا شركة اسمها «الشركة الإيطالية المصرية»، وصوروا فيلمين، وعرضوهم في دور العرض اللي انتشرت في كل حتة.

بس كانت لسه الخبرة قليلة، والأفلام ما نجحتش

فشل الفيلمين، والشركة، خلوا محمد كريم يسيب مصر، ويروح أوروبا يتعلم هناك فن السينما على أصوله، ولما يرجع يبقى يعمل أفلام.

بعدها ظهر مواطن طلياني برضه، وقرر يعمل أفلام، فعمل 3 أفلام بطولة نجوم المسرح اللي كانوا منتشرين وقتها: فوزي الجزائري (بحبح افندي) وبشارة واكيم، وغيرهم، وتجربة الراحل الطلياني زي اللي قبله.

لا قلم زاد ولا قلم نقص.

بعدها ظهر مواطن تالت اسمه محمد بيومي، كان راجع من ألمانيا، ومعه معدات تصوير سيما، وقال لك نعمل أفلام، وعمل فيلم يعني نص نص، ثم باع المعدات لطلعت باشا حرب، وده كان الأساس اللي اتبنى عليه استوديو مصر بعدين.

فبراير 1925، نشرت واحدة من المجلات خبر، إن المخرج التركي الكبير وداد عرفي، شرف مصر مندوباً عن شركة «ماركوس» الألمانية لإنتاج 3 أفلام في مصر.

وداد عرفي اشتغل مع الفنانة عزيزة أمير

بدءوا يعملوا فيلم، بس لظروف كتير مش موضوعنا دلوقتي، وداد انسحب من الفيلم، ومن مصر كلها، فعزيزة قررت تخرج هي الفيلم، أيوه، ست وهتخرج فيلم عادي، وكان بيساعدها في الإخراج الفنان الشاب ستيفان روستي.

عزيزة بكدا بقت أول مخرجة سينما

في مصر؟

لا

في العالم كله

مفيش أي ست في أي مكان تحت الشمس قدرت تخرج فيلم قبل عزيزة أمير.

عزيزة تعبت جدًّا مش بس في إخراج الفيلم، لكن في إنها تلاقي مكان يقبل يعرض الفيلم، وبعد محاولات كتيرة، خرج فيلم «ليلي» للنور، اللي هو يعتبر أول فيلم مصري خالص، وكان طبعا فيلم صامت سنة 1926.

علشان كده

ما تستغربش أبداً

لما حد يقولك

إن السينما كانت تاني مصدر للدخل القومي في مصر بعد القطن

الحاجات دي

لازم نحطها قدامنا دايمًا

مش بس علشان نفخر بيها

لا

علشان نعرف إحنا إيه

وممكن نبني عليه

آه والله

زي ما بقولك كده.

نعوم شبيب

برج القاهرة

مبنى جريدة الأهرام

سيما علي بابا

كنيسة سانت كاترين

كنيسة سانت تريز

مدرسة القلبي الخيرية

تفتكر إيه الي ممكن يجمع كل الحاجات دي مع بعض؟

تخيل بقى

الي يجمع الحاجات دي ببعضها إن مصممهم ومهندسهم شخص واحد،

آه والله،

زي ما بقولك كده.

المهندس العبقرى ده الي اسمه مش مشهور هو: نعوم شبيب، الي كان بنى أول ناطحة سحاب مصرية، ولما نقول ناطحة سحاب، فاحنا بتتكلم عن مبنى يزيد عدد أدواره عن 20 دور.

خلينا في برج القاهرة، الي قال نعوم شبيب في حفل افتتاحه:

«أقدم لكم هذا المبنى لكى نعتز به، فهو عربى في تصميمه، عربى في إنشائه، عربى في كل مرحلة من مراحلها»، وقتها كانت فكرة «عربى» بديل عن كلمة مصري، كلمة مصري مكتش بتستخدم خالص، وهاقول لك على حاجة رسخها التلفزيون في عقول المصريين، إحنا بنقول «فيلم عربى» بمعنى مصري، لأنه لو فيه فيلم تونسي مثلاً، بنقول عليه فيلم تونسي مش فيلم عربى.

بس برج القاهرة مش عربى، مصري حتى النخاع، هو عربى بس باعتبار إن مصر عربية، قاعدته من جرانيت أسوان الي ياما اتبنى بيها معابد، وقمته تصميم على شكل زهرة اللوتس، الزهرة المصرية العريقة، فهو مصري مصري مصري.

المثير هنا هو قصة بنا البرج، وتكلفة إنشاؤه، اللي يفخر بيها أي محب لجمال عبدالناصر، وده حقهم الصراحة، فخلينا نحكي الحكاية:

وقتها مكش لسه فيه عداا واضح بين ثورة يوليو والولايات المتحدة الأمريكية، والرئيس الأميركي وقتها زي ما بنقول حب «يدوق» رجال الحكم الصاعدين في مصر، يختبرهم يعني فقابل حسن التهامي، اللي كان مستشار رئيس الجمهورية المصرية، واداله ستة مليون جنيه في شنطة يوصلها لعبدالناصر، تحت بند «مساعدة الرؤساء الأصدقاء».

فكرة إنه بعتمهم في شنطة معناها إن فيه إمكانية المبلغ يدخل خزينة الدولة خمسة مليون، أو أربعة، أو ما يدخلش خالص، ويبقى ده مقابل تبعية الموقف المصري في المنطقة للموقف الأمريكي، خصوصًا في القضايا الإقليمية زي موقف مصر المساند للجزائر مثلاً.

عبدالناصر كان ذكي ونزيه في الموقف ده، لأنه وجه باستغلال الملايين الستة في أطول «لا» في التاريخ، قرر يبني برج على هيئة لا مؤاخذه خازوق، وإنه حتى ما يستغلش الفلوس في البنية التحتية المصرية، وبكده يفضل البرج طول الوقت شاهد على إننا رفضنا العرض الأمريكي.

أجهزة الدولة السيادية طبعًا هي اللي تولت عملية البناء، وادوا تكليفها لظابط اسمه يسري الجزار، بعد تحديد مكان البرج في منطقة الجزيرة جنب قصر النبيل عباس حليم، ومكش نعوم شيبب مرشح خالص للموضوع ده، كان المفروض مهندسين تانيين بس علقوا بإن التربة بتاعة المنطقة ما تستحملش مبنى عالي كده.

يسري الجزار كان ماشي وقتها في باب اللوق، فشاف عمارة عالية بتبني هناك، فقال: الله، ما هي الأبراج أهي طالعة في المنطقة، فسأل عن اسم المهندس اللي بنى البرج ده، فعرف انه نعوم شيبب، وراح مكتبه فورًا، وشرح له هو عايز إيه، فتولى نعوم تنفيذ البرج.

الأمريكان سمو البرج ده «شوكة عبدالناصر»، فالمصريين سموه «خازوق روزفلت».

آه والله

زي ما بقولك كده.

بسماتيك

قامت الدنيا من كام يوم على كلمة واحدة. . . رمسيس رمسيس . إلقوا يا عيال لقوا رمسيس . حلق يا واد على ملك المطرية . بص شوف الفراعنة بيعملوا إيه . الملك عندنا وماحدث قدنا .

إلحق التمثال اتكسر . لا ماتكسرش هو مكسور من الأول . حوش البلدوزر . إوعى الونش . هس العيال من على التمثال . حط التمثال عالعرابية . العرابة مش داخله المتحف . نزل التمثال .

ده مش رمسيس على فكرة. . . ده بسماتيك!!!

بسماتيك ياختيبيبيبى كل ده وماطلعش رمسيس؟

آه والنبي زي ما بقولكوا كده .

وماتعرفش إيه اللي حصل للناس لما عرفوا إنه بسماتيك . باين من منطلق إن اللي نعرفه أحسن من اللي مانعرفوش . ورمسيس ابن حلال وواكلين معاه عيش وملح، وكان واقف عند المحطة، واللي رايح واللي جاي عارفه . فزعلوا أو أحبطوا لما لقوا فرعون جديد داخل عليهم!!

قلت والنبي ما انا مزعلاكوا . وقلت أكسر الحواجز النفسية اللي بينكم وبين أخونا الكبير بسماتيك علشان مايصحش اللي حاصل مع الجدع ده .

بص يا سيدي بسماتيك ده حدوتة كبيرة أوي .

آه والنبي زي ما بقولكوا كده .

بسماتيك يا سيدي اتولد باسم (واح-ام-رع) بمعنى (المحروس من رع)

واسمه الملكي (أبسماتيك) أو (ابن الأسد) . أبوه هو الملك (نخاو الأول) .

أمه الملكة (استامبت) وهي نوبية الأصل وبنت الملك (طهارقا) شخصياً أعظم ملوك الأسرة الـ 25

قالك يا سيدي في عصر جده الملك طهارقا النوبي حاول الأشوريين أحفاد الهكسوس احتلال مصر . فجه جده الملك طهارقا قاد مصر من الجنوب وقضى على الأشوريين وطاردهم وخرجهم كمان من بيت المقدس . ورجع جوز بنته من حاكم مصر نخاو ورجع للنوبة ومات .

بعد موته رجع الأشوريين تاني ودخلوا مصر واحتلوها وقسموا مصر من جديد للدلتا والصعيد . وتولى أبوه نخاو حكم الدلتا الموالي للأشوريين .

لكن الراجل اللي اعتبره البعض خاين كان غير كده خالص. قرر يجهز ابنه ويعلمه فنون الحرب والسياسة بعيد عن عيون الأشوريين. فبعته لأهل امه في الجنوب. دربوه وعلموه فنون الحرب والقتال والسياسة.

ورجع أسماتيك حكم الشمال خليفة لأبوه. واشتغل سياسة ووطد علاقته بأهل امه في الجنوب. لأ وحسن علاقته بالإغريق في الشمال وعمَلهم مدينة كاملة شبه السوق الحرة كده يتاجروا فيها. لدرجة إن من شدة إعجابهم بيه بعثوه سريتين إغريقيتين يحاربوا في صفه.

وكان ووطد علاقته بالقبائل الليبية في الغرب وأقام معاهم تجارة واتجوز منهم كمان.

وبكده وبسياسته وحكمته يوحد مصر كلها من تاني تحت راية واحدة.

ساعتها بس وجبت الحرب. وفعلا ينقض بسماتيك على الحاميات الأشورية ويسحقها تمامًا ويظهر مصر ويوحدها. لأ ويروح كمان يقضي على الأشوريين في عقر دارهم. وينهي الإمبراطورية الأشورية من الوجود.

وتتقسم الإمبراطورية بين مصر والفينيقيين والكلدانيين والبابليين.

ويحصن حدود مصر الشرقية ويحكم مصر 50 سنة بالتمام والكمال!!

شوفتوا العظمة؟

بتخيل جلالة الملك ودماعه بتطلع من الحفرة إياها ويص حوالياه ويشوف المنظر اللي شوفناه في الصور والشاشات!!

أنا إيه اللي رماني الرمية السوداء دي يا جدعان!! إنتوا مين؟؟ وانا بعمل إيه هنا؟

لأ هيزعل

هيزعل بجد

هيزعل زعل وحش والنبي زي ما بقولكوا كده.

بسماتيك

انهض

لن تفنى

لقد نوديت باسمك

لقد بعثت

جعران مصري صادفت

ترنيمة البعث لدى قدماء المصريين

بلادي بلادي

تبدأ حكاية بلادي بلادي من سنة 1919

البلد كانت في ثورة، المشاعر ملتهبة، عصر بيخلص، عصر بببدأ، صراعات في كل مكان، أحداث كبرى، قصص، ملاحم، وأغاني، أغاني كثير كثير، فيها وطني، وفيها شطط، وفيها كل حاجة.

أول ما نفوا سعد زغلول (النفي كان نقطة انفجار الأحداث اللي بتستوي بقالها فترة) ومع بداية أحداث الثورة نفسها، ظهرت مئات الأناشيد «الوطنية»، وكان واحد من الأناشيد دي، من أشهرها كمان، نشيد «بلادي بلادي»، اللي كتبه يونس القاضي ولحنه سيد درويش.

ولأن الأغاني والأناشيد كانت كثير، محدش كان مركز قوي مين اللي كتبه، ولما جات الإذاعة بعدين أذاعت النشيد ده، تعاملت معاه باعتباره من كلمات بديع خيرى، حيث إنه من ألحان سيد درويش، عارف، زي ما ناس كثير بتعامل مع كل اللي غناه الشيخ إمام باعتباره أحمد فؤاد نجم.

نشيد بلادي بلادي كان متسجل في الإذاعة باسم بديع خيرى، ويونس القاضي مكنش مهتم بتصحيح المعلومة، لحد ما بديع نفسه قال لهم من باب الأمانة اللي تليق بواحد في حجمه: الغنوة دي مش بتاعتي، الكلام ده كان أوائل الستينات، وبعد بحث، اتعرف إن اللي كاتبها هو يونس القاضي.

الغنوة دي بالذات، كانت خاصة في تراث محمد يونس القاضي، لإن مطلعها مطلع خطبة لمصطفى كامل:

بلادي بلادي بلادي لك حبي وفؤادي

ومعروف إن مصطفى كامل كان من أوائل الناس اللي قدموا يونس القاضي، وقال له: إنت تقدر تحول كلماتي لأغاني، وده كان بيحصل كثير، إن كامل يعمل خطبة عصماء، فتترجم غنا على يد القاضي.

في أواخر السبعينات، وبعد اتفاقية السلام، كان طبعًا لازم يتغير السلام الوطني، وبلاش «والله زمان يا سلاحي»، وطبعًا اللي اختار النشيد هو الموسيقار عبد الوهاب، موسيقار الأجيال، وبقي بعدها رسميًا سيادة اللواء محمد عبد الوهاب، لأنه أخذ رتبة شرفية، واتصور بالبدلة العسكرية وهو يقود الفرقة الموسيقية اللي لعبت النشيد.

اللي حصل، وحكاه الكاتب الكبير أنيس منصور، إن السادات طلب من عبد الوهاب إنه يألّف النشيد أو يعيد صياغة لحن بلادي بلادي، بشكل يخليه ينفع سلام وطني، فبعد الوهاب عمل الصياغة الجديدة. فموسيقار الأجيال فهم إن السادات عايز «بلادي بلادي»، فعمل الصياغة بتلات سرعات مختلفة، وراح سمعه للسادات، وكان معاهم أنيس منصور.

سمعوا التلات تسجيلات، والسادات سأل عبد الوهاب: كلهم كويسين، تختار أنهي واحدة. فعبد الوهاب قال: سيادة الرئيس أنا ألفت وعرضت والرأي لك.

سأل أنيس، فأنيس قال: الثانية، لا سريعة ولا بطيئة.

فالسادات قال لهم: لأ، أنا أختار الأبطال لإننا مش عايزين نحارب. خلاص، تعبنا من الحروب، عايزين السلام، عايزين نذوق طعم السلام والأمان والراحة، والتقاط الأنفاس، تعبنا.

بس ياسيدي

دي كانت حكايات السلام الوطني لمصر

من أيام ما كانت خديوية، ثم سلطانية، ثم مملكة، ثم جمهورية

تاريخ طويل عريض

تفضل المزيكا شاهدة عليه

احكوا حكايات السلام الوطني لولادكم

خلوهم يحكوها لولادهم

الحاجات دي مش بس حواديت

دي ذاكرة ووجدان ووطن

آه والله

زي ما بقولك كده.

فلسفة البلاغات

واحدة من ألطف الحالات اللي بتحسها وانت ماشي في شوارع ودروب مصر المحروسة، هي الحالة الفلسفية!! آه زي ما بقولكوا كده المشي والسواقة في شوارع بلدنا بيخليك فيلسوف، فيلسوف فيلسوف يعني، اللي هو تلاقي الحكمة بتدلدق كده من بين شفايفك، بالإضافة لحاجات تانية وأصوات تانية جنب الحكمة، بس الحكمة أساس يعني.

قوم وانا سايقه كده في شوارع بلدنا وبعدا أول هودر وتاني هودر وتالت هضبة ورابع دوحديرة. والدوحديرة عزيزي المواطن تختلف عن الهودر والهضبة إذ إنها خليط بين الاتنين تطلع وتنزل وتميل عالجنب وتتشهد وترجع تتعدل وتمشي في جزء من الثانية.

فوتكوا في الكلام، المخمضة دي وصلتنى للنيرفانا بأه وآه والنبى زي مابقولكوا كده. طلعي أرسطو وقعد عالكتف اليمين وأفلاطون قعد عالكتف الشمال وهات يا إيجاءات وإرهاصات وبلاوي زرقة.

بس الرؤية الفلسفية العميقة دي لاقتها محتاجة فيه رأي حد من الأصدقاء يكون خريج هندسة.

هل مادة البلاغات في قسم الطرق بتكون مستوى رفيع مثلاً؟ أو اختياري؟! يعني يا تاخذ (بلاغات) يا تاخذ (أرصفة وعمدان نور) زي يا (رياضة 1) يا (جيولوجيا وعلوم بيئية) بتاعة ثانوية عامة في بدايات الألفية؟!

طب بلاش، أساتذة علوم البلاغات، كلهم ماتوا في الكلية فمحدثش بقى بيدرس الكورس ده فيبطلعوا مهندسين طرق مش مركزين في حوار البلايع ده أصلاً؟!

بلاش كده وكده... هل سؤال البلايع ده كان بيبقى صعب وعليه 5 درجات، بس زي البلاغة كده أيام ثانوية عامة بردو، فكننوا بتطنشوا مذاكرة البلايع أصلاً؟!

ماهو أصل ضروري فيه سبب منطقي للي حاصل في الشوارع ده!! ماهو معنى إنهم يوم ما ربنا يكرمهم ويسفلتوا أي شارع -ده لو حصل وسفلتوا- يا إما يغضوا الطرف عن البلاعة ويفضلوا يخلقوا عليها كده لحد ما يجولوا مكانها لثقب أسود، عمقه ملايين السنين الضوئية، يا إما يعتبروها عار، وشكل من أشكال الإثم والفجور والسفور البين، قوم يكسبوا ثواب سترها عن أعين العامة والدهماء، أو وأدها في المهدي. قوم يسفلتوا عليها ومايجلوهاش أثر ولا قبر هنادي الخاطية.

المشكلة إن في الحالتين المواطن المسكين هو اللي بيلبس. سواء من شخرمة مساعدينه وجنوطه في أعماق البلايع كونية العمق دي. أو في مياه الأمطار اللي بتحول فصل الشتاء لمستنقعات أمازونية مش لاقية مصرف.

بمبة كشر

زمان كانت الفنانة والفنان متهمين دايماً، مدانين، حتى أهل الفن مش يتعاملوا معاها على إنها فنانة، وفي بدايات الفن خالص، كان نادرا لما تلاقي فنان قدر ياخذ وضع اجتماعي مميز، مهما كان وضعها الاقتصادي، ومهما وصلت شهرتها. بس بمبة كشر كانت استثناء.

آه والله

زي ما بقولك كده.

بمبة كشر فنانة حقيقية، فيه ناس بتعامل مع الاسم باعتباره لشخصية خيالية أو أسطورية، بس بمبة كشر اسم لواحدة عاشت في مصر، أواخر القرن الـ 19، وكان ليها صيت مسمّع في كل مكان.

أبوها كان اسمه أحمد مصطفى مقرر قرآن مشهور، وجدها، أبو أبوها عين من أعيان المحروسة اسمه مصطفى كشر، اللي خدت منه اللقب بتاعها، وهي نفسها اسمها بمبة، على اسم أم عباس، وجدها لأمها كان الملك الأشرف أيتال، عيلة مأصلة يعني، مستحيل حد يتخيل يطلع منها رقاصة، بس أهو حصل، كمان أختها نبوية خلفت بنت، هي المطربة المعروفة فتحية أحمد.

بدأت قصة بمبة لما أبوها اتوفى وهي عندها 14 سنة، فأمها اتجوزت المقرر الخصوصي بتاع الخديوي توفيق، راحت بمبة وإخواتها قاطعوا أمها، وسكنوا في بيت تاني، البيت ده كان جنب بيت عالمة معروفة، اسمها «سَلَم»، هي اللي اكتشفت موهبة بمبة كشر، وخذتها معاها في حفلاتها.

الي خلى بمبة كشر توافق على إنها تشتغل مع العالمة التركية هي انها مكنتش بتتعامل غير مع علية القوم، فكانت الحكاية صاينة نفسها، ومفيهاش مرمطة، لدرجة إن بمبة كان عندها ركوبة بسواق، ولما نتكلم عن ركوبة، فاحنا نقصد لا مؤاخذة حمار، ده كان بديل العربية وقتها.

طبعا كان فيه صعوبات بتواجه بمبة، زي حكاية إن فيه راجل يسوق لها الحمار، ويوديه ويجيبها، وفي أوقات متأخرة، فاتجوزته فترة، بس لما كبرت، واستقلت عن «سَلَم» اتطلقت منه واتجوزت فنان معروف اسمه سيد الصفتي.

بمبة بقت أشهر راقصة، وكانت بترقص بالصينية، وكانت بتنظم مهرجانات للرقص كانت تسميها حفلات الزار، الحفلات دي كان بيحيتها اتين من كبار الصيطة هم صالح عبد الحي وعبد اللطيف أفندي البنا (دوروا عاليوتوب واسمعوا وانسطوا).

كانت الأغاني تبدأ الأول وبعدين يبدأ مهرجان الرقص، اللي بتبدؤه هي ويختم بصبيانها من الرقاصات اللي بتكتشفهم، ومكتش ترقص إلا عند البهوات والباشوات، والفلوس جريت في إيدها، ولما منافستها الوحيدة «شفيقة القبطية» جابت حنطور، راحت هي كمان جابت حنطور، وكانت الناس يفسحوا لها السكة وهي ماشية، وكانوا بيغنوا لها: يا بمبة كشر يا لوز مقشر.

كانت بمبة بتواجه صعوبات، وهي إجوازها دايمًا بيخبروها بين الاستمرار في الجواز والاستمرار في الفن، وهي كان عندها إصرار إن الفن مش عيب، بعد طلاقها من جوزها الثاني سيد الصفتي، التجوزت واحد اسمه توفيق النحاس، كان شهندر التجار، وحصلت نفس الحاجة.

يوم ما رجع سعد زغلول من منفاه كانت بمبة كشر أسطى أسطوات مصر في كار العوالم، ويومها فرشت شارع الموسكي كله سجاد من أفخر الأنواع.

فضلت ترقص لحد ما ماتت وهي عندها سبعين سنة، بس للأسف، لما ماتت كانت السياما يدوب لسه في أوائلها، فظهرت في فيلم صامت ولا حاجة، وما شفنهاش.

بس فضلت حكايتها في الكتب

وهي حكاية مهمة

ولها أكثر من معنى

آه والله

زي ما بقولك كده.

الملافظ سعد

متهيأ لي

والله أعلى وأعلم

إنه مفيش حد مر مط لغته زي ما إحنا عملنا وبنعمل كل يوم

إوعى تفتكرني، لا سمح الله، باتكلم عن اللغة العربية الفصحى، والنحو والقواعد والحاجات الفخيمة دي.

الحقيقة أنا طموحي أقل من كده بكثير

باتكلم عن لغتنا المصرية العامية، اللي بنتكلم بيها دايبا

اللغة البسيطة دي

بهدلناها معنا آخر بهدلة

آه والله

زي ما بقولك كده.

إزاي؟

يطلع واحد يقول جملة أو تعبير أو فكرة يحطها كده في عبارة شيك.

جميل

بس اللي مش جميل بقى

إنه تلاقي فجأة كل الناس، بتحشر الجملة دي ولأ التعبير ده في أي كلام، وتسمعه في كل مكان، بمعناه، وبغير معناه، وأحياناً بعكس معناه. وتقراه في كل حته، وتلاقي السوشيال ميديا اتبدرت بالتعبير ده، لحد ما نستهلكه، ونبذله، وبعد ما كان تعبير شيك، بقى نكتة بايخة.

مش عايزة أعد لك:

ييجي واحد يقولك: المجد، كل المجد، لمش عارف مين.

ماشبي

حلو برضه إننا نعجب بحد، لحد ما نقول عنه إنه في المجد.

بس لما توصل لإنك تلاقي واحد كاتب:

المجد كل المجد، للي بيسقّي الشاي بالسكويات الساعة سبعة وربع المغرب، ده إيه؟

إيفيه!

ماشي يا سيدي

ولو انه مش ماشي

بس ماشي

إيفيه

نضحك شوية

وماله؟

لكن الإيفيه لما يقوله أكثر من 14 نفر، ما يبقاش إيفيه، ومش هيضحك، وكل اللي هيحصل إن الكلمة هتفقد معناها.

مستهونين إحنا بالحكاية دي

وانا مش عايزة أبالغ

بس والله والله والله وماليكو عليّ حلفان: البلاد والأمم مش ممكن تعيش وتستمر وتتقدم، إذا الكلام الكبير صغر: المجد، الحرية، الوطن، الشرف، النزاهة، . . . إلخ، ده كلام كبير، لازم يفضل محتفظ بوقعه على الودن والنفس والوجدان، بالذات الوجدان.

ألمانيا واليابان اتدمروا في الحرب العالمية الثانية، دلوقتي، هم ألمانيا واليابان، بإيه؟

بالعلم، والاقتصاد والتكنولوجيا؟

صحيح

لكن اللي علمّ العلم، ونمّى الاقتصاد وطور التكنولوجيا كان القرار، قرار الشعب ده إنه يقوم من وقعته. والقرار ده وجدان مش أكثر من وجدان سليم لسه محتفظ بكل المعاني المهمة.

المشكلة إن الكلام بس ما بقاش قاصر عليّ وعليك وعلينا كأفراد، ده فيه مواقع عجيبة الشأن، بقت تقول الكلام بأي معنى، ومن غير معنى، وبأي مناسبة ومن غير مناسبة.

لسه من كام يوم شايفة موقع كاتب:

رسمياً وفاة والد اللاعب الفلاني

اللي هو يا نهار كحلي!

هو فيه في الوفاة رسمياً وعرفياً؟

رسمياً ازاي يعني؟

إحنا كده طلعتنا من الغلط في اللغة، لمؤاخذة يعني، للجليطة وقلة الذوق.

علشان كده أهالينا قالوا:

«الملافظ سعد»

والملافظ مش بس الكلام الحلو، الملافظ عمومًا، أي كلام بنقوله، لازم وإحنا بنقوله نكون واخدين بالناس كويس هو رايع فين، وهيعمل إيه؟ واللي قدامي لما يسمعه أو يقراه ممكن يحس بإيه؟

خلينا نفتكر مع بعض إن الكلمة نور زي ما قال عبد الرحمن الشرقاوي، وإن الكلمة مش حروف بنقولها أو نكتبها، الكلمة دي هي إنت وأنا وأي حد بيقولها

آه والله

زي ما بقولك كده.

بيب بيب

بيب بيب بيب، تيت تيت تتيت، أو أو أو أو أو

طول ما انت ماشي في الشارع، تسمع النغمات دي جايلك من كل اتجاه، حصار، حصار على ودانك وأعصابك وضغط دمك، حصار مفيش منه مهرب غير إنك تقعد تدعي ربنا توصل المكان اللي رايح له في أسرع وقت، وقبل ما تنهار.

ما أظنش إن الخواجة الفرنساوي أنطوان ريديه كان يتخيل إن ده هيكون مصير اختراعه اللي وصل له من 170 سنة، الخواجة أنطوان اخترع آلة التنبيه، وطبعًا بدأها في المنبه اللي بنحطه جنب السرير، وكثير مننا بيعتبروه عدوهم الأول، اللي بيصحيهم من أحلاها نومة علشان شغل أو ميعاد مهم.

بعد كده استعاروا فكرة آلة التنبيه، وحطوها في العربيات، بس مش بتدق في ساعة معينة، لأ، المفروض إننا بنستخدمها علشان ننبه بعض لو فيه حاجة تستاهل التنبيه.

الفكرة في آلة التنبيه عمومًا، سواء كانت في المنبه أو الكلاكس، إن صوتها يبقى مزعج، لإن هدفها الأساسي هو الإزعاج، آلات التنبيه مش مزيكا نمشي نعمل بيها سيمفونيات في الشارع، اللي تحت إيدي وإيدك ده مش بيانو ولا أو كورديون ولا حتى بيانولا حسب الله، علشان نمشي نغني بيها ونرد على بعض.

ليه اللي عمل المنبه عمله مزعج؟

علشان دي طبيعته، آلة التنبيه عاملة زي جسمك لما يقولك: خد بالك فيه حاجة مش مضبوطة، فتحس بحاجة توجعك، علشان كده فيه قواعد مرورية واضحة تقول لك إمتى تستخدم آلة التنبيه وإمتى ما تستخدمهاش.

اللي بيحصل إننا بنستخدم الكلاكس بكل الأشكال والألوان والمعاني، حد بينده على حد في الدور الرابع، يقول له: هاكلكس لك من تحت، إشارة واقفة فالعربيات تكلكس للعسكري، قال يعني لما يسمعهم هيفتح الإشارة، واحد عايز يعدي العربية اللي قدامه، واحد عايز اللي وراه ما يعديهوش، زفة عروسة، وأحيانًا تلاقي زمارة طالعة تحرم طبله ودنك، تحاول تدور لها على سبب، ما تلاقيش غير إن اللي سايق بيتمزج من صوت الكلاكس.

المشكلة إن استخدام الكلاكس عمال على بطل، مش بس عامل تلوث سمعي، وضوضاء، ويسبب أمراض ويقصر العمر، ده كمان بيخليه يخسر وظيفته الأساسية باعتباره يعني في الأصل آلة تنبيه لما يحصل غلط.

ممکن حد يكون ببعدي الشارع، فالي سايق يديه كلاكس، فما يسمعش، ما هو كله بيدي كلاكس، يعرف
مين إن ده ليه هو بالذات؟

يمكن علشان كده لما عربية إسعاف تكون بتتنقل مريض، ولأ عربية مطافي رايحة في حاجة لا قدر الله، مش
كتير بيستجيب للسارينة، مع إنها مزعجة الدبل، بس إحنا خلاص، ودانا نحست، ولا ألف سارينة بقوا
يهزونا.

كلنا عارفين حكاية الراعي اللي كان كل يوم يصرخ، ويصحي الناس من النوم، ويقول لهم: ديب، ديب،
ديب، فالناس يصحوا مفزوعين، ويجروا يدوروا عالديب، فما يلاقوش ديابة، يوم بعد يوم، ما عادش حد
بيصدق الراعي، فلما جه الديب بجد، ما لقاش حد ينقذه.

آلة التنبيه يا إخوانا، سلاح، سلاح رهيب، الدنيا كلها بتستخدمه لما يكون فيه حاجة بجد، أبوه والله زي ما
بقولكوا كده

حاجة بجد

ثانوية وأخواتها

بنت حلوة وصغيرة راحت تجيب نتيجة الثانوية العامة، البنت يا ولداه لاقت نفسها مش جايبة المجموع اللي بالها فيه. هوب ولعت في روحها!!

شاب أمور وكيوت راخر جاب النتيجة لقي نفسه ساقط، راح محود على النيل غطس مقبش!!

نعم يعني؟ مبدئيا ده عمرهم ومش هتتكلم فيها. لكن نعم بجد؟ اللي هو إيه؟؟ ثانوية مين وكلية إيه وإحباط مين ويأس إيه اللي يأسوه العيال الورور بتوع أول امبارح دول؟!

بصوا كل واحد قطته جمل، دي حقيقة لازم نعرفها، وبردو اللي قبلينا قالوا كل برغوت على قد دمه. لما طول السنة نحط على كتاف العيال، ان الثانوية هي مفصل حياتهم اللي راحت واللي جاية، وانهم واقفين قصاد تحديد هويتهم وأن كل كيانهم متوقف على شوية أرقام مطبوعة هاتيجي في صورة نتيجة لمجهودهم. أقل واجب يعني الصراحة العيال يوصلوا للمراحل المنيلة دي نفسياً.

بس ماهو ربنا عرفوه بالعقل يا جماعة، مش كده! مانعمل إحصائية كده ونشوف اللي اشتغلوا بتخصصاتهم قد إيه ووصلوا لحد فين، واللي قرروا يعتمدوا على مواهبهم وقدراتهم، أو كبروا دماغهم من تخصصهم واشتغلوا بعيد عنه، قد إيه ووصلوا لحد فين.

الأكيد يعني إن التانيين دول أكثر وأنجح وعلى كافة المستويات، آه والله زي ما بقولكوا كده. مش بقول إن ده الصح والمنطقي واللي المفروض يحصل. لأ العكس هو اللي المفروض يحصل، والطبعي إن اللي بيدخل تخصص أو يدرس مجال، بيطلع منه متجهز إنه يشتغل في المجال ده وينجح ويوصل لأعلى مكان فيه.

كلام نظري بحت نقوله ونحبس بكوباية الشاي وننام مرتاحين الضمير. لكن على الأرض الكلام ده ماياكلش عيش.

ليه بأه مش موضوعنا. فيه خلل ما؟ آه فيه خلل ما. بس إحنا خيلنا في النتائج مش في الأسباب. مش موضوعنا النهاردة.

طب ونروح بعيد ليه ما أهو. ولأ أقولكم خلونا نروح بعيد!! آه اشتروا مني بس ونروح بعيد ونشوف غيرنا عملوا إيه بالثانوية العامة.

عارفين يا شباب مدام أجاثا كريستي؟ الكاتبة العظيمة وصاحبة أعلى معدل طباعة روايات في العالم لحد النهاردة؟ عارفنها دي؟ ماتعلمتش!! آه والنبي زي ما بقولكوا كده ماتعلمتش. امها علمتها القرابة والكتابة وبالعافية في البيت وكانت ضعيفة جداً في الهجاية وحالتها حالة.

بيل جيتس العبقري وواحد من أغنى أغنياء العالم، إن لم يكن أغناهم. ساب الجامعة من تاني سنة علشان
لقى نفسه مش أحسن طالب في حقوق، طلقها تلاتة وراح أسس مايكروسوفت!!

أوبرا وينفري تعرفها؟ لوماتعرفهاش روح اتعالج عدم المؤاخذة. أوبرا راحرة لا اتعلمت ولا شافت علام
بعينها واترمرت مسح سلام، وخدمة في البيوت، واعتداءات وبلاوي، لحد ما بقت أغنى امرأة من أصول
إفريقية في العالم، وأهم إعلامية وواحدة من أكثر 100 شخصية مؤثرين في العالم كله.

واحد من أهم الأدباء في التاريخ العربي كله عباس محمود العقاد، ماعهوش غير الابتدائية، وكمل تعليمه
ثقافة وقراية وبس.

القصد عمر ما كان مستقبلك وحيلتك وتاريخك كله اللي هيحدده مرحلة تعليمية ولا شهادة ولا مجموع.

إنك وبس اللي بتكتب تاريخك وبتحقق إنجازاتك وبتوصل للي انت عاوزه طالما بجد عاوزه.

جارك

سلفادور ملحن أمريكي شاب ولاعب جيتار وممثل أمريكي. ابتدى يتشهر شويه قام قرر ينقل مكان سكنه لمنطقة في شمال غرب هوليدود، علشان يبقى قريب من ستوديوهات التصوير. يتعرف على الست الي ساكنة جنبه وهي عجوز عمرها 89 سنة اسمها نورما.

يشوفها في الأيام الي بتروح تاخذ فيها العلاج فيحييها وتحبيه وخلص.

لاحظ إنها بقالها فترة مابتخرجش من بيتها، راح خبط عليها لاقاها مكتتبه لأنها عرفت من الدكاترة إن خلاص جسمها رافض يستجيب للعلاج وإنها المفروض تقضي أيامها الأخيرة في هدوء بعيد عن آلام العلاج.

الشاب يتأثر ويقرر إنه مايتخلاش عن جارتة اللطيفة في أيامها الأخيرة.

يروح للمكان الي بتتعالج فيه ويعرف فعلاً إنها مصابة بسرطان الدم ومع وحدتها واكتئابها وسنها الكبيرة مابقاش فيه أمل في شفاء وإنها حسبة أيام مش أكثر.

يقرر الشاب إنه ينقل جارتة تعيش معاه في بيته ويبدأ يدعمها ويهتم بيها، ويخرج معاه يومياً، يتمشوا ويروحوا الاستوديوهات سوا، ويخرجوا يتعشوا بره.

آه والله زي ما بقولكوا كده.

وبعد الست ما كانت مكتتبه وأهملت في نفسها رجعت تاني تلبس وتحط مكياج وتسرح شعرها، وشها نفسه بقى بيضحك أكثر وبقت فرحانة من قلبها، حتى فحوصاتها تحسنت كثير عن الفترة الي كانت بتتعالج فيها.

عملت لنفسها أكونت على انستجرام وفيس بوك وهو كمان بقى بيشارك كل صورته معاه لأصدقائه، الي بدورهم اهتموا بنورما وبقوا بيتابعوها كل يوم ويسألوا عنها.

وييجي إذن ربك وتفارقنا نورما يوم 16 فبراير ويكتب سلفادور كلماته الأخيرة عنها.

«رحلت صباحاً نورما بابتسامة كبيرة على وجهها، ستظل روحها تتواصل معنا، كما أنها غيرت حياتي، وأنا أرغب في أن يهتم الجميع بالغرباء وجيرانهم والتعامل معهم بلطف، وحينما تحاول إضاءة حياة شخص تضاء حياتك أنت.»

صحيح غريب أمرنا يا جدع، إحنا اللي كنا بنقول غرب مين دي عالم باردة مايحسوش ببعض، لكن إحنا هنا قلبنا على بعض والجيران لبعضيتها والنبي وصى على سابع جار، وجارك قدامك ووراك إن ماشافش وشك يشوف قفاك.

ولسه الدراما بتوريلنا أشكال وألوان من علاقات الجيرة، بقينا بنستورد حكايات تعاطف الجيران مع بعض من البر الثاني من الكوكب!!
آه بجد زي ما بقولك كده.

علاقات الجيرة بقت مبتورة ما حدش يعرف حد، والشقق بقت كمباوندات منفصلة مالهش صلة لا يمين ولا شمال ولا فوق ولا تحت.
حتى الكومباوندات الجديدة بقت عاملة زي بيوت الباربي، زي ما يكون العايشين جواها بلاستك مش بجد.

علاقتنا مع الجيران بقت بتتلخص في خناقات اتحاد الملاك، وخناقات الركنة!!! ده يا مؤمنين الناس بتنزل في الشارع يجيبوا شواشي بعض ويلموا عليهم القراض وساعة ما يعملوا محضر ولا يجيلهم عسكري يكتشفوا إنهم سكان شارع واحد إن مكانش عمارة واحدة!!
آه والنبي زي ما بقولكوا كده.
عملنا في نفسنا كده ليه؟

أيوه الدنيا تلاهي والحياة صعبة والناس مكفية ع المعايش وبيتواصلوا مع كف إيدهم بالعافية. بس مايضرش من أقل القليل من الإنسانية والتواصل مع البشر المحيطين.
واوعوا تنسوا إن ساعة الزنقة، والحوجة الجامدة، جارك بيبقى اقرب من أخوك.
بُنا جسور الود والتواصل أحياناً مش بيحتاج أكثر من ابتسامة وهزة راس وصباح الخير وخلونا نشوفكم.
مش لازم تعملوا زي سلفادور يعني.

جربوها يمكن تنفعكم

واحنا قاعدين قعدة سنتي، وبتكلم في الحاجات والمحتاجات، وشئون البيت، والعيشة واللي عايشينها، إذا بواحدة من الصديقات الشابات حكنا عن تجربة بيعملوها في مدرسة ابنها، التجربة عجبتني أوي، قلت أشارككم معايا الفكرة.

المدرسة عاملة مكتبة، زي كل المدارس، بس إيه بقى، كل تلميذ من كي جي ون وإنت طالع، لازم يختار كتاب يستعيه يوم الخميس، ويرجعه الخميس اللي بعده. ومش مسموح للطفل يرفض الاستعارة. صديقتنا دي سألت المسئولين في المدرسة: وهو الطفل في كي جي ون أساسا بيعرف يقرأ علشان يستعير كتب؟

كان الرد إن الهدف مش إن الطفل يقرأ الكتاب اللي استعاره، إنما إنه يتعود على الكتاب، يبقى جزء من مفردات حياته، وتفصييلة عادية من تفاصيل يومه، أكيد في مرة هيحاول يفتح الكتاب، وهيقرا شوية، وبكرة يقرأ أكثر، وبعده يشده كتاب يجيبه من أوله لآخره، ولو كان قصة للأطفال، أو كتاب في الفيزياء المسلية أو عن شخصية، فلما يكبر، ما يقاش محتاج مجهود في القراءة.

آه والله زي ما بقولك كده، الكتاب مع الطفل وفي إيده من كي جي وان، من قبل حتى وعيه بالدنيا ما يتفتح ويتشكل.

التجربة دي خلتنى أفنكر بيوتنا زمان، مكنش ممكن بيت ما يكونش فيه مكتبة، ولو صغيرة، ولو رف واحد عليه أربع خمس عشر كتب مرصوين بعناية. وشكلهم يفرح القلب الحزين، ويفتح النفس للقراءة. كانت هدية من الهدايا المعتبرة، لما الأب أو الأم يجيبوا لابنهم أو بنتهم هدية كتاب، أو مجلة، أو قصة، وعلامة من علامات إن الابن كبر، أو البنت بقت أنسة، لما تبدل نوع الكتب اللي بتقراها، والأولاد يعدوا مرحلة القصص المصورة للروايات والقصص والأشعار.

مش بس الكتب، إحنا الحقيقة لازم ندقق في أي حاجة بيتعامل معاها أطفالنا، وبأقصد هنا التعامل اليومي العادي، الحاجات اللي الطفل بيشفها ويسمعها ويستقبلها ببساطة.

العالم كله دلوقتي بيعمل دراسات على تأثير كل حاجة حوالينا على تكوين شخصية الطفل، وفيه اتفاق على إن السنين الأولى من العمر، قبل ست سنين، هي اللي بيتكون فيها كل حاجة تخص النفر منا، كل اللي جي بعد كده بيبقى تراكم في نفس الاتجاه. خلاص، الحاجة اللي بقت أساسية هتفضل أساسية، والبعيد عنه هيفضل بعيد عنه طول حياته.

مرة قرئت دراسة عن تأثير الموسيقى على الطفل، فانداهشت من كم الحاجات الي بتتنمى عند الطفل من خلال اندماجه مع المزيكا والألحان، إحنا هنا مش بتتكلم عن ناحية الفن بس، لأ، خد عندك: تنشيط الذاكرة، خصوصًا طبقًا الذاكرة السمعية.

زيادة التركيز، على عكس ما كتير فاكرين، إن الطفل الي بيسمع المزيكا بيتشتت. حتى من الناحية العضلية والحركية، الانسجام مع المزيكا بيعود الطفل على أداء الحركات الرياضية، إن شاء الله حتى البسيطة.

زمان قالوا لنا: بسيطة ما تستبسطهاش.

وقالوا لنا كمان: معظم النار من مستصغر الشرر.

علشان كده، التدقيق في حياة ولادنا، والحاجات الصغيرة الي بيتعاملوا معاها، بيفرق فوق ما نتخيل.

مش بس بيفرق مع الطفل.

كمان إحنا الأب والأم هيرتاحوا جدًّا، لما ابنهم أو بنتهم يدخل مراحل المراهقة والشباب، وهم أسوياء كده وشادين حيلهم.

آه والله، زي ما بقولكوا كده

ربنا يخلي لنا ولادنا جميعًا

جروبي

مصر تانية وعصر تاني
في وسط البلد، في وسط وسط البلد
في قلب وسط وسط البلد
في ميدان طلعت حرب
كان عندنا صرح اسمه جروبي
مكنش مجرد كافيه أو مكان للقعاد،
جروبي كان معنى أكبر من كده بكثير
آه والله
زي ما بقولك كده.

جروبي كان ملامح عصر ومصر وطبقة ما عدتش على كثير مننا، ولا إحنا عدينا عليها.
القوام الأساسي لزوار جروبي كان الطبقة الوسطى العليا، «أبر ميدل كلاس»، اللي هم الموظفين الكبار، الفنانين، الأطباء، المحامين، المهندسين، المدرسين، لأن أي واحد من دول لحد السبعينات كانوا هم دول برنسات مصر، واللي معاهم الفلوس، وكانت مصر متجهة بقوة للذوق الأوروبي.
وسط البلد عمومًا كانت نسخة من شوارع فرنسا، ولما تشوف مظاهرات الطلبة في فرنسا سنة 1968، مستحيل تفرقها من مظاهرات 25 يناير، لأن شكل العمارات متطابق، والحركة الليبرالية في مصر لحد الأربعينات كانت بتسعى إن مصر تدخل الحداثة، قبل ما يحصل لها اللي حصل، والله يجازي اللي كان السبب.
اللي أسسه هو چاكومو جروبي اتولد 1863 ومات 1947 كان حلوانى سويسري، هاجر لمصر سنة 1884، ونجح مع ابنه أكيلي في تأسيس شركة باسم عيلته «جروبي» وكان أول واحد يدخل الجيلاتى والآيس كريم مصر.

ليه فروع منتشرة في اسكندرية من سنة 1890، وبعدين عمل فروع في القاهرة سنة 1909 و1925. وليه فرع في ميدان طلعت حرب (سليمان باشا زمان)، وفرع في شارع عدلي. ابنه أكيلي أسس محل الأمريكين، كبديل لمحل جروبي علشان يبقى للأفندية والموظفين والطلبة اللي ماكتتش إمكانياتهم المالية بتساعدهم على

دخول جروبي، وشرا حاجات منه واللي كان محل العيلة المالكة للحلويات، والمحل اللي الباشوات واللي معاهم فلوس بيشتروا منه.

«شيزار» و«بيانكي» كانوا آخر ورثة المحل عن جدهم، ومؤسسه «جروبي»، باعوا المحل للشركة العربية للأغذية، عبد العزيز لقمة، سنة 1981. وهو دلوقتي مقفول للأسف.

جروبي مكنش مجرد مطعم وقهوة على الطراز الفرنسي، وإنما تحول لمشروع ثقافي يؤسس لذوق وتقاليد جديدة، وناس كثيرة اعتبروه مركز من مراكز الحداثة، وفي جروبي كان أحمد رمزي، قبل ما يبقى أحمد رمزي، بيقتد ياخذ فطاره المعتاد، اللي غالبًا بيكون كرواسون بالجبنه الفرنساوي وشاي إيرل جراي، اللي أول ما ريحته تطلع تعرف إن رمزي جه، وكان دائمًا معاه أصحاب الدراسة، وفي يوم من الأيام زارهم في قعدة الصبحية المعتادة مخرج شاب اسمه «يوسف شاهين»، بعدين انضم للشلة الصباحية شاب تاني اسمه عمر الشريف، فقدمهم يوسف شاهين في فيلم «صراع في الوادي».

راقية إبراهيم كانت بتروح الساعة أربعة العصر، وأحمد مظهر بيعاكس محمد عبد الوهاب في قهوته. ومنها طلع المخرج أحمد يحيى اللي كان بيقتد هناك من وهو عنده عشر سنين.

مش بس نجوم المجتمع، لو عملت سيرش على جروبي في جوجل، هتلاقيه عنصر مشترك في عشرات الحوادث، منها الاجتماعي، ومنها السياسي، وحتى في عالم الجاسوسية هتلاقيه كان مكان مهم لالتقاء الناس مع الناس اللي بتجندهم، حتى رؤساء الدول لما كانوا بييجوا مصر كانوا بياكلوا في جروبي.

آه والله

زي ما بقولك كده.

جعيتا

لبنان حلوة! لأ لبنان حلوة بجد. آه وربنا زي ما بقولكوا كده. الي سعده وقته وسافر لبنان بغرض السياحة أو الشوبنج أو العلاج أو لأي سبب، أكيد لاحظ دايماً أول سؤال بيتسأله:

زرت جعيتا؟

وما أدراك ما جعيتا!

جعيتا لمن لا يعرف جعيتا هي كهف جبلي في ضواحي بيروت تم اكتشافه بالصدفة.

الكهف اتكون بفعل المياه الجوفية، وقامت المياه وملايين السنين من الترسبات الكلسية بعمل لوحة سبحان الخلاق على جمال تفاصيلها.

الاهتمام اللبناني بجعيتا وصل لحد إعدادها علشان تكون واحدة من عجائب الدنيا السبعة الطبيعية، وبالفعل مغارة جعيتا من أقوى المعالم الطبيعية المرشحة للحصول على المكانة العالمية دي.

المهم وزبي زي غيري اتوهمت بجمال وروعة جعيتا وبحكي عن جمالها لحد من الأصدقاء، الي قالي طب جعيتا أحلى ولا كهف سنور ولا مغارة الجارة؟

فإذا بيأ أقوله لأ ماشوفتهمش دول. . . هما دول في لبنان برضو؟

الراجل حنكه وقع منه وقال لي لبنان!!

مغارة وادي سنور دي في بني سويف وكهف الجارة ده في الفرافرة حضرتك؟

كثيراً بأه من الـ (ياختيسيبى) و(بجد!!!) و(قطيعة) و(نهار مالوش ملامح)

والراجل يجيبلي في ميه وعصير، ويحطلي في كمادات ويجيبلي في مضادات اكتئاب ومناديل وأنا أعيسيبط بصوت عادل امام.

المهم بعد ما فوقت وأنا باخد دوا المرارة قولتله: احكي لي أكثر الله يسترك.

قالي بصي يا ستي: كهف وادي سنور ده يعتبر من أقدم الكهوف الطبيعية في العالم، وعمره بيحي كام مليون سنة كده. تم اكتشافه راخر بالصدفة في صحراء بني سويف جنوب القاهرة بـ 200 كم، وتم إعلان المنطقة محمية طبيعية من وقتها.

كهف الجارة ده معجزة بيئية، جمال الظواهر الجيولوجية الي فيه يخليه تحفة بيئية متكاملة.

حالي الصحية والنفسية والمعنوية ماخلتنيش اسأل عن حركة السياحة والدعاية العالمية للمكانين دول.
إذا كنت معرفهمش محلياً فمممكن أقول إن إلي يعرفوا المكانين دول مايزدش عدددهم عن 10٪.
ما بالك بأه بالدعاية والسياحة والكلام ده!! بلاش كلام فارغ.
القصد للممت شتات نفسي زي ما بيقولوا واخذت بعضي وجوجلت على المغارتين وقلت اتفرج.
عادييييييييك عالي شوفته.

مش من مستوى جمال المكانين لا قدر الله بالعكس، المغارتين آية من آيات الجمال الرباني. اللي ماتخيلتش
وجوده في مصر.

لكن على الجانب الثاني فيه التاتش إياه.

مبدئياً يا مؤمن وادي سنور ده مالوش طريق، آه وعهد الله، مدق في الصحرا تاخده أزح على رجلك لحد
ما توصله، ونهار مايزعقلك نبي وتوصل تلتقي سلم خشب نقالي حلو كده ربع متر في مترين ارتفاع تتسلقه
تلاقي باب المغارة 2 متر عرض في 75 سم طول. أيوه بالزبط حاجة زي فتحة الحصالة كده.
حالة كهف الجارة أحسن شوية بس برضو، الوصول ليها محتاج أزح في الصحرا.
مش هحكى ولا أقارن بين ده ودوكها.

ولا هاجيب سيرة التلفريك اللي بيوديكم جعيتا ولا قطار الملاهي البخاري اللي بيوديكم للمغارة الثانية.
ولا هحكى عن بازارات الهدايا وأماكن الترفيه وكم الشغل اللي جنب جعيتا.
لأني الحقيقة هقوم آخذ أقراص وكباسين ونقط الضغط والقولون والطحال. هات يابني كيس الأدوية من
جنب رجل الكرسي. أنا إيه اللي خلاني أعمل البرنامج ده.

جمال حمدان

بعد النكسة بشوية، نبيل زكي، الصحفي المعروف، دخل ميدان المساحة، ومنه على شارع الرافعي، ودخل البيت رقم 25، ودق الباب، مستني حد يفتح له، بس محدش فتح، مع إن صاحب البيت كان جوه.

صاحب البيت هو الدكتور جمال حمدان، أستاذ الجغرافيا المصري، اللي كان بقاله 4 سنين معتزل ومنعزل وقاعد في البيت، مقرر إنه ما يختلطش بحد، وما يعملش غير حاجتين: يقرأ، ويكتب، حتى الجواز ما تجوزش، حتى الأكل والشرب والفلوس، كان بيعتمد على عم أحمد البواب، يقبض له، ويجهز له الأكل، ويطلعهوله.

آه والله

زي ما بقولك كده.

نبيل زكي كان عايز حمدان يكتب تاني في مجلة «الكاتب»، بعد انقطاع، بس صاحب شخصية مصر ما فتحلوش، لأنه مش بيفتح لحد أيًا كان.

ما كانش لسه أستاذ الجغرافيا الأشهر في تاريخ مصر كمل وقتها 40 سنة، هو اتولد سنة 1928، واتعلم في مدرسة شبرا الابتدائية، اتعلم فيها حاجات كتير جنب القراية والكتابة. كان أبوه الأزهرى الشيخ محمود صالح حمدان مدرس لغة عربية وخط في المدرسة اللي اتعلم فيها، ومع دروس الخط اكتشف قدرته على رسم الخرائط باليد على درجة كبيرة من الدقة.

مع الخرائط، درس اللغة العربية، والتاريخ، فطلع رابط ما بين التاريخ والجغرافيا والعلوم الإنسانية، وشايفهم حاجة واحدة، وكان عرف بالضبط هو عايز يعمل إيه.

من مدرسة التوفيقية خد التوجيهية وهو عنده 16 سنة فقط لا غير، ومع إنه كان واحد من الطلاب العشرة الأوائل على مستوى الجمهورية، فهو كان مقرر، وعارف طريقه، دخل على جامعة القاهرة، والتحق بكلية الآداب قسم الجغرافيا، وكان طبيعي يتخرج ويتعين معيد وهو ابن 20 سنة، وتكون الطيارة المتجهة لإنجلترا في انتظاره علشان ياخذ الماجستير.

في جامعة ريدينج كان مدرسه مستر مولر، ولما استلم منه رسالته للماجستير عن «فلسفة الجغرافيا»، قدم طلب للجامعة إن الرسالة دي تقبل كرسالة دكتوراه، ويحصل منها حمدان على لقب دكتور، وقد كان (عمره وقتها كان أقل من 25 سنة) وأصبح رقم ستة في العالم اللي يكتب في ذلك المجال الوليد، ويرجع مصر محمل بكتير من الأفكار والأحلام، مع بداية عصر جديد بعد يوليو 1952.

في أول سنة بعد رجوعه، ألف كتاب سماه «دراسات العالم العربي»، واداه لأخوه عبد العظيم حمدان
علشان يودييه وزارة الثقافة يتنشر هناك، والوزارة ردت بمنحه جايزة الدولة التشجيعية.

لكن الدنيا ما مشيتش بالبساطة دي، والأحلام مش بتتحقق كده، وبعد عشر سنين من المعاناة مع
البيروقراطية، والتعنت، قرر حمدان إنه ما اتخلقش علشان وظيفة ودرجة ومنافسات صغيرة على كراسي
أصغر، فاستقال وقرر يتفرغ للكتابة، واكتفى بعائد بسيط يكفي قوت جسمه القليل النحيف.

شغل حمدان ما ينفعش نرصده في البورتريه البسيط ده، تتفق أو تختلف مع رؤاه، الراجل كان فاهم كويس
هو بيعمل إيه، وبيكتب إيه، وكان أول واحد في العالم يتكلم عن تفكك الكتلة الشرقية، وانهار الاتحاد
السوفييتي، في كتاب «استراتيجية الاستعمار والتحرير» قبل ما الانهيار يحصل بعشرين سنة.

وتفضل درة التاج بالنسبة لجمال حمدان أهم كتبه: «شخصية مصر»، اللي كتبه في 4000 صفحة، معتمداً
على 1036 مرجع باللغات العربية والإنجليزية والفرنسية والألمانية والأسبانية، عمل فيها تشريح للبلد على
كافة مستوياته مش بس الجغرافية.

17 إبريل 1993 كان فصل النهاية في حياة حمدان، اتوفى بعد ما حصلت حريقة في بيته، الحريق كان
غامض، ووزارة الصحة قالت إنه مش السبب في الوفاة، وناس اتهمت الموساد باغتياله، بس محدش قال
حاجة قاطعة، غير إنه ساب الدنيا بعد ما ملاها بـ 29 كتاب و79 بحث، ومشوار قصير بس مش أي
مشوار، الله يرحمه.

حكاية ٣ أسود

عارفين حكاية الـ 3 أسود؟ مش عارفينها؟ طب استنوا أما أتممص دور ابلة فضيلة بلاش زوزو نبيل. قالك يا سيدي حبوا يعملوا تجربة في علم النفس. قاموا جابوا 3 أسود حلوين كده ودخلوهم أوضة مقفولة وجابوهم غزالة حلوة كده مدبوحة وحطوها قصادهم.

قام واحد منهم اتشجع وقام مقرب بوزه من الغزالة. هوب راحوا دالقين مياه سخنة على دماغ الاتنين التانيين. وهكذا، كل ما واحد يقرب من الغزالة الاتنين التانيين يغرقوهم مياه سخنة مولعة.

مرة بعد مرة، بقى أي واحد يقرب من الغزالة أو يفكر حتى الاتنين التانيين يمسكوه يضربوه، الأسود جعانة بس معنى إن حد يقرب إن التانيين يتشوا بالمياه. شوية وراحوا ساحبين أسد من الثلاثة ودخلوا مطرحه واحد جديد.

طبيعي الغريب غشيم، قام دخل عدل على الغزالة. الاتنين القدام عارفين اللي فيها، راحوا ملطشينه وعدموه العافية، وكل ما يقرب ياخذ علقة حرامي في مولد.

شوية واتعلم خلاص، راحوا ساحبين كمان أسد من القدام. وكالعادة يخش غشيم ومتعافي على الغزالة. يقوم الاتنين الموجودين ضاربينه ومطلعين النخل في عينيه كل ما يقرب من الغزالة. لحد راحر ما اتعلم إن اللي يفوت يموت يا عم الغضنفر.

هوب راحوا ساحبين آخر أسد من القدام ودخلوا واحد جديد. ويتطبق السيناريو حرفياً، جوع لحد ما تموت بس اوعى تقرب من الغزالة.

أخذتوا بالكم من حاجة؟ الـ 3 أسود اللي موجودين دلوقتي مايقربوش من الغزالة ويضربوا أي واحد يتجرأ ويقرب رغم إن ولا واحد فيهم إتعرض لعقاب المياه السخنة!! فهمتوا حاجة؟

طب ممكن نفهم إن الأسد أهو دابة ماتكرمتش بالعقل زي بني آدم كده.

ورغم كده بني آدم كلهم بيعملوا اللي بتعمله الأسود دي بالزبط - أي وربنا زي ما بقولكوا كده، ناصبين طواطم وأصنام وثوابت عمرهم ما فكروا فيها، عمرهم ما ركزوا بيعملوها ليه، أهو طلعتنا لاقينا أهلينا بيعملوا كده عملنا زيهم.

طلعنا لاقينا اللي قبلينا مكلبشين في الميري وحالفين ليتمرغوا في ترابه. لحد الميري ما بقى آية حلمنا ومبلغ علمنا.

طلعنا لاقينا اللي قبلينا متشعبطين في ديل جلاية القاهرة والمدن الكبرى لحد ما وقعت على دماغهم وبططتهم، ومع ذلك طلعنا نموت ونكش في جلدنا لو اضطررنا الظروف نسكن ولأ نشتغل بعيد عن القاهرة 20 كيلو.

لاقينا اللي قبلنا بيدوروا على يا إما واسطة يا مين فاتح الدرج الشمال. . . دورنا على واسطة أكبر ومين فاتح الشمال واليمين.

لاقينا اللي قبلينا بيحفظوا ما يفهموش، لا حفظنا ولا فهمنا. لاقيناهم بيلكلكوا. . . طلسأنا، لاقيناهم مكبرين دماغهم. . . كبرنا كل حاجة لحد ما قربوا يمسوننا من رجلينا بفتلة لنظير من كتر التكبير.

طب ما نقطة نظام بأه ونمسك حبة ثوابت وطواطم وأصنام من دي ونعيد تفكير فيها! مش لازم نكسرهما بس على الأقل نكسر تابوهاتنا ونناقشها. نفهمها نحاول ندور على سببها ونشوفه منطقي ولا أهو جعلوه فاجعل كده وخلاص.

والنبي ما هنخسر حاجة، ده بالعكس يمكن نكسب، بالك لو ما كسبناش حتى مكسب مادي ما. . الأکید هنكسب مكاسب معنوية كثير. احترام نفسك ودماغك وعقلك أولها، ده غير الراحة النفسية والتفكير بره الصندوق اللي شخسخ وصدى من كتر ما الكل يفكر ويتنفس جواه. أي والنبي زي ما بقولكوا كده.

حكاية مبهجة

مغرمة أنا بالحواديت.

ومش الحواديت الأسطورية، لأ.

حواديت البشر.

بيهمني جدًّا أقرأ وأسمع وأشوف حكايات عن الناس، الحكايات دي، هي الناس نفسها، هي حياتهم، هي اللي بتصنع المعاني، وتقدمها، هي اللي بتخلينا نتحمل وقت الضيق، ونفرح وقت الحزن، ولو شوية، ونقدر نكمل مهما كانت الصعوبات.

آه والله.

زي ما بقولك كده.

ودي مش دراما كوين، ولا كآبة، ولا تنمية بشرية، ولا غيره

بقولك اللي في قلبي.

وتعالى مثلاً أحكي لك حكاية لاعب كرة قدم في نادي ألماني صغير.

اللاعب ده اسمه روس.

في مباريات الكورة، تحديداً في البطولات الرسمية، بيعملوا للاعبين تحليل بعد الماتشات، علشان يعرفوا هو بياخد منشطات أو لأ، دي حاجة عادية معروفة طبيعية منطقية، زي السلام عليكم.

روس بعد ماتش من الماتشات، اتعمل له التحليل، فطلعت النتيجة إيجابية.

إيجابية يعني بياخد منشطات.

بس إزاي، وهو عمره ما عمل كده، وبيأخذ باله أوي، وملتزم آخر حاجة؟

قالوا له:

ما هو لو مش منشطات، يبقى الوضع أخطر كثير.

وفعلًا.

طلع الوضع أخطر بكثير.

وبدأ روس رحلته مع المرض الخبيث.

طيب.

لاعب كرة قدم.

أصيب بهذا المرض اللعين.

مبدئياً كده، المتوقع إنه ينسى النجيلة تاني.

والمباراة اللي لعبها دي مؤكد هي الأخيرة.

ممكن كمان حد يزود ويجود:

مباراة إيه وكورة إيه؟

ده أيامه في الدنيا نفسها بقت معدودة، ولازم يبدأ يودع الحاجات اللي بيحبها: مراته، أولاده، بيته، الأماكن اللي بيحب يروحها، الأكلة المفضلة ليه، عربيته، دراع البلايستيشن، الكنبه اللي في الصالة اللي بيقتعد عليها يلعب، البسكليتة اللي بيلف بيها من باب النزهة، كلبه اللي مريبه، حاجات كتير كتير، ممكن لما يشوفها ما يشوفهاش تاني.

بس روس قدر يعمل لنا من الصورة العتمة دي، أحلى وأجمل صورة مبهجة في الحياة.

روس قرر إن علاقته بالمرض هي عبارة عن معركة، تشبه المباريات اللي بيدخلها، الفرق إنها معركة حياة أو موت بجد، مش زي ما يقولوا على ماتشات الكورة.

المعارك محتاجة إيه؟

تخطيط، روح قتالية، ثبات مهما كانت الآلام والخسائر، أقصى وأقصى درجات الالتزام على النفس.

كل ده عمله روس بمنتهى الإصرار: خاض الجراحة، تحمل الألم، نفذ التعليقات بمنتهى الدقة، وكان كل يوم، ويمكن كل دقيقة، يفكر نفسه إنه لو ما هزمش الوحش، الوحش هيقضي عليه.

بعد سنة

سنة واحدة من بدء معركة العلاج

كان روس عمل إيه؟

خف!

آه، ما هو ده اللي أكيد حضرتك توقعته، وإلا مكناش قلنا حكايته، لكن قصة روس تجاوزت ده، إنه مش بس خف من المرض، لأ، ده رجح يتدرب كرة قدم، لأ، ده نافس على مكانه في فريقه تاني، لأ، ده بقى أساسي في مركزه اللي سابه عشان المرض، لأ، ده بيلعب قبل نهائي كاس ألمانيا، ومطلوب منه يسدد ضربة جزاء، يا تخلي فريقه يكمل، يا تخليه يخرج بره، يعني شايل مسؤولية ملايين المشجعين لفريقه، وكانت الضربة الحاسمة والأخيرة، وسجلها.

الحقيقة مش لاقية كلام أختم بيه الحكاية دي، غير كلام روس نفسه بعد تسجيله هدف الصعود:
«تفكيري في كرة القدم كان قد توقف منذ فترة طويلة.
لم يمض حتى عام كامل على تشخيص إصابتي بالسرطان.
والآن أتواجد في نهائي كأس ألمانيا.
إنه ببساطة أمر رائع للغاية»
شفت الجمال
إنه ببساطة أمر رائع للغاية
آه والله
زي ما بقولك كده.

حكمت أبو زيد

التاريخ مش بيتعمل بالحنة
والمنظومة، لما تكون كلها شغالة في اتجاه التقدم، وماشية لقدام ولفوق

كل حاجة لوحدها

بتمشي لقدام ولفوق

آه والله

زي ما بقولك كده.

في الثلاثينات والأربعينات، كان فيه وعي عام بأهمية العلم والتعليم، وتعليم البنات زي تعليم الصبيان، علشان كده ظهر ناس كتير تمسكوا بتوصيل بناتهم لأعلى الدرجات العلمية، مهما تكلف الأمر، ومنهم ناظر مدرسة في مركز في محافظة أسيوط، اسمه أبو زيد.

ما كانش فيه وقتها مدارس في المركز اللي عايش فيها الأستاذ أبو زيد، فكان بيودي بناته، اللي واحدة منهم اسمها حكمت لمدرسة في مركز تاني خالص، وده كان مكلف جدًّا، وهو ده اللي خلى العيلة تعترض، من باب إن الفلوس اللي بيصرفها دي ممكن يشتري بيها عقارات وأراضي، لكنه كان مقتنع إن الاستثمار الأمثل هو الاستثمار في التعليم.

خلصنا مدرسة ابتدائية، نكتفي بقي

لا

طب المدارس الثانوي في مصر (القاهرة المحروسة)

نبعتهم القاهرة المحروسة.

هنا بانق قدرات حكمت، اللي ما اكتفتش بإنها طالبة بتدرس في مدرسة، وشاركت في الحياة السياسية، وكانت جزء من الحركة الوطنية اللي بتدعم التحرر الوطني، والاستقلال، ورحيل الاستعمار، وسلطات الاحتلال فصلتها من المدرسة، ففضلت تكافح، لحد ما رجعوها، بشرط تروح إسكندرية.

كان تعجيز، لكنها ما عجزتش، وأخذت البكالوريا من إسكندرية، ورجعت على جامعة فؤاد الأول، دخلت كلية الآداب، اللي كان عميدها الدكتور العظيم طه حسين، اللي كان مؤمن بإن التعليم كالماء والهواء.

د. طه اختار لحكمت أبو زيد إنها تدرس اللغة الفرنسية، فرفضت، وأصررت تدرس التاريخ، فوافق لها، كل ده ووالدها في ضهرها، بيدعمها ويبارك اختيارها.

لما خلصت الليسانس كان فيه فرصة تحضر الماجستير والدكتوراه في أوربا، والبنت اللي من كام سنة أهلها كانوا معترضين إنها تروح مدرسة في المركز اللي جنبهم، ركبت الطائرة، وسافرت بلاد الإنجليز، ورجعت الدكتورة حكمت أبو زيد.

سنين إقامتها في بلاد الخواجات ما منعوهاش إنها تتطوع في الدفاع المدني، لما حصل العدوان الثلاثي على مصر، وتشارك بإيديها في أعمال القتال، والمقاومة الشعبية في سنة 1956، وقررت ما ترجعش للتدريس قبل جلاء العدوان.

كان طبعي إن حكمت تبقى واحدة من أعمدة البلد، بجد، وتبقى مسئولة عن حاجات كتير إلى جانب التدريس، ونتيجة لأنشطتها الكبيرة والواسعة والمتعددة، الرئيس جمال عبدالناصر أطلق عليها لقب «قلب الثورة الرحيم».

لما جت سنة 1962، واتعملت أول خطة خمسية، واتشكلت وزارة برياسة علي صبري، ناصر اختار حكمت تكون في الوزارة دي وزيرة الشؤون الاجتماعية، وده كان حدث جليل.

ست!

وزيرة!

ما كانتش حصلت قبل كده، ولا كان منتظر تحصل ولا متوقع، كان لسه بدري أوي على الكلام ده، إحنا لسه بنعافر في تعليم البنات، هنخلي ست وزيرة؟

حكمت أبو زيد ما شالتش بس مسئولية الوزارة، لكن شالت المستقبل، لو كانت فشلت في مهمتها، أو قصرت، أو حتى جابت تسعة من عشرة، كان ألف مين يقول: شفت! آدي يا عم الستات.

بس هي صمدت واشتغلت وعملت قوانين كتير، وكان ليها دور مهم في تشكيل الجمعيات، ونجحت، زي ما نجحت في إنها تكون أول وزيرة، نجحت في إنها ما تكونش الأخيرة.

آه والله

زي ما بقولك كده.

خصوصية

هو إيه الفيسبوك ده يا ولاد؟

يقول لك: ده موقع تواصل اجتماعي، وبالخواجاتي «سوشيال ميديا»

أيوه، اللي هو إيه يعني؟

يقول لك تاني: يعني مكان على الإنترنت بنتواصل فيه مع بعض.

مين إحنا بقى؟

هو ده السؤال.

الأصل في المواقع اللي زي دي، حسب ما أفهم يعني، إن «الأصدقاء» و«أقرباء» و«الأصدقاء» يلاقوا وسيلة أسرع يتواصلوا بيها، يتبادلوا صور، ينظموا مواعيد شغل أو أجازات، يعني كل الحاجات الشخصية دي.

آه والله زي ما بقولك كده.

حاجات شخصية

علشان كده اسمه «فيس بوك» «كتاب الوش».

طيب، هل إحنا بنستخدمه كده؟

بسم الله الرحمن الرحيم، الإجابة: لأ طبعًا.

أغلبيتنا بيبقى عنده في قائمة الأصدقاء ناس ما يعرفهمش نهائي، وناس عاملة أكاونتس بأسماء زي «طائر الليل الحزين» و«قلب الهدهد اليتيم» و«تائه في صحراء الملكوت».

ثم إن الفيسبوك أضاف بعد انتشاره حاجات زي الشير والمتابعة، والصفحات، والجروبات إلخ إلخ، وكل شوية عمال يوسع ويوسع، فبقى الواحد لما يكتب حاجة على الفيسبوك، بيكتبها في الهواء الطلق.

حتى لو إنت عامل برايفسي، ومظبط الأكاونت الشخصي بتاعك على مجموعة ناس معينين، ما تضمنش خالص إنك تحافظ على الخصوصية دي.

أي حد يقدر ياخذ سكرين شوت لبي انت كتبتة، ويعيد نشره على صفحته، فتلاقي نفسك كاتب حاجة لعشرة خمستاشر نفر، فجأة بقت على الملأ، وبيشوفوها الملايين.

أکید کلنا شفنا وفاکرین حالات شبیهه، لناس نشرت حاجات فی مساحات شدیدة الخصوصية، حتی فی الرسائل الخاصة (الإنبوكس) الی بینک و بین حد.

ده غیر الهاکرز الی ممکن یخترقوا حسابک، وما تعرفش إنه اخترقه، بس بیتلصص علیک.

باختصار

مهما حاولت إن حساباتک فی أي موقع علی الإنترنت تكون شخصية، إنت وأنا وكلنا معرضین نفقد الخصوصية دي فی أي لحظة.

یبقى إیه؟

یبقى ناخذ بالننا، وكل واحد فینا بیکتب حاجة، یتعامل وکإنه یتکلم بأعلى صوت فی وسط الشارع. لازم یبقى فیہ بینا و بین بعض کده قواعد، ممکن نسمیها «آداب الفیسبوك» زی آداب الطعام و آداب الضیافة وکل الآداب الی کانوا یربونا علیها فی المدرسة.

عن نفسي، الحاجات الی أتکسف أقولها فی أي مجال عام، أتکسف أکتبها علی صفحتي، وباستغرب جدًّا، وانزعج، لما باشوف حاجات بعینها منتشرة:

شتایم

ألفاظ مش ولا بد

فیديو لست بتقع فی الشارع (علی أساس یعنی دي موقف طریف)

صور کده و لا کده

نمیمة

نشر أخبار خاصة عن حد

واحد بیتخانق مع مراته

ست بتعاير جوزها

ألف حاجة و حاجة تدخل تحت بند «الستریا رب»

حجة الناس الی بیعملوا کده دایماً إنهم أحرار یعملوا الی هم عایزینہ، مادام علی صفحتهم الشخصية.

هنا بقی لازم نعید له کل الی قلناه

والله العظیم

والله العظیم

الإنترنت ده شارع عمومي

ماهوش صالة البيت

ده حتى صالة البيت فيه حاجات ما بينفعلش نعملها فيها، لأن فيه ناس تانيين عايشين معانا، ولادنا وإجوازاتنا وإخواتنا وأجدادنا وأحفادنا

وبنستقبل فيها ضيوفنا

ولما ضيوفنا بيزورونا بنستقبلهم بأحسن صورة، ونكرمهم، مش بنقولهم: إحنا قاعدين في بيتنا فبراحتنا بقى.

فالفريندز ولأ الفولولرز ولا أي حد ممكن يوصل له كلامك، ممكن جدًا تعتبرهم ضيوفك، وتشوف وتتصرف على هذا الأساس، وتكرمهم علشان ربنا يكرمنا جميعًا

آه والله

زي ما بقولك كده.

دولت أبيض

حبيب بطرس، مواطن مصري من أسيوط، اتولد في القرن الـ 19، أهله علموه كويس وأكثر حاجة اهتموا يعلموهاله هي اللغات، فطلع مترجم، واشتغل في وزارة الحربية وراح السودان.

اتعرف حبيب على واحدة روسية، وحبها، فاتجوزوا وخلفوا بنت اسمها دولت، وجم القاهرة.

دولت بنت حبيب بطرس القصبجي خدت قرار خطير جدًّا، إنها تشتغل في التمثيل.

إحنا في أوائل القرن العشرين، يعني مفيش أي ست وقفت على خشبة مسرح، وطبعًا مفيش سينما ولا تلفزيون،

آه والله

زي ما بقولك كده

فهي بقى تمثل فين دي؟

الفن بالنسبة للستات وقتها كان قاصر على الغنا، يعني الصيطة والعوالم، إنما المسرح، أو المسرح، كان اللي بيشتغل فيه هو الرجالة وبس، إنما دولت حبيب آيست وما فقدتس الأمل، لحد ما قدرت فعلاً سنة 1917 إنها تقف على خشبة المسرح.

وقوفها على الخشبة كان من خلال فرقة «عزيز عيد» اللي تحمس لها آخر حاجة، وتحمل المسئولية، واداهها دور الكونتيسة في مسرحية «خلي بالك من إيميلي» (العنوان اللي اتأخذ منه خلي بالك من زوزو) فلعبت الدور وأجادت وفتحت الطريق لشغل الستات من بعدها.

بعد كده الفرقة عملت مسرحية اسمها «ليلة الدخلة»، وهي خدت دور العروسة، فاثبتت في المسرح، وكان طبيعي إن نجيب الريحاني يطلبها في فرقته، فراحت.

واضح إن وعي دولت مكش لسه اكتمل، لأنها مكنتش تعرف إن فرقة نجيب الريحاني بتقدم مسرح كوميدي، اتفاجئت، فرفضت إنها تشتغل، وكل اللي قضته في الفرقة 4 أيام، أساسًا فكرة إنها تمثل كانت مغامرة كبيرة، فكمان هتقدم مسخرة، يا عيب الشوم.

حاول الريحاني يقنعها إن الكوميديا مش مسخرة، إنما هي رفضت رفضًا باتًّا، فراح بعتها لصاحبه جورج أبيض، اللي كان عنده فرقة بتقدم مسرح تراجيدي، وجورج طبعًا ضمها للفرقة، ومش ضمها للفرقة وبس، ده ضمها كمان لبيته.

دولت حبيب كانت التجوزت، وخلفت بنت اسمها إيفون، وما نعرفش جوزها الأول ده إذا كان مات ولا راح فين، إحنا عارفين إن المسيحية مفيهاش طلاق، لكن المهم إن دولت التجوزت جورج أبيض، ومن اللحظة دي ما بقاش اسمها دولت حبيب، بقى اسمها: دولت أبيض، وده الاسم اللي عرفناها بيه.

دولت أبيض مثلت من أول فيلم سيميا اتعمل «أولاد الذوات»، وفضلت طول الباقي من عمرها تمثل في السيميا، وأعتقد إن كلنا نعرف دورها في فيلم «المراهقات» بتاع ماجدة، وطول الوقت دولت أبيض على الشاشة كانت صاحبة الوش الصارم، أكيد متأثرة ببداياتها اللي كلمتك عنها، ومن هنا بنعلن جائزة لأي واحد يجيب لنا مشهد لدولت أبيض بتبتسم فيه، مجرد بتبتسم.

المهم، جورج ودولت أبيض جت عليهم فترة صعبة ما قدروش يستمروا كمنتجين، فحلوا الفرقة في الثلاثينات، وانضموا، كممثلين، لفرقة يوسف وهبي، وفضلوا فيها فترة، واستقالت من كل الفرق سنة 1944، لإن حلم إنها منتجة وصاحبة فرقة كان لسه موجود.

سنة 1944 عملت مسرح الهونولولو، قريب من بيتهم في حدائق القبة، والمسرح اشتغل كويس، لحد 26 يناير 1952.

لوش فاكرا التاريخ ده

فده حريق القاهرة

اللي بلع حاجات كتيرة في جوف النار، ومنها مسرح الهونولولو بتاع دولت أبيض، فقضت بقية حياتها ممثلة عادية في السيميا، وأواخر حياتها طبعًا الطلب بدأ يقل عليها، وآخر ست سنين تفرغت لتربية أحفادها

ربنا يرحمها

ويرحم الجميع

رأس البر

اليومين اللي فاتوا انتشرت صور كده حلوة وبتلمع من النضافة والجمال، مدينة ساحلية أنيقة وصغيرة، مبانيها صغيرة، أبيض في أبيض، شوارع واسعة، أسقف البيوت أغلبها أسقف إنجليزية تمانيات تمانيات بالقرميد الأحمر.

حاجة كده تقول اليونان تقول إسبانيا. وييجي التعليق على الصور يقولك إنها رأس البر!! يا حلاوة يا ولاد؟؟ رأس البر بتاعة زمان دي؟؟

آه والله هي رأس البر زي ما بقولكوا كده!!

أينعم ما يضرش إن الصور صنايعي فوتوشوب عمل فيها حبة حركات، بس يعني مش كتير أوي، الصور حتى اللي من غير فوتوشوب بتقول إن المدينة رجعت عروسة تاني، وإن فيه اهتمام واضح بيها الصراحة.

ألا يا ولاد إيه حكاية رأس البر دي؟

قالك يا سيدي رأس البر زمان مكانش اسمها رأس البر، كان اسمها في القرون الوسطى، اللي أطلقوا عليها العرب (جيزة دمياط)

ولما زارها المقريري في القرن الـ15 دعاها في قصيدته (مرج البحرين)

في وقت الحملات الصليبية شهدت رأس البر أحداث رهيبية، اختلط فيها دم الفرسان بمياه بحرهما ونيلها. ووصلها لويس التاسع عشر بأسطوله وانجلى عنها بعد هزيمته وأسرته.

حكاية المصيف بأه بدأت في بدايات القرن الـ19.

ابتدى الموضوع مع بعض أعيان مدينة دمياط، اللي لقوا في مكان رأس البر بقعة جميلة وساحرة فبنوا أكواخ من البوص على الشاطئ بحيث يلجئونها في الصيف. تبع الأعيان مجموعات تانية من جوه دمياط ومن براها، لحد ما جه الألماني كوخ، عالم شهير، كتب عن رأس البر وجمالها وإنها لو في أوروبا كان زمانها بقت قبلة لكل الأوربيين.

ظروف الحرب العالمية الأولى والثانية، كانت وبال على العالم كله بس كانت فتحة خير على رأس البر.

إزاااي؟؟ أعيان مصر وأمراؤها ماقدروش يسافروا أوروبا يصيفوا زي كل سنة، قوم يروحوا فين؟؟ رأس البر طبعًا.

وتتحول رأس البر لمقصد لصفوة المجتمع المصري.

الملكة نازلي تقول عنها: إنها أشبه بفينيسيا وإنها قررت تقضي شهر كامل فيها مع بناتها.
أم المصريين (صفية هانم زغلول) تنقل عنها مجلة الاتنين انتقالها لعشة طاهر اللوزي بك برأس البر وهي
أجمل وأكثر العشش تجهيزاً. لأن فيها حمام ببانيو وسخان ومولد كهرباء!! قمة الدلع يعني.
الست أم كلثوم كانت أشهر رواد عشش رأس البر، بس كانت بتفضل العزلة في عشة بعيدة حوالي نص
ساعة من رأس البر، أحمد رامي كتب إنها قاعدة في معتقل، وإن رجله اتبرت يا ولداه من المشاوير رايح جاي
عليها!!

أهل الحب صحيح مساكين يا أستاذ رامي معلش.

قصد كمان رأس البر، أسمهان وسليمان نجيب ويوسف وهبي وفريد شوقي ومحمد الموجي والشيخ محمد
متولي الشعراوي والكاتب محمد التابعي والكاتب مصطفى أمين، وكل نجوم الفن والصحافة تقريباً. وزارة
النحاس باشا بالكامل بالباشا بزوجاتهم بولادهم كان مصيفهم المفضل هو رأس البر.

أحداث وزمن كامل مر من هنا يا جماعة زي ما بقولكوا كده والله.

في السبعينات ومع الانفتاح تحولت رأس البر لمصيف شعبي، وأهمل المصيف جداً واتنسى تقريباً وطاله
اللي طال حاجات كثير في البلد.

بس أهو رجع ينور تاني، فكم حاجات في بلدنا محتاجة ترجع تلمع وتنور تاني. آه والله زي ما بقولكوا
كده.

سليمان بيه نجيب

* وانت شايف نفسك تسد في الشغلانة دي؟

يعني ضليع في قواعد اللغة العربية؟

أصول اللغة العربية؟

- أيوه،

زي ما انت ضليع في قواعد الجرجير،

وأصول البقدونس،

والفجل الرومي

مين مش فاكر الحوار الفطيع ده من فيلم «غزل البنات»؟ الحوار اللي كتبه بديع خيرى، ودار بين الباشا (سليمان نجيب) ومدرس بنته (نجيب الريحاني) في أول لقاء بينهم.

سليمان نجيب ده، كان اسمه رسمياً سليمان بيه نجيب.

آه والله

زي ما بقولك كده.

بيه رسمي بمرسوم ملكي.

البيه سليمان كان له فضل كبير على فن التمثيل عمومًا، وعلى السبيا خصوصًا، مش بس لأنه ممثل عظيم، العظام كثير، ولا لقدراته في اللغة والإلقاء (كان ضليع جدًا في قواعد اللغة العربية) ولا أي حاجة تانية ليها علاقة بالتمثيل نفسه، رغم إجادته التامة.

الفضل اللي قدمه سليمان نجيب، إنه مثل أصلًا.

ودي فيها إيه؟

سليمان نجيب ابن عيلة مرموقة، وناس ولاد ناس صحيح، أبوه مصطفى نجيب كان أديب ومفكر كبير، وخاله باشا، هو أحمد زيوار باشا، يعني قريب علي زيوار، بيمفاهيم أيامها مكش ممكن حد من العيلة دي يشتغل مشخصاتي أراجوز، لا تقبل شهادته في المحاكم.

سليمان نفسه كان منتمي لأهله، الي ربوه كويس، وعلموه كويس، فدخل الحقوق بناء على رغبتهم، لكن من ناحية ثانية، هو كان بيحب الفن، وشايف نفسه ممثل كبير، وهو كده فعلاً، وقاتل لحد ما قدر يشبع هوايته دي.

في بدايات حياته، سليمان نجيب كان كمان كاتب، وله كتاب بيحكي مذكراته في الجزء ده من حياته، عن متسلفي ثورة 19، واسمه «مذكرات عربي»، بعدين اشتغل سكرتير في وزارة الأوقاف، ثم نقلوه السلك الدبلوماسي.

كان سليمان نجيب كمان فاعل في أوساط الكتابة والخطابة، ومقرب من شخصيات كبيرة ومهمة، يعني مثلاً كان صديق مقرب من مصطفى كامل الزعيم الخالد، صاحب مقولة: «لو لم أكن مصرياً لوددت أن أكون مصرياً» وغيره.

فضل سليمان نجيب يتدرج في السلك الدبلوماسي، لحد ما بقى قنصل مصر في سفارتنا باسطنبول، ثم رجع علشان يشغل منصب سكرتير وزارة العدل، وكل دي مناصب كبيرة تخض، ومكانة اجتماعية كبيرة.

عارف يعني إيه واحد زي ده يظهر في فيلم زي «الآنسة حنفي»، ويفضل كل شوية يقول إيفيه: «يا ريتني كنت خدت الوصل»، أو حتى من قبلها في أفلام الأربعينات؟

المهم، عينوه بعدها رئيس دار الأوبرا المصرية في عهد الملكية، وخلال الفترة دي كان لازم يوازن بين الفنان والموظف، ودي كانت حاجة شاقة، لكنه أدار الموضوع ببراعة، وكثير من الفنانين ليهم معاه مواقف، كان حريص فيها على حفظ النظام، وفي نفس الوقت ما يزعلش حد.

الملك فاروق كان معجب بسليمان نجيب، فاداله رتبة البكوية (البهوية زي ما المصريين بيقلوها) وكان بيتكتب في تترات الأفلام، سليمان بك نجيب.

حياة سليمان بيه كانت قصيرة نسبياً، ودايمًا كان مراهن صحابه إنه مش هيكمل الستين، وهيموت قبلها، وفعلاً قبل الستين بشوية مات فجأة

مات وهو واقف على رجله،

وساب لنا البسمة والفن،

وساب لنا حاجات حلوة كتير.

ربنا يرحمه ويطول لنا في عمره

آه والله

يطوّل لنا في عمره بفنه وبهجته وعقله وإنجازاته

آمين يا رب العالمين.

سهير القلماوي

راجل كردي قابل ست شركسية في طنطا.

يمكن الجملة دي تكون غريبة دلوقتي على الودان، ممكن تفتكرها بداية نكتة، قفشة، بوست ساخر على فيسبوك، أو أي حاجة شبه كده، إنما ده كان عادي جدًا إنه يحصل في مصر، لما كانت منفتحة على العالم، وقادرة تهمضم كل الثقافات والجنسيات.

الراجل الكردي ده، والسك الشركسية دي تجاوزوا، بعد ما بقوا مصريين بالإقامة ومية النيل، وخلفوا بنت سموها سهير، بس مكتتش أي بنت، كانت سهير القلماوي.

على أيامنا كان اسمها هو المثل في الثقافة والتمكن من اللغة والأدب والنجاح والإنجاز، وكنا نقول: دي ولا سهير القلماوي!

آه والله

زي ما بقولك كده.

عارف إنت الناس اللي هم طول عمرهم الأول دول، مش الأول على الفصل، ولا على الجمهورية، لأ، أول حد يعمل حاجات كتير أوي.

أول بنت مصرية تدرس في الجامعة.

بعد ما درست في المدرسة الأمريكية، راحت تقدم أوراقها في جامعة القاهرة، في الأول حبت تدرس الطب، فالجامعة رفضت، أيامها مكنتش فيه مجموع، كانت الكليات بتقبل أو ترفض حسب المقابلة الشخصية، والجامعة شافت إنها بنت، فممكن ما تقدرش على دراسة الطب.

والدها شجعها، وقال لها: مش نهاية الكون، تعالي نشوف حاجة تانية، وهي اختارت الأدب، علشان هي كانت متميزة كمان في اللغة، وعندها موهبة كتابة القصة، وكلية الآداب قبلتها، وكان عميد الكلية الشجاع اللي خد القرار، هو الدكتور الكبير طه حسين، الكفيف اللي ملا الدنيا نور، وخلانا نشوف.

كانت دفعة سهير القلماوي 14 طالب، 13 شاب وهي البنت الوحيدة، مش بس قدرت تاخذ الشهادة الجامعية كأول فتاة مصرية، إنما كمان كانت الأولى على الدفعة. أساسًا هي بقت كاتبة ونشطة وشغالة، وهي لسه في السنة الثالثة، وكانت تلميذة مقربة ونجيبة من الدكتور طه حسين.

خذ عندك بقى، ماجستير، دكتوراه، مدرسة في الجامعة، كل المشوار اللي حضرتك تتخيله حصل، كطالبة متفوقة، وكاتبة متميزة، وزى معظم أبناء جيلها العظيم، مساهماتها في الشأن العام أضخم من إننا نرصها ورا بعض كدا: عضوة في البرلمان، أسست مجلس اتحاد الكتاب، أسست جوائز للمتفوقين، مشوار كبير في حقوق المرأة.... إلخ... إلخ.

إنما مش ده اللي عايزة أقول لك تفاصيله، الحاجات دي موجودة في كل مكان لى يحب يعرف.
عايزة أقول حكاية لك عنها، لما كانت رئيسة قسم اللغة العربية، كلية الآداب، جامعة القاهرة.

الدكتور عبد المنعم تليمة، الناقد الكبير -الله يرحمه- حكى إنه لما كان لسه مدرس مساعد، اختارته يساعدها في مشروع لصالح مؤسسة دولية، بعد ما تم المشروع اتفاجئت إنهم قرروا مكافأة ضخمة جدًا ليها، ومكافأة بسيطة لمساعدتها.

بعثت جواب رسمي للمؤسسة، شرحت لهم فيها إن المجهود اللي عمله ما يقلش أبدًا عن اللي هي عملته، والقيمة العلمية كمان، بالتالي طالبت بإن اسمه يتحط جنب اسمها بنفس البنط على كل ملفات المشروع، وإنه ياخذ نص المكافأة المقررة ليها.

الجامعة ردت، بإنها حرة، تدي له نص المبلغ زي ما هي عايزة، وممكن يتعمل ده بشكل ودي، لكنها أصرت على إن ده يحصل بشكل رسمي، علشان ياخذ «حقه» بصورة كريمة.

الحكاية مش حكاية تفوق دراسي، ولا مجموع عالي، ولا منصب فخم، ولا ألقاب تخينة، ولا صور في الجرايد والمجلات.

الإنسان قبل أي حاجة.

الإنسان هو المادة الخام للوطن

والناس دول كانوا بني آدمين

وكانوا بجد.

آه والله

زي ما بقولكوا كده.

سيد حجاب

مين الي قال الدنيا دي وسية؟

فيها عبيد مناكيد وفيها السيد

سوانا رب الناس سواسية

لا حد فينا يزيد ولا يחס ايد

الله عليك يا عم سيد وعلى جمالك وإبداعك. كاتب الكلمات الرائعة دي وغيرها وغيرها هو عمنا سيد حجاب. أمير الشعر العامي زي ما أطلقوا عليه.

سيد حجاب حدوته مصرية مكتملة التفاصيل، ابن الدقهلية وبالأخص المطرية على ضفاف المنزلة الي اتعجن بحواديت الصيادين، وحفظ سمرهم وأزجالهم وأغانيتهم زي اسمه. الواد الصغير الي كان من ورا أبوه، يبجري يحضر قعدات الصيادين حوالين النار ويكتب كل كلمة بتتقال في القعدات دي. ويتفرج عليهم وهما بيتنافسوا في التزجيل والشعر وبعدين يشاركهم، ويتفوق عليهم.

وف يوم يتجرأ ويوري أبوه محاولاته في الكتابة ويتفاجئ إن أبوه عجبه جدًّا كتاباته، وطلب منه إنه يستمر ولا يبطلش كتابة أبدًا. وفعلاً ما يبطلش سيد كتابة طول حياته.

ويبدأ بديوان (صياد وجنية) الي واضح فيه طبعًا تأثره ببيتته الي نشأ فيها، وينجح ديوان سيد حجاب الأول ويطلب بالاسم في الندوات الشعرية في القاهرة، ويحتفي النقاد بديوانه الأول، ويقابل في القاهرة الخال عبد الرحمن الأبنودي، الي يتحول لزميل ورفيق درب وشريك نجاح.

ويقابل الكبير صلاح جاهين الي يتنبأله إنه هايكون حدث في دنيا الشعر العامي.

ويقدم سيد حجاب مجموعة من البرامج الشعرية في الإذاعة المصرية زي (بعد التحية والسلام) الي شاركه الخال في تقديمه وبرنامج (أوركسترا) و(عمار يا مصر)

التحول الكبير كان دخول سيد حجاب لمجال كتابة الأغنية، ويا سعده الي غنى كلمات لسيد حجاب

على سبيل المثال لا الحصر

عفاف راضي

علي الحجار

محمد منير

صفاء أبو السعود

سميرة سعيد

عبد المنعم مدبولي

كلمات سيد حجاب اللي مافيش بينها وبين قلب وودن الجمهور أي عوائق، كانت تذكرة وبصمة مسجلة
لأي أغنية إنها ناجحة بعون الله
آه والله زي ما بقولكوا كده

كلمات عم سيد كمان ساهمت في التأريخ للدراما المصرية. كلمات تترات البداية والنهاية اللي كتبها لأهم
المسلسلات الدرامية، حفرت معالم المسلسلات دي في وجدان شعب مصر كله.
يعني بمجرد ما تعدي جنب ودنك جملة زي (منين بيجي الشجن) فورًا مخك هيستحضر ليالي الحلمية كلها
بداية من ضحكة سليم البدري نهاية بطرطور سليمان غانم.
وجايز جدًا تنسى أحداث البوابة والتشابكات التاريخية اللي فيها لكن لا يمكن تنسى إن (الي بنى بنى
مصر كان في الأصل حلواني وعلشان كده مصر يا ولاد حلوة الحلوات).

سيد حجاب كمان كتب للأطفال وكان كاتب مؤثر في مجلات ميكي وسمير لفترات طويلة.
حبة سياسة برضو مايضروش، وإزاي أصلاً شاعر ماتطحنهوش السياسة وتسحله في سكتها، وتسحله
السياسة فعلاً حبة مش بطالين ويكون عضو ناشط في حزب مصر الفتاة ويعتقل في الستينات ست شهور.
سيد حجاب نال تكريم بالحصول على جائزة كفافيس عن مجمل أعماله.
وأخيرا في 25 يناير 2017 يحط عم سيد جنبه، ويغمض عينه بعد ما ملا الدنيا غنا وحب وبهجة وأمل
ولا ينشاش يسيلنا وصيته اللي يقول فيها:

ولما أموت

لو مت عالسرير ابقوا احرقوا الجسد

ونطوروا رمادي عاليوت

وشوية لبيوت البلد

وشوية ترموهم على تانيس

وشوية حطوهم في إيد ولد

ولد أكون بُستته. . ولا أعرفوش

شارلي شابلن

في مذكرات العظيم شارلي شابلن بيحكي عن موقف جمعه بأبوه.

بيقولك كنت رايح السيرك لأول مرة في حياتي، وأبويا واخدني وواقفين في طابور التذاكر. واقف قصادنا أسرة كبيرة من أب وأم و6 أبناء. واضح عليهم الفقر من هدمهم القديمة لكن كلها كانت نظيفة جداً. الأطفال كان أغلبهم أصغر منه في السن وسعداء جداً بأنهم هايشوفوا السيرك لأول مرة وبيحكوا عن الساحر والمهرجين والحيوانات اللي نفسهم يشوفوهم. وصل أبوهم عند موظف الشباك وسأله عن سعر التذاكر. وفجأة الراجل ارتبك وندته مراته وقعد يوشوشها.

بيقول شارلي إن أبوه الحاج شابلن راح مطلع ورقة بـ20 ووقعها ووطى جابها وخط إيده على كتف أبو العيال وقاله: الحق يا عم الفلوس دي وقعت منك.

بيقول شارلي إنه شاف في عين الراجل -رغم سنه الصغير وقتها- نظرة لا يمكن ينساها، نظرة تحمل كثير جداً من الشكر والعرفان بالجميل والاحترام من أب لأب.

أب عارف كويس يعني إيه إحراج وكسرة نفس قصاد ولاده. وعارف أكثر يعني إيه خيبة أمل عيال صغيرة وضياح بهجتهم.

الألطف بأه إن شارلي شابلن وابوه خدوا بعضيهم ورجعوا البيت ولا دخلوش السيرك يومها لأن العشريناية دي كانت آخر فلوس مع أبوه.

ومع كده شارلي شابلن بيقول إن ده أحلى عرض شافه في حياته حتى لو مادخلوش.

الحدوتة الطريقة دي افكرتها لما قرئت بوست الإنسانية اللطيفة اللي انتشر مؤخراً، للإنسانية اللطيفة اللي بتحكي عن كرم جدتها الفلاحة البسيطة اللي كانت بتشوف إن حل أي مشكلة أو مصيبة تحيط بأسرتها هو إنها تعمل عدس وبيض مسلوق وتوزعهم عالغلاية.

وتقول إن حكمتها كانت بدفع البلاء بالغذاء. وانها لما تحب تدي للمحتاج كانت بتدي من أكثر حاجة هي شخصياً بتحبها.

القيمة اللي فضلت مع حفيدتها لحد النهاردة، وبقت تدفع البلاء بالغذاء برضو بس بتوزع كيك!!! آه كيك هي بتحب الكيك فتعمل كيك وتوزعه عالناس.

العطاء متعة!! آه والله زي ما بقولكوا كده. العطاء متعة، متعة كبيرة ما حدش ممكن يحسها إلا اللي بيمارسها.

والمحروم من متعة العطاء محروم من متعة الحياة نفسها.

إنك (تدي) دي موهبة! آه موهبة بجد إنك يكون عندك قدرة تدي وتوهب وتمنح وتستمتع بالفعل ده. إنك تكون متأكد وواثق إن اللي بتديه ده بيرجع. بيرجع أضعاف مضاعفة. بمجرد ما الدائرة بتدور بترجعلك وتتردلك بفوايدها وأرباحها وحصادها.

ويا سلام لو العطاء والمنح ده يكون مجرد. حاجة كده لله في الله. لا ورا منها غرض ولا مصلحة ولا من ولا معايرة ولا تقطيم.

تبقى كملت يا بني والله وكوشة عالصح كله وعهد الله.

علموا ولادكم العطاء وحسوسهم بمتعته وازرعوا فيهم قيمة المنح. قووا عندهم ملكة الإحساس بالناس بوجعهم وآلامهم وانهم يحسوا إنهم ممكن يبقوا في مكان المحتاج النهاردة.

مش شرط العطاء يكون فلوس، ولا أكل، ولا أي حاجة عينية. العطاء ممكن يكون كلمة حلوة، موقف جدع. نصيحة في وقتها. طبطبة، شدة ضرر.

كلها صور للعطاء والمنح. خليكوا قدها وجربوا متعتها. لو حد ماجربهاش وجربها أوعدك متعتها تخليك تدمنها.

وده بقى أحلى ادمان في الدنيا آه والله زي ما بقولك كده أحلى إدمان.

حجر رشيد

جت الحملة الفرنسية على مصر 1798، بعدها بسنة كان جنود الحملة يبحثوا خندق في مدينة رشيد، فوقعوا على حجر عليه كتابة كثير، فسلموه للمسؤولين عن الحملة، ونابليون قرر إنه يحطه في المجمع العلمي، اللي عملته الحملة.

رغم إن الفرنسيين قعدوا في مصر سنتين بعدها، بس ما وصلوش لأي حاجة بخصوص الكتابة اللي على الحجر، يعني لا فكوا الشفرة ولا اكتشفوا اللغة الهيروغليفية، ولا حتى كان فيه في الحملة حد اسمه شامبليون من أساسه، وطبعًا القصر اللي في شارع شامبليون مكتش ساكن فيه زي ما الناس فاكرة.

آه والله

زي ما بقولك كده.

لما جت الحملة تخرج من مصر، كانوا عايزين ياخدوا معاهم الحجر اللي اكتشفوه في رشيد، واللي هيبقى اسمه أكيد «حجر رشيد»، فمين وقف لهم؟ الإنجليز، قالوا للفرنساويين، زي ما دخلت خفيف تخرج خفيف، وكل الأثارات اللي لقيتها دي تلزمتنا.

الكلام ده مكتش خاص بحجر رشيد لوحده، محدش كان لسه فاهم أهمية البتاعة دي إيه، والإنجليز خدوا الحجر، وبعدها بسنة في 1802، حطوه في المتحف البريطاني (مكانه لحد دلوقتي) ثم بدءوا يحاولوا يفهموا إيه الموضوع.

الحجر كان عبارة عن منشور ملكي، كتبه بطلميوس الخامس في عهد البطالمة. والمنشور مكتوب بتلات لغات:

اللغة اليونانية القديمة

اللغة الهيروغليفية

اللغة الديموطيقية.

الثالثة دي (الديموطيقية) كانت اللغة الشعبية اللي بيتكلم بها العامة والغوغاء من شعب مصر، في الوقت اللي كانت فيه اللغة الهيروغليفية بيتكلم بها كبار الكهنة والطبقة الحاكمة.

الإنجليز ما فهموش اللغة دي، فراحوا نسخوا اللي مكتوب على الحجر زي ما هو، وبعثوه لكل المهتمين في العالم على أساس يشوفوا مين ممكن يوصل لإيه.

أول هام، اكتشفوا حكاية إنه مكتوب بتلات لغات، بعدها بكام سنة جه واحد اسمه توماس يونج سنة 1814. واكتشف إن اللغة الهيروغليفية كانت بتستخدم رموز صوتية لنطق الكلمات الأجنبية، لحد ما جه دور شامبليون.

جان فرانسوا شامبليون، شاب فرنساوي عنده حاجة وعشرين سنة، وهو صغير كان فقير لدرجة إنه ما راحش مدارس، بس كان عنده موهبة في اللغات، فخذ دروس خصوصية في اليونانية واللاتينية، وبيقولوا إنه لما وصل سنه 9 سنين، كان بيقرا شغل هوميروس، زي كده ما واحد مصري وهو عنده تسع سنين حافظ المعلقات وفاهمها.

الثقلة اللي حصلت لشامبليون إنه راح مدرسة ثانوية في مدينة جرينوبل، وهناك تتلمذ على إيد واحد اسمه فوربيه، وده كان سكرتير للبعثة العلمية التي جت مصر مع حملة نابليون بونابرت، ففوربيه ده هو اللي خلّى شامبليون يدرس علم المصريين، من خلال مجموعته الخاصة من المقتنيات الأثرية، اللي قدر يهربها من الإنجليز.

قبل ما يقفل شامبليون 17 سنة، كان مقدم بحث عن الأصل القبطي لأسماء الأماكن المصرية في أعمال المؤلفين اليونان واللاتين، وقضى ثلاث سنين في دراسة اللغات الشرقية والقبطية على إيد كبار العلماء، وبعدين سافر باريس يشتغل أول أمين للمجموعة المصرية في متحف اللوفر، واشتغل أستاذ كرسي للآثار المصرية في الكوليج دي فرانس، وعمل معجم في اللغة القبطية، يعني مكنش شاب مغامر ولا حد هفأ، رغم سنه الصغيرة (بالمناسبة مات وهو عنده حاجة وأربعين سنة).

الي عمله شامبليون إنه اكتشف الرموز الصوتية للغة المصرية القديمة، يعني دي جيم، ودي خاء وكده يعني، الكلام ده كان سنة 1822.

فيه ناس بعدين شككت في أهمية اللي عمله شامبليون، وناس قالت إنه كان عنده أخطاء، بس ده كلام ثاني خالص.

والله أعلى وأعلم

المهم بقى

القصد من ده

إننا عندنا تراث وتاريخ

العالم اهتم بيه

واتحاق عليه

وحاول كتير يكتشف أسراراه

إحنا بقى

فین من کل ده؟

هه؟

فین؟

شيكلاتة

سألوا 200 ألف سيدة من 200 دولة حول العالم، عن أكثر مسببات السعادة بالنسبة ليهم.
جات الإجابة بعيدة حبتين عن توقعاتكم، يعني لا قالوا العيال ولا الراجل ولا الأمان ولا راحة البال
وكل الكلام الحمصي اللطيف ده.

74% يا مؤمنين قالوا الشيكلاتة!!

آه والنعمة زي ما بقولكوا كده

الشيكلاتة؟

أيوه الشيكلاتة، الستات شافوا إن الشيكلاتة بتسبيلهم السعادة أكثر من أي حاجة تانية في الدنيا.

العلم كمان أكد كلامهم الحقيقة

قالك يا سيدي الشيكلاتة بتحفز إفراز السيترولين في الدماغ، ودي مادة طبيعية بتعدل الحالة المزاجية
وتخلى مزاج النفر عنب والنبي.

لأ وبيستخدموا المادة دي في أغلب أدوية الاكتئاب.

ده غير الكافيين الموجود كمان في الشيكلاتة بشكل طبيعي، والكل عارف آثار الكافيين في الشعشة
والسهللة.

غير الفوائد الصحية بأه كمان اللي فيها!!

أيوه وليها فوايد صحية كمان زي ما بقولكوا كده

بتحافظ على مستوى ضغط الدم، والأنواع الدارك منها مليانة مضادات أكسدة، وبتنقي الجسم من
السموم.

الزغلولة الكبيرة بأه، اكتشف حديثاً إن في الشيكلاتة فيها مادة قريبة الشبه من تركيب الأفيون. . . لا
استنوا مش هترموا عالارض وتتنجوا وتمسكوا دراكتكوا وانتوا بتتهرشوا علشان باكو كورونا. .

الموضوع أبسط من كده. قالك التركيب المشابه لتركيب الأفيون ده بيدي إحساس بسيط من البهجة
القريبة من لوعة الحب وإحساس العشاق!!!

وجون وجون وجون هيسيسيسيه

أيوه بأه هو ده الحل بلا جواز بلا سهوكة بلا تليفونات نص الليل بلا ماسدجات وورد ودباديب.
شيوكولاتك في شنطتك. قطمتك في بؤك والي يقولك بحبك شوّهيه.
المشكلة في اللي بعد كده.

ليه طاه ماهو إحنا ماشيين حلو آهو.

قالك يا سيدي الفضيلة بين الإفراط والتفريط.

لما تتدرمع في الشيكولاتة بتتحول مضادات الاكتئاب ومسببات السعادة ومشابهات الأفيون ومضادات
الأكسدة وكل اللطافات دي لشكل من أشكال الإدمان.

وزي كل أنواع الإدمان. كل ما تغرق زيادة كل ما تطلب منك كميات أكثر.

يعني دهون تتراكم بكميات مهولة وسمنة مفرطة وأمراض قلب وشرابين وسكر وبلاوي مالهش آخر.

ولو بطلت تعاني أعراض الانسحاب، اللي بتتمثل في الاكتئاب بأنواعه، اللي وصل بالبعض للانتحار!!

لدرجة إن شركات الشيكولاتة الكبيرة، لازم يكون عندها ذواقة للأنواع الجديدة بيدي رأيه في
الشيكولاتة ويقبلها أو يرفضها - شغلانة لوز والنبي - فيه كمية قيود على الشغلانة دي رهيبه!

ليه هو حد لاقى؟

قالك يا سيدي علشان ما يحصلش للذواقة إدمان ولا يتأثر بالعوامل السلبية الخاصة بالشيكولاتة.

قوم ما بشغلهاش أكثر من يومين أسبوعياً وعدد ساعات ما يزيدش عن 3 في اليوم.

وبمرتب خيالي لأنه ممنوع يشتغل أكثر من سنة واحدة في حياته! بالتالي المرتب لازم يأمنه الباقي من
حياته؟؟

شوف تشتغل يومين في الأسبوع 3 ساعات بس كل يوم تاكل فيهم شيكولاتة لمدة سنة وتاخذ مرتب
يأمنك باقي حياتك.

آهو ده اللي امه ما قامتش من عالسجادة ليلة القدر وهي بتدعيه.

بصوا الكلام ده كله علشان هدف واحد.

ما حدش بيشتري السعادة ولا بيضحك على روحه بمسببات وهمية ليها.

ممكن نتحايل عليها، ممكن نحاورها، نطلبها من سكة طويلة شوية، بس في الآخر ما ينفعش نشغلها.

هي كده صعوبة بس حلاوتها في صعوبة منالها.

رذيلة. . . علشان كده لما بتيجي ببيقالها شوقه وبنحسها أوي.

اسعوا ورا السعادة اللي بجد وواعوا من السعادة المزيفة.

والنبي زي ما بقولكوا كده

منتظريني فيه.

لما اعتزل، حصلت النكسة

والنادي الأهلي تقريبًا تجمد

ولما رجعت الكورة، النادي كان أطلال، ومحدث كان راضي يتحمل مسئولية فريق الكورة، اللي هو عنده تاريخ عريض، بس حاضر بعافية شوية.

تجربة المايسترو في الفترة دي تتدرس

آه والله

زي ما بقولك كده.

تتدرس

في الكورة؟

لأ، خالص خالص

الكورة آخر حاجة كانت في التجربة دي

قال لهم: ادوني ثلاث سنين، أديكم نادي عالمي وفريق لا ينافس.

ثلاث سنين من الشغل على الاقتصاديات، والتأسيس الإداري، وتقسيم العمل، وحتى علم النفس، دي بقى حاجات أعرف أكلمك فيها، ولو إنها عايزة حلقات ورا حلقات.

هو فهم إن كل حاجة بتبدأ باقتصادياتها، فاشتغل على تحويل البراند اللي اسمه النادي الأهلي ده، لحاجة تجيب فلوس، وفلوس كثير، ليه؟ لأنه يستحقها.

لما بأفكر، مصر كدولة عندها إيه وينفع يتسوق، دايماً أفكر تجربة صالح سليم مع الأهلي.

الحكاية مش إنني أجيب لاعبية موهوبة ومدير فني السي في بتاعه ثقيل، أبدًا، أبدًا، أبدًا

الحكاية إزاي تصنع كيان

والكيان يبقى له ملامح

ويمشي على أصول وأسس ومبادئ، تفضل، حتى بعد وفاة الأشخاص

يارب

ارزقنا بصالح سليم في كل مكان

يارب

وارحمه واسعده

زي ما أسعدنا جميعًا

أيوه

جميعًا

زي ما بقولك كده.

صراحة

اجعل رسالتك بناءة

دول الـ 3 كلمات اللي بتقابلهم لما تدخل لموقع الصراحة الجديد، اللي انتشر في الفترة الأخيرة وبقى عليه إقبال أكثر من حلاوة الموسم ليلة مولد النبي.

فكرة الموقع بسيطة وهي إنك تدخل تبعت رسايل لصحابك وللناس اللي انت متابعتهم على مواقع التواصل الاجتماعي، من غير الشخص ده ما يعرفك. بيأمنك سرية الهوية يعني، وقول اللي نفسك فيه بأه. رغم إن الفكرة كانت اتهرست قبل كده بأشكال مختلفة وطرق كتير إلا إن صراحة صادف النجاح الأكبر من نوعه.

مصمم الموقع مبرمج سعودي اسمه زين العابدين توفيق، وبيقولك إن الموقع دخل عليه من مصر لواحدتها أكثر من 7 مليون مشترك!! آه بجد زي ما بقولكوا كده. الصراحة مفتركة بعضها أوي في مصر. وقالك يا سيدي رغم الـ 3 كلمات بتوع اجعل رسالتك بناءة إلا إن الرسايل مش كلها راحت ناحية بناءة دي.

ما ياكلش جو بناءة ده لواحد شكله ولا إيه؟!!!

ناس كتير دخلت شمال في بعض!! آه والنبي كل واحد جاب مكنون صدره وحواشي سواد ضميره، وكل السو اللي محوشه للمأسوف على شبابه اللي قرر يواجه الصراحة، وراح هوب دالقه في حجره. .

ما هو ماحدث عارف مين اللي بيتكلم بأه، والمثل بيقول إيه؟
حط راسك بين الروس وادعي عليها بالقطع.

المصيبة إنهم لما جابوا حكيم نفساوي قد الدنيا وسألوه: ليه الناس بتلجأ أصلاً لفكرة الصراحة؟
اللي هو ليه يعني واحد يقول للعامة والدهماء كلموني بصراحة.

قالهم الدكتور إنها حاجة من اتنين

يا إما نوع من الفضول

يا إما نوع من الدراسات الاجتماعية.

الفضول البشري العادي اللي هو

يا ترى رأيهم فيا حلو بس ولا حلو أوي؟!!!
آه هو النفر بيتقى بيّفكر كده ومستني كده
مستني كلمتين حلوين وتشجيع وكلام دلح وأنت مافيش منك يا حلوانت يا حلو.
يقوم ينطس في وشه بـ (يا تبييت يا مدعي يا أفاق يا ملزق يا بن التبييت)
وكثيرًا من التبييت.

أما الدراسات الاجتماعية دي فاللي بيلجئوها المشاهير علشان يعرفوا آراء الجمهور فيهم وفي أعمالهم.
القصد فكرة اني أحط حيلة بيني وبينك وأقولك عالي في بالي من ناحيتك من غير ما تعرفني دي. على قد
ما هي غريبة إلا إنها -للي يقدر على نارها- تديك شوية أضواء كده على طريقك وتفتح دماغك على حاجات
كثير يمكن ماتكونش واخذ بالك منها، في تصرفاتك أو في علاقاتك أو حتى في المحيطين بيك.

كويس جلد الذات ده من وقت للتاني وإن الواحد يقف كده يتشطف ويتاخذ غسل ومكوى من ناس
مش عارفهم، فميتقاش له تار شخصي معاهم، وهما كمان بيخوا سمهم بدل ما يفضلوا معيين ويتحولوا
سيريال كيلرز في آخر الفيلم.

القصد اللي عاوز صراحة مايقولش ياح، ولا تنتظرش كلام حلو ومزوق وجميل وبس. . . الناس
مابتصدق يا مؤمن.

الأكادة إن فيه سؤال سألوه ناس كثير.

يا ترى يا هل ترى لو البرنامج اتخبط في نافوخه ولا حد لعب فيه قوم قرر يقولك مين أصحاب
الرسايل!!!

ياختبييتي

فكركو عادي هنعرف نبص في وش بعض تاني بسهولة؟؟

هنقدر نحافظ على سلام العلاقات بينا وبين بعض؟؟

أقولكم الصراحة أنا!!

الصراحة مش دايمًا راحة

وبجد بجد ما حناش قد الصراحة

آه بجد زي ما بقولكو كده

صوت العرب من القاهرة

كانت مسرحية لدريد لحام في سوريا الحبيبة، اللي يعرف مسرح دريد لحام، يعرف يعني إيه الدقة والالتزام، الستارة تفتح الساعة ثمانية، يعني الساعة ثمانية بالثانية، بس فاليوم ده الستارة تأخرت أكثر من ساعة.

قبل ما تفتح الستارة، طلع الفنان الكبير، اعتذر لجمهوره، وقال لهم، لو عرفتوا السبب هتعدروني، كان لازم نستنى لما ضيوفنا ييجوا، عارفين مين ضيوفنا؟

ضيوفنا هم «صوت العرب من القاهرة»

آه والله

زي ما بقولك كده.

الي اشتغلوا في الإذاعة المصرية، خصوصًا خصوصًا إذاعة صوت العرب، يعرفوا أوي معنى وقيمة الجملة دي.

لما كنا نروح أي بلد عربي، ويكون معانا زميل أو زميلة من صوت العرب، كانوا بيبقوا نجوم فوق العادة، ممكن التسقيف يستمر خمس دقائق متواصلة لما يتذكر اسم حد ارتبط بالإذاعة دي. واللي كانت حاضرة يومها، رئيسة الإذاعة ذات نفسها.

صوت العرب مكنتش مجرد ميديا، مش محطة متميزة بتقدم برامج وأعمال ممتازة، مع إنها كانت بتعمل ده دايماً، إنها اتعملت علشان تكون اسم على مسمى «صوت العرب من القاهرة».

الجملة دي في الأول كانت اسم برنامج واحد بتذيعه المحطة الرئيسية «إذاعة البرنامج العام»، لحد ما جه الدكتور عبد القادر حاتم، وتولى عملية تحويل البرنامج لمحطة إذاعية كاملة، ودي عملية مكنتش سهلة أبداً وقتها، إذاعة يعني طقم مذيعين ومعدنين محترفين، واستوديوهات، وميكروفونات، وشغلانة كبيرة، وكل ده بتمويل، ومحتاج خبرة، والوقت ضيق، ومطلوب إنجاز سريع.

د. حاتم قدر ينجز المهمة في أقل من سنة، وزى النهارده 4 يوليو 54 لعل الصوت من استوديوهاتنا، وأعلننا إن عندنا إعلام يقود المنطقة كلها.

سيبك من السياسة، مش هي موضوعنا، إنت مع ولّا ضد، الكلام هنا عن اللي بيسموه القوة الناعمة، والريادة، والكلام اللي بجد.

وقتها كانت الجزائر الشقيقة تحت الاحتلال الفرنسي، والإذاعة تبنت قضية بلد المليون شهيد، وقتها كان كل بيت جزائري يبظبط مؤشر الراديو على إذاعتنا، لدرجة إن قوات الاحتلال وزعت عليهم أجهزة راديو مجاناً، في وقت كان الراديو أغلى جهاز إلكتروني موجود، وكانت الأجهزة الفرنسية متصممة بحيث ما تجيبش صوت العرب، كانوا ياخذوا الأجهزة الفرنسي، يركنوها ويسمعوا إذاعتنا.

صوت العرب كمان شهدت تعيين أول رئيسة محطة سيدة، هي السيدة أمينة صبري، أمينة هانم صبري، زي ما كنا بنسميها، الست اللي كانت حاضرة مسرحية دريد لحام، وعطل المسرحية أكثر من ساعة علشانها.

اللي كان ورا ده كتيبة عمل بتشتغل بحماس ونشاط وحب وإيمان، سيبك من السياسة، السياسة دايماً فيها وفيها، وبحورها واسعة وغميقة، كلامنا هنا مش عن توجه صوت العرب، إنما عن الشغل باحترافية، والكفاءة، والعمل بأقل إمكانيات ممكنة، وأصعب ظروف تعيشها.

صحيح نكسة 67 كانت ضربة كبيرة لحاجات كثير، ومنها طبعاً إذاعة صوت العرب، لكن فضلت الإذاعة تؤدي دورها، واتجهت لطريق ثاني في السبعينات، إنها تبعد تماماً عن السياسة، وتشتغل على الفن العربي، والثقافة العربية، وتستضيف كبار الفنانين، وتفضل تخاطب الشعوب اللي اتعلقت بيها.

صوت العرب كانت درس في إنك إزاي توصل للتأثير، إزاي تكون الصوت المعبر عن 22 دولة من المحيط للخليج، إزاي تعلي اسم بلدك ودورها وتأثيرها، وإنت معندكش سلاح غير الميكروفون.

آه والله

زي ما بقولكوا كده.

هدوم جاهزة مش متفصلة ليهم مخصوص .

بس مصر كانت مليانة أجنب أينعم أفقر من المصريين!! بس طبعًا مستهلكين جيدين للبضايح دي .

المقر الرئيسي بقى 71 فرع في طول مصر وعرضها .

ومش بس صيدناوي كانوا بيعزوا الصناعة المصرية، وينموها ويسوقوها أحسن تسويق .

لأ كمان اتجهوا لخدمة المجتمع واشتروا سراي أرتين باشا بعد وفاته وحولوها لمستشفى أهلي وسموها مستشفى صيدناوي وكان مكانها في شارع نوبار باشا .

وافتحها الملك فاروق بنفسه بس للأسف كان سمعان باشا اتوفى قبل الافتتاح، فأنعم الملك فاروق على إلياس ويوسف أبنائه في يوم الافتتاح رتبي الباكوية والباشوية تقديرًا لجهود سمعان صيدناوي والدهم .

وتدور الدائرة وتتأمم مجموعة صيدناوي وبلا . . . بلا . . . بلا يجرى عليها اللي جرى على غيرها وآهي أيام دول .

حدوتة الكفاح والنجاح والبداية من الصفر دايمًا حواديت تفتح النفس كده على الشغل، وتدي أمل إن يمكن آخرة الصبر تبقى عسل، رغم ان الصبر شخصيًا مر . . . مر أوي

بس وما له أهو نحكي ونحط سبوتات وكهارب عالناذج دي يمكن تنور لحد سكة ولا طريق أو تخلي حد يكمل في طريق صعب يكون عطلان في نصه أو قرب بيأس .

ده غير فكرة إننا يمكن برضو يمكن يعني، حد عندنا مسئول ولا حاجة، يحط في عينه حصوة ملح ويستخدم منهج الناس دي في النجاح ويرجع يشتغل بنفس الطريقة ونفس الذمة

مش كده ولا إيه؟

عصمت الإسكندراني

بما إنه عام المرأة خلوني أركز شوية قولوا شويتين تلاتة على المرأة المصرية.

ولا حد عنده مانع؟؟

مهمم باحسب.

حكلمكم النهارده عن اسم كتير ما يعرفهوش، وده شيء عجيب الحقيقة.

عطاء الست دي يخلي اسمها يتكتب بالنيون في تاريخ مصر عمومًا وتاريخ المرأة خصوصًا.

عصمت الإسكندراني الملقبة بـ (بنت بطوطة) أو (أم البحرية المصرية)

عصمت اتولدت عام 1898 حفيدة لأمير البحار الأسبق حسن الإسكندراني. وكان طبيعي ومع حبها لجدها إن حفيدة الوز تطلع عوامة. عشقت البحر من صغرها ولفت بلاد مالهاش عدد. سوريا ولبنان ومراكش وتركيا واليونان وإيطاليا وإسبانيا وروسيا وبلجيكا وسويسرا، ومكانتش بتسافر سفر سياحي، لا خالص كانت بتحب تشارك البحارة حياتهم الصعبة والخشنة لحد ما سموها (بنت بطوطة) وفي الآخر تستقر في باريس ويبدأ هناك إنتاجها الأدبي. اتعرفت بالمستشرق الفرنسي (كرستيان شرفيس) ولما شاف اهتمامها بالسفر وتاريخ الأمم، اقترح عليها تكتب تاريخ بلدها وتبسطه للأوروبيين وسمحها بالبحث والاطلاع في مكتبته الضخمة.

تكتب عن أكثر من موقعة حربية زي حطين وعين جالوت وموقعة شريش واشتركت في مسابقة جريدة ماتان الفرنسية عن مسابقة لأشهر المواقع الحربية التاريخية الفاصلة. وكتبت باللغة العربية: «أحاديث تاريخية» و«من تاريخ هارون الرشيد والبرامكة»، وكتاب «سيف الدولة»، وكان لتصوير الحضارة العربية، و«صفحات من تاريخ البحرية المصرية»، للإشادة بأجداد مصر البحرية، و«موقعة نفارين» 1960، و«المغامرات البحرية»، 1951 لتصوير حياة البحار.

الغريب إن كتير من مؤلفات عصمت الإسكندراني لسه لحد النهارده مقالات في المجلات والجرايد وماتجمعتش في كتب منشورة!!

المهم، تقوم الحرب سنة 1948 في فلسطين تقوم الست عصمت تبرع بسفينة بحرية حربية كاملة ومجهزة من نفقتها الخاصة وتهديها للبحرية المصرية!!

آه بجد زي ما بقولكوا كده

وماتكتفيش بكده تقرر تهدي بيتها في منطقة راس التين بالإسكندرية للبحرية المصرية علشان يكون نادي للقوات البحرية.

كده وبس لأ ياريت.

عاشقة وطنها تقرر تكتب وصيتها بوهب كل مدخراتها وأراضيها الزراعية ومنازلها ومجوهراتها للكلية البحرية!! مساهمة منها لإعلاء شأن الأسطول المصري. .

شوفتوش حاجة بالعظمة دي قبل كده؟؟

الرئيس جمال عبدالناصر أهدي عصمت الإسكندراني وسام الكمال الذهبي تقديرًا لجهودها ويتسرق البيت ويتسرق الوسام، قوم جمال عبدالناصر في استثناء ماحصلش في تاريخ النياشين والأوسمة يقرر يمنحها وسام ثاني بديل.

يوم 21 مارس من كل سنة في يوم عيد الأم كان أبناء القوات البحرية يتسابقوا لزيارة السيدة عصمت الإسكندراني اللي كان باب بيتها مابيتقفلش أبدًا لكل من يلبس بدلة البحرية البيضاء.

ويقعد أبناء البحرية يسمعون قصص بنت بطوطة عن عظمة وتاريخ الأسطول المصري على مر الزمن، وازاي سنة 1840 كان الأسطول المصري تالت أقوى وأكبر وأطول أسطول في العالم كله.

عصمت الإسكندراني كانت تقدر تدخل أي قاعدة بحرية في أي وقت من اليوم بدون تصاريح ولا إذن دخول.

كذلك كانت تقدر تطلع على ظهر أي قطعة بحرية أيًا كانت في أي وقت ترغب فيه وتقيم فيها كمان إن حبت.

كذلك مصرح لها بدخول أي ميناء بري أو بحري بدون أي إذن أو ترخيص.

كانت نموذج للوطنية الخالصة والعشق النادر لوطنها وأسطول وبحرية الجيش المصري.

وتفوتنا المناضلة والأديبة السكندرية عصمت الإسكندراني وترحل في هدوء سنة 73

فكروا تستحق الاحتفاء ولا لأ الست العظيمة دي.

عماد الدين

برودواي مصر، شارع الفن، قلب القاهرة الذي لا ينام.

لو رجلك خدتك مرة لعماد الدين، جرب تمشي وأنت باصص لفوق، ماتركزش أوي على محلات الأجهزة الكهربائية -إلا لو بتجهز ومعاك حماتك وبتدوروا على غسالة فوق اتوماتيك- لو بصيت عالمباني، لو ركزت في البلكونات. لو دققت في مداخل العمارات، هتلاقي نفسك رجعت 70 سنة لورا.

اتفرج يا جدع على كشكش يا جدع. يوسف بيه اسمالله عليه. سكة للسلطانة. . . رجلك يالفندي. . .
الست ملك وسع للست ملك يا جدع. . . الليلة وكل ليلة عثمان عبد الباسط على مسرح الكسار. .

دي عينة من أصوات ونداءات الشوباشجية قصاصد المسارح والصلالات والقهاوي الي احتضنهم شارع الفن في العشرينات والتلاتينات والأربعينات من القرن الي فات.

شارع عماد الدين.

شارع عماد الدين في وسط البلد بيمتد من شارع رمسيس شمالاً لحد منطقة عابدين جنوباً بطول 5.2 كيلو متر.

وبتمر خلاله ميادين مصطفى كامل والأزبكية.

جميع الشوارع المحيطة على أسامي علي الكسار ونجيب الريحاني، زكريا أحمد، وسيد درويش.

هنا إسماعيل ياسين جرب حظه مرة واتنين واتلطم عالقهاوي لحد ما بقاله مسرح باسمه وفرقة لها شنة ورنة. هنا علي الكسار ونجيب الريحاني اتنافسوا وقطعوا بعض مسرحيات وأفيشات وأسامي روايات لدرجة إن الرواية أحياناً مكانتش تكمل أسبوع لو حس واحد من المتنافسين، إن رواية الثاني ناجحة أكثر منه. هوب يلّم ديكوراته وأفيشاته وينزل بالأناح منها في ظرف يومين بالكثير.

آه والنبي زي ما بقولكوا كده!!

حتى قهاوي عماد الدين مكانتش قهاوي قعاد ومشاريب ودومنة وشيشة. . . لا نوهائي، كانت صالونات فنية بمعنى الكلمة، الفنانين المبتدئين الي لسه مجالهمش حظ الوقوف على مسارح عماد الدين كانت القهاوي بتحتضنهم يغنوا ويقدموا مونولوجات واسكتشات وعروض بلياتشو وحاوي وأراجوز. ده غير رواد القهاوي دي من أصحاب الفكر والقلم.

عماد الدين بمبانيه اللي اتعرفت بالقاهرة الخديوية نسبة للخديوي عباس حلمي الثاني. اللي أبدع في إنشاء بنايات الشارع، على طراز معماري مميز فيه خلطة أوربية مع ملمح شرقي، وسخاء في استعمال الرخام للعمدان والسلامم والواجهات.

المباني دي آلت بعد الخديوي عباس لواحد خواجه اسمه سيتون وبالطبع اتأتمت في الستينات وأصبح أغلبها مقر للشركات.

الشارع ابتدت قصة دهولته وانحدار جماله من بعد حريق القاهرة. أكثر من نص مسارحه اللي كان عددهم فوق الـ 15 اتحرق وأكثر من 90% من دور السينما اللي فيه طالها الحريق، لدرجة إنك لو دقتت شوية وأنت ماشي ممكن تلاحظ آثار حريق القاهرة على واجهة البنايات.

حالة الشارع النهاردة ماتسرش عدو ولا حبيب، وان كنا سمعنا مؤخرًا عن مشروع لإحياء القاهرة الخديوية.

الحقيقة فكرت كده في حاجة شبه شارع الفن في هوليدود، نجوم بأسامي فنانينا على طول الرصيف. . . مسرح الريحاني وهو بيستحمى من تراب الزمن ويرجعله نوره وجماله، السينمات الباقية وهي بتنور من جديد ويعاد تفعيلها واستخدامها. العمارات وهي راجعة تبرق، الشارع وهو راجع متحف مفتوح لفن المسرح والسينما. مهرجانات فنية وثقافية وفرق شبابية بتغني وتعزف وتمثل في قهاوي ومسارح وطريق الشارع، أطفال بيتفتحلهم قصور ثقافة وومسارح عرايس وخيال ضل ويستمعوا محاضرات في تاريخ الفن.

بحلم يرجع عماد الدين لمكانه ومكانته ونستغل ثروات مشكلتها الوحيدة أكوام التراب اللي عليها.

فأر السبئية

قاعدة بتفرج من كام يوم على فيلم (أنا وبناتي) قوم لاقتلكم (ناهد شريف) بتقول لأبوها (زكي رستم) لما سأها: بتعملوا إيه بالشمع ده؟

- قلنا نخليه علشان لما فأر السبئية بييجي يا بابا!!

فأر السبئية؟؟

إيه علاقة فأر بالسبئية بالشمع بأن فأر بييجي أساساً!!!

الحقيقة إن ليهم علاقة وطيدة ببعض الحقيقة.

آه والنبي زي ما بقولكوا كده. استنوا لما أحكيلكم حكاية فأر السبئية.

في أوائل الخمسينات انقطع التيار الكهربائي عن حي السبئية المجاور لرمسيس!! وفضلت الكهرباء مقطوعة فترة طويلة جداً. قوم طلعت ثاني يوم الجرايد تحمل الحقيقة والخبر اليقين في سبب انقطاع التيار الكهربائي.

قالك يا سيدي إن فيه فأر تسلل بهدوء للمحطة الرئيسية، وقرقوض في الغلاف البلاستيك للأسلاك قوم حصلت قفلة، وانقطع التيار. بس كمان الشهادة لله الجرايد قالت إن فأر الملعون أخذ جزاته واتكهرب مات!!! آه بجد زي ما بقولكوا كده.

قوم فأر ده بقى أشهر من ميكى ماوس وفرافيرو العجيب. لدرجة إن الناس بدل ما بقت تقول النور راح ولأ الكهرباء قطعت بقت تقولك (فأر السبئية جه) آه والنبي بأمانة ناهد شريف في الفيلم. ده الموضوع انتشر مش بس في القاهرة ده من إسكندرية لأسوان بقى مرادف لانقطاع التيار هو حضور فأر السبئية اللثيم.

اختفى فأر السبئية في ظروف غامضة في بداية السبعينات، ماتعرفش الفران اللي انقرضت ولا مابقوش يجبوا أسلاك الكهرباء. بس رجع ثاني في صورة (الماس الكهربائي). الحقيقة الماس أصيل عن فأر. الراجل تنه معانا من السبعينات لحد النهاردة. ويا ولداه شيال همول الصراحة. كل مصيبة يطلع يتصدر فيها. يمكن تسعين في المية من حرايق ومصايب الكهرباء شايلها الجدد ده لواحد ولا بيشتكيش.

آه والنبي يا كبد أمه زي ما بقولكوا كده.

بجد الحقيقة سواء فار السببية ولا الماس الكهربائي، ولا أيتها عذر من النوعيات دي، بنشيله لأغلب الكوارث، اللي أكيد الصراحة العنصر البشري وإهماله وتكبير دماغه هو السبب الأساسي والرئيسي فيها، بقت حجته ماسخة الصراحة. مابقتش مبلوعة ولا مستساغة كده. وكل النكتة ما بتتكرر كل ما بتبوخ وتبقى سم نافع كده مش مقبولة.

ما هو لو المستمع عاقل بردو يا جدعان!! نقول إن الفار هو السبب، ولا الماس، ولا عقب السيجارة، ولا انعدام التهوية، ولا الكاميرا كانت عطلانة، ولا السيستم كان واقع. ولا أيتها عذر دايب من دول؟! طب مين اللي ساب المبنى عرضة للفيران تدخله؟ مين اللي استلم المؤسسة وفيها أسلاك مش معزولة ولا قابلة للماس. مين اللي رمى عقب السيجارة ومين اللي سابه يترمي؟ مين اللي ساب السيستم يقع وساب الكاميرا بايظة؟؟؟

من الآخر فيه واحد مسئول. الأكيد إن الأجهزة مابشتغلش لوحدها ولا السجاير بتولع وتترمي لوحدها ولا السيستم اللي بيقع مالوش اللي يقومه.

اللي بيتكسر فيه حد كسره أو كان السبب في كسره. كل مصيبة وراها عامل بشري. لما نحاسب الغلطان ونعرفه إن الله حق والشغل حق ومال البلد حق. زي ما فار السببية انقرض هينقرض راخر الماس، والعقب، والسيستم هيشغل زي القرد وكل الشاعات هتتكسر ولا يقاش حاجة تتعلق عليها. آه وربنا زي ما بقولكوا كده.

فتى الشاشة الأول

فتى الشاشة الأول، الجملة دي على فكرة مكاتش معموله علشان تبقى ملازمة للجان المصري اللي واكل الجوى، والحبيب الأمور اللي مدوب قلوب العذارى في كل وقت وكل زمان في السياما.

أي نعم هي تحولت مع الوقت لكده، لكن ده كان لقب متفرد بيه واحد بس وأطلق عليه لوحده.

أول من أطلق عليه اللقب ده، ولو جينا للصراحة فهو أكثر واحد لايق عليه اللقب ده..

هو المبدع (أنور وجدي)

الراجل ده حدوته كبيرة أوي يا جماعة.

آه والله زي ما بقولكوا كده

تعمل حكايته مسلسل 400 حلقة، ولا يقاش فيهم مط ولا لونجير بخمسة صاغ حتى.

راجل أبدع في كل حاجة عملها في الـ 50 سنة اللي عاشهم على وش الدنيا.

مثل في 8 من أهم 100 فيلم في تاريخ السينما المصرية.

أنتج فكانت أفلامه نقلات في الفن السابع، اكتشف أهم نجوم فترة الأربعينات والخمسينات. أخرج وألف ولعب مزيكا. خدوا مثلاً دي، يحكى عن أبو الأنوار، إنه كان لما يبجي يدخل يصور فيلم، يقوم جايب الممثلين ويفصل ملابس الشخصيات ويبنى ديكور من الديكورات، ويجيب الفوتوجرافر اللي محصلش بأه. وهات يا صور وكادرات ولقطات تجمع الفنانين.

هوب ياخذ الألبوم العظيم ويجري على الأقطار العربية.

إشي مراکش إشي تونس إشي دمشق لبنان العراق. الموزعين يشوفوا الصور يتوهموا هوب يشترى الفيلم، وهو يجيب فلوس الإنتاج ومكسبه وهو لسه مادقش مسمار حتى في الفيلم. شوف الدماغ؟؟

وكل ده كوم وحياته الشخصية اللي لوحدها عاوزة خميس بجمعة نكون فاضيين نلت ونعجن فيها.

الراجل اللي دعا بالغنى والمرض في ساعة استجابة، فيتحقق مناه، ويجمع ثروة أكثر من نص مليون جنيه في زمن كان صاحب الجنيه ملك. وبعد الفقر والضعف والجوع الحرفي اللي شافه، البلية تلعب بس المرض مايسبهوش في حاله، ويصاب بسرطان الأمعاء ويتحرم من متع الدنيا رغم الغنى.

الحكاية دي وقفنتني قصاد معنى عميق... وانتوا عارفني في العمق ماتوصاش.

لو كل اللي اتمنيناه في وقت من الأوقات تحقق، هل ساعتها هنكون سعداء؟؟
يعني الحاجات اللي بنبقى هنموت عليها دي ولا تحصلش. . . الشغلانات الكثير اللي اتقدمناها ولا
حصلش فيها توفيق.

العلاقات الكثير اللي ابتدت حلوة وجميلة واتمينا نعيشها لآخر ثانية، وهوب فكست كده وفرطت بسبب
أو من غير.

الأفلام اللي مدخلناها والأغاني اللي مسمعناها والخروجات اللي مخرجناها وكل القطارات اللي
ملحقناها.

كل الفرص اللي اتميناها ولا جاتش.

والفرص اللي عدت ولا لحقناها.

وكل الحاجات اللي ندمنا عليها وزعلنا واتقهرنا.

كانت تستاهل بجد؟

طب يا ترى لو كانت جات كنا هنستمتع بيها؟

بصوا بعد تفكير حبتين كده. مش كل اللي بتتمناه بيكون هو أحسن حاجة لينا.

آه وعهد الله

ياما اتمينا حاجات والقدر اختارلنا عكسها تمامًا. ونغضب ونزعل ونتقهر وتعددي الأيام ونكتشف إن
أحسن حاجة حصلت لنا هي أكثر حاجة كان نفسنا ماتحصلش.

آه وربنا زي ما بقولكوا كده.

علينا نسعى في الدنيا. . أكيد ولزمن ولا بد من كل بد نجري ورا الحاجة ونسعالها.

بس إدراك النجاح ده مش بتاعنا بأه. نجحنا خير وبركة ونستمتع بمجهودنا ونتيجته.

مانجحناش وما له، خير وبركة ماهياش آخر الدنيا وأهو اكتسبنا خبرة على الأقل.

من الآخر محدش عارف الخير فين.

فرقة رضا

حلاوة شمسنا، وخفة ضلنا، الجو عندنا، ربيع طول السنة
بغض النظر عن كم الكذب المتعلق بالجو في الأغنية، بس مش مشكلة. . . الغنوة حلوة، لا بجد حلوة،
والفيلم أحلى، والاستعراضات أحلى وأحلى، وفرقة رضا أحلى وأحلى وأحلى.
فرقة رضا اللي تاريخ الرقص الشعبي كله وقف عند محطاتها، ونزل ارتاح واستمتع وشرب لمون وروق باله
ورجع ركب وكمل رحلته.

فرقة رضا اللي غيرت مفاهيم ومقاييس فن الرقص في أذهان المصريين والعرب كلهم.
ولما نتكلم عن فرقة رضا مانقدرش مانجيبش سيرة الأخوين رضا والأختين فهمي.
علي ومحمود رضا وفريدة ونجيدة فهمي.

وعلى وجه الخصوص المبدع محمود رضا، صاحب الفكرة. اللي عشق الرقص من خلال أخوه اللي شافه
بيرقص في بعض الأفلام، فوق في هوى الرقص، قوم يلتحق بمدرسة باليه في عمر الـ 17 بينما زميله كانوا
أطفال سن 6 سنين.

ويشوف فرقة فنون أرجنتينية بترقص في الأوبرج فيلتحق بيهم ويسافر معاهم لكل أوربا، وفي الآخر
يقول في نفسه وأنا أرقص رقصات بلاد تانية ليه ما أرقص رقص مصري.

فيلم رحالُه ويرجع على مصر يلفها طول وعرض ويجمع 400 رقصة يكونوا نواة فرقة رضا.
يكون بطلها وراقصها الأول ومصمم رقصات، وبطلتها تكون مرات أخوه فريدة فهمي، وأخوه علي
يتولى الأمور الإدارية، بينما نجيدة تتولى تصميم الأزياء.

وتخرج للنور أول فرقة مصرية للرقص الشعبي في الخمسينات.
وسط مجتمع محافظ فكرته عن الرقص لا تنفصل عن الانحلال والعري.
فيقرر محمود تقديم رقص من غير عري أو ابتذال.

وتنجح فرقة رضا النجاح اللي يخلي المواطن المصري ما عندوش مانع أبداً إن أطفاله يتفرجوا على رقص
شعبي ويحضروا حفلاته ويدخلوا يشوفوه في السيام وعالمسارح.

وتسافر الفرقة تلف العالم كله، تصدر الثقافة المصرية في صورتها الراقصة المبهرة للدنيا كلها. تحصد جوايز
تحتاج مجلد بس علشان يتم كتابة أساميها. وتنال إعجاب الناس في كل حته في الدنيا.

ومش بس الناس العادية، فنانى العالم كله كانوا بيعشقوا حفلات فرقة رضا، لأ وحتى ملوك ورؤساء دول كانوا بيطلبوا فرقة رضا بالاسم تروح تحيي حفلات في بلادهم ويروحوا يحضروا ويشوفوهم بنفسهم. تاريخ مشرف ونقله حضارية كاملة قامت بيها فرقة رضا في وعي وتشكيل الشعب المصري اللي بسبب الفرقة، وصل الأمر إن بنات الأسر الكبيرة بقوا عضوات وراقصات في الفرقة بدون أي معارضة من أسرهم، لأ وكمان بتشجيع منهم. آه والله زي ما بقولك كده.

بس زي برضوا ما بقولكوا كده باين علينا استخسرنا في نفسنا الحلاوة المفرطة دي. قوم حد حضر عفريت البيروقراطية وقاله هوب بستك عليها.

في يوم وليلة الدولة حطت إيدها عالفرقة، ومحمود رضا من صاحب ومدير الفرقة والمتصرف فيها يبقى موظف فيها. وزي ماتتزع الروح من الجسم، اتسحبت روح الفرقة منها، اتبقى الأداء والملابس والديكور والمزيكا والمسرح، بس اختفت اللمعة والبريق باختفاء الروح.

يخرج محمود رضا معاش ويتحصل على 330 جنيه بحالهم -حاجة آخر بشبشة - وكمان من غير تكريم من وزارة الثقافة اللي كان وكيلها.

فيلم عزاله ويسافر يعلم الدنيا كلها الرقص الشعبي ويقاله تلامذة في أرجاء الأرض الأربعة كلها. تحية للمجهود الجبار اللي قامت به فرقة رضا لحفظ تراث الرقص الشعبي المصري، وتحية للأخوين رضا والأختين فهمي ولكل أعضائها الراحلين والباقيين على قيد الحياة. أمتعتونا.

وصايا قدماء المصريين

لما يقولك إن حضارة قدماء المصريين هي فجر الضمير البشري. بناخذ الكلام ده إحنا كحاجة لطيفة، من باب قشطة آه أولك أجدادنا وبتاع وبيتقال عليهم كلام حلو وكده.
لأ ماهواش كلام، ولا ينفعش إحنا بالأخص وبالذات ناخده على إنه كلام. والنبي زي ما بقولكوا كده مش كلام. ده فعل، وتدوين، وكتابة، وسن قوانين، وقواعد!!
قواعد؟

أيوه قواعد، مخالفتها ممكن تحرمك من الأبدية والنعيم في الحياة الأخرى.
أقدس ما آمن به أجدادنا، مخالفة قوانين الضمير الإنساني دي، كانت كفيلة بحرمان الإنسان من الخلود.

القوانين دي كان اسمها (قواعد ماعت الـ42)

ماعت للي مايعرفهاش هي ربة الحق والعدالة.

تجوش نقرا شوية في قواعد ماعت!؟

1) أنا لم أرتكب خطيئة

02) أنا لم أسلب الآخرين ممتلكاتهم بالإكراه

03) أنا لم أسرق

04) أنا لم أقتل

05) أنا لم أسرق الطعام

06) أنا لم أختلس القرابين

07) أنا لم أسرق ممتلكات المعبد

08) أنا لم أكذب

09) أنا لم أخطف الطعام

10) أنا لم ألعن (أشتم)

11) أنا لم أغلق أذني عن سماع كلمات الحق

12) أنا لم أزين

- (13) أنا لم أتسبب في بكاء الآخرين (إيذاء مشاعر الآخرين)
- (14) أنا لم أنتحب (أحزن) بدون سبب
- (15) أنا لم أعتد على أحد
- (16) أنا لم أعش (أخدع) أحدًا
- (17) أنا لم أغتصب أرض أحد
- (18) أنا لم أتصت (أتجسس) على أحد
- (19) أنا لم ألق تهمة لأحد
- (20) أنا لم أغضب بدون سبب
- (21) أنا لم أغو زوجة أحد
- (22) أنا لم أدنس (ألوث) جسدي
- (23) أنا لم أقم بإرهاب أحد
- (24) أنا لم أخالف القانون
- (25) أنا لم أتماد في الغضب
- (26) أنا لم ألعن (أشتم) النرو
- (27) أنا لم أستخدم العنف ضد أحد
- (28) أنا لم أهدد السلام
- (29) أنا لم أتصرف بغوغائية (بدون تفكير)
- (30) أنا لم أتدخل فيما لا يعنيني
- (31) أنا لم أتحدث بالمبالغة (النميمة)
- (32) أنا لم أفعل الشر
- (33) أنا لم يصدر مني أفكار/ كلمات/ أفعال شريرة
- (34) أنا لم ألوث ماء النيل
- (35) أنا لم أتحدث بغضب أو استعلاء
- (36) أنا لم ألعن أحدًا بكلمة أو فعل
- (37) أنا لم أضع نفسي موضع شبهات

38) أنا لم أسرق ما يخص النترو

39) أنا لم أنبش القبور ولم أسئ إلى الموتى

40) أنا لم أخطف لقمة من فم طفل

41) أنا لم أتصرف بكبر وغطرسة

42) أنا لم أخرب المباني الدينية (المعابد)

شوفتوا الكلام؟؟؟ تصدقوا بإيه؟

عشرة بس من القواعد دي، تطبيقهم بجد على النفر مننا كافي جداً يخليه إنسان عظيم. . . . عظيم بجد زي الكتاب ما بيقول.

وعشرة بردو بس من القواعد دي لو طبقناها على بلدنا، هنبقى أعظم بلد على وجه البسيطة.

الأكادة إنهم عملوها قبل مننا

وبقوا قبل مننا.

بس ماتعرفش بأه إيه اللي حصل!!

حد أخذ كتاب ماعت ده وخفاه في صندرة الزمن، ولا باعه بالكيلو لبتاع الطعمية، قوم قواعد الحق والشرف والخير والاحترام اتحولت لقراطيس.

القصد والنبى نقرا الكلام ده تاني!

والنبى نحاول ننفذ منه عشرة بس ونطبقهم على نفسنا!

وصدقوني زي ما بقولكوا كده هتفرق معانا وهتفرق إحنا مع الدنيا كلها.

طبعًا ما حدش جاب للمسخوط كلب بحر، بس راخر فضل مأوص شهر بطوله وما بيكلمهمش.
هو دلوقتي نسي أكيد موضوع كلب البحر، بس المشكلة إن أبوه بيقول: إنه متابع حياة البطريق بشغف
اليومين دول وهو بيلطم حاليًا.

آه والنبي زي ما بقولكوا كده.

الموضوع ده خلاني اركز حبة في طريقة تفكير العيال اليومين دول!!

مش علشان كان عاوز كلب بحر بقى الواد مختلف، لأ عادي، كلنا وإحنا صغيرين يا ما شطحنا بخيالنا
ولبسنا فساتين بكرانيش واستنينا اليونيكورن، والأمير اللي هاييجي يخطفنا.
ولا حتى الجيل اللي عاش دور النينجا تيرتلز وعملوا مونشاكو بعصيان المكانس وحبل الغسيل.
الجيل ده مختلف في حاجة تانية خالص.

الواد قبل ما ياخذ قراره درسه من كل الجهات. اتفرج واتشبع بالفكرة وقام عمل سيرش على الموضوع
أون لاين، لأ وفهم أبعاد مشكلته وحضر أجوبة لمعظم التساؤلات، لحد ما أفحم الكل.
فكرة التطور اللي عند الجيل ده بقت مخلياهم أكبر مننا.

آه والنبي زي ما بقولك كده

العيل بيقى مقصوف رقبة شبر واقطع وياخذ منك الموبايل ولأ اللاب توب يقولك: الثوفت وير ده قديم
ويلعب شوية ينزلك الجديد!!

إذاي معنديكث الأبليكنش الفلاني؟!

ده بيعمل كيت وكيت وكيت

إتفرجتي على فيلم فلان اللي مترشح للأوثكار يا طنط؟ أنزلهولك تثوفيه؟.

تحس إنك فيل ماموث من العصر الحجري واقف قصاد بيل جيتس شخصيًا

العيال كل حاجة حوالياهم بتطور بسرعة الصاروخ وهما بيتطوروا أسرع منها. وإحنا حرفيًا مش ملاحقين
عليهم في كل حاجة.

طب وبعدين؟!

إحنا شوية شوية بتنسحب مننا اختصاصتنا وبنبقى دايناصورات في نظرهم.

التوجيه والتربية، وتعويدهم الفرق بين الصح والغلط وتلقينهم الأخلاق والبداهيات، أكيد هيبقى صعب
وهما بيصلونا نظرة معروضات المتاحف دي!!

فكركم الحل إيه؟

نجري ونلاحق عالتطور ده؟

طب واللي مايقدرش؟

ما هو رحم الله امرأ عرف قدر نفسه برضو

نسيب العيال لمفرمة التطور دي هي تربيههم بمعرفتها!!

ما تدلونا يا خبراء التريية العمل إيه في الحفرة اللي إحنا معكوكين فيها دي؟

تلقي المصوراتي في عينه نظرة (إحنا ضحينا بالأم والجنين) وببيديك ظرف فيه 7 صور ويقولك معلش الباقي اتحرقوا.

قوم ترسى ذكريات الرحلة ولا الحفلة على 7 صورة منهم 2 مهزوزين وواحدة طالع فيها كتف بني آدم وديل الجمل وطوبتين من الهرم.

ومع كده ناخذ الصورتين اللي طلعا وكتب على زهرهم التاريخ والمناسبة ومين موجود في الصورة ونجيب ألبوم ونشيل ونعبي جوه منه ذكريات.

التعقيد ده واللفة الطويلة دي كانت بتخلي للصورة قيمة ومعنى كده. عكس صور اليومين دول بهجتها في ساعتها وخلاص. فين وفين لما ترجع تبص على صورة خدتها أو اتاخذتلك ونادر ما يبجي في بالك تطبع صورة وتحولها لكارت ملموس، وشوية وتقرر تنضف التليفون وأول ماتروح المقشة تروح عالصور. . . تشيل وترمي.

زي ما بقولكوا كده ما ده اللي كلنا بنعمله.

تعرفوا إن أول صورة اتاخذت في إفريقيا كلها كانت في مصر؟ وتحديداً في إسكندرية سنة 1839؟!

ويقال إنها كانت صورة لمحمد علي باشا شخصياً! ولما شافها استعاذ بالله وقال ده عمل شيطاني!!

بس الحقيقة الباشا الميال للحدثة انبهر بالاستخراج الجديد. ومصر بقت هدف المصوراتية الجداد في الدنيا كلها. وده ساعد في نقل صور كثير لمصر وشكلها في أوائل القرنين اللي فاتوا. خلونا نستعجب أحياناً ونتحسر كثير الحقيقة.

ظهور التصوير الفوتوغرافي، قضى تقريباً على الكلاسيكية في الفنون التشكيلية، فظهر التجريد والتكعيب والبوهيمية والسريالية، وكل الحاجات الملخنة اللي يفهموها اللي عاملينها بس دي.

التصوير الفوتوغرافي بقى مهنة وفن واحتراف وجزء مهم جداً، إن لم يكن الأهم في صناعة الخبر.

ويقولك في عرف الصحافة. . . الصورة بألف كلمة. واكم صور جابت حقوق، واكم صور خربت بيوت، واكم صور جابت داغ جيوش.

آه والنبي زي ما بقولكوا كده.

كوبري ستانلي

من أجمل وأجدد معالم مدينة الإسكندرية حالياً هو (كوبري ستانلي) الكوبري حديث نسبياً، عمره ما يوصلش 20 سنة لأنه افتتح عام 2001. بنته الشركة المصرية العظيمة (المقاولون العرب). طوله حوالي 400 متر وعرضه 30 متر.

الكوبري جميل جداً معمارياً مستوحى شكله من شكل سور قصر المنتزه، ويعتبر نسخة مكبرة من كوبري المنتزه الشهير.

جمال الكوبري وموقعه الجميل في قلب بحر إسكندرية وطلته من ناحية على كباين ستانلي الشهيرة ومن الناحية الثانية على منظر في قلب البحر غير إضاءته الجذابة جداً. خلاه بسرعة من أشهر معالم إسكندرية الحديثة. الإسكندرية كمان مايتوصوش. ولما بيلاقوا الحلو بيحسوه بزيادة. ناس كوزموبوليتان بأه. قوم بسرعة ربطوا الكوبري بكل ما هو ممتع الحقيقة وجميل.

مافيش ليلة تعدي من عالكوبري إلا لما تلاقي صف عرايس وعرسان واقفين بياخدوا صورة للذكرى. الكوبري كمان شهد أول قفل حب يتحط عليه. . . حاجة كده زي جسر الفنون على نهر السين في فرنسا.

هيسيسيس

المهم وبغض النظر عن العيال الرزلة اللي راحوا فوروا القفل من على كوبري ستانلي إلا إنه شهد الحالة اللطيفة دي.

كوبري ستانلي كمان بيشهد انطلاق أغلب الفعاليات الرياضية اللي بتقام دايمًا على الكورنيش. ماراثون أسبوعي بينطلق من هناك. . . سباقات الدراجات الأسبوعية برضو بتنطلق من هناك. . . فعاليات نادي السيارات. . . فعاليات الدراجات النارية. . . لدرجة إن أول ride للسيدات اللي بيركبوا موتوسيكلات وسكوترز انطلق من هناك!!

آه وربنا زي ما بقولكوا كده. . . مش بقولكوا بلد كوزموبوليتان. .

ليلة راس السنة كمان بيكون دايمًا الكوبري شاهد على احتفالية الإسكندرية بإطلاق الألعاب النارية مع اختلاط أصواتها بصوت أبواق المراكب اللي جاية من المينا في عادة سكندرية قديمة.

كوبري ستانلي وعاداته اللي ربطها السكندريين بيه لو في حته تانية كان جه اللي يستغلها ويسوقها ويعمل عليها قصة وحدوته ورواية ويبيع للعالم كله منها، بس عندنا كالعادة الموضوع ماشي خلف خلف الله خلف خلاف المحامي.

في يوم عيد السهوكة العالمي الملقب بالفالتين. راح الشباب السكندري كالعادة بدعوا بدعة جديدة وربطوها بالكوبري.

لبسوا أحمر وجابوا بلالين حمرا وراحوا عالكوبري اتنينات، ثلاثات، عشرات، ميات. . . وطيروا البلالين وطارت ونزلت في المياه واتصوروا، هاشتاجاتك وصورك وفيسبوكك وانستجرامك.

آه والنبى زي ما بقولكوا كده.

بس وعادييييييك يا مؤمن عالتيققات.

اللي اهتم العيال بالانحلال، واللي يمصمص شفايفه ويقولك شوف وصلنا لإيه؟ واللي يتريق، واللي يألش، واللي يطالب بتدخل الدولة!!!

لأ بجد! وده اسمه إيه؟

تتدخل الدولة علشان العيال قرروا يحتفلوا بالحب!!؟

هو لا حب نافع معاكوا يا بشر ولا قتل ودم ونار ودبح في بعض؟

احتفلوا يا بشر باللطافة في صورها العفوية والبسيطة والجميلة. . طالما لا فيها أذية ولا غلاسة ولا سخافة.

احتفلوا باللي بيطلع تلقائي وحلو ويفرح. . دي الفرحة والحب والجمال العفوي ده نادر وقليل وإحنا في

عرضه والنبى زي ما بقولكوا كده.

صدقت والنبى أمينة جاهين لما قالت:

فيه ناس بتلعب كوره في الشارع

وناس تمشي تغني، تاخذ صورة في الشارع

فيه ناس بتشتتم بعض

تضرب بعض

تقتل بعض

في الشارع

فيه ناس تنام عالارض في الشارع

وناس تبيع العرض في الشارع

وفي الشارع أخطاء كتير صبحت صحيحة

لكن صحيح حتكون فضيحة

لو يوم نسينا

وبوسنا بعض في الشارع.

أول ست تطير بجد

من ساعة ما فتحت عينيها على الدنيا، وهي بتحلم بالطيران
الطيران اللي هو الطيران بجد، يعني تسوق طيارة، وتطير بيها فوق السحاب.
ممكن الكلام ده ما يبقاش مدهش دلوقتي، مع إنه أكيد مش عادي إن واحدة ست تحلم تسوق طيارة.
لكنه أكيد كان فوق مستوى الخيال بالنسبة لبنت اتولدت سنة 1907، يعني من 110 سنة
آه والله زي ما بقولك كده.

باتكلم هنا عن لطفية النادي

اللي كان والدها بيشتغل في المطبعة الأميرية، موظف يعني، ماهوش خواجه ولا باشا ولا حتى بيه
مواطن مصري أفندي من الأفنديات
لما كانوا الأفنديات هم عصب مصر.

لما كبرت لطيفة شوية، وبقت ست سنين، الوالد قرر يعلمها، وكانت نيته تاخذ الابتدائية، ثم تشوف
مستقبلها، ومستقبلها يعني تتجوز، مع العلم إن الابتدائية في الفترة دي كانت خطوة جبارة، مش بس
للبنات، لعموم الشعب المصري.

والدها رفضت الفكرة، لأ مش فكرة تعليمها، فكرة إنها تقف عند الابتدائية، وأصرت على إن لازم الأب
والأم يعملوا حسابهم إن البنت تكمل للنهاية، وما بعد النهاية كمان، لحد ما يقدرُوا يوصلوا بتعليمها.

البنت مكنش فارق معاها هتتعلم لغاية فين، هي ما عندهاش غير حلم واحد
الطيران، تسوق طيارة وتطلع بيها فوق السحاب.

مكنش الموضوع سهل،

حضراتكم متخيلين إحنا بنتكلم في إيه؟

بنت عايزة تسوق طيارة في العشرينات

مش تتعلم

مش تاخذ شهادة

مش تتوظف

مش تشتغل مهندسة ولا دكتورة
مش أي حاجة من الحاجات اللي كانت صعبة جدًا
دي حاجة أصعب من أي حاجة
لكنها فضلت ورا حلمها، رغم المشاكل المعقدة
ما خليتش حد ممكن يكون ليه دور ما راحتلوش
راحت للصحفي الكبير أحمد الصاوي في الأهرام يتبنى حلمها،
راحت لكمال علوي مدير عام مصر للطيران.
ده غير صعوبة إقناع أهلها، اللي كانوا شايفين حلمها حاجة فوق الخيال، حاجة فوق الجنان، حاجة فوق
السحاب.

طيب، حتى مع اقتناع كل الناس دي
هتفضل مشكلة كبيرة

العلام مش ببلاش، إحنا بتتكلم في وقت كان اللي اتعلم فيه الطيران من الرجالة يتعدوا على صوابح
الإيدين، ودروس الطيران بتكلف، فاقترحت إنها تشتغل في مصر للطيران ببلاش، وفلوس مرتبها تبقى هي
فلوس التعليم، وعلشان مرتبها يكفي اشتغلت أكثر من شغلانة في الشركة.
بعد فترة من التعليم والتدريب، حصلت أخيرًا لطيفة على تصريح بالطيران.
كان أول ست في مصر والعالم العربي وأفريقيا والشرق الأوسط، ده بديهي، في الفترة دي الأول في مصر
يبقى الأول في كل المناطق دي، إنما المدهش بجد إنها تاني ست في العالم كله تاخذ رخصة طيران.
طارت الكابتن لطيفة من القاهرة للإسكندرية، أول رحلة ليها في أكتوبر سنة 1933، وهي عندها ستة
وعشرين سنة فقط لا غير.

بعدها طلبت طلب إن والدها يرافقها في واحدة من رحلاتها، وطافت بالطيارة فوق الهرم.
ياااااااااه

يا ترى كان شعور والدها إيه في اللحظة دي
ده أنا جسمي قشعر وأنا بقرا عن اللحظات المجيدة دي
أيوه، هو ده المجد
إن المواطن والمواطنة يقدر يحقق حلمه مهها كان شكله مستحيل.

الحكاية الي حكيها ببساطة دي، ما حصلتش ببساطة، حصلت نتيجة وجود مواطنين بيحلموا، وما
بيخسروش حلمهم مهما كانت الصعوبات.

آه والله

زي ما بقولكوا كده.

الست هدى

معظم شوارع وسط البلد متسمية بأسماء ناس ظهوروا في تاريخ مصر قبل 1952، وملوا الدنيا، وعملوا حاجات عظيمة، الشوارع خلت الناس تحفظ الأسماء لحد دلوقتي، لكن حكايات الأسماء دي إيه؟ مثلاً، لما تدخل من ميدان التحرير على شارع طلعت حرب، قبل ما توصل لميدان طلعت حرب على طول، فيه شارع يمين، شارع معروف، اسمه شارع «هدى شعراوي»، كتير يعرفوا الشارع، لكن مين بقى «هدى شعراوي»؟

نور الهدى محمد سلطان، رائدة العمل النسائي في مصر، ممكن تخط تحت عنوان «رائدة العمل النسائي» ألف حاجة وحاجة عملتها الست العظيمة دي، القوية دي، اللي مش عارفة أوصفها إزاي دي، لدرجة إنها بقت في أعلى المناصب الدولية للاتحادات النسائية، وسافرت لفت العالم، وقادت منظمات ومؤتمرات شارك فيها ناس من كل الجنسيات.

إنما أنا مش هتكلم عن العمل النسائي، هاقول لك هات تاريخ أي حاجة عليها القيمة، لازم وحتمن ولا بدن تخبط في اسم الست دي، عملت حاجة، أسست حاجة، اتبرعت بحاجة، كانت ضلع في كل حاجة. آه والله، زي ما بقولك كده.

تمسك في الصحة: تلاقي الست دي ساهمت في تأسيس مستشفى المبرة، اللي كان ليها دور كبير لأجيال وأجيال في علاج ملايين المرضى بالذات من الأطفال، والعلاج كان كامل بالمجان، من ساعة ما بدأت 1909

الفن: أنشأت مسرح لرعاية الفنانين، وعملت جمعية «أصدقاء مختار» لتخليد ذكرى أعمال الممثل العظيم محمود مختار، مش بس كده، ما عملتش الجمعية حاف كده، دي اتبرعت بجائزة سنوية مالية، وميدالية تذكارية للممثل المصري اللي يعمل أجمل أثر فني خلال السنة.

الاقتصاد: ساعدت الراجل الاقتصادي الكبير طلعت حرب في جمع رأس المال، علشان يساعد في تأسيس بنك مصر، أول بنك مصري وطني، عملت ده من خلال جهودها بين الأصدقاء والمعارف، من البهوات والباشوات، وهي نفسها اتبرعت بمبلغ كبير من رأس المال اللازم لتأسيس البنك. أول حضانة في مصر عملتها هدى شعراوي، لما بدأت الست المصرية تخرج للعمل وتتوظف، علشان يقدرُوا يطمنوا على ولادهم وهم في الشغل.

يووووه، هنقول إيه ولا إيه؟ أنا مش عايزة أقعد أفصل في الحاجات اللي هي عملتها، أولاً، علشان هي كتيرة جداً، وثانياً، علشان ده مش مربوط الفرس.

الفكرة هنا إن الشغل مش بالشعارات، أي حاجة ماهاش أثر على الأرض، في النهاية تفضل بلا قيمة. الواحدة والله بتقعد تفكر:

هي الناس دي عاشت كام عمر؟

واحدة زي هدى شعراوي دي، قدرت إزاي تعمل كل الحاجات دي، في كل الاتجاهات دي، في كل المجالات دي، في نفس الوقت؟
لأ وإيه؟

لا فيه إنترنت يسهل التواصل وجمع المعلومات.

ولا حتى فيه موبايلات.

ممكن بالكثير يبقى فيه تليفون، ويا بختك لو كان فيه حرارة أو مفيهوش.

وممكن اللي انت عايز تكلمه ما عندوش تليفون.

يعني علشان تبعت ورقة ولا ملف ولا تجيب معلومة ولا أي حاجة عايز أيام وأيام لكننا عملت كل الحاجات دي

ليه؟

علشان ببساطة كان فيه مناخ عام يساعد على إن الواحد يطلع اللي جواه.

وفيه إيه إننا محتاجين كل الجهود، في كل يوم، في كل لحظة.

علشان كده.

أرجوكم

وانتو داخلين شارع طلعت حرب، من التحرير، قبل ما توصلوا الميدان، بصوا على آخر شارع يمين، واقرأوا الفاتحة لروح الست هدى.

آمين.

ماسبيرو

ما تيجي أحكي لك حدوتة

حدوتة اسم كبير ومهم

كلنا بنرده كثير، خصوصًا لما ننزل وسط البلد

وحتى لو ما نزلناش

وأغلبننا ما يعرفش عنه أي حاجة

مع إنه مهم جدًا جدًا جدًا

آه والله

زي ما بقولك كده.

اسمه الحقيقي، أو خليننا نقول اسمه الأول «جاستين»، ده اسمه اللي لما اتولد اختاروه له، ونادوه بيه، واللي اختاروه مش أبوه وأمه، هو أصلًا يتيم، كل المعروف عنه إن أبوه وأمه طلاينة، واللي رباه واحد طلياني، بس هو اتولد واتربى في باريس، وكان ميلاده سنة 1846.

يدوب عدى عشر سنين، وبدأ شغفه بالتاريخ، تحديدًا التاريخ المصري الفرعوني، فدرس الهيروغليفية، وبعدين اللغة العربية، ولصغر سنه أتقنهم بسرعة، وبقي واضح إن مستقبله هيكون هناك، في الشرق، بالذات بالذات تحت سفح الأهرامات.

كانت مصر وقتها بتستعين بعالم مصريات فرنسي اسمه مارييت، اللي كان طبيعي يسمع عن الطفل المعجزة، وانتهاز فرصة وجوده في فرنسا، وادى لجاستين نصين بالهيروغليفية، وكان مارييت لسه مكتشفهم في مصر طازة، وكانوا صعبين في الترجمة، بس هو ترجمهم في بحر أسبوع، كأسرع ترجمة حصلت لحد وقتها.

اللي كان مدهش مش بس سرعته في الترجمة، ولا إن عمره وقتها كان 21 سنة بس، لكن كمان إنه عمل كده من غير ما يزور مصر أصلًا، هو درس المصريات اعتمادًا على الآثار اللي كانت موجودة في فرنسا، خصوصًا في متحف اللوفر.

كان طبيعي بعد كده إنه يبقى مدرس للمصريات، ويناقش أول رسالة دكتوراه عن المصريات (الإيجبتولوجي) في جامعة السوربون بفرنسا، ده كان في الوقت اللي المصريين بيتعاملوا مع الآثار باعتبارها مساحيط، وفيه اللي بيعتبرها أصنام لازم نكسرهما.

لما ناقش الدكتوراه كان جاستين عنده 24 سنة، فعينوه مدرس مساعد، ولما بقى عنده 26 سنة عينوه أستاذ كرسي، وده منصب كبير، وبقت دروسه في علم المصريات ظاهرة في فرنسا، بيحضرها جمهور كبير كإنه جمهور مسرحية ناجحة، فكانت دايمًا كومبلت، ومفيش مكان لرجل.

أظن بعد كل ده ما يصحش إنه ما يجيش مصر، ويبدأ يحول علمه النظري لاكتشافات علمية وعملية، فجّه المحروسة، وأستاذه مارييت بيموت، اللي فعلاً مات بعد أسبوعين من وصوله، الكلام ده كان في يناير 1881.

مسك جاستين مدير مصلحة الآثار المصرية، اللي هي دار الآثار القديمة (الأنتكخانة) اللي اتسمى باسمها الشارع اللي بقى اسمه شارع محمود بسيوني، وعمل جاستين أول مطبعة هيروغليفية وعربية، وكان إلى جانب ده أمين المتحف المصري للآثار في بولاق، ووصل دخله من شغله في الآثار لألف جنيه سنويًا، وده رقم فلكي. وكان عايش في عوامة على حافة النيل اسمها عوامة «المنشية» اللي كانت من ممتلكات إدارة خدمة الآثار. بعدها أصدر الخديوي عباس حلمي الثاني فرمان بتعيينه مدير عموم المتاحف المصرية، ومدير عموم الآثار التاريخية.

كامل صاحبنا الحفريات اللي كان بيعملها مارييت في سقارة، ووسع نطاق البحث، وما نسيش أصله كعالم للغة الهيروغليفية، فكان مهتم بالمقابر اللي فيها نصوص فرعونية مهمة تثري اللغة الهيروغليفية. واكتشف آلاف الآثار فصورها وطبعها، وأنشأ المعهد الفرنسي للآثار الشرقية في القاهرة، وطبعًا كان أول مدير له، وتوسع المعهد في دراسة كل الآثار المصرية سواء إسلامية قبطية كله.

كمان اكتشف جاستين أكثر من 4 آلاف نص بالهيروغليفية واشتغل في معبد إدفو وأيدوس واستكمل أعمال إزالة الرمال عن أبو الهول، ما هو أبو الهول كان مدفون تحت الرملة سعادتك، والأجانب هما اللي طلعوه.

إنت أكيد زهقت من طول الكلام، والراجل عمل وسوى وعمل وسوى.

عندك حق، باختصار، الراجل ده كان جامد جدًّا، واكتشف آثار، كل واحد دفع جنيه علشان يبجي يشوفه، هو يستحق منه قرش.

كلنا نعرف اسم الراجل ده، وبنرده كثير، بس ما نعرفش عنه حاجة.

الراجل ده هو اللي إحنا عارفينه باسم «ماسبيرو»

أيوه، ماسبيرو، كورنيش النيل، اتحاد الإذاعة والتلفزيون.

محمد أفندي البيلي

محمد بدوي البيلي، سنة 1919 كان طالب في مدرسة الحقوق، ويكتب مقالات في جرنان الأهرام، فجه مرة كتب مقال عن ضرورة تأسيس بنك وطني يجمع مدخرات المصريين، ويخلي استثماراتهم جوه البلد.

آه والله

زي ما بقولك كده.

الفكرة أساسًا جت من طالب

وقتها كانت الاستثمارات المصرية بشكل رئيسي بتصب في البنك الأهلي، أو بنك كريدي فونسيه أو غيرهم من البنوك اللي بتصب بره بشكل مباشر، فبتدير الفلوس دي في استثمارات هناك، وده طبعًا بينمي الاقتصاد في أوربا، ويضعفه في مصر.

من مقال البيلي أفندي، انفجرت حملة صحفية واسعة لإنشاء البنك، ومصر وقتها كانت بتعيش أجواء ثورة 1919، والرغبة في الاستقلال عن بريطانيا، بالتالي كان أي حاجة تصب في أي استقلال كانت بتاكل.

تخيل إننا تحت الاحتلالات المختلفة من سقوط آخر أسرة فرعونية، وأديك بتشوف الاستقلال بيقترب منك، فكانت الكلمة نفسها ليها سحر، لدرجة ربطها بالحياة نفسها: «الاستقلال التام أو الموت الزؤام» الزؤام = السريع، وكان فيه حمى وسبق، وكانت كلمة «مصر» بتتهز فعلاً، دي الفترة اللي اتغنى فيها بلادي بلادي، وأنا المصري كريم العنصرين، وقوم يا مصري مصر دايمًا بتناديك، زمن.

المهم، استجابة للحملة الصحفية اللي بدأها البيلي، بدأ يحصل تشاورات ومكالمات بين أصحاب رءوس الأموال المصرية، ورجال الاقتصاد اللي هيجي ذكرهم بعدين، وكان على راس السلطة في مصر السلطان فؤاد الأول (اللي هيبقى الملك فؤاد) وهو كمان كان عايز الاستقلال، علشان بدال ما يبقى حاكم بلد محتل، يبقى حاكم بلد من بابها.

علشان كده في 5 إبريل 1920، صدر المرسوم السلطاني من سلطان مصر أحمد فؤاد، بتأسيس شركة مساهمة تدعى «بنك مصر»، (أيوه، هو بنك مصر الشهير) وكان البنك من مساهمين كلهم مصريين هم: أحمد مدحت يكن باشا، يوسف أصلان قطاوي باشا (من كبار الأعيان اليهود المصريين)، ومحمد طلعت حرب بيك (اللي اتنسب له البنك وارتبط باسمه) وعبد العظيم المصري بيك، وعبد الحميد السيوفي بيك، والطبيب فؤاد سلطان بيك، واسكندر مسيحة أفندي، وعباس بسيوني الخطيب أفندي.

ويلاحظ في تشكيل المؤسسين الأوائل إن فيهم أفندية وبهوات وباشوات، مسلمين ومسيحيين ويهود، طبيب واقتصادي وتاجر، وعلى كل لون يا باتيستا، وتوليفة من مصريين مختلفي المشارب والاتجاهات.

ارتباط البنك باسم طلعت حرب، راجع لإن الفكرة كانت عنده من قبلها، وسنة 1908 قرر طلعت حرب إنشاء شركة مالية سماها «شركة التعاون المالي»، كانت على قدها في الأعمال المصرفية. وأهم نشاطات الشركة كان هو تقديمها قروض كثير لأصحاب الأعمال الصغيرة في القاهرة، وأوكل طلعت حرب إلى صديقه دكتور فؤاد سلطان مهمة إدارتها، وتفرغ لما هو أكبر من هذه الشركة، وهو حملة الدعوة إلى تأسيس شركة مساهمة كبرى لبنك مصري، وده اتقابل مع حملة البيلي.

وقتها كان ممكن الاحتلال الإنجليزي يتصدى للموضوع، ويمنع تأسيس البنك، أو يمارس ضغوط، أو أي اختراع، بس هم ما عملوش كده، أولاً علشان ما يستفزوش المصريين الثائرين ويفتحوا على نفسهم جبهات تانية، لكن العامل الأهم كان تصورهم إن خبرات المصريين الاقتصادية ضعيفة، وقدرتهم على تجميع الأموال أضعف، وإن المشروع ده كبيره سنة وهيئفلس، واللي هايحطوا فيه فلوسهم هيخسروها (قريب نحتفل بمئويته).

في 10 مايو 1920 ألقى طلعت حرب خطبة عصماء في دار الأوبرا المصرية بمناسبة بدء أعمال بنك مصر، وكان أول مقر له في شارع الشيخ أبو السباع، وكتب المصريين ملحمة في العمل الجماعي، حاجة من النوادر كده، اللي مش بتكرر كثير في التاريخ للأسف.

محمد كريم

نفتح كتاب التاريخ

نقرأ أسامي

أسامي كثير، كثير، كثير

ما هو تاريخ وأحداث وحوادث وعصور وأمم وبشر

من كتر الأسماء بيدخلوا في بعض، وما نبقاش فاكرين، هو ده مين؟ بتاع إيه؟ الي عمل إيه؟

آه والله

زي ما بقولك كده.

علشان كده

مهم أوي أوي نفكر بعض، مهم ننعش ذاكرتنا بأسماء لبشر عملوا كل الي عليهم علشان حياة الي بعدهم، الي هو إحنا، تبقى أحسن، نجحوا ما نجحوش، مش ده المهم. المهم إنه قدموا كل الي يقدرنا يقدموه، حتى أرواحهم وحياتهم ما بنخلوش بيها، وما استنوش لاحمد ولا شكرانية.

من الناس العظيمة دي محمد كُرَيْم.

كُرَيْم إسكندراني جدع زي الإسكندرانية، عاش حياته في الأول زي كل الناس، ساعد والده في شغله، اشتغل قباني (بتاع موازين يعني) لقيوا إن عنده مهارات إدارية، مسكوه إدارة بعض الأمور، لحد ما وصل إنه بقى محافظ الإسكندرية.

كان ممكن كريم يعيش ويموت زي غيره من المحافظين الي جم قبله والي جم بعده، لولا إن القدر حطه في المواجهة، وحظه خلاه يبقى هو حاكم الثغر المصري وقت نزول نابليون بونابرت وحملته الفرنسية على مصر.

سيك من الجدل النظري والتنظيري حوالين أهمية الحملة، ودورها في التاريخ، وأي كلام ممكن يتقال، في النهاية: ده حاكم مدينة بتتعرض للاحتلال والغزو من قوات أجنبية، ده الي نفكر فيه.

ساعتها الناس مختلفين، فيه الي بيقاوم، وفيه الي يهرب، زي ناس تانيين قابلوا الحملة الفرنسية في القاهرة. كُرَيْم كان من الناس الي قرروا المواجهة لحد آخر نفس.

الله!

طب ما هو ده العادي والطبيعي، اللي ما يعملش كده هو اللي شاذ.

تمام

إنما مش ده اللي لفت نظري

اللي شد انتباهي، وخالني أحب الراجل ده، وأعتبره بطل فوق العادي، إنه لما انهزم، ووقعت المدينة في إيد المحتلين، وقع في الأسر.

بونابرت مش سهل

قرر إن يتبع معاه سياسة خبيثة شوية، لأ، شويتين

أطلق سراح كريم

ورجع له سيفه وسلاحه

وعينه حاكم تاني على المدينة

وحاول يقنعه إنه مش محتل، وإنه مش هينسى أبداً اللي اتعاونوا معاه.

كانت بانة خلاص إن نابليون حكم وتحكم ومحدث هيقدر يصده

كان ممكن كُريم يقول: وهي يعني جت علي؟ ما يقدر على القدرة إلا ربنا، أو أي كلام من اللي الناس بتصبر بيه نفسها، لكن كريم ما عملش كده.

اللي عمله إنه شكل فصائل لمقاومة المحتل، وكان بيروح الصحرا، ويكلم القبائل البدوية، ويقنعهم إن الناس دي محتلين، ولازم نقاومهم، ويجمع الرجالة على قد ما يقدر، ويقاوم. جايز مش هيقدر يخرجهم، لكن على الأقل على الأقل، ما تبقاش إقامة سعيدة وأوبن بوفيه للمحتلين في أرضنا.

نابليون كان راح القاهرة، واحتلها، وساب كليبر في الإسكندرية، كليبر ما قدرش يحافظ على وعد نابليون بإنه محدش يقرب من كُريم، الإزعاج كان واصل مداه، فاضطر إن يخوض حرب جديدة على محمد كريم ورجالته وقواته، لحد ما قبض عليه تاني، وبعته لنابليون.

نابليون لحد آخر لحظة، كان عنده أمل إن راس محمد كُريم تميل، واحد زي ده لو راسه مالت، هتميل وراه روس الشعب كله، بس طبعا ما حصلش.

أصدر نابليون أمر بإعدامه، وأجله شويتين، لكن في الآخر، مكش فيه فائدة، وسهم الله نفذ، وأعدم كريم.

أعدم، بس ما ماتش

ربنا يطوّل لنا في عمره

ونفضل نحكي حكايته لولادنا وولاد ولادنا إلى أبد الأبد

قولوا آمين.

محمود بدر الدين

أي إنسان عاقل يهيمه الناس والبلد والمجتمع، لازم يحسد كرة القدم، تقريباً ده أكثر نشاط ليه ناس بتابعه بشغف وحب، ولو فيه أكثر من الشغف والحب هاقلوله.

آه والله زي ما بقولك كده.

الواحدة بتشوف وتقابل ناس يبوقوا عاقلين كده وراسين، وأول ما تيجي سيرة النادي اللي بيشجعه يقلب طفل صغير.

دي حاجة كويسة مش وحشة، صحية مش مرضية.

مهم الإنسان يفرغ الشحنات السالبة والعصبية في نشاط زي ده، وفيه دراسات كتير اتعملت على تأثير الأنشطة اللي زي دي شجعت الدول إنها تهتم أكثر.

اللي بيهمّ واحدة زيي، هو إني أدور وافتش: إمتى الكورة في مصر بقى لها الشعبية دي، وفي أي ظروف؟ ومين اللي ساعد على انتشارها؟ وازاي؟

كل ما ادور يا اخويا، ألاقى اسم بيطلع لي، واستغرب إنه مش واخذ حقه حتى في الإعلام الرياضي. بنتكلم هنا عن الدكتور محمود بدر الدين.

الراجل ده من ساعة ما قالوا يا كورة، قرر إنه يعمل كل ما في وسعه، علشان اللعبة دي تنتشر. ليه؟

الحب يا عزيزي

هو بيحب الحاجة دي، فيديها، وهو مش متأكد هي كمان هتديه ولا لأ. يديها من وقته وجهده وتركيزه.

لو عندنا في كل مجال ناس بتحب مجالها زي ما محمود بدر الدين حب الكورة، كان زماناً بقينا نمرة واحد في كل حاجة.

المهم،

الراجل ده كان أستاذ جامعة، في كلية الفنون التطبيقية، وبishtغل في الكورة كهواية، كان لاعب وحكم، ولما اعتزل، قرر يكمل في اتحاد الكورة، ويعمل مشاريع لتطوير اللعبة، ونشر شعبيتها.

أول ما اتعملت الإذاعة المصرية، سنة 1934، كان د. محمود أول رياضي يجري على الإذاعة، علشان ينقلوا الماتشات.

أيوه يا دكتور، بس دي كورة، زي أفلام السيمبا كده، الناس بتشوفها مش بتسمعها، فاخترع حكاية «الوصف التفصيلي» للمباراة، التعبير اللي كلنا بنسمعه، ومش بنفكر هو جه منين.

من خلال الميكروفون، وانتو عارفين علاقتي بالميكروفون عاملة ازاي، قدر الراجل الهايل ده يربط ودان المصريين بالملاعب، وفي خلال سنين بسيطة كان كل نادي له مشجعين في كل مكان فيكي يا مصر، تخيل حضرتك، ممكن يكون فيه مواطن، عمره ما شاف ملعب كورة، لكنه أهلاوي صميم، أو زملاوي عتيد، أو إسماعيلوي، مصراوي، اتحاداوي، وكل الأندية.

يسكت الدكتور محمود؟

أبدًا

لازم الكبيرة بقى

ننظم دوري عام لكرة القدم في كل مصر.

كان قبلها الكاس، وحسب ما أنا فاهمة، دي بطولة صغيرة، عايزين بقى حاجة تخلي الأهلي والزمالك (اللي كان اسمه وقتها نادي فاروق) يروحوا يلعبوا في كافة أرجاء القطر المصري، والناس تشوف اللاعبة.

أكثر من 8 سنين، الدكتور محمود بيعمل مشروع الدوري، ويقدمه للملك، ويترفض، لإن المشروع غير قابل للتنفيذ، فيرجع تاني، ويجيب اللاعبة اللي احترفت في بريطانيا، زي كابتن لطيف، علشان يشرحوا إزاي الدوري الإنجليزي بيتنظم، لإن تنظيم الدوري ده مش حاجة سهلة خالص، أي حد بينظم إيفينتات يعرف إحنا بتتكلم عن إيه.

في الآخر، اتقبل المشروع، واتلعب أول دوري مصري سنة 1948، واستمر لحد يومنا هذا، واتطور، وكبر، وأندية راحت وأندية جت، وكانت الكورة، جنب الفن، سفير مصر في المنطقة وللعالم كله.

ومرت الأيام.

والناس نسيت اسم الدكتور محمود.

لكن اللي عمله لسه باقي.

آه والله زي ما بقولكوا كده.

مصر في روسيا

مصر في كاس العالم

مصر في مونديال روسيا 2018

مصر ترجع ثاني واسمها يتنده، وعلمها يرفرف، وسلامها الوطني يتعزف في أكبر حدث رياضي عالمي.

يمكن الكلام ده بيان كلام في الكورة

إنها لا

ده كلام في السياسة والاقتصاد والفلسفة وعلم النفس كمان

آه والله

زي ما بقولك كده.

كاس العالم لكرة القدم، البطولة العالمية اللي بتتلعب بقاها 88 سنة، مش حدث كروي وخلاص.

الأحداث اللي زي دي بتتجاوز مجالها بكثير، زيتها زي جايزة نوبل، وجايزة الأوسكار، والأولمبياد الرياضية، وميس يونيفرسال، وغيره وغيره من الأنشطة اللي تبان ترفيهية أو مالهاش لازمة.

لو اتكلمنا سياسة، يبقى بتتكلم عن وضع على الخريطة الدولية، ياما دول محدش سمع عنها إلا في بطولات رياضية، صحيح الحمد لله مصر مش كده، ومصر أم الدنيا فعلاً، وسبعتلاف سنة حضارة، لكن كمان الصورة الحالية توصيلها مهم.

مثلاً من ساعة ما بقينا ملوك العالم في الأسكواش، وبقي المصنف الأول عالمياً من مصر، بدأ اللاعبين دول يبقوا سفراء لمصر في كل مكان، وساعدوا كثير في توصيل صورة مصر لأماكن كثيرة، ولناس كانوا متخيلين إن مصر يعني الشرق والهرم والجمل ودمتم.

لو اتكلمنا اقتصاد، فاحنا في أكبر سوق عالمي لأهم لعبة على سطح الكوكب، لعبة ليها متابعين بالمليارات، وانت من هنا لحد ما يتلعب كاس العالم تحت المنظار مع الدول الثانية اللي ربنا كرمها وصعدت معاك، وفرصة لتسويق اللاعبين، وتنبيه العالم إنك عندك هنا مكان ينفع يبقى مصدر للاعبية.

هقول لك رقم عالمشي.

عارف حضرتك جوايز بطولة دوري الأبطال قد إيه؟

مصطفى عبدالرازق

طول الوقت كان عندنا شيوخ مستنيرين

طول الوقت كانوا بيزقوا البلد دي لقدام ولفوق

طول الوقت كانوا مثقفين فنانيين يقدررو المواهب ويدعموها

آه والله

زي ما بقولك كده.

ومن الناس دول الشيخ مصطفى عبد الرازق.

عبد الرازق من الناس اللي ينفع تتكلم عنه في خمسمية سياق، وألف قضية، بس احب ابدأ الكلام عنه من باب أم كلثوم.

لما الست جت من طهاي الزهايرة، كان الموضوع صعب عليها، المدينة الكبيرة المتوحشة، المستعدة لافتراس الفلاحة البسيطة، اللي ما حيلتهاش غير صوتها، ومع إن صوتها ده مش شوية، بس مش كفاية. سيبك من الإشاعات والردالة والمنافسين وولاد الكار وكل متاعب المهنة التقليدية، أكبر مشاكل أم كلثوم كانت في «الصيغة»، إيه الصيغة اللي ممكن تقدم بيها نفسها، وإيه الشخصية اللي تكونها، والمشروع اللي مصر محتاجاه وقتها.

كل ده فيه ناس كثير ساهمت في تظيطه عند أم كلثوم من أول أبو العلا محمد لحد أصغر عازف في فرقته، لكن نصيب الأسد كان لمصطفى عبد الرازق، الشيخ الأزهري اللي كان لسه راجع من السوربون وليون، وداخل معركة التحديث اللي خاضتها مصر بعد ثورة 19، داخلها بكل ما أوتي من علم وفكر وفن وحساسية.

تأثير عبد الرازق على أم كلثوم لا يقدر، هو اللي نقلها من حيث الشكل، ومصادر المعرفة، والتبصير بالمدينة وأهميتها، غير إنه دافع عنها قولاً وكتابة، باختصار هو اللي اداها ملامحها، وبنى لها الأساس.

حماس عبد الرازق لأم كلثوم، مكنش حماس سمّيج لمطربة، وإنما جزء من مشروع كامل للنهضة كان يبجله بيه، كان فيه رغبة حقيقية في تجديد الخطاب الديني، رغبة عملية على الأرض، مش في المؤتمرات.

الشيخ مصطفى خد من محمد عبده، ومن اللي اتعلمه في فرنسا، واشتغل بنشاط في الصحافة والسياسة والشغل الأكاديمي، يعني مثلاً مثلاً كان أستاذ في كلية الآداب أول ما اتعملت، وكان أستاذ فلسفة، ومن

الناس اللي اتعلمت على إيديه، وكان ليه تأثير كبير عليهم نجيب محفوظ بجلالة قدره.

وكان جوهر المشروع هو السؤال: إزاي مصر تقدر تدخل العصر الحديث؟ مش من الناحية الشكلية، أصلك دي سهلة، برلمان ودستور وشوية قوانين وانتخابات والسلام عليكم ورحمة الله وبركاته، بس كل ده يفضل حاجة صورية، لو ما استندش للثقافة.

مصطفى عبد الرازق هو الأخ الأكبر والمعلم لعلي عبد الرازق، صاحب الكتاب الشهير «الإسلام وأصول الحكم»، وكان معني أكثر حاجة بالثورة الاجتماعية، وشايف إن مصدر الأخلاق اجتماعي، لا هو علمي ولا فني ولا أدبي، وكان بيكتب في مجلة اسمها «السفور»، ويشجع على خلع اليشمك والبرقع والحاجات دي، وله معارك على أكثر من مستوى.

مصطفى تولى وزارة الأوقاف 8 مرات، وخذ الباشوية سنة 1941، لحد ما بقى شيخ الأزهر نفسه سنة 1945، فتنازل عن الباشوية، وفضل شيخ الأزهر لحد ما اتوفى سنة 1947.

تخيل، مصر عدى عليها وقت، كان شيخ الأزهر هو أحد صناع أهم مطربة في تاريخ مصر
والله ده حصل

حصل، وما عادش ممكن يحصل، لدرجة إننا مضطرين نحلف إنه حصل.

آه والله زي ما بقولك كده.

والنعمة حصل

معلومة ستدهشك

10 معلومات عن فلان الفلاني

الثالثة ستدهشك

37 حقيقة عن إعلان العلاني

رقم 23 صادمة

18 مش عارفة إيه عن مش عارف مين

وكله دهشة وصدمة ومفاجآت وانبهارات

وهكذا بنتهك كل يوم بعضنا من غير إحم ولا دستور

آه والله

زي ما بقولك كده.

من عيوب السوشيال ميديا، مع الاعتراف بإن ليها مزايا، إن خلت أي حد يقدر ينشر أي معلومة عن أي حد من غير إذن، سواء كانت صحيحة أو غلط، عامة ولا شخصية، حلوة ولا ملتوتة، وكل ما كانت «أسخن» كل ما جابت ترافيك، تبقى مطلوبة أكثر، للأسف.

في السنين الأخيرة مثلاً

بقي فيه ظاهرة

تفقع المرارة

فلان الفلاني شخصية عامة يتوفاه الله، فتلاقي جحافل الكاميرات رايحة تصور العزاء، اللي هو أصلاً مش مفهوم ليه، ده كان زمان خط أحمر بجد، كان فيه جلال وهيبة للموقف.

عمرنا ما شفنا الأستاذ مصطفى أمين مثلاً باعت مصور يصور جنازة فنان رحل، مع إن الأستاذ مصطفى، وكل أخبار اليوم، المؤسسة العريقة، كانت مشهورة بالبحث عن الأحداث والتفاصيل المثيرة، والدخول في كواليس الفن.

إنما كواليس الفن، وفي حدود وأطر.

عمرى ما شفت صور من جنازة فنان إلا الأيام دي.

مع إني يعني، يقولوا، إني مهتمة أوي بالواجب، وباروح المناسبات الاجتماعية.
عمري ما شفت مصور ناطط في بق ابن الراحل ولا بنته، وحريص إنه يجيب له صور وهو منهار أو
بيبكي.

ألا هو بتصورها ليه؟

دا مفيد في إيه؟

بهم القارئ ولا مستخدم الإنترنت في إيه؟

وازاي تخلي لقطة زي دي تلف على كل الناس، وتفضل، وتسبب أذى ووجع أبدي لصاحبها، كل ما
يشوفها على مدار السنين؟

للدراجادي مفيش أي رحمة؟

مش بس العزاءات والجنازات

مليون مناسبة ومناسبة

أمور شخصية تمامًا

فرح، أزمة، أي حاجة مش من حق حد يفتش فيها

عارف يعني إيه تعيش تتلفت وراك وقدامك

خايف تروح مناسبة

خايف حتى تظهر في الشارع، تقع غضب عنك، صورتك تبقى موضوع السوشيال ميديا.

يجوز حضرتك و حضرتك تقولوا إن دي مشكلة الشخصيات العامة والمشاهير

أبدًا أبدًا

كل حد فينا للأسف، بقي مرشح يبقى نجم اليوم، كل يوم بنشوف صور وفيديوهات ومعلومات بتتنشر
من غير إذن أصحابها، وفجأة تبقى زبون الليلة.

أذكر لما كانت تحصل حادثة

ما كناش نعرف حتى اسم صاحب الموضوع

يعني في الثمانينات والتسعينات كان فيه قضيتين هزوا مصر

قضية فتاة العتبة

وقضية فتاة المعادي

الدنيا اتقلبت ساعتها

واتعمل أفلام وروايات وقصص

لكن المعاصرين للحكايات ممكن يفتكروا معايا:

هل عرفنا اسم فتاة العتبة؟ اسم فتاة المعادي؟

هل صورهم غرقت الجرايد والمجلات؟

لأ

ليه؟

من قلة المصورين؟

إطلاقاً

بس كان فيه حدود

أصلاً مين اللي هيقاله نفس يخترق الناس بالشكل ده؟

هل تعلم عزيزي؟ هل تعلمين عزيزتي؟

وخليني من نفسي أقول لكم معلومة تدهشكم

إن شفيقة ومتولي، مكنش اسمهم شفيقة ومتولي

وإن الشاعر الشعبي

اللي قرر يعمل الحكاية دي موال علشان العبرة

غير الأسماء الأصلية علشان أهاليهم

وعلشان محدش يخترق خصوصيتهم

كان فعل فطري من شاعر بدائي

بس فطرة سليمة

لو كانوا ظهوروا دلوقتي

كان هيبقى إيه الحال؟

37 معلومة لا تعرفها عن شفيقة

شاهد قبل الحذف

صور حصرية لسكينة متولي

يا اختيبي

مکناش خلصنا
آه والله
زي ما بقولك كده.

مفيدة وتوحيدة

والله العظيم، والله العظيم تاني، وما لك عليّ حلفان، أنا باتضايق أوي لما الاقي أغلبنا مش عارفين مفيدة وتوحيدة، ولا مسيرتهم العظيمة على كل المستويات.

مين مفيدة وتوحيدة؟

دول مفيدة عبد الرحمن، أول محامية مصرية، وأختها توحيدة عبد الرحمن أول طبيبة تتعين في الحكومة المصرية، وتاني طبيبة مصرية على الإطلاق بعد الدكتورة هيلانة سيداروس، أختين من أسرة مصرية كانت عايشة في الدرب الأحمر، الحي المصري العتيق العريق، اللي كان حي الأفندية، ومنهم عبد الرحمن أفندي محمد والد مفيدة وتوحيدة.

الراجل العظيم ده، اللي كان خطاط وصاحب مطبعة، وكتب بإيده المصحف الشريف 19 مرة، الراجل ده من تسعين سنة وأكثر قرر يعلم بناته، ويوصل بيهم في التعليم لأعلى المستويات، لدرجة إنه بعث البنت الكبيرة توحيدة في بعثة لبريطانيا علشان تدرس الطب، آه والله زي ما بقولك كده، بريطانيا حتة واحدة. كان نفسه أختها الصغيرة مفيدة تدرس الطب زي أختها، لكنه ما فرضش عليها الطريق، وسابها تختار، هي اختارت تتجوز، وتكمل في دراسة الحقوق، فاتجوزت اللي اختارته، ودرست الحقوق وبقث أول محامية مصرية.

بمناسبة الجواز: الأختين مفيدة وتوحيدة اتجوزوا أخين هم محمد ومحمود عبد اللطيف، محمود عبد اللطيف جوز توحيدة، كان مستشار كبير، وتقريباً كده درجته تعادل نائب وزير العدل، وكان القاضي اللي حكم في واحدة من أهم قضايا الخمسينات، الشهيرة باسم الجاسوسية الكبرى، لكنه وقف جنب وفي ظهر زوجته علشان تأدي مسيرتها الطبية.

لما كانوا مخطوبين، المستشار محمود سافر بريطانيا في رحلة مخصوص، علشان يشوف الأماكن اللي كانت عايشة فيها خطيبته، علشان لما يتجوزوا، وتتكلم عن أهم سنين عمرها، اللي قضتها في إنجلترا، يكون عايش معاها ذكرياتها. ده سيادة المستشار اللي كانت كلمته في المحكمة بتهز دول عظمى.

لما مفيدة اتقدمت لكلية الحقوق، علشان تبقى طالبة فيها، عميد الكلية اشترط موافقة جوزها باعتبارها زوجة وأم، الحقيقة إن العميد كان مستغرب إن فيه واحدة ست هتدرس القانون، وكان السؤال: هتعمل بيها إيه؟ فيه واحدة ست هترافع في محكمة؟

محمد عبد اللطيف جوز مفيدة، قابل العميد، ومضى له تعهدات، واتخرجت، وارتفعت في المحاكم، مش بس كده، دي فتحت مكتب مستقل، وجوزها كان أول داعم ليها، ووصلت إنها تولت أرفع المناصب محلياً ودولياً، كفاية بس أقول لك إنها كانت رئيس الاتحاد الدولي للمحاميات والقانونيات.

في وسط ده، مفيدة وتوحيدة، كل منهم كونت أسرة، وخلفوا أولاد: مفيدة خمسة، وتوحيدة سبعة، هما كانوا قبل تنظيم الأسرة، إنما كل واحدة منهم قدرت تربي أولادها، وتعلمهم أحسن تعليم، مش بس من الناحية العلمية، لكن كمان كأسرة بكل معاني الأسرة المحترمة.

مفيدة وتوحيدة مش رقم، مش حكاية المحامية رقم واحد والطبيبة رقم اتنين، إنما كانوا نموذج للي نفسنا كلنا نشوفه ونسمع عنه، بنتين بقوا سيدتين، عاشوا حياة مديدة من غير ما يسعوا لأضواء أو شهرة أو يستفيدوا شخصياً أكثر من إنهم يعيشوا حياة بسيطة.

عندي عنهم حكايات وحكايات، أتمنى إنكم تدوروا عن سيرتهم ومسيرتهم، وأوعدكم كل حرف هتقروه هتقولوا: الله، الحمد لله إن الكلام ده حصل في مصر يوم من الأيام.

مواجهة المخاوف

السنة اللي فاتت افتتحت الصين أعلى جسر زجاجي في العالم. آه والله زي ما بقولكوا كده، جسر بالكامل من الزجاج الشفاف، مدعم بالكوابيل الصلب ويربط بين جبلين بينهم وادي عميق جدًّا، في مدينة زانغياجي الصينية.

حاجة كده معجزة معمارية صيني، وأكد مننا كثير شافوا فيديوهات للناس اللي بتحاول تعدي الجسر ده، ويصوتوا يا عيني من رهاب المرتفعات اللي عندهم، ناس تصوت وناس تصرخ وناس ركبها تلف على بعض من الرعب، الموضوع بيوصل لناس تترمي على ضهرها من الخوف، واللي معاهم يجروهم جر على الكوبري وهما بيصوتوا يا ولداه من الخوف. عالم تانية بياخدوا السكة حبي على ركايم وهما بيعيطوا بالدموع!!

كل ما اشوف الفيديوهات دي والي ينزل عليا، أبقى اتنطط في مكاني، وانا بقول: عليكم من ده بإيه؟! ماتخليكوا بقيمتكم!! ما انتوا عارفين إن عندكم خوف مرضي من الأماكن المرتفعة، تروحوا عند ودن القرد ليه طاه؟؟

إلا واقعد كده وافكر في الكلام تاني واقول لنفسي لأ يا شيخه، الناس دي جدعان!! آه والنبي زي ما بقولكوا كده جدعان، جدعان وجدعان أوي كمان! بتسألوا إزاي؟؟ أقولكم أنا. .

الناس دي قررت تواجه أقصى مخاوفها! زي ما بقولكوا كده، قرروا يواجهوا أكثر حاجة بيتربعوا منها، وجهًا لوجه، يروحوا المرحلة الأخيرة ويجاربوا الوحش مباشرة.

الناس دي قالت هي موة ولا أكثر، الناس دي تعبت من فكرة انهم مرعوبين من حاجة معينة وقرروا ان كفاية كده هنعملها وزي ما تيجي تيجي!

حد فينا جرب يعمل كده؟؟

حدش فينا قرر يواجه أكبر مخاوفه؟

حد قرر يلعب مع الأسد؟

بالمناسبة كمان الموضوع محتاج شيء كده من التوازن، أصلها شعرة رفيعة ما بين مواجهة المخاوف، والغشومية والتهور. قوم لازم نعرف الفرق علشان ما حدش يروح يولع في بيتهم اكمنه قرر يواجه خوفه من

الكبريت!!

الفكرة كلها في إنك لما بتحط فكرة إن الحاجة دي صعب تعملها، الصعب يتحول لـ (ماينفعش) والماينفعش مع الوقت تبقى (ماقدرش) والماقدرش تبقى (مستحيل).

والمستحيل تبقى عقدة وشنيطة، وتعيش عمرك كله مرعوب من مجرد فكرة إنت أصلاً ماجربتش بتعرف تعملها ولا لا!

كام واحد اتربع من فكرة العمل الخاص وفضل أمان الوظيفة ومرتب آخر الشهر؟

كام واحد قرر إنه مالوش في الرياضة وقرر يكمل تربية في كرشه وجنابه من باب الأمان الدهني ولا مرمطة حرق السعرات؟

كام واحد استمر في دراسة لا بيحبها ولا قادر يتفوق فيها، من باب أهو أيام وبتعدي وبتنجح وكده رضا؟

كام واحد خاف حتى يجرب هواية ولا حرفة ولا أكلة حتى من باب إن (مش هاعرف) أو (هاتبوظ مني) أو (مش متعود عليها)؟

كام واحد ها؟

أقولكم؟

كلنا! آه بجد والله.

كلنا ضيعنا فرص وفوتنا حاجات، وكلنا راح مننا وقت كثير في إننا مانحاولش حتى.

بس الأكيد إن اللي خدوا قرار المواجهة. . . كسبوا

أيوه كسبوا. كسبوا على الأقل كسر الحاجز اللي بينهم وبين الحاجات اللي طول عمرهم مرعوبين منها!

بصوا اختاروا كام حاجة كده وقرروا مواجهتها وجربوا شرف المحاولة.

هتفرق والله هتفرق.

موزارت

فولفغانغ أماديوس موتسارت. . . مواليد سالزبورغ النمسا لأسرة فقيرة جدًا. الأب كان موسيقي في الكنيسة. بسبب الفقر ماتعالمش من أمراض الرئة ولا الكبد اللي أصابته وهو طفل وبسبب سوء التغذية والشغل المتواصل في طفولته وعدم النوم اضطربت هرمونات نموه ومازادش طوله عن 150 سم.

موزارت ماتعلمش أي شكل من أشكال التعليم، أبوه بس علمه المزيكا، والواد النبي حارسه ماخييش ظن ابوه. من وهو عنده أربع سنين كان بيعزف ع الكمان والفلوت والكيورد ويحفظ مقطوعات كاملة بمجرد ما يسمعها من أول مرة ويعزفها على آلات مختلفة رغم إنه يكون سمعها بألة تانية!!
قرد صغنين والنبي زي ما بقولكوا كده.

بعدها بسنة وهو عنده خمس سنين يلف أوروبا مع أبوه في رحلة عمل. والناس تتفرج عليه زي العجبة كده، عيل شبر واقطع عبقرى مزيكا، لأ وكان ابتدى يألف مقطوعات بسيطة ويسمّعها لابوه وكان ابوه يكتب وراه كل اللي بيألفه.

في عمر الـ 7 سنين يقود موزار أوركسترا سيمفوني لوحده وشوف انت بأه. . . لما مقصوف رقبة سبع سنين يقف على مسرح يمسك العصاية إياها ويقود أوركسترا ملكي كامل. أوروبا طبعًا كلها اتوهمت بالعبقري الصغير.

بمرور الزمن بنلاقي إنتاج موزارت الغزير بلا حدود ويفوق سنين عمره بمراحل.

عزف وهو عمره 10 سنين le Miserere d'Allegri وهي مصنفة كواحدة من أصعب المقطوعات الموسيقية ويستغرق عزفها أكثر من ربع ساعة ومكانش سمعها غير مرة واحدة.

العبقرية دي ماوصلتوش أبدًا انه يبقى غني أو حتى يملك قوت يومه، عاش تعيس ومريض وحالته كرب.

أكثر من 200 عمل من كافة أشكال الموسيقى ساهم وراه موزارت اللي مات وهو ماكملش 35 سنة.
الراجل إلي صورته على العملات النمساوية، وله مطار باسمه وصوره بتزين أكبر وأهم شوارع النمسا، مالوش مقبرة معروفة لأنه كان غلبان اتدفن في مقبرة جماعية بدون شاهد يحمل اسمه.
قصة موزارت لو كان لها عنوان هيبقى الخلود.

مهما كان الشخص تعيس في حياته فموهبتة هتمنحه الخلود للأبد. وهياخذ التكريم الحقيقي والمكانة اللي يستاهلها في الوقت المناسب حتى لو بعد حياته كلها ما تخلص.

طب خدوا الزتونة بأه بتاعة الموضوع. مشكوك في إن سبب موت موزارت هو ملحن زميل كان بيغير منه بسبب عبقريته، عدوك ابن كارك. راحله وسقاه السم على إنه دوا للأمراضه ولأنه عرضه بالمجان، الراجل يا ولداه راح مأربعه وزاحه -العيامر يا ولداه- وبعد ما مات الجدع يا عين امه، عاش الملحن الثاني ده لعمر الـ 80 وقال وهو بيموت: قتلته علشان الناس تنساه، بس هو عاش وهيعيش أكثر مني ولو جابولي 10 أعمار فوق عمري.

القصد: الخلود نصيب أي عبقرى. البقاء مصير كل حد مؤمن باللي بيعمله. كل اللي بنعمله في حياتنا بيتحسب علينا ولينا، ونصيبك هايصيبك بس انت وبختك يا سعدك لو جاك على حياة عينك. وخليك واثق إن كله مكتوب في أجندتك وهيتردلك، طيب هيتردلك، رضا هيقعدلك. ماتستهونوش بقدراتكم وبمواهبكم وادوها فرصتها وسط دوشة يومكم، يمكن الله أعلم تكون هي تذكرة الخلود.

آه والنبي زي ما بقولكوا كده

مينا هاوس

بذمتك ودينك يا بيه، بذمتك ودينك يا هانم، وأنا راضية ذمتكم ودينكم
لو فيه أي بلد في العالم، عندها مكان زي اللي هاحكي لك عنه دلوقتي، كان ممكن تكسب من وراه كام؟
ملايين الدولارات وحياتك،
آه والله

زي ما بقولك كده.

ملايين الدولارات سنويًا.

نشوف الأول وبعدين نحكم:

أيام الخديوي إسماعيل، كان أفندينا بيروح يصطاد في الصحرا، فجھ اختار حته بتاعة 40 فدان كده،
يعملها استراحة من رحلات الصيد، وبالمره يعمل فيها اللقاءات، ما هي الأرض كلها كانت بتاعته، يتصرف
فيها زي ما هو عايز. الاستراحة دي بناها سنة 1869، في نفس سنة افتتاح قناة السويس.

بعدها الخديوي رستأ المكان، وظبطه ووسعه تاني، وظبط شارع الهرم اللي بيودي عليه، وزرع فيه
حاجات، وخلاه واحة في قلب الصحرا، بس حضرتك عارف إن الدنيا مش بتمشي على كيف النفر مننا،
والحياة قلابه، لا بتخلي الراكب راكب، ولا بتسيب الماشي ماشي.

غرق أخونا إسماعيل في الديون، فراح ابنه قرر سنة 1883 يبيع القصر اللي اتبنى بالواحة اللي نشأت
حواليه وباعه فعلاً لراجل إنجليزي ومراته كانوا جاين يقضوا شهر العسل، فالعريس كان عايز يبهر
العروسة بتاعته، فاشترى لها عزبة تطل على الأهرامات شخصيًا، فيه حاجة زي كده في العالم؟

الراجل والست ولاد المحظوظة دول اسمهم فريدريك وجيسي، وهما اللي سمو القصر ده بالاسم اللي
هنعرفه بيه طول عمره «مينا هاوس»، وسبحان الله يا أخي الإنجليز لما حبوا يختاروا له إسم، اختاروا اسم
فرعوني «مينا» على اسم مينا موحد القطرين، دلوقتي اسم مينا بيعني لنا إحنا إيه

ياللا

بعد سنتين قدمت الست جيسي مع الأفندي فريدريك، والانبهار راح، وتلاقيهم خلفوا لهم حته عيل،
وهو طلع له كرش، وهي بقت ريجتها بصل فراخوا بايعين البيت لجوز إنجليز تانيين، سنة 1885، والجوز

الجديد كانوا فاهمين الي فيها لانهم ما اشترو هوش للاستخدام الشخصي، وإنما عملوه فندق، بس حافظوا على الاسم، وافتتحوه للجمهور في السنة الي بعدها 1886.

لما قامت الحرب العالمية الأولى، حطت القوات الأسترالية والنيوزلندية إيدها عليه، كانوا بيستخدموه في أغراض الحرب، وأواخر الحرب خلوه مستشفى رسمي، وبعدها عدت فترة كده سقطت من تاريخ الفندق، لحد ما جات الحرب العالمية الثانية، وكان لازم تشرشل يتقابل مع روزفلت، مع الراجل بتاع الصين الي مش عارفه أقول اسمه، في اجتماع شهير، معروف باسم اجتماع القاهرة، واتقابلوا في المينا هاوس.

كل ده وملكية الفندق تابعة للراجل الإنجليزي ومراته، الي باعوه قبل يوليو لشركة مصر للفنادق، الي اشترت أكثر من فندق، لحد ما قامت ثورة يوليو، فطبعًا الفندق اتأمم، وفضل طول فترة ناصر ملك للدولة. في السبعينات اتباع لشركة هندية، هي الي مالكاها لحد دلوقتي، ولما اتعمل مؤتمر تحضيرى لكامب ديفيد، اتعمل في المينا هاوس.

شفت كم الشخصيات والأحداث التاريخية العالمية الي مرت على المكان ده؟

بص، أنا مش هاطول عليك، بس دور كده في جوجل على أسماء نزلاء فندق مينا هاوس في التاريخ، وانت تتخض، والمصحف تتخض، أباطرة.. ملوك.. رؤساء.. مسئولين.. فنانيين.. نجوم من كل صنف ولون، ولأ أقول لك، شوف الأفلام العربية والأجنبية الي اتصورت فيه.

بعد ما تشوف ابقى تعالى قول لي حاسس بإيه غير الحسرة؟

آه والله

زي ما بقولك كده.

الحسرة.



Table of Contents

1. [مقدمة](#)
2. [يارب كتر أعيادنا](#)
3. [وشك حلو يا لطيف](#)
4. [والله زمان يا سلاحي](#)
5. [هزيمة بألف انتصار](#)
6. [نبوة موسى](#)
7. [نجيب باشا محفوظ](#)
8. [حكاية زلعة العسل](#)
9. [حرب أكتوبر](#)
10. [مارس 16](#)
11. [سنة سينما 120](#)
12. [أبو قريش وأبو قريشين](#)
13. [أمال فهمي](#)
14. [أمينة السعيد](#)
15. [ترجمة أفلام السينما](#)
16. [أهلي وزمالك](#)
17. [أول عالمة ذرة مصرية](#)
18. [أول نشيد وطني](#)
19. [إحسان شريف](#)
20. [أبلة نظيرة](#)
21. [أخو الرئيس](#)
22. [اسلمي يا مصر](#)
23. [إعلانات بير السلم](#)
24. [الأخلاق](#)
25. [صباح الأمل](#)
26. [الأباطية](#)
27. [الأحلام المؤجلة](#)
28. [الاستمطار](#)
29. [الأوبرج](#)
30. [البداية الجديدة](#)
31. [البطل أحمد عبد العزيز](#)
32. [البطل عبد الرؤوف جمعة](#)
33. [التربية](#)
34. [الترفيه](#)
35. [التسويق](#)
36. [التكايا](#)
37. [التنوع](#)
38. [عائشة التيمورية](#)
39. [ثقب أسود لكل مواطن](#)
40. [الجيرتي](#)
41. [جبة جنان](#)
42. [الدمرداش ومراته](#)

91. [شارلي شابلين](#)
92. [جير رشييد](#)
93. [شيكلاتة](#)
94. [صالح سليم](#)
95. [صراحة](#)
96. [صوت العرب من القاهرة](#)
97. [صيدناوي](#)
98. [عصمت الإسكندراني](#)
99. [عماد الدين](#)
100. [فأر السبئية](#)
101. [فتى الشاشة الأول](#)
102. [فرقة رضا](#)
103. [وصايا قدماء المصريين](#)
104. [كلب البحر](#)
105. [كلنا كده غاوزين صورة](#)
106. [كويري ستانلي](#)
107. [أول ست تطير بجد](#)
108. [الست هدى](#)
109. [ماسبيرو](#)
110. [محمد أفندي البيلي](#)
111. [محمد كريم](#)
112. [محمود بدر الدين](#)
113. [مصر في روسيا](#)
114. [مصطفى عبدالرازق](#)
115. [معلومة ستدهشك](#)
116. [مفيدة وتوجيه](#)
117. [مواجهة المخاوف](#)
118. [موزارت](#)
119. [ميناهويس](#)

Landmarks

1. [Cover](#)